


عبير جمال الدين

رواية

الطبعة
الثانية



يوم

من

غلبني



دار النشر



الطبعة الثانية:
1440 هـ / 2018 م

اسم الكتاب: يوم من غلبي
المؤلف: عبير جمال الدين
موضوع الكتاب: أدب ساخر
عدد الصفحات: 304 صفحة
عدد الملازم: 19 ملزمة
مقاس الكتاب: 21 x 14
عدد الطبعات: الطبعة الأولى
رقم الإيداع: 2018 / 22635
التقييم الدولي: 1 - 724 - 278 - 977 - 978
ISBN:

التوزيع والنشر:

القاهرة - جمهورية مصر العربية
هاتف: 01152806533 - 01012355714
E-mail: elbasheer.marketing@gmail.com
elbasheernashr@gmail.com

كتابنا
للثقافة والعلوم

جميع الحقوق محفوظة

كتابنا
للثقافة والعلوم

جميع حقوق الطبع والنسخ والترجمة محفوظة لدار
البشير للثقافة والعلوم. حسب قوانين الملكية الفكرية،
ولا يجوز نسخ أو طبع أو احتذاء أو إعادة نشر أية معلومات
أو صور من هذا الكتاب إلا بإذن خطي من الناشر

©copyrights

عبير جمال الدين

يوم
من غلبي

رواية

دار البشير
للثقافة والعلوم

الإهداء

إلى روح زوجي الحبيب الغالي
لم أنس دعمك ومساندتك الرائعة لي، ولن أنسى
ثقتك في قلبي وقت أن شكك فيه بعضهم، ودوماً
سأتذكر دفعك بي إلى الأمام.
الحياة بدونك يا عبد الرؤوف فقدت معناها،
وبعض منك (مريم وليلى) أعيش، ولأجلهما أتمسك
بالحياة، حتى يحقق ما كنا نتمناه لهما..
رحمك الله يا توأم الزوج.

كَلِمَاتُ الشَّيْرِ
لِلثَّقَافَةِ وَالْعُلُومِ

المقدمة

لن تعرف حقيقة ما يدور من حولك في الحياة إلا
إذا توقفت قليلاً كل فترة، بحثاً عن نفسك التائهة

وسط الأشياء الكثيرة المحيطة بك.

ولن تعيش في سلام وراحة بال، ما لم ترسل إلى
العالم الخارجي من داخل نفسك سلاماً لتشاركه
بجزء منك.

ولن تستمتع بوجودك، ما لم تمتع من حولك في
الحياة بنصيبك من المتعة.

ابحث عن راحة الآخرين أثناء بحثك عن راحتك،
وكن جزءاً من نسيج الحياة
ولا تكن نسيجاً من جزء في الحياة!

عبير جمال الدين

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

كلاكيت أول مرة

(إيناس ماهر)

يغمر الحجرة ضوءً باهر، أسحب نفسي من تحت الغطاء،
ورأسي تئنُّ من صداعٍ شديدٍ، أركّز بصري في اتجاه باب الغرفة،....

.....

أجلس في محاولةٍ لاستجماع ما الوقت الآن؟ وما الزمن الذي
أعيشه حاليًّا؟! فقد نمتُ نومًا عميقًا، أنظر إلى الساعة لا أستطيع
رؤية شيء، وما زالت غشاوةُ النوم تغطي عيني.....

.....

لقد كانت الشمس حانيةً على غير عاداتها في هذا الوقت من
العام، فأرسلت بعضًا منها، فتسلل داخل بيتي من خلال نوافذه
الزجاجية؛ فامتلاً المكان بنورها وبدفئها، وببريق انعكاساتها
المتألئ، فحملتُ قهوتي السوداء المنعشة، وقد غمرتني رائحتها
النفّاذة المحبّبة إلى قلبي، وتوجّهتُ - مستبشرةً ببداية اليوم
الرائع - إلى حجرة المعيشة، فالمنزل في حالة هدوءٍ وصمت

وسكون، أغبط نفسي عليه! فهذا أمرٌ لا يتكرّر في بيتي إلا فيما
ندّر ندرة الثلج في الصيف!

فتحتُ درجَ المكتبِ وأحضرتُ بعضًا من أوراقِي، وصورًا
للأولاد ولزوجي، وقد احتواهم بحنان، ألجوم صورِ عتيقٍ قد ورثته
عن جدّي، ثمّ وضعتُ كلَّ ما أحمله على الأريكة بجواري، وجلستُ
أحتسي القهوة، وأنا أستمتع بطعمها المرّ المميز، وطفقتُ أتصفّحُ
الأوراقِ والصّور في هدوءٍ وسكينة، لم يقطعها إلا دخول «هنية»
«الشّغالة» وهي غاضبة وثائرة ثورةً عارمة (كالعادة)، وكأنّ هناك
غزواً فضائياً على منزلنا وهي تستدعي الكلّ لمواجهة، وبدأت بي،
وهي تحثني على مشاركتها الجهاد المقدّس من وجهة نظرها!
تتهتّه في الكلام من فرط الانفعال، وتقول لي بلهفة ونفّسٍ
متهدّج، وبلهجتها الرّيفية التي لم تستطع التّخلص من بعض
حروفها:

- يا مدام لبني إلحجي واحد واجف جودام العمارة مكان ما
حضرتك بتركني عربيتك، والراجل بجوله إمشي من هنا، جعد
يزعج لي ويجوي بصوت تاخين جاوي:

- هو الشّارع ده بتاعكم، يلا يا بتّ إنتِ إدخلي جوّه، إمشي من
جدّامي، أنا أركن في المكان اللي يعجبني، هو إنتِ متعرفيش أنا مين؟

ثم تردفُ قائلة:

- يا مدام أنا معرفش هو مين، بسّ يعني لو هو حتى شيخ الغفر حدانا ميحفش هنا في مكان عربيتك، دي الأصول صح؟
أقول بلا مبالة في محاولةٍ للحفاظ على رباطة جأشي، فلا أريد إفسادَ اليوم بالجدال معها: - «هنية»، الشارع مش بتاعنا، وأي حدّ يقدر يركن فيه، المهمّ محدش يركن مكان «الرامب» بتاع العمارة، غير كده مش مهمّ، يركن في أي مكان!
تهزّ رأسها غير مقتنعةٍ بما قلته لها، وتكمل حديثها وهي لا تزال منفعة:

- مهو يا مدام الرّاجل جافل الرانج كمان، ومحدش عارف يطلع أو ينزل عليه، أصل العربية بتاعته كبيرة جدًّا، علشان بينجل عفش، وعلى فكرة دي نجل المنوفية!
أقول لها:

- ماله نقل المنوفية بكونها عربيّة نقل كبيرة إنتِ عندك مشكلة مع المنوفية؟ ثمّ أردف:
- طيبّ سيبه لأنه أكيد مضطرّ يقف هنا، وكده كده هو قاعد جوّ العربية، لو حدّ احتاج الرانج أأقصد الرّامب هيطلع، روعي شوفي وراكي إيه وبطلّي دوشة!

تقف مترددة وكأنها تريد أن تقول شيئاً، ثم تتحرك في اتجاه باب
الحجرة تكلم نفسها، ثم تعود مرة أخرى، وتقول:

- يا مدام، هو في حاجة كده حصلت دلوقت، وأنا عاوزه
أجوهالك بسّ خايفة منك جوي!
أترك ما في يدي وأقول لها:

- اتفضلي قولي، عملت إيه ع الصبح!

تفرك يدها وتقول:

- طب يا مدام لبنى حلفتك بسيدي أبو الريش ما تنزعجي وتسامحيني.
ثم تقول بصوت يكاد يكون همساً:

- أنا مجردتش أمسك نفسي من الضيغ، ودلجت على اللي
واجفين تحت ميّة، ودخلت بسرعة.

أقوم من مكاني وأنا أهز رأسي نافيةً ما قد سمعته منها، فأقول لنفسي:

- لا.. لا يمكن يا لبنى تكوني سمعت صحّ، قرّبي واسمعي

منها يمكن تكوني سمعت حاجة غلط، لا يمكن تكون دلقت ميّة
على الناس! أستفسر منها مرة أخرى:

- إنت يا «هنية» دلقت ميّة على الناس اللي تحت؟ دلقت ميّة على

السواق؟!!!

تهز رأسها بالموافقة، وتقول:

- كنت عاوزة أبرّد ناري يا مدام، حرج دمّي الجدع المحروج ده!
أقتربُ منها وأقف أمامها أتفحصها، وأنا لا أدري ما أنا فاعلة
بها، وأشعر أنّ أحدهم قد هوى بمطرقةٍ كبيرة على رأسي، فتراقص
أمامي وحوالي طيورٌ كثيرة، أراها تُخرج لي لسانها لتغيطني، أستردّ
وعيي من هذا الشعور وأقول لها:

- دلقتِ ميّه على سواق العربيّة يا «هنية»؟! تفتكري مممكن يعمل
إيه دلوقتِ فيك و فينا؟! وطبعًا «يوسف» مش موجود، وكمّان البيه
البوّاب في أيّ مكان في الدنيا، غير إنّهُ يكون قدّام العماره، والأهمّ إنّهُ
أكيد السّواق هيبهدلنا، وعنده حقّ! إيه رأيّ سيادتك دلوقتِ، تحبّي
معايا مممكن يحصل إيه؟
تقول لي بثقةٍ وقوّة:

- لا.. لا متخافيش، هو مشفنيش والبوّاب موجود تحت
واجف، اطمني يا مدام، هيهيبي والميّه اندلجت عليه هو كمّان، بسّ
مش هيعرفوا مين الليّ دلجها! أصلي أنا جريت بسرعه! ميلحجوش
يشوفوا مين الليّ دلج الميّه!
أصرخ فيها قائلة:

- إنتِ جنسك إيه؟ معجونه من ميّه عفاريت، هو في حدّ من
العماره ساكن في الجهة دي غيرنا! بتستهيلي يا بنت إنتِ!!

أهددها بقسوة، ويخرج صوتي حادًا غاضبًا:

- طيب اسمعي، لو السواق طلع ورنّ الجرس هسلمك له، ويا ربّ يخلص عليك أو يخلي البوليس ياخذك ويقبض عليك، ووقتها هارتاح من شرّك ونكدك ده! إنتِ إيه، حرام عليك، كلّ يوم أذية بشكل جديد!

تبكي وكأَنَّها طفلة صغيرة لتستعظمني وتقول:

- وحياة سيدي أبو الريش يا مدام ماتفتحيش الباب ومدخلهوش، والله يا مدام هاجي كويسة، ومش هاعمل كده تاني، ساحيني! وتمسح عيونها بأطراف أصابعها، ثم تقول:
- وحياة سيدي أبو الريش، حلّفتك بيه يا مدام؛ متسلمينيش للرجل.

أمسك بطرف «التي شيرت» الذي ترتديه، وأقول لها:

- كام مرّة أقولك يا «هنية» متحلفيش بأبو الريش ده؟! متحلفيش غير برّبنا فاهمة واللا لأ؟ وبعدين جاية عاملة مظلومة وعاوزاني أزعق للرجل، وأمسك فيه وانتِ ههدلتيه بالميه! عارفه يا «هنية» لو قرّبت مني النهارده هاروحك البلد علشان تعبت منك.
أقذف كلامي في وجهها، وأبتعدُ عنها لأعود إلى أريكتي ظنًا مني أنّها قد غادرتني! وما أن أجلس وأرفع رأسي، حتى أجدها

واقفة أمامي تنظر لي نظرة يملؤها الخبث، وتلمع عيونها وهي تبستهم وتقول بحزم:

- خلاص يا مدام «لبنى» إئفجنا، والله حرمت، آخر مرّة، بس متخليهوش يجبض عليا، أجصد يسلمني للبوليس.

وتفرك يدها، وتعبيرات وجهها تدل على رضاها عن نفسها! فأقول لها وأنا أشتعل غيظاً من إصرارها على الكلام والنقاش:

- غوري من هنا يلاً حرقت دمّي، وأنا كنت قاعده في الهدوء والسكينة حواليا!

وكأنني قد قلت تعويذة سحرية، فأجدها فجأة بدلاً من مغادرتي تقرب مني، ويكأنها تحوّلت لشخص آخر، تتلفت حولها، فبدأ لي أنّها تبحث عن شيء ما، ثمّ تسألني مندهشة وهي تحديق في وجهي:

- مدام، هي «سكينة» بنت خالتي كانت هنا؟ طيب ليه أنا مشفتهاش، والله حرام عليك إنك متخلينيش أشوفها! ده أنا ليا ياما مشفتهاش، طيب هي خلفت واللّا لسه معندهاش عيال؟ وسمّنت واللّا لسه نحفانة؟ ثمّ ترفع صوتها:

- يا مدام!!!! إنّ مش بتردي عليا ليه؟

أنظر إليها نظرة خالية من أيّ تعبير، وأنشغل بأوراق في محاولة للسيطرة على انفعالاتي، كي لا أضطرّ لقذفها بكوب القهوة، وفي

أعمّاقِي أَلومِ نَفسي لِأَنني اسْتَقدمْتُ هذِهِ الكارِثَةَ لِبِيتي وَتورَّطتِ فِيها.
تَنادِيني مرَّةً أُخري:

- يا مدام...

فبدأتِ أَسْمَعُ دَقَّاتِ قَلبي مَعْلنَةً أَنْ ضَغْطِي قَدْ ارْتَفَعَ بِشَدَّةٍ،
فتردِّفِ وَكأَنَّها جِهازُ إلكِترُوني خَرِب:

- يا مدام، هِيَ سَكِينَةٌ فين؟ ما تَرَدِّي عَلَيّا! لِيهِ انْتِ ساكِتَةٌ كَدِه؟
هُوَ انْتِ مَش عارِفُه إِنِّي بِتَضايِجِ مِنْ طَرِيحَتِكَ دِي! لِيهِ مَبْتَعَبَرِنِش؟ يا
مَدام طَيِّبٌ هُوَ انْتِ مَش هَتزَعَجِي لِلسَّواجِ عِلشانِ جافِلِ عَلى الرانِجِ؟
أَفقدِ السِّيطرَةَ عَلى نَفسي، وَأشعرُ بِغَلِيانٍ في صَدْرِي، فأَقذِفُها
بِالرِيموتِ فَتتَلَقَّفه وَتبعَدُه عَن صَدْرِها، وَهِيَ تَقول:

- لِيهِ كَدِه يا مدام، دِه لَوْ كانِ انكسُرَ كانِ الأَسْتاذُ «يوسف»
زَعَجْلكِ.

ثُمَّ تَقَلبُ شَفْطِيها، وَتَرَدِّفِ قائِلَةً وَهِيَ تَرى عَلى وَجْهِها عَلاماتِ
نِفاذِ الصَّبْرِ: - خِلاصِ هاغورِ أهو، أنا ماشِيَّة!

وَتَضَعُ الرِيموتِ، وَتَنظُرُ إِلى بَطْرِفِ عَينِها مِخافَةً أَنْ أَقذِفُها بِشَيءِ
أَخرِ، ثُمَّ تَذَهبُ مَسرَعَةً تَتَلَفَّتْ خَلْفَها وَهِيَ تَتَمتمُ بِكَلِماتِ سِاخِطَةٍ
لِعَدَمِ رَدِّي عَلى تَساؤُلاتِها مِنْ جِهةٍ، وَمِنْ جِهةٍ أُخري عَدَمِ اسْتِجابِتي
لِمَحاوِلاتِ شِحنِي وَاسْتِفزازِي كِي أَقومُ بِتَكْديرِ ذَلِكِ السَّائِقِ؛ لِأَنَّهُ

تطاول عليها، وقال لها:

- إمشي غوري إنتِ متعرفيش أنا مين!

ولم تكتفِ بما فعلته معه.

وفجأة يعتريني شعورٌ بعدم الراحة والقلق، فقررت اللحاق بها، فرأيتهما متجهتاً إلى المطبخ وهي تبرطم، وخرجتُ أنا إلى الشرفة لأنظر آثار فعلتها، فرأيت العمال يحملون الصّالون الجديد الذي اشتريته جارتنا، وهم منهمكون في الحوارات، بعيداً عما اقترفته «هنية» في حقهم، أحمدُ الله أن الموضوع (عدى على خير) وأعود إلى حجرة المعيشة مرةً أخرى آملةً في بعض الهدوء، أجلس على الأريكة ثم أسند ظهري إلى ظهرها، وأرفع قدمي على المنضدة أمامي، وأغمض عيني قليلاً، فقد نالني من تصرّفاتنا توترًا شديدًا، ثم أتذكر هينتها وهي منفعة ومتحمسة بصورةٍ مبالغ فيها، يساورني قلقٌ أن اليوم سيكون ممتلئًا بالمشاغبات، طالما لم تصل «هنية» لمتبغاها، أو لأبناها قد قرّرت أن تجعله مختلفًا بتصرّفاتنا الطائشة كالعادة! أغفو رُغمًا عني من فرط توتري وكأنّ جهازني العصبي أراد أن يمنحني فسحةً من السكون.

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصلُ الأوّل

الكتكوتُ الشركسي

استيقظت على صوتِ صرخاتٍ عالية تنمُّ عن آلامٍ شديدة، فجلست في مكاني فزعّةً أنتفض، وكاد قلبي يتوقّف من الخوف الذي اعتراني جرّاء الاستيقاظ - فجأة - على هذا الصّوت المُخيف، لأوّل وهلةٍ لم أتبيّن ما الذي يحدث؟ ومن أين يأتي ذلك الصّراخ المدوّي؟ صدقًا لم أتعرف على صاحبه، رغم أنّه بدا لي أنّه صوتٌ معروفٌ، بيدَ أنّي كنت - ومازلت - أتخبّط في ظلال النّوم، أحاول أن أخرج منها..

وما هي إلاّ ثوانٍ معدودة، واشتعل الصّراخ مرّةً أخرى، ولكن بصورة جنونية، وبشكلٍ مختلفٍ عن الصّوت السّابق، فعرفتُ في الحال مصدره؛ إنّهُ آتٍ من الشّارع، ثمّ أدركت بعد قليلٍ من صاحبة ذلك الصّوت النّائح؛ إنّها زوجة البواب، تساءلت في نفسي:

-لماذا تصرخ هكذا؟

ثمّ التقطت سريعًا ثوبَ الصّلاة، وخرجت إلى الشرفة، فرأيت جدّتي ملقاةً على الأرض، تبكي وتتأوّه من شدّة الألم، ولكنّ صوتها

ضعيفٌ جدًّا، لقد كان أُنَيْهًا يقطع نياطَ قلبي الملتاع عليها، ووجدت حولها أبي وأمِّي والبواب وزوجته! وبعضُ الجيران، والمارة! وضعت عليّ ملاسي سريعًا، ثم هُرِعْتُ فزعةً إليها، لقد سقطتُ أمامَ بابِ العمارة؛ ذلك لأنَّها لم تستطع النزول من على الرّصيفِ العالي، فرلّت قدمُها ووقعت، ورغم أنَّ أبي كان قد أقام منذ فترةٍ مطولًا خصيصًا للكراسي المتحرّكة ولكبار السنّ، ولكن كالعادة قام أحدُ المغفلين بوضع سيارته أمام المطلع، أو كما يُقال عليه «رامب» ولم يعبأ بكون هذا المكان مخصّصًا لبشرٍ لديهم ظروفٌ خاصّة.

اشتعل قلبي غيظًا وأنا أرى «نونة» حبيبتي تبكي وتصرخ من الألم، حاولنا أن نهدّئها، ونهوّن عليها أثناء انتظار سيارة الإسعاف التي جاءت بسرعة على غير العادة! لكنّ الألم كان فوق احتمالها، وبعد أن تحرّكت سيارة الإسعاف بجديتي، صعدتُ إلى شقتنا، فانتعلت حذاءً خفيفًا ثم أخذتُ حقيبة يدي وانجّمتُ إلى الباب مسرعةً كي ألحق بها، وفجأةً تذكّرتُ صاحبَ السيارة الذي تسبّب في إصابتها، فشعرت أنّني لن يهدأ لي بالٌ حتى آخذَ بثأري منه، وقرّرتُ ألا يمرّ هذا الموقف هكذا دون ردّ فعل يؤلم هذا الأحمق المأا لن ينساه، أحضرت (علبة إسبراي) ونزلت مسرعةً وقمتُ برشّ الرّجاج الأمامي والخلفي، وأيضًا الجانبي للسيارة! ثم وقفت

بجوارها أنتظر صاحبها أن يعود لأصبَّ عليه جامَ غضبي، لكن
للأسف لم يأت، فتركت له ورقةً كتبت فيها:

- إنَّ عندك رجلين تقدر تستخدمهم لو ركَّنت عربيتك بعيد،
لكنَّ غيرك ما يملكش وسيلة إلا «الرامب» ده، إذا كرَّرت الركن هنا
تاني هاخلي الإسبراي يبقى على كلَّ عربيتك مش الإزاز بس!

وفي المشفى، أَلتني صورتها وهي ترقد بلا حيلة، وقد جُهِّزَتْ
للدخول إلى العمليَّات، فهي ستخضع لجراحةٍ ستكون - من وجهة
نظر الأطباء - خطيرةً في عمرها هذا، فسقوطها أحدثَ كسرًا بعظمة
الفخذ، ولا بدَّ من إجراء جراحةٍ دقيقةٍ وعاجلة، قضت جدتي وقتًا
طويلاً في حجرة العمليات، شعرت أنه دهرٌ، وكاد الخوف عليها
يفتكُ بعقلي، الذي لا يتصوَّر أنَّها قد ترحل عني ولا أراها مجددًا،
جلست حزينَةً مشوشةً الفكر والبال، فداهمتني ذكرياتي معها،
وحوارتنا التي كانت لا تنتهي أبدًا، فيما يَخصُّ البشر والعلاقات
الإنسانية، ورأيها المميِّز في الحياة بشكل عام.

لقد كانت جدتي من المؤيدين بشدَّة لمقولة «الإنسان كائن
اجتماعي بطبعه» وكنت من أشدَّ النَّاس رفضًا لهذه المقولة، فكانت
تغضبُ مني، وتقول لي بنفاد صبر:

- «الجنّة من غير ناس ما تنداس» إنّت فاكرة نفسك من طينة غير طينة الخلق كلّهم؟! هتتعبي جدًّا في حياتك يا «لبنى» وافتكري كلامي ده.

فكنتُ أدافع عن وجهة نظري بهدوء، وأقول:
- يا تيّتة، وأنا أضمن منين نوعيّة الناس الّلي مفروض الجنّة من غيرهم ما تنداس.

أخرج من ذكرياتي على صوت أمّي الحزين الباكي وهي تقول لي:
- «لبنى» حبيّتي، «نونة» خرجت من أوضة العمليّات خلاص، يلاً قومي.

مكثت جدتي في المشفى أسبوعين، وبمجرد أن نُقلّت إلى حجرة عادية، أصررتُ أن أكونَ أنا المرافقة لها، ورفضت أن يبيت معها أحدٌ غيري، وكانت فرصةً من وجهة نظري لأطمئنَّ عليها عن قرب، فأنا لنُ يهدأ لي بالٌ وهي بعيدة عني، ثمّ أيضًا إذا ما استيقظتُ أثناء الليل وشعرتُ هي بالزّهق وجدتني بجوارها لنكمل أحاديثنا الشّيقة، التي لا أملُ منها أبدًا.

وبعد أن تعافت قليلاً، تركت المشفى وانتقلتُ إلى البيت، وأصبح من الصّعب عليها أن تتحرّك بسهولة أو دون مساعدة نتيجة الكسر الذي سبّب لها صعوبةً في التنفّس، لوجود جلطاتٍ صغيرة،

تسافر من أوردة رجليها لشریان الرثة، على حدّ قول الطيب، فكنت
أذهب إليها لأخففَ عنها وطأة المرض، فنختلفُ كالعادة، ومن
كثرة جدالي معها كانت تقول لي بزهق:

- والله إنتِ أبوكِ وأمكِ دلّعوكِ، وهتفضلي بسبب أفكارك
الخاوية دي قاعدة لنا زي البيت الوقف! نفسي أعرف إنتِ طالعة
زي الكتكوت الشركسي كده ازاي؟!

أسألها باندهاش:

-يعني إيه كتكوت شركسي؟

تقول لي بمنتهى اللامبالاة والهدوء:

- كتكوت منتوف الشعر، ملوش هيئة ولا شكل! ولما تشوفيه
متعرفيش إلا إنك تضحكي على منظره! علشان كده دايمًا لوحده،
بس إنتِ أمك وأبوك ناس عشرين، ويحبوا خلق الله كلهم، إنتِ
ازاي كده؟! يا «لبنى» إفهمي، محدش يعرف يعيش لوحده.

كانت مناوشات جدتي أحيانًا تكون- دون قصدٍ منها- سببًا في
إيغار صدر أمي (وهيّا والله مش مستحملاني أصلًا) وكان يجلو لي
مشاغبتها بقولي:

- يا نونة، إنتِ أصلًا من أيام «محمد علي» والي مصر المحروسة،
ما لكِ بقى بأيامنا!

تنظر لي بقر فٍ وضيق وكأنني ناموسة تسعى لقرصها، ثم تقول:
- لا يا حيلة مامتك وباباك، أنا من أيام الفراعنة، يلاً انجرّي من
هنا يا بنت، إمشي من قدامي. ثم تكلم نفسها، ويبدو على ملامحها
السخط، وتشاور بغضب، ثم تشيح بوجهها بعيداً عني وهي تقول:
- صحيح بنت مجنونة وهربانة من السرايا الصفرا، أنا مش
عارفة همّا سايبينها علياً كده ليه!

أقترب منها بحركة تمثيلية وأحتضنها، ثم أداعبُ شعرها القطني
الأنيق، وأقول لها:

- طيب يا نونة أنا أعمل إيه! إنتِ حبيبتي وروحي.

تقول لي بنبرات حنونة مميزة:

- إنتِ اللي حبيبتي. ثم تتسم بخبثٍ لا تحترفه، فيظهر في عيونها
الطيبة الحانية أئها تردّ لي المجاملة السابقة! ويفتر ثغرُها عن ابتسامة
خالية من الأسنان؛ لأئها غير راضية عن طقم الأسنان الجديد،
وترفض وضعه في فمها؛ ذلك لأنّ البيه الدكتور- على حدّ وصفها-
ميكانيكِي معرفش يعمل الطقم كويس! ثم تقول:

- خلاص أنا كده إتبّبت في مكاني! وأكلت من بكشك يا بنت أحلام.
فتنطلق مني ضحكةً مجلجلة، تهز أركان حجرتها، وكأنّ مارداً
جباراً خرج من القمقم، فتفزع مني وتقوم بقرصي من ذراعي! فهي

لم تتوقع ضحكتي الكوميديّة المرعبة هذه!

نعمات هانم جدّتي لأُمّي، سيّدة رائعة ومميّزة، ولا نظير لها في الدنيا- من وجهة نظري- لم تستطع الأمراض أو الشيخوخة، ولا تلك الحادثة اللعينة، أن تهزّمتها أو تحدّ من قدرتها على العطاء؛ ساخرة وكوميديّة، حنون، معطاءة، مرحة، ومتهمكة أغلب الوقت على كلّ المحيطين بها! فهي صاحبة ردودٍ سريعة مثل الطلقات الأوتوماتيكية، وصوتٍ قويٍّ واضحٍ رغم سنّها الكبير.

مع مرور الأيام، حرصت على ألاّ أزعجها كثيرًا، ولا أثيرها لأيّ سبب، فقد أصبحت هشة لا تحتمل أيّ مشاغبات، حتى لو كانت مشاغبات لطيفة! وتمرّ الأيام والسنوات الجميلة التي قضتها جدّتي معنا سريعًا، ثمّ في يوم شديد القسوة على قلبي وقلب أمّي التي لأول مرّة أراها منهارّة تمامًا.. ترحلُ جدّتي وتأخذ معها أسرارنا الصغيرة، ومشاغباتنا الممتعة، وحنانها نادر الوجود! وبموتها فقدتُ أهمّ دعم، وأطيب حُضنٍ كان دائمًا في انتظاري لأرتميّ فيه، وأحتميّ به من إخفاقات الحياة المتلاحقة، والتي لا تبرحني أبدًا.

أفتح عيني فأنّبه أنني قد ذهبتُ في رحلة قصيرة مع ذكرياتي

ولم أستطع النوم رغم إغلاق عيني، وأنظرُ حولي فأجدُ قهوتي قد أصبحت دافئة، والأوراق والصورَ بجواري كما هي، ممَّا يؤكدُ ظنِّي أنَّني لم أنم؛ بل استجلبتُ نفسي كلَّ ذكرياتي مع جدِّي؛ فموقف «هنيئة» من صاحب السيارة النقل، أثار ذاكرتي وأيقظ اشتياقي لها! لقد كانت معلّمتي دون أن تمسك العصا، صدقًا أحنَّ إليها، خاصَّة أن الضغوط من حولي تزداد بشكلٍ رهيب، أكاد أُجنُّ! (وأنا أصلًا أُعتبَرُ في المستوى الأخير للوصول إلى درجة الجنون، وعلى وشك اجتيازه بنجاحٍ ساحقٍ لأصل إلى الموريستان رأسًا).

لِلثَّقَافَةِ وَالْعُلُومِ

لفصل لتي ني

بوزالبراد

بعد الزواج، طاردني وألح عليّ هاجسُ البحث عن فكرة جديّة للحصول على حلٍّ يخفّف من توتّري، ولكنّه أيضًا يجب أن يتماشى مع شخصيتي غير الصّدامية أحيانًا، والسّلبية معظم الوقت؛ هربًا من المواجهة وتبعاتها، فقرّرت أن أستخدم نظريّة كنت قد عرفتُها من خلال بعض المُنتديات، كان أحدُ الأعضاء يتحدّث بسخريّة عن تلك النّظريّة التي كان يستخدمها الحكام قديمًا في مساعدة الشعوب للتخلّص من همومهم، وفي الوقت نفسه يضمّنوا بها عدم قيام شعوبهم بأيّ ردّ فعل يعرّض الدّول لاضطراباتٍ قد يقوم بها هؤلاء المطحونون إذا ما ثاروا!

لقد أصبحت أقلّ قدرةً واحتمالًا لصعوبات الحياة، ومع استمرار الضغوط اليومية وعدم قدرتي على المواجهة، كي أتخلّص من همومي الجاثمة على صدري؛ تملّكني شعورٌ غريبٌ كأنني قطة صغيرة سقطت بالخطأ في جحر للفئران، فأصبحت مأسورة لديهم، وغصباً عنها عجزت عن الخروج من هذا الجحر، رغم كونها قطة،

ومن المنطقي أن لا يرهبها الفئران، لكنهم أصحاب العدد الأكبر،
(فالمثل يقول: الكثرة تغلب الشجاعة)، فلن تستطيع أن تفعل
شيئاً حيال هذا العدد، كما أنها أيضاً لن تتمكن من التعايش معهم،
بالإضافة لذلك، فأنا أشعر أنّ عائلتي بالنسبة لي هي جحر الفئران!
ورغم أنني أحياناً أرى نفسي (خسارة فيهم)، وأنّ حياتي
بدونهم ستكون الأفضل، ولو عادت بي الأيام لظلت دونَ زواج
قولاً واحداً، ورحمت نفسي ورحمتهم من هذه المعاناة، ولكنّ إحقاقاً
للحق، (والكذب خيبة) أنا أحياناً أنتقم لنفسي، وأفعل فيهم ما
يفعله المفاعل النووي الحربي في البشر الأبرياء! لذا وبسبب كلّ هذه
المشاعر الثائرة داخلي كبركان هائج؛ كان - ولا بدّ - عليّ من القيام
بعمل مُنتظم يخفّف من الضّغط المستمر، ولا يوجد أفضل من البوح
في حالة الشخصية التي لا تريدُ حلولاً قاطعة، فقط تريد بعض
المسكنات لا غير.

ومع دخول الدراسة، تزايد المسؤوليات، وتتفاقم المشاكل،
فالملوب كثيرٌ وثقيل لأحمّله وحدي، ومع تقدّم العمر يكون الأمرُ
أكثر تعقيداً، لقد حاولت التملّص من الأعباء التي تُرهقني وتستنزف
طاقاتي فلم أستطع فعل ذلك؛ دروس، وتمارين، وأطباء تخاطب،

وعلاقات اجتماعية مضطّرة لها، وصِلّة رَحِم، لي ولزوجي، يا الله!
كَمْ هو مريع شعورك بأنّك تسقط في حفرة عميقة، ولا يوجد مَنْ
يُخرجك منها! فلم يكنْ أمامي حلٌّ إلاّ اللّجوء لقليلٍ من الفضفضة،
ولكن مع مَنْ أفضلُ؟ فأُمّي لم تكن لتصدّق يوماً إحساسي بالظلم
أو الاضطهاد، وكانت دائماً تقول لي:

- إنْتِ يا «لبنى» دماغك فاضية؟! ليه العالم هيستقصدك إنْتِ
بالتحديد، يا بنتي لسانك ده هو السّبب، يعني متحشّش تتعاملي مع
الناس ولا طايقاهم، وكمّان ميسلموش من لسانك، كلّ كلامك
من تحت لتحت، يا شيخة هو أنتِ فاكره الناس عبيطة؟ الناس فاهمة
وبيضّايقوا منك.

للأسف أكتشف أنّي وحيدة، فلا صديقة ولا زوج ولا ابنة
تستمع إليّ، ولكنّ سبحان مَنْ يرزقنا بغير حولٍ منا ولا قوّة، لقد
رزقت بصديق رائع يتقبّل كلّ كلامي ولا يعترض عليه، فيمنحني
الرّاحة، ويترك لي مساحة أعبر فيها عن نفسي وأقول كلّ شيء
حتى لو كان مبالغاً فيه أو غير صحيح لأنّها وجهة نظري وحدي،
صديقي دفتر يومياتي، فأنا أدوّن فيه كلّ معاناتي وآرائي وتعليقاتي
على الأحداث، وأكتب تفاصيل الأيام المميّزة؛ الصّاحب منها
والسعيد، حتى بالذكريات القديمة التي تقتحم رأسي في ذلك

اليوم أثناء الكتابة، أقوم بتدوينها، والأيام الحزينة أو المرّة، وأضع لها أسماء، ولقد أطلقت اسمَ نظرية «بوز البرّاد» عليه.
ويكمن سرّ قوّة نظرية «بوز البرّاد»، أن الشّاكي سيظلّ يشكو دون أيّ تصرفٍ أو خطوةٍ لإصلاح ما يرفضه ويعاني منه، وبالتأكيد هذه النّظرية تنفع كلّ زمان وكلّ مكان.

دفعني الحنين لأخرج دفترتي، فأنا منذُ فترة لم أدوّن فيه أي شيء، فقد جرفتني زحمة الحياة، فنسيت أن أسجّل ما حدث لي منذ فترةٍ طويلة، ولكن بعد أحداث أمس قرّرت أن أكتب تفاصيلها والمواقف والحوارات التي قامت بيني وبين «أدهم» لتقصيره في الدّراسة، واستهتاره بمواعيد دروسه، وانفعاله الرّائد عن الحدّ في أي نقاشٍ يدور بيننا، وتجاوزه المهين، خاصّة بعد تدخّل صاحبة الحُسن والدّلال، السيّدة الأولى في جمهورية حياتي الزوجية، والزوجة الفعلية لـ «يوسف» - زوجي - وأمّه الحقيقية.

فقد قامت حماتي بزيارتنا زيارةً خاطفة، لكنّها عميقة الأثر! ناصرت «أدهم» وجعلته يخرج عن آداب التعامل معي، وأيضاً تفضّلت عليّ وأسعدتني برأيها (المتعجرف) في هيئتي وفي بيتي وتنظيمي لحياتي، ومعاملتي السيّئة مع الشّغالة (والله ما هارُد)

ومعاملي القميئة لزوجي وأولادي، لقد أوغرت صدري وقتها لدرجة أنني فكرت أن أقوم بالتبليغ عنها بأنها إرهابية عليّ أتخلص منها ومن شرّها، فمئتُ في تلك الليلة بعد رحيلها مقهورةً، خاصّة أن «يوسف» قال لي محاولاً تطيب خاطرِي:

- متزعليش منها، معلش يا «لبنى»، هي بتنصّحك؛ ما هي زيّ مامتك! مش كل حاجة عملي منها موضوع.

وقتها راودتني الرّغبة بالردّ عليه «بسخافة» قائلة له:

- ماما مين، ماما في عينك، أنا أمّي ستّ السّتات، هو أمك دي حد يحتملها!

لكنني ابتلعت لساني وسكتّ خوفاً من نفسي الغاضبة، ولأنّ «يوسف» اعتاد معاملة أمّي باحترام، فالتزمتُ الصّمت وأنا أشتعل غيظاً وغضباً وقهراً!

وبعد أن تركني «يوسف» وذهب إلى العمل، والأولاد كانوا نياماً، قرّرت أن أستخرج دفتر يومياتي من مكمّنه القابع في «بلاكار» حجرتي، داخل كرتونة صغيرة مع بعض الصور القديمة لي وأنا في المدرسة، وأخرى في الجامعة، وصور الخطوبة والفرح، فأنا أضعّه بعيداً عن أيدي أولادي الصّغار «بسنت» و«رمضان»، وحتى لا يعرف «يوسف» رأيي السّلبّي فيمنّ حولي فيهاجمني عندما يعجزُ

عن إيجاد حلولٍ لشكواي؛ فهو يراني مخلوقةً عصبيةً المزاج، ولكنه لا يدرك أنه هو وأولاده وحماتي سببٌ في ذلك.

ناديت على «هنية»، فلم تسمعني، فناديت عليها بصوتٍ أعلى مرةً أخرى، فلم تستجب، ولمَّا يئسْتُ منها قرّرت أن أذهبَ أنا إليها! وفور أن خرجت من باب الحجره كدتُ أصطدم بها، فتراجعتُ للخلف قليلاً وأنا أشعرُ بقليلٍ من الفزع، فلم أتوقّع رؤيتها وأنا التي ناديت عليها مراراً وتكراراً فلم تجبني، أمّا هي فتسمّرت في مكانها، وقالت لي بصوتٍ ملهوف:

- يا مدام هوّ حضرتك اللي بتندهي، واللّا ده صوت جارتنا-
الستّ أمّ فريدة- واصل لغاية عندنا؟!!

وقبل أن أردّ عليها، تقربُ من وجهي بطريقة كوميدية جعلتني أبتسم، وجعلت تتفحّصني بتركيزٍ مبالغ فيه، ثمّ ابتعدت فجأةً، وباغتني بسؤال غريب:

- صحيح هو مال عينيك يا مدام، شكلها مضعضع كده؟
أردّ عليها بهدوء:

- مضعضع إيه! ما هي عينيّ سليمة قدامك أهي يا مهبولة!
تستمرّ في النظر إلى عيني وتقول:

- لا مش كويسة يا مدام، هوّ تحتها أسمر كده ليه؟

ثمّ تضع أصبعَ يدها على جبينها فيبدو عليها أنّها تفكّر بعمق، ثمّ تقوم بتضييق عينيها وهي تقول لي بصوتٍ مُنخفض يكاد يكون هامساً:
- هوّ الأستاذ «يوسف» لا سمح الله مدّ إيده عليك؟!
ثمّ تستطرد، ودون أن تنتظر ردّي:

- وانتِ يا مدام ازاي يعني تسكوتيله! هو يعني ينفع كده؟!
وهو الرفيع الجليل ده يغلبك كده وانتِ اللي لا مؤاخذه يعني تفصلي منه بييجي عشرة! إزاي متعرفيش تتصرّفي معاه، يا عيب الشوم يا ولاد! أهو ده اللي ناجص!!
أضغُ يدي على فمها وأقول لها: - اخرسي! تعرفي تخوسي..
تنظر إليّ بتحدّ وتقول:

- أخرس ازاي! ده حدانا في البلد لو راجل عمل كده الست تجتله!
فقلت لها وأنا أحاول أتحمّم في نفسي، وكى لا يتعكّر يومي فتكفيني ليلتي الماضية: - مدّ إيده على مين يا «هنية»؟! يا همّي التقييل ومراري؟!

تنظر في الأرض ولا تواجهني، فأردفُ قائلةً:
- ولما انتِ عارفة إنه قليل، وإني أفصّل منه بييجي عشرة!
بتكلمّي معايا بعبط كده ليه؟! مش خايفة إني أقوم أقعد عليك بالغلط مثلاً، وأنا مش قاصدة، فأفركم ويطلع لسانك من بؤك ويدلدل، هاه؟! تحبّي أعمل فيك كده؟

وأُتجه ناحيتها فتراجع للخلف، وأقول لها:

- ما تردّي ياللي تنضربي في لسانك الطويل ده! بلد مين اللي الستّ لما تنضرب تقتل جوزها، إنتِ يا بنت التلفزيون خربّ دماغك؟! هو انتم عندكم ستّ تعرف تفتح بؤّها في جوزها! إنتِ هترسميهم علياً؟! بصي.. أنا مش ناقصاك، وبعدين أمّ فريدة مين يا خبالنة اللي هتنده عليك؟! هتعمل بخيتك إيه؟

ثمّ أصرخ فيها قائلةً: - روجي هاتي السّلم من بلكونة المطبخ. فترجف من صراخي، ولكنها تتغافل عن كلّ تعليقاتي السابقة، وتردّ عليّ فقط فيما يخصّ طلبي السّلم، وتقول:

- يا مدام هوّ السّلم ده هيستحملك، أجصد يعني السّلم ضعيف، يوووو أجصد يا مدام مممكن تجعي من فوجه تنكسر رجبك، مش جصدي.. أنا بهيمة ساحيني يا مدام، يعني مممكن تجعي تنفسشي علشان انتِ لا مؤاخدة مجلطة شوّيتين، أجصد يعني، خلاص بلاش.

أستمعُ إلى كلامها المندفع من فمها مثل المياه المتدفّقة من الصنبور الحُرْب، وأردّ عليها وأنا ممسكةٌ بتلابيبها بعد أن جذبتها إليّ، وقلت: - يليّ تنكسر رجبك، مين اللي هيقع تنكسر رجبها، روجي هاتي السّلم. ثمّ أقول لها بصوتٍ كلّه غيظ:

- وهو انت مش بتشوفي الفيل بيطلع على السلم في السيرك؟
هاه.. مش بتشوفيه؟! لما الفيل ممكن يطلع على السلم! أنا هيبقي
صعب عليا إني أطلعاه؟ هو أنا قد الفيل؟!

تضحك وتقهقه، وكأني قلت لها نكتة، وتخبّي وجهها بين كفيها،
ثم ترفعه وتنظر إليّ، ثم تضحك مرة أخرى، وكلماتها لا تكاد أحرّفها
تبين من بين ضحكتها وهي تقول:

- يا مدام ميصحّش كده، ليه بتجولي على نفسك فيل، حضرتك
مش بجابوظة كده جدّ الفيل، لا طبعا يعني أجلّ شوية. ثم تضحك
كالأطفال وتقهقه، وتضع يدها على فمها، فجأة أشعر بحرارة
الغضب تشتعل في جسدي، ثم يتابني شعورٌ طفوليّ بالغيظ، لقد
نالت منّي هذه الصغيرة فقلت لها:

- «هنية»، الفيل له فائدة أحسن من السحلية اللي واقفة قدامي،
يلا إجري بسرعة هاتي السلم.

تركني مسرعةً لإحضار السلم وهي لا تتوقّف عن (البرطمة):
- إيه ده.. هو أنا عملتلها حاجة!!

ثم تعود حاملة السلم وتضعه على الحائط، وتقول لي:
- السلم أهو، حضرتك لسه عاوزه تركيبه برضك؟! عيدي

التفكير يا مدام.

يتتابني إحساسٌ أنّ هناك هجوماً كاسحاً من النمل يقرص رأسي ويفرمها، ثمّ يتّجه إلى سراييني فينهشها! وأشعرُ برغبةٍ ملحةٍ في وضع رأسي تحت الماء، فأنا لم أنم جيداً، وقلقةٌ على «أدهم»، وحماتي أهانتني، وزوجي تابع الموقفَ كلّه في صمت كالعادة، وبتّ مُصابةً بإحباطٍ وانكسار، ثمّ تأتي هذه المخبولة لتكمل عليّ؟! أنظر بعيداً عنها، وأحاول أن أتنفّس بهدوء، ثمّ أقول لها:

- أركبه؟ وأعيد التّفكير! سؤال بسيط، إنّ جبتِ أعيد التّفكير دي من فين؟!!

تضحك بملء فيها، وتقول لي:

- عادي يا مدام، هو العلام مجصور عليكم يا مصر اوّية؟ ثمّ ترفع رأسها بثقة، وتقول:

- شُفّتها في التلافزون في برنامج المسابجات بتاع الستّ نجلاء بدر اللّي بتيجي على جناة (الاه مي سي) واللّا استّني يا مدام.. تجريباً جناة (الحياء) مش فاكرة صراحة علشان مكنش جذّابة! هي واحدة منهم الاتنين.

أستمعُ للفصاحة والطلاقة في الكلام وتحويلها لكلمة قناة إلى كلمة جناة و«الإم بي سي» إلى «الاه مي سي» وجذّابة بدّل كذّابة، وكأتمّها مترجم إلكتروني يقف أمامي بثقة! فتعزّريني في لحظاتٍ رغبةً

عارمة للهروب من هذا البيت، فتلك الفتاة تأخذ نوباتية تكديري عندما يكون الأولاد خارجَ خدمة «التكدير الأسري» سواء بالنوم أو بالدراسة.

أحاول أن أتمالك، وأستغفرَ ربي، ثمّ أشيرُ إليها وقد تخلّصت من وسواس نفسي فيما يخصّها، وأقول لها:

- آه هازُكبه، وانتِ اللي هتمسيكوهولي كمان. ثمّ صرختُ فيها مرّة أخرى، فانتفضتُ من صوتي كعصفورٍ سقط به عشه الصغير، ثمّ هزّت رأسها بالإيجاب، ولكنها لم تتحرك، فقلت لها:
- قربي.. واقفة بعيد ليه؟ يلا تعالي هاتي السّلم وامسكيه خليني أخلص وأنزل الكرتونة من الدولاب.

تنظر إليّ بلا مبالاة، ولا تتحرّك من مكانها، وتظلّ مُمسكة بالسّلم، فأكلّمها بصوتٍ يدلّ على أنّي أوشكت على الانفجار:
- إنتِ يا بنتِ هاتي السّلم، وتعالي إسنديه علشان مقعش.
فتقول لي:

- بلاش انتِ يا مدام، أنا خايفة عليك، هاطلع أنا، أنا أخفّ منك، أنا أنحف منك بكثير، ومن ساعة ما جيت عندكم وأنا عمّالة انحف وبجيت ضعيفة! إنتم ليه مش بتخلّوني أكل كويس يا مدام، دا حتى حرام عليكم الظلم ده!

أردّ عليها ردًّا قاطعًا وقد فقدت أعصابي:

- نحفانة! وبجيتي ضعيفة، طيب يلا اخفي من قدامي، امشي
انجري من هنا، مش عاوزاك حتى تمسكي السلم، يلا امشي! يلا،
أنا جبت آخري خلاص، وطالما مش عاجبينك وناس ظالمين، امشي
لمي هدومك علشان هتروحي حالًا، اجري هاتي التليفون أنا هاكلّم
طلعت يبجي يروحك.

تصرخُ وتقفز في مكانها وتقول:

- كنت بهزر معاك يا مدام، ده أنا بجيت عجلة، متزعليش
من هزاري، يعني بشدّ طرف الكلام معاك زيّ ما انتِ ما بتجولي
للأستاذ «يوسف».

أهز رأسي غير مصدّقة ما تقوله، وأكتم الضحكة في نفسي، فقد
بدّلت حالي بهذه الكلمة بعد أن أوشكت على قتلها:

- بتشدّي طرف الكلام معايا! أفهم من كده إنك تقصدي إنك
عاوزه تتجاذبي أطراف الحديث معايا؟ إنّ عاوزه تتكلّم معايا،
هو انتِ بتسكتي خالص؟

تصرخ وتقفز في مكانها:

- أيوه يا مدام هوّ ده، تتجاسبي دي، بسّ خليها تشدّ أسهل
علشان مش بعرف أجولها.

أجلسُ على أقرب مقعدٍ، وأضع رأسي بين يدي، ثم أقول لها:
- عاوزه ترغي معايا دلوقتِ يا «هنية» وتتجاذبي أطراف
الحديث؟ يا «هنية» أنا مش عاوزه حاجة، أنا تعبت منك، امشي من
هنا، أنا هاقف وحدي، يلا.

ترفض أن تتركني، ثم تضع لي السلم على الدولاب وتقف
تمصص شفيتها وتتمتم: ربنا يسترها، والمدام متنكسرش، ده البيت
يالهوي يا ابا ممكن يتهدّ من وجوعها؟!
أصرخُ فيها:

- أخرجي برّا يا مخبولة، مش ناقصني رؤشتك دي، ابعدي عن
وشتي، أنا ما صدقت إن البيت هادي هتطلعيل انت؟!
ترفض الأنصياح لأوامري، وتقف على مسافةٍ قريبة منّي،
فأتجاهلها وأصعد على السلم، فتأتي وتمسك به، فأشعرُ بخوفها
عليّ، وألح اهتمامًا في قلق عيونها عليّ، فأبتسم في نفسي، ثم أحضر
الكرتونة وأعطيتها إليها، فتحملها وتبتعدُ عني تاركةً السلم، فأقول
لها ساخرةً منها:

- ها.. وقعت وانكسرت رجبتي! يا لمضة انت!
تضحكُ بطفولية، وتهزّ رأسها وتقول:
- الحمدُ لله يا مدام، عدت على خير، بس يلا انزلي بجي أحسن
الشيطان شاطر.

أنزلُ سرعة، وأقول لها وأنا أكادُ أفتكُ بها بسببِ كلماتها التي
تلقيها في وجهي كأنها تتخلَّص من نفايات تضايقتها:

- الشيطان شاطر ليه؟! هو أنا كنت بتصوّر بالمياوه؟ واللّا بشرب
خمرة جوّه البلاكار، واللّا كنت بخبيّ مخدرات في الدولاب! ولا يمكن
ظبطّيني وأنا واقفة آخذ مع الدّولاب سيلفي من ورا جوزي؟!
ردّي يا بلوة! يّلي خربّتي لي يومي بغلاستك دي وجبتلي صداع
ودوخة!!

ترتّبك وتحاول أن تداري حَرَجهَا أمامي، أخيراً شعرت أنّها
تجاوزت حدّها معي، ثمّ تقول لي:
- خلاص يا مدام، أنا أجصد يعني إنّه يورّك تطلعي تاني
وبعدين تنكبّي على وشك، فخلاص معلّش خدي الكرتونة أهّي،
وأنا هاخذ السّلم أوّديه المطبخ.

أخذتُ منها الكرتونة، ثمّ جلست على السرير، واستغرقتني
البحثُ في أوراقِي، وجعلت أقلّبُ فيها، فوجدت مواقفَ كثيرة
مُزعجة، صحيح أنّ اجترارها مؤلم جدًّا، لكن في الوقت نفسه
القراءة تذكّرة، كي لا نكرّر أخطاءنا مرّةً أخرى، فقلّبت في الدفتر،
فوجدت أحداثًا كثيرة بطلّتها الرئيسية «حماتي»، ثمّ عاملة المنزل
التي تأتي البيت وهي تظنّ نفسها مفتش مُرسل من وزارة الصحة،

أو وزارة التموين، وحارس العقار؛ ذلك الشخص الذي يقف «يوسف» بيني وبينه حائلاً، ويقسم عليّ ألا أقرب منه خوفاً عليه من جنوني! و«همايا» العزيز الذي يشاهد معاناتي صامتاً، والكثير والكثير، فتأكدت أنني كنت محقة عندما قرّرت أن أستخدم دفتر «بوز البراد» لأدوّن رسائل لن أرسلها لهم، فقط أنفّس عن ضيق صدري منهم، وقد يكتب لي (أن أرسلها لهم يوماً ما).

فتحتُ الدفتر، وبدأت القراءة، وتصفّح ذكرياتي بشكلٍ سريع، ورأيت تاريخ آخر تدوينه، ثم طلبت من «هنية» أن تتركني وتذهب لتقوم بتنظيف المنزل، وأكدت عليها ألا ترعجني، فوافقت على مَضض، لكنها لم تتحرّك قبل أن تسألني بفضول غريب:

- هوّ إليه الليّ في الصندوق ده يا مدام؟ عاوزاني أساعدك وأنجله في أوضة التّلافزون؟
- لا..

أردّ عليها وأشاور بيدي فقط، فتنصاع لإشاراتي، وكالعادة تبرطم بالكلام وهي في طريقها خارج الحجرة! وتقول:
- يعني هو الصندوق هينجص منه حتّة لو نجلته لها، حاجة عجيبة! المدام ساعات بتعمل حاجات بجد عجيبة، هات الصبر يارب.

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصل لئ لك

عماد حمدي

بعد أن غادرتني «هنية»، وضعت دفترَ يومياتي جانبًا، وبدأت أستخرج من الكرتونة ألبومات الصور. استفتحت بصور المدرسة والجامعة، وصورتي في العمل والرحلات، ثم فجأة استوقفتني صورةٌ كنت قد التقطتها لأمي في أحد الأماكن العامّة، والتي تقابلنا فيها مع أحد العرسان وأمه، ولأنّ المكان كان ساحرًا، قمتُ بالتصوير فيه، ولا أدري لماذا هذه الصورة بالتحديد أعادت إليّ مشاعري الغاضبة من الرجال، ورغم أنني الآن متزوجة وأحبّ زوجي جدًّا، ولديّ أبناء أعشقهم، ولا أرى طعمًا للحياة بدونهم، لكنني كنت - ومازلت - أحسدُ الرجال لكونهم رجالًا، لأنهم يتمتعون بحقوق لا أتمتع بها، وفي أعماق أعماقي أرغبها وأتمناها بشدّة، على سبيل المثال لا الحصر؛ يستطيع الرجل البقاء بلا زواج، ومن دون تقريع أو همزٍ أو لمزٍ لكونه أصبح عانسًا لا يرغبه أحد!

(على مزاجه ده راجل)، هذه الجملة كانت تتسبّب لي في مشاكل بيني وبين أهلي، وأيضًا يستطيع السفر والعمل في أماكن بعيدة،

حرية الاختيار لديه واسعة، (أيام شبابي كانت الحياة غير الحياة الآن) ولأنني عشت حياتي كلها فتاة طبيعية- من وجهة نظري- لا أفكر في الزواج، ولا أشعر بأهميته، فلم يتملكني يوماً إحساساً بالنقص أو أي شيء من هذا القبيل، ولم تعترني تلك اللهفة التي تظهرها بعض الفتيات للارتباط، ولم أكن من نوعية الفتيات التي تأكل الحسرة قلوبهنّ إذا تزوجت الأصغر والأقلّ منهنّ جمالاً، (كلّ ده مليز منيش، أنا فرحانة بنفسي كده) فلا داعي لآتنازل عن حرّيتي، حتى لو كنت «بنت مش راجل» كما كانت تجربني أمي، لقد كادت أمي تجنّ بسبب إعلاني أكثر من مرّة أنني لن أتزوج، وأصابها الهمّ من هذا التصريح، وأصيبت بالتوتر والقلق، وأصبح زواجي هاجساً لا يفارقها، لدرجة أنّها كانت تسأل المعارف الذين تعتبر علاقتنا معهم سطحية جدّاً، ولا يجوز الجهرُ أمامهم بهذا الوضع، لقد كانت نظراتهم تمزّق كبريائي، فهم يشفقون عليّ من تأخّر زواجي، ولا يعرفون أنّني أرفض الزواج نهائياً، وأحياناً كانت تهمسُ برغبتها في تزويجي للأصدقاء وبعض الغرباء إذا ما فتحت سيرة تأخّر زواج البنات! حتى «أمّ سامح» بائعة الفراخ، سألتها لي عريساً! لم أكن أدرك أنّ الموضوع أصبح مرضياً، حتى كان اليوم الذي طلبت منّي أمي أن أمرّ على محلّ الدواجن بعد الانتهاء من عملي لأحضر لها

الدجاج الذي أوصتُ به «أمّ سامح» لغياب الصبي الذي يحضر
الطلّبات إلى البيت، فمررتُ على «أمّ سامح» التي استقبلتني بحفاوة
مبالغ فيها، وقالت:

- أهلاً أهلاً بعروستنا.

تلفتُ حولي أبحثُ عن عروستها هذه! لأنّه لا يوجد في المحلّ
سواي، فابتسمت لها وأنا مُندهشة من اللّقب، وما ألبث أن أتته إلى
أنّه لفظ يطلقه البُسطاء على البنات، فأقول لها: - أنا كويّسة الحمد
لله، إنّتِ كويّسة يا «أمّ سامح»؟

تقتربُ مِنّي ورائحة الدّم تفوح منها، فهي قد انتهتُ للتوّ من
ذبح وتنظيف الدجاج الذي طلبته منها أمّي، تبسم ابتسامة المنتصر
وتقول لي:

- يا «لبنى» يا بنتي عندي ليك عريس لُقطة، نقاوة بسّ مش
هينفع أحكيك تفاصيل، أنا هاكلمّ مامتك، أصل الكلام ده مينعش
نتكلّم فيه مع الصغار، بسّ انتِ قوليلها «أمّ سامح» هتتصل بيك،
علشان في عريس!

وقتها لم تكن لديّ رغبة أو هدف سوى الجري سريعاً، والقفز
داخل ماكينه نف الرّيش من فرط خجلي، لعلّي أجد هناك ريشاً
يغطّي احمرار وجهي، ويداري خجلي من تلك السيّدة البسيطة التي

تراني عانسًا! أحاول أن أتمالك نفسي ثم أقول لها:
- بجدّ! عريس! الله يا «أمّ سامح» بقالي كثير محدّش جابلي
عريس بريش ولا بفروّة!
تنظر إليّ المرأة باندهاشٍ لسخريتي، وتقول لي: مالك يا «لبنى»
يا بنتي؟! ريش إيه! هو أنا بقولك جابيلك ديك رومي؟!
أترجع عن سخافتي، وأقول لها:
- بهزر معاك يا «أمّ سامح»، حاضر، هابلق ماما... ثم أقوم
بتغيير الحديث، وأسألها:
- هيّ الفراح جهزت؟
فتناولني الأكياس وهي تنظر إليّ بحنان وطيبة، أتركها وأذهبُ
إلى نهاد أختي، لأستمتع باللّعب مع أبنائها، وأيضًا حتى تهدأ نفسي،
التي لم أفلح في تهدئتها.
أعودُ إلى البيت وأنا أشعر أنّي قد شارفت على الجنون، وما أن
أدخل من الباب إلّا وأجدُ أمّي غارقة في الضحك، وتقول لي:
- جالك عريس لقطه، متريش، هتريه على إيديك.
أسألها بتوجّس وزهق:
- مين ده إن شاء الله عريس الغفلة أبو الريش! ومين اللي جابه
المرة دي؟

تفجر هي وأبي في الضحك؛ لأن العريس هو «سامح» الذي لم يتخط العشرين، وما زال في المدرسة الصناعية: أنا أتزوج طفلاً؟! أنا

«لبنى عامر» أتجوز عيل صغير لسه بيكمل تعليمه؟ إيه ده!

لم أشعر أنّ الموقف ضاحك، بل سخيّف ومزعج، كيف يخطر ببالها أنني من الممكن أن أتزوج طفلاً ما زال يتعلّم، ومستواه الاجتماعي مختلف؟! أعلم أنّ أبي وأمي سيفضان، لكن كيف خطر

لـ «أمّ سامح» أنّي سأتزوج من ابنها الصغير؟!

الزواج تكامل وتكافؤ، ما هذا الهراء! أخاصم أمّي وأتهمها بأنّها تتسبّب في مهانتي باستعجالها زواجي.. وأطالبها بالكفّ عن البحث لي عن عريس، لقد كادت أمّي تُصاب بجلطة في القلب لخوفها عليّ من فكرة البوار المؤكّد، فأنا من وجهة نظرها لم يفتني القطار؛ بل فرمني، ولا أمل في زواجي بسهولة (بسبب دماغي الناشفة من جهة) وبسبب التبطرّ على الرزق!

وهل الرزق هو أن أتزوج أيّ شخص لمجرد أن أعير الحالة الاجتماعية في البطاقة من آنسة لمتزوجة؟! هل البطر هو أنّي أرفض غير المناسب؟ (أي عريس لازم أوافق عليه) سواء كان أقصر مني أو طول عمود النور، نحيفاً جداً أو سميناً سمينة مُرعبة، أعزب أو أرمل! ولا مانع من المطلّق مع أو بدون أطفال! فمن وجهة نظر أمّي

رفضني يعني بطر، ولن أتزوج لغضب ربنا عليّ!
لقد كنت أرفض الخطّابَ غريبِي الأَطوار من وجهة نظري،
وهذا حقّي، لكن أمّي كانت تقول إنّ العيب فيّ وليس فيهم! وإنّه لا
يوجد غريب أطوار إلا أنا!

أنا غريبة الأطوار؟! أنا التي ترتدي ملابس عتيقة، وأتكلم
بأسلوب قديم جدًّا لم أسمعهُ إلا من خلال أفلام الأبيض والأسود،
وكأنّ عماد حمدي خرج من أفلام الخمسينيّات، وتقدّم لي ليخطبني،
فكنت أقول لأمّي:

- يا ماما ده فارق شعره تلت وتلتين، وبيتكلم بمصطلحات
مسمعتهاش من «نونة» نفسها، واخده بالك من «نونة»، وكمان
بيشرب أعشاب، والشاي بيخلّيه يسهر، أقول لها وأنا أكاد أجن:
- والله يا ماما لتحكمني بالحقّ! أتجوزه ازاي وأنا أصلاً بحبّ
السّهر، أنا بشرب والقهوة وبعدها على طول أدخل أنا، لا يمكن
يا ماما، استحالة أوافق على الصّفات دي، لا يمكن.. فكان ردّها
العادي والمتوقّع:

- البطران عيشته قطران! خليك كده لما محدش يبصلك ولا يعبرك!
وقتها كنت أصرخُ بغضب وأنا أشعر أنّ الدّماء كلّها قد تدفّقت،
وقرّرت الخروج من شرايين وجهي من قوّة الغضب، وأقول لها:

- أنا يا ماما بطرانة ليه؟

أستعجبُ على حال أمِّي وقتها فهي لم تحضُر لي ظافر عابدين،
ولا إياد نصّار، ولا ابن ملك الأردن وأنا رفضت، واللّا يمكن ابن
رئيس الجمهورية مُعجب بجمالي وحُسني ودلالي وأنا قلت له آسفة،
أرفض هذا الزّواج! أقول لها:

- بجدّ يا ماما كفاية، هتخرّجي الرّخمة اللّي جوّايا وأنا
بحاول أوئدها.

في ذلك الوقت كانت جدّتي مازالت على قيّد الحياة، فردّت
علّيّ بتهكّم:

- تويديها! يا ساتر يا «لبنى» إنتِ مش عارفة إنّ وأد البنات حرام.
أقلّبُ نظري بين أمّي وجدّتي التي تبسم بخبث، وأقول لها:
- «نونة»، إيه الكلام اللّي اندلق في وشّي دلوقتِ وكان لطيف
قوي قوي، إيه السّكر ده يا روعي، لا.. لا يا «نونة» بلاش كده
علشان حاسّة إنّ بدأت أتحوّل لمجنونة رسمي وخايفة على نفسي!
وتشوّح لي بيدها، ثمّ تدفن رأسها في الكتاب الذي تقرؤه،
وتتلو بعض السّطور بصوتٍ عالٍ، فأضحك من التّلقيح المستر، ثمّ
أعود لأمّي وأقول لها:

- أنا مش هاتجوّز أيّ حدّ وخلاص.

وأُزِدُ بِقِصَّةِ أُخْرَى لِأَدْعَمَ كَلَامِي بِأَحْدَاثٍ حَقِيقِيَّةٍ وَليْسَ
بِمَجْرَدِ كَلَامٍ مَرْسَلٍ وَالسَّلَامِ، قِصَّةُ الْفَتَى النَّحْنُوحِ الَّذِي كَادَ
يُصِيبُنِي بِهَسْتِيرِيَّةٍ ضَحْكٍ فِي النَّادِي، وَلَوْلَا سِتْرُ اللَّهِ لكَانَتْ (جُرْسَةُ
وَمَادَّةٌ تَنْدُرُ لِعَضْوَاتِ النَّادِي اللَّطِيفَاتِ) فَأَقُولُ لِأُمِّي:

- فَافْكَرِ الْعَرِيسَ دَه لَمَّا سَأَلَنِي هُوَ أَنْتِ بِتَعْرِفِي تَسْوِيقِي الْعَرَبِيَّةَ
وَحَدِّكَ مَشَ بِتَخَافِي؟! عَادِي كَدَه يَعْنِي! وَاللَّهِ يَا مَمَا وَقْتَهَا قَلْتِ فِي
نَفْسِي وَأَنَا مُبْتَسِمَةٌ لَهُ بِرَخَامَةٍ:

- نَعَمْ يَا حَلْوَةَ يَا كَمِيلَةَ أَنْتِ! ... وَحَدِي! لَا هَاجِبَ الْفَرِيقِ
الْقَوْمِي يَسُوقُ مَعَايَا!

إِيهِ الرَّاجِلُ الْغَرِيبُ دَه مَا لَهُ لَوْسِي كَدَه فِي نَفْسِهِ! فِينِكَ يَا (يُوسُفُ
وَهَبِي) تَطْبَطُّهُ! طَيِّبَ يَا مَمَا خَلِينِي أَنْعَشْ لِكَ الذَّاكِرَةَ شَوِيَّةً، فَافْكَرِ
كَمَا نَمَّا قَالَ لِي مَسْتَعْرَبٌ وَمَسْتَعْجَبٌ:

- أَنْتِ بِتَشْتَرِي حَاجَاتِكَ لَوْحَدِّكَ؟ وَاللَّاهُ لَا زَمَ يَنْزِلُ مَعَاكَ حَدَّ
مِنْ أَصْحَابِكَ أَوْ مَامَتِكَ؟! أَصَلْ أَنَا بِحَبِّ ذَوْقِ مَمَا قَوِي، وَلَا زَمَ
نَنْزَلُ سِوَا مِنْ أَيَّامٍ مَا كُنْتَ بِيَبِي صَغِيرًا!
فِي سَرِّي كُنْتَ بِقَوْلٍ:

- يَا بِيَبِي أَنْتِ SO CUTE، وَأَحَاوَلُ السَّيْطِرَةَ عَلَيَّ نَفْسِي، وَاللَّهِ
يَا مَمَا كَانَتْ مَسِيطِرَةً عَلَيَّ فِكْرَةَ إِيْنِي أَضْرَبُهُ وَاحِدَةً خَطَّافِيَّةً

أكسر له فكّه، وطبعًا كنت بردّ عليه وأنا هنفجر، وابتسامتي
الرّخمة ماليه وشّي: -

فعلاً مينفّش تنزل وحدك، أصل ممكّن البيّاع يدّيك بضاعة
مغشوشة يا حرام، ويضحك عليك!

اللّي كان غايظني يا ماما إنّه كان بيتسم ويهزّ راسه موافق
على كلامي، وطبعًا أكيد أخذتِ بالكِ إنّي كنت عمّاله أفرك علشان
نمشي، وفكره لما وشوشتك:

- يلاً يا ماما علشان ميصحّش نقعد أكثر من كده، وقت
الرّضعة جه، والبيبي لازم يرضع، وربّنا يسترها وأمّه تكون معاها
البيرونة! معقوله بعد كل ده مصرّة يا أمي يا حبيتي إني بطرانة!
وربنا هيعاقبني؟

وأتذكر أنّنا يومها عندما عدتُ للبيت كنت أصرخُ كالمجنونة
وأقول لأمي:

- يا ماما، إيه ننوس عين مامته ده، نعمممممم! ماما
بتجيب الهدوم، ومستغرب إنّي بسوق العربيّة لوحدي، إيه إن شاء
الله مشروع البنت اللّي ضلّت طريقها ده وراحت عالم الرّجال!! يا
ماما، أنا أرجل منه!

وكأنيها أمامي تضحك ضحكتها الرّائقة، أتذكر أمّي وهي تخفي

وجهها بين يديها وتقول: - مش ؤمكن، مش قادرة أصدق... ثم
تردف وهي تضحك بهستيريا لم أعتدها من أمي:

- اسكتي يا «لبنى» كان هيغمي عليّ من كتر ما أنا كاتمة
الضحك، أصل كلّ شوية مامته تلعبله في شعره، وتمسح على إيدته،
وكأّتها بتطمّنه ما يخافش أو ما يتكسفش، ههههههه شكلها عرفت
إنّك غوريلاً، وبتاكلي العرسان!

أصرخ وأقول لها:

- بتضحكي يا ماما، يا «أحلام» حرام عليكم، والله مايرضيش
ربّنا اللّي بتجيبهم دول، أحكي كمان واللّا خلاص، يا ماما أنا مش
غريبة الأطوار، ولا عجيبة، أنا بشوف أشكال ملعوب في جيناتها!
ثم أردف بحماس لإقناعها بوجهة نظري:

- طيّب فاكراه الأفتدي اللي عاوز يتعرّف عليّ الأوّل وناخد على
بعض، وبعدين لو ارتحنا لبعض يجيب مامته البيت! عاوز يتصرّح
معايا (دا إسمه نظام شقط)

أنا «لبنى» اللّي أصلاً شايفة إنّ الرجالة ملهمش أيّ لازمة
يقولي نتعرف الأوّل ونخرج مع بعض! يا ماما ارحميني، أنا هاموت
مقهورة من العلل اللّي بشوفها.

بيد أنّ كلامي هذا لا يؤخذ عندها مأخذ الجدّ، فهي تهدأ

قليلاً ثم تعود لممارسة الصَّغُوط، وكأنَّ ما قلناه لم يُقَلِّ، وأنا ما زلت
المخطئة المتبطَّرة! أشكو إليك يا ربَّ! ما ذنبي إذا لم أجد أحدًا
من الخطَّاب يناسبني، ويستطيع أن يقتحمَ عقلي وقلبي فيقنعني به
زوجًا، لماذا تحاسبني أمي على ذنب لم أقترفه، لماذا تنكر عليَّ حقي
في الاختيار السليم؟!

ولكنَّ بالصَّدفَة البَحْثَة حدث ما لم أتوقَّعه! لقد اقتحم
«يوسف» حياتي دون إذن منِّي، وبمجرَّد رؤيته انتابني إحساسٌ
غريب بالارتياح، وهذا الإحساسُ أبدًا لم أشعر به تجاه أيِّ خاطب
رأيته، وبالتأكَّد من هنا بدأ الغُلب الحقيقي!

أسمعُ نقرًا على الباب، وقبل أن أردَّ تدخل «هنية» مسرعةً تقول لي:
- يا مدام، هتطبخي إيه النهارده؟ لحمه واللَّافراخ علشان
أنزَّهم يفكِّوا من الدلاجة، على ما تنتهي من اللَّي بتعمليه. ثمَّ تُردِّفُ
بفضول سخيف:

- صحيح هو انتِ بتعملي إيه يا مدام؟
أضعُ ورقةً صغيرةً في الصَّفحة التي وقفت عندها وأقول لها:
- مش هردِّ عليكِ وملكيش دعوة باعمل إيه؟! هو انتِ جوزي
يا بنتي علشان تسأليني بعمل إيه!

- «هنية»، هو انتِ عمرِكِ طبختِ أو دخلتِ المطبخ غيرِ علشان

تساعديني؟ هل حصل وطلبت منك مرة إنك تطبخي مكاني؟!

تضحك بخبث، وتقول:

- يا مدام أنا عندي 17 سنة تجريبًا، وعلى وش جواز، لازم

أتعلم الطبخ، واللّا انتِ عاوزاني أروح لبيت جوزي وأنا خاية؟!

أقول لها:

- أولًا إنتِ عندك 16 سنة مش 17، ثانيًا أول ما تتخطي

هاعلمك الطبخ، أمّا دلوقتِ إمشي انجري من هنا، ويلا من فضلك

متدخليش عليّ تاني.

تردّ عليّ سريعًا:

- طيب يعني لو لا جدّر الله حتى لو حصلت مصيبة

مدخلكيش؟! عادي مجوليكيش؟

ألتقطُ ألبوم الصور وأذفها به، فتتفاداه وتخرج سريعًا وتغلق

الباب خلفها، أستغرب من تصرّفاتها الطفولية، ورغيها غير العادي،

وأحمد الله أنّ «بسنت» نائمة! فوجودها و«هنية» يعني يوجد احتياج

مُلمح لقوات مكافحة الشغب، أتناول دفتر يومياتي، وأفتح على الجزء

الخاص بزواجي من «يوسف» وأقرأ ما سطرته فيه منذ سنوات.

تقدّم لي «يوسف» عن طريق صديقةٍ مشتركة مع أخته إيمان، وكان يعتبر زواج صالونات كما يقولون، ذهبتُ للمقابلة في بيت صديقتي، مع أخي محمد وشقيقتي نهاد، ويومها أقسمتُ عليّ أمي ألا أرتدي نظّارتي، وقالت لي: بلاش تلبسي النظّارة يا «البنى» يا حبيبتي؛ علشان بتاكل نصّ وشك، وبتخبّي عيونك الجميلة، وكان مادام أخوك اللي هيسوق يبقى خلاص خليك من غيرها؛ هتحتاجيها في إيه؟!!

ولا أعلم كيف طاو عني قلبي ولم أعارضها؟! صحيح أن أخي هو من سيقود السيّارة، ولكن أنا.. أنا من سيقودني؟ وفي الميعاد بالدقيقة كنا عند صديقتي، استقبلتنا هي وأمها والدها، ورحّبوا بنا، ثم لم نلبثُ إلا قليلاً، حتى حضر «يوسف» وأخته إيمان، وعندما وقع نظري عليه شعرتُ بارتياح وطمأنينة غريبة لم أشعر بها من قبل مع أيّ من الخطّاب الذين أنهكوني بمحاولة بلعهم، وتقبّل شخصياتهم الغريبة، وكما كانت تقول جدّتي:

- لما يبجي النّصيب الواحد منّا بيعمى ويبقى أطرش وأخرس

كان!

لقد كان شرطُ حدوث القبول مقرونًا بحدوث إعاقة ثلاثيّة، إنّه لأمرٌ غريب، ولكن الحمدُ لله لم تصبني هذه الإعاقة عندما وافقتُ على «يوسف»؛ بل كنتُ بكامل حواسي، ولكن بعد الزواج أصبّتُ بالعديد من العاهات! وأثناء اللّقاء لم أستطع أن أتبيّن ملامح «يوسف» جيّدًا، بسبب ترّكي النظّارة في البيت (الحقيقة أنا أخذته بالشبه كده) وبعد

انتهاء المقابلة قلت لأختي؛ وأنا أمني نفسي أن يكون مثل فتى أحلامي:

- صحيح يا نهاد هو العريس شبه «فلان»؟!

تضع يدها على صدرها وهي تضحك من غرابة السؤال،
وتقول:- لا طبعاً خالص. أفاطعها: - خالص! يعني تقصدي إنه
مثلاً شبه «علان»؟!

فتضحك مني، فيتابني شعور بالندم لعدم تمكّني من رؤية
العريس بوضوح، ثم أقول لها: - صحيح أنا إيه اللي هيوصلني
ل«علان»! وبعدين بقى إيه الصّداق ده؟! أتمتم في نفسي وأقول:- إيه
الحظّ العجيب ده، هو أنا شفت مين! ليكون «حسن الأسمر»!
ثم أُرِدِفُ:- عموماً عندك حقّ، دا أنا كبيرى يكون شبه عمّ رزق
صاحب كشك الجرايد اللي على أوّل الشارع.

تبسّم وتقول وهي تكاد تسقط أرضاً من ردة فعلى التي لم تتوقّعها:
- ليه بتقولي كده تصوري دا شبه «عادل مجدي» (واحد قريينا).
لا أتمالك نفسي من الفرحة، وأصرخ قائلة:

- إنتِ بتقولي إيه! أبو عيون ملوّنة وشعر أصفر! هو العريس أمّور
كده! يا حلاوة أنا مش مصدّقة نفسي، ده أنا كنت بتمنى عريس شبه
أحمد مظهر مثلاً، وده مكنش فارس أحلامي، ده كان أحلامي كلّها،
علشان أحلامي لا تجرؤ على أبعد منه! يا سلام يا نهاد! قلبي هيقف..
ثم فجأة أنتبه وأستدرك والدهشة تغمرني، وأقول لها مستنكرةً:
- ودا أنا عجبته في إيه؟! أكيد مكنش لابس نصّارته هو كيان!

فتضحك نهاد وتقول: - ليه بتقولي كده على نفسك؟! والله إنت تستاهلي كل خير يا «لبنى»، وعمومًا يا ستي العريس والله شيك وخليوة وهادي ورايق.

وفجأة وكأنك أغلقت الأنوار كلها، تذهب عني نهاد وتنشغل بأبنائها وتتركني أحلق بعيدًا مع أفكارني، فأدخل غرفتي وأرقص من الفرحة، لقد كان معظم الخطّاب الذين رأيتهم مزيجًا من أحمد زكي و«محمد رمضان»، وعندما يكون مميزًا بالطول فيكون شبه «علي ربيع»، أمّا وأن يكون شبه «براد بيت» فهذا هو المستحيل الخامس من وجهة نظري طبعًا! أنظرُ إلى نفسي في المرآة وأقول بصوت عالٍ:

- يا ناس في حدّ في الدنيا الواقع بتاعه يكون أصلي، وأحلامه هي

النيجاتيف

(عريس ألوان مش أبيض واسود، يعني عيال خواتم، يعني عيال إشي أشقر على إشي عيون عسلية ومقططين)
من الآخر يعني زيّ عيال الإعلانات، اللهم صلّ على النبي، يعني صبرت ونولت يا لبنى، سبحان الله! الحمد لله إن نفسي كانت مسدودة عن الجواز علشان أستنى الخليوة ده، أيوه بقى، وهنافس أمريكا وفرنسا!

أرجو أن تطلقوا لخيالكم العنان، لتتصوّروا كم كانت سعادتني بعريس (يعجبني وأرتاح له نفسيًا وأيضًا وسيم)، لقد كدت أطيّر من السعادة والفخر.

لفصل لربيع ترتر

بعد المقابلة التي تمت في بيت صديقتي بأسبوع، حضرت لزيارتنا أسرة «يوسف»، وذلك لطلب يدي رسمياً من أبي وأمي، ولن أصف لكم كيف كانت المقابلة، فأنتم ستكتشفون كيف كانت، ولن أعبث بخيالكم وأفرض مفرداتي! لا.. بل سأترككم تطلقون العنان لخيالكم، وأثناء القراءة قد تعودون مرة أخرى لهذه الفقرة لتتصوّروا كيف كان اللقاء! فتكشيرة أم «يوسف» كانت الشيء المميّز في اللقاء، تحدّد يوم قراءة الفاتحة والخطوبة بعد زيارة أسرة «يوسف» بأسبوعين، ويوم الخطوبة كانت ابتسامتي لا تفارق وجهي، لدرجة أن أمي سحبتني من يدي وقادتني إلى حجرتها وهي تبسم للحضور حتى لا يظهر لهم مدى قلقها، وبعد أن أغلقت باب الحجرة قالت لي:

- اقفلي بؤك يا «لبنى» شويّة، شكلك زي زينات صديقي اللي ما صدقت لاقّت عريس، إتقلي شويّة! فأبتسم أكثر رغماً عني، وأحتضنها وأقول لها:

- ما انتِ عارفة إنَّ الابتسامة دي عادة عندي ومش مقصودة
والله، ومش بعملها وأنا واخدة بالي.

فما كان منها إلا أن قالت:

- لمي نفسك يا «لبنى» هتكسفينا، حماك عمالة تمصمص
شفايفها وشكلها هتعمل زيّ الستّ بتاعة فيلم أمّ العروسة، الستّ
قرّبت تطلّع دخان، وانتِ زيّ ما يكون عمرك ما جالك عريس.

ثمّ تقرصني من أنفي، وتقول:

- يا بنتي اهدي شوّية، ده أنا كنت بدأت أشكّ إنك هتتجوّزي
من كتر رفضك للعُرسان، والله العظيم متصوّرتش تبقى هبلة
وخفيفة كده، فيك إيه يا بنتي هتفضحينا!
أقربُ منها وأضعُ يدي على خصرها، وأضمّها كأننا سنرقص،
ثمّ أقول:

- ماما آه صحّ طبعًا عمري ما جالي عريس قمر كده! يا لهوي،
أنا حاسّة إنّ زينات صدقي الليّ جوّايا عمالة تكبر وخايفة أقول تترتّر.

تقبّلني على خديّ وتزيح يدي عنها برفق، ثمّ تبسّم وتقول:
- تترتّر في عينيك، عموماً انتبهّي، أمّ يوسف مش سهلة، الحليوة
ده معاه أمّ هتخليك تلفّي حوالين نفسك!

أهزّ كتفي بلا مبالاة، وأقول بثقة العارفين:

- مفيش حلاوة من غير نار، متقلقيش يا ماما على بنتك، أنا مروّضة وحوش. تتمتم في سرّها بالدعاء، ونخرج من الحجرة فتذهب هي لتجلس بجوار عمّتي «وصوف» التي ترمي «يوسف» بنظراتٍ تنمّ على أنّه سقط في الاختبار، ولم يُرق لها! ثمّ تناديني فأقترُبُ منها، فتقول بصوت هامس: - خمس دقائق وتعالى ورايا، عاوزاك ضروري، إوعي تطنّشيني.

أبتعدُ عن عمّتي، وأذهب لأقف بجوار نهاد التي تقبلني وتقول لي:
- مبروك يا «لبنى» يا حبييتي... ثمّ تتساءل باندهاش:
- صحيح يا «لبنى»، هو إنتِ ليه مش قاعدة في الكوشة إنتِ وعريسك، ما لكم عاملين زيّ الليّ في عيد ميلاد، وكلّ واحد منكم قاعد مع أصحابه.

أردّ عليها بصوتٍ كلّه فرحة:
- عادي يا نهاد، إنتِ هتتوقّعي منّي إيه غير كده، بسّ طبعًا طنط
«سعاد» هتموت منّي، بسّ مش مُهم، المهمّ أنا بجدّ مبسوفة!
تدعو لي بالتوفيق، ثمّ تتركني لتلحق بصغيرها الذي يريد أن يأخذ شيئاً من يد ابن بكر، وهو أخو «يوسف». وما أن لَحَت عمّتي قد تحرّكت حتى لحقت بها فأدخلتني الشرفة، وقالت لي: - إيه يا بنت يا «لبنى» العريس الإتمّ ده! ما له دمّه ثقيل كدا؟!!

أحتضنها وأقول لها: - ما لهُ يا عمّتو! ما هو قمر أهو، وبنغز في
خدوده، حاجة تفتح النفس على الجواز. تقلب شفايفها بضيق، وتقول:
- هوّ الجواز بالحلاوة، مش شايفة أمّه قاعدة زيّ الكبّة ازّاي؟!
يا ستّار، واللّا حماك ده ميينطقش يا بنتي، إنت هتتجوّزي من العيلة
دي ازّاي!

فأغمز لها وأقول لها: - عادي يا عمّتو دي خطوبة.. يعني وارد
منكملش، كبري يا ست الكل... ثمّ أبتسم لها مشاغبة إياها، فلا
تردّ عليّ الابتسامة أو حتى تتمنّي لي التوفيق، أضحك وأقول لها: -
هنجربّ يمكن يطلع حلاوة وأخلاق.

وبعد أن هممتُ بالمغادرة، أترجع وأعود لها فأقول بجديّة:
- يا عمّتو ادّعي لي بسّ، وآدينا هنشوف في فترة الخطوبة دي
هنعمل فيها إيه! وفجأة أسمع صوت أبي ينادي:
- يا «لبنى»، إنت فين؟ إنت يا بنتي يا حبيبتي، تعالي.

أكلّم نفسي: - إيه الفضايح دي يا عمّ، إفرض كنت في الحّمّام
عادي يعني، ولازم تعرّف الناس إنّي اختفيت!!... أخرج وأنا أشعر
بالحرج، وأقول له:

- أنا أهو يا بابا يا حبيبي، أصل عمّتو كانت عاوزاني، بتبارك
لي على جنب!

فينظر لعمّتي ثم لي، ثم يتسم ابتساماً أفهمها، وعمّتي أيضاً تفهمها، ثم يرفع صوته منادياً ويقول: - يا «يوسف» يا ابني أنت فين انت كمان؟ تعالوا بس خمس دقائق نلبسكم الشبكة وانطلقوا تاني، وكل واحد يروح في الحتّة اللي تعجبه.
ثم يكلم حمايا مستنكراً:

- أوّل مرّة أشوف عروسة وعريس مش قاعدين مع بعض يوم خطوبتهم! إيه الولاد دول! مكش له لازمة نعمل كوشة!
يتسم حمايا ويهزّ رأسه دون تعليق، فقد قامت حماي بالتعليق نيابةً عنه وقالت:

- هيقعد على الكرسي وحده!! ما هي العروسة عمّالة تننطط!
فيتسم أبي لي ولا يردّ على سخافاتا، ويرحل بعيداً عنها، أمّا أنا فأصوّب لها نظراتٍ باردة، وأبتسم لها ببلاهة، ثمّ أذهب مع أبي.

استمرّت خطوبتنا حوالي خمسة أشهر، ولم نكن نستطيع الخروج أثناءها بمفردنا، فكان لا بدّ أن يخرج معنا أيّ فردٍ من العائلتين، المهمّ الآن نكون بمفردنا، لأننا لسنا عاقدين (مكتوب كتابنا)، وبالطبع لم يكن «يوسف» ليغفل عن كوني أقوم بتوزيع ابتساماتي على كلّ من يقابلنا؛ من أوّل عامل المصعد، والجرسون؛ إلى الزبائن، فكان يعلّق قائلاً:

- يا «لبنى»، أنا عارف إنك بشوشة ومبتسمة على طول، بس
إنت كده خلّيتني أتأكد إنّي خاطب مرشحة في الانتخابات البرلمانية،
إنتِ ليه ماشية نفرقي ابتساماتك كده على الناس؟!
فكنت أبتسم ردًا على كلامه، وأجيبه:

- مش عارفة يا «يوسف» والله، طول عمري كده، أنا بلاقي
نفسي ببتسم في وشّ الناس من غير ما أحسّ.
ثمّ فجأة تتقمّصني الشريرة النائمة في أعماقي، فأقول بسخرية
تكسوها الجدّية، وبصورة احترافية قد لا يَفطن إليها «يوسف» لأنّه
حديثٌ عهدٌ بي:

- «يوسف»، هو أنا محتاجة علاج؟ ليكون عندي مشكلة في
العضلات، أو يمكن مُصابة بمرض التبسّم اللاإرادي!
وبصورةٍ مسرحيةٍ أظهر الحزن وأنا أسأله: - واللّا إنتِ إيه رأيك؟
فيردّ عليّ بهدوء متجاهلاً كلامي، أو- كما أظنّ- لم ينتبه
لسخريتي اللاذعة:

- لا إنتِ محتاجة بسّ تمسكي نفسك شوية علشان بؤك المفتوح
ده ممكن يجييلك صداع ومشاكل مع الناس؛ إنتِ في غنى عنها.
طبعًا أفرح بكلامه، وأشعر أنّه إمّا أنّه طيب بشكل رائع ولم
يفهمني بعد، وإمّا أنّه يفهمني ويتجاوز عن سخافاتي، وهذا دليلٌ

على أن لديه القدرة على التعامل مع طبيعتي الغريبة عنه، وأنه طويل البال وصبور! كنت أقول في نفسي بعد أي حوار يظهر فيه طيبة نفسه: - ما أروعك يا «يوسف»! عيبك الوحيد (سعاد حماتي)، فهو لا يؤنّبني على تصرفاتي؛ بل كان يعاملني برفق، ويتحمّل جنوني بصبر، وطبعاً حسن خلقه هذا كان سبباً في أن حبي له يزداد يوماً بعد يوم.

فترة الخطوبة وعقد القران من أجمل الفترات الرومانسية في حياة البنات، أمّا أنا فكانت كلها أحداثاً ومواقف كوميدية وساخرة، تنفعني حالياً؛ فعندما أتعرض لمواقف تضايقني، أفتح صندوقَ الذكريات القابع في عقلي، وأجلس وحدي أتذكرها، فتخرجني من ضيقي وزهقي إلى براح ذكريات باسمه، كلّها مرح وبراءة، وانطلاق.

ومن المواقف التي لا أنساها، عندما كنّا نجلس مع الأصدقاء أو المرافقين لنا في أيّ مكان عام، أو حتى في الزيارات الأسرية؛ وتبدأ الحوارات في الاشتعال وتسخن النقاشات، نندمج فيها، فيسرقني الوقت ما بين الردّ والتعليق والضحك، ثمّ أجدني انتهيت من قهوتي أسرع من المعتاد وهي ساخنة جداً، كدتُ أجنّ ولم ألبث طويلاً في حيرتي، حتى أمسكت «يوسف» بالجزم

المشهود، وجدته يضع فنجانَ قهوتي بعد أن شربه، فقلت له:
- مسكتك! إنت بقى اللي بتخلص على قهوتي ونسكافيهي
وحاجاتي، ومخليني هاتجنن وألف حوالين نفسي! وبدأت أشك في
نفسى وأقول إنى إتغيرت ومزاجي اتحول!!
ثم بجديّة ساخرة قلت له: - لما يا «يوسف» نفسك في قهوة
زيادة ما تطلب لنفسك قهوة دُبل، واللّا قهوتي فيها ترياق! بجدّ أنا
متغاظة منك.

فينفجر ضاحكًا وتغرورق عينه بالدموع، وجميع الجالسين، ويقول:
- الفكرة مش في القهوة، الفكرة إنك إنت مش دريانة بنفسك،
ده أنا بعمل كده من أول يوم اتخطبنا فيه، وأنا بشر ب نصّ كوبييتك
ولا انت هنا، وكلّ مرّة أقول هتاخذ بالها أو تحسّ إن في حاجة
غلط، هتنتبه! مفيش فايده، طيارة في ملكوتك ومرفرفة بجناحات
الروقان، مش معقول بالسّرعة دى حاجتك بتخلص! يا «لبنى»
إنت حكاية فعلاً! أنا كلّ يوم أكتشف فيك ميزة جديدة.

وما أن ينتهي من كلامه، حتى أتذكر شيئاً كنت أضمره في نفسي
منذ وقت، وهممت بالسؤال، ثمّ سكتُ خوفًا من سخريته، فقد
أصبحتُ أضحوكةً بسبب عدم تركيزي، ثمّ يضغط عليّ السؤال
ويلحّ وأنا أنحيه جانبًا، وبمجرد أن نركب السيارة في طريق عودتنا
حتى وجدتنى أسأله بجديّة:

- «يوسف»، والله لتقول الحق، هو انت برضو اللي كنت بتاكل الفشار بتاعي في السينا؟! لأن الموضوع ده مجنني ومش قادرة أقول عليه لحد! أصل مش معقول أكل الكمية دي كلها وأخرج جعانة وريقي مش ناشف!

يضحك لدرجة أنه يوقف السيارة، فقد كان سؤالي جادًا جدًّا، وبدا عليه الخطورة من نبراتي، فقال وهو يضحك والكلمات لا أستطيع استيضاحها من فرط الضحك:

- أيوه أنا يا «لبنى»، أنا اللي كنت بأكل الفشار ونصّ الشيكولاتة، بس انتِ مكنتيش واخدة بالك!

أنظر له بغضب إنسانٍ اكتشف - فجأة - غباءه، ثم ما ألبث أن انفجر في الضحك وأقول له: - والله يا «يوسف» هتندم، خليك فاكِر اليوم ده كويس؛ لأنّي أكذلك إنك بعد الجواز هتقول حقّي برقبتي. يضحك من ردّ فعلي، ولا يعلق على كلامي، وقتها اكتشفتُ أنّ «يوسف» متمسك بي من أجل (عرق العبط والدّهولة) الظاهر على تصرّفاي (رغم إنه غير حقيقي)، وحقيقة الأمر أنا مركزة جدًّا، والدليل شكواه منّي بعد الزواج (إني كابسة على مراوحه) على حدّ قوله، لكنّ بالتأكيد أحيانًا أفصل من ضغط الواقع.

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصلُ لِح مس

فراو سامحون

أُغلقُ الدَّفتر، وأقومُ لأحضر ألبوم الصُّور الذي قذفت به «هنية»، فأجد صورةً من صور (كتب الكتاب) كانت قد التقطتُ لنا أثناء عقد القران، لقد سقطت نتيجة قذفي لـ«هنية» بالألبوم، أنظرُ إليها بحنينٍ جارف، أراني فيها سعيدة وفرحةً بشكل لم أتصوِّره أنا نفسي، وقبل أن أستكمل تصفُّح الصُّور، يساورني هاجسٌ أنه هناك شيء؛ لعدم وجود أيِّ مقاطعات من «هنية»، فأضع الألبوم وأفتح باب الحجرة بهدوء، فيصل إلى مسامعي صوتُ «هنية» وهي تغني ومنهمكة في العمل! فأخرج على أطراف أصابعي وأنظرُ لحجرة الأولاد فأجد «أدهم» و«رامي» و«بسنت» نائمين، لقد نامت «بسنت» على سرير «أدهم»، ونام هو على الأريكة، فهي أحياناً كثيرة تطلبُ منها أن تنام معها، فيرقُّ لها قلبُ «أدهم» ويدعها تنامُ على سريرهِ.

ثم تقزع ذاكرتي المهمة التي من أجلها أخرجتُ دفترَ ذكرياتي؛ فأتذكَّر أنني أريد أن أدوِّنَ أحداثَ أمس قبل أن أصاب بفقدان جزئي لأحداثه، فأذهب مسرعةً إلى حجرتي، وأجلس على الكرسي

المقابل لباب الحجره، وبدلاً من تناول دفتر يومياتي للتدوين فيه أعودُ لألبوم الصور أتصفّحه! فأرى صورة أبي وأمّي، والسعادة المرسومة على وجهيهما، والبسمه التي لم تفارقهما طوال ذلك اليوم، وأيضاً أشاهد صورَ حماتي وهي مكفهرة، وحمايا وهو لا يُبدي أيّ تعبير، وحببتي إيهان وهي مُبتسمة، والفرحة تُظهر في لمعة عينها، ونهاد ومحمد أخي، حقاً كان يوماً رائعاً مميّزًا، لبت السعادة التي كان يحظى بها ذلك اليوم تغمرُ باقي أيام حياتي.

مرّة أخرى تأخذني الذكريات، فأضع الألبوم جانباً وأغمضُ عيني، فتنهمر علي تفاصيل ذلك اليوم؛ بل والأيام التي سبقته، فتذكرت أنه في أحدها، وبعد مكالمة سريعة من «يوسف» لأبي، لم أعرف محتواها إلا عندما ناداني أبي، وقال:

- طبعاً يا «لبنى» إنتِ حبيبتي، إنتِ عارفه إنك أقرب عيالي لقلبي! عاوز أقولك إن اللي بيربي قطة بتصعب عليه لو خرجت ومرجعتهش، فما بالك ببنتك اللي خللت عنده وقربت يا «لبنى»- يعني على رأي جدتك- ريحتها تطلع من الركنة ومن القعدة... وتدمع عيناه من الضحك وهو يرى تعبيرات وجهي نتيجة كلمة (ريحتك تطلع) فيقول لي:

- معلش يا «لبنى» يا بنتي القافية حكمت! وبصراحة تعبيرات

وشكّ مخلّتينش قادر أوقّف الكلام.

قلت له بذهول:

- بابا، إنت بتقويّ آسف بعد الوصف البليغ ده، والقافية حكمت؟ ليه كده! هو انت هتطردي من البيت، واللّا ناوي على نيّة وحشة من ناحيتي معرفهاش؟ ليه المقدّمة الغريبة دي يا ابو محمّد يا غالي! ماشي «خلّلت» عندكم في البيت مش مُعترضة! بسّ هو علشان خلّلت ترميني برا البيت!؟

ضحك حتى دمعت عيناه لأنّه ظنّ أنّي أتحيلّ أنّه يريد طردي من البيت، رغم أنّي كنت أسخر من الطريقة التي تكلم بها معي، قام من مكانه ثمّ احتضني وقال:

- بصراحة حبيّت أهزّر معاكّ علشان الموضوع صعب على نفسي جدًّا، رغم أنّه يوم الهناكّ إنّي أشوفك في بيت جوزك، خليّني أقولك.. أقاطعه وأقول:

- ما هو إنت بتقول يا حاج، هو أنا قلت حاجة، شكلك عايز تديهملي يا بابا النهارده، هات وأنا هاغمّض عنيّا، النهارده شكله مش يومي، أنا قلبي حاسس من الصّبح إنّ اليوم ده جاي لي بضهره، مادام اصطبحتّ فيه بأّم عزّت!
ينظر لي باستغراب ويقول:

- إيه يا بنتي الهرتلة دي، في إيه؟! اسمعيني... ثم يأخذني في
حضنه، ويمسح شعري بيده وكأنني قطعة صغيرة، ويقول:
- أنا بجدّ ارتحت لـ(يوسف)، وفعلاً بثقّ فيه، هو عاوز يكتب
الكتاب في أقرب وقت!

ثمّ يدفّعني برفقٍ عن حضنه ويجلس أمامي في انتظار ردّي!
وعلى عكس ما كنت أفكرّ أو أخطط وجدّتي أقول لأبي:
- موافقة. اللي تشوفه يا بابا.

لقد كانت موافقتي مفاجأةً لِنفسي أكثر من أبي الذي تبدّل القلق
لديه إلى راحة، وارتسمت ابتسامة عريضة على وجهه، لقد كان خائفاً
من ردّ فعلي، ثمّ قام مرّة أخرى واحتضني، وقال لي: - الحمد لله،
بنتي حبيبتى عاقلة وراسية..

أنظرُ إليه ثمّ أتلفّت حولي متسائلةً: - مين دى اللي راسية
وعاقلة؟! وشعرت وقتها بصدق المقولة:
(أبويأ بيشتغلني واللا إيه)؟!

القران عُقد في المسجد، وكانت السعادة ترفرف فعلياً على المكان
وباديةً بصدق على وجوه الحضور (يظهر لأنّي كنت من وجهة نظرهم
معصّلة شوية)، لقد كانت أكثر اللحظات امتلاءً بالمشاعر والرّهبة

والخوف؛ هي اللحظة التي تكلم فيها المأذون مع أبي و«يوسف»؛ لقد كانت - صدقاً - لحظة مؤثرة، تابعت الموجودين «أمي» و«أخي» و«نهاد»؛ كانوا جميعهم متأثرين، ويبدو الانفعال على ملامحهم، إلا أبي، لقد كان متناسكاً ولم يبك مثل كل الآباء في هذه اللحظات، ولا حتى دمعت عيناه، لقد ساورني الشك أنه قد يفعلها ويبيكي، لكن في قرارة نفسي كنت أعلم أن قلقة عليّ ينهش صدره، وها هو قد أرسل ذلك القلق بعيداً عنه بزواجي من «يوسف».

بمجرد أن انتهى المأذون من عقد القران، وخطف المنديل - كالعادة - قامت الناس لتقبل «يوسف» وتقبلي، والأهل يتلقون التهاني، وفجأة - وفي خضم هذه المشاعر الحارة والتهاني والزغاريد - أجد أبي متجهاً إليّ يشق الجموع المهنئة حولي ومعه «يوسف»، ثم يأخذني من يدي لتتخذ ثلاثتنا مكاناً بعيداً عن الناس، ونظر أبي لي بحب، وعيونه تلمع بدموع يحاول أن يداريها وهو يتكلم بهدوء ومرح باد على صوته، ثم وجه كلامه لـ «يوسف» قائلاً:

- اسمع يا «يوسف» يا ابني، «لبنى» دي بنتي حبيبتي، نور عينياً وأغلى أولادي. أشعر بالسعادة تغمرني، وأقول في سرّي:

- أيوا بقى يا بابا، ورّيه وصايا الأبهات التقال قوي، ظبطه يا «عامر» يا حبيبي، أحسن أنا خايفة يشوف نفسه علياً... وأنتبه من

أفكاري على شكل «يوسف» وهو يتابع كلام أبي باهتمام وقلق،
فيُردف أبي بتمهّل قائلاً:

- «البنّي» بنتي أمانة عندك، حافظ عليها، وهتاخذها بضمان
ستّ شهر، تقدر خلال المدّة دي ترجّعها في أيّ وقت، أمّا إذا مرّت
الستّ شهر خلاص، مليس بنات عندك، إوعى تفكر ترجّعها لي،
معرفكش وقتها! (إتعامل بقى مع قسمتك ونصيبك)!

فيضحك «يوسف» من كلام أبي ويظنّه مزحة، وأنا أبتسم
كالبلهاء، وأريد أن أقول لأبي: - إيه يا عمّ الحاج! في حدّ يعمل كده
في بنته... لكنّي أسكت وأشارك «يوسف» ضحكّه أمّا مزحة، وأنا
أعلم يقيناً أنّ هذا هو تفكيره!

(مش هيسمح بأيّ انفصال بينّا، ولا حتى قبل الستّ شهر)
فهو يرى أن الارتباط شيء مقدّس، يحتاج منا بذلاً ومجهوداً
للحفاظ عليه، وإن كان يبدو مزاحاً فإنّه يقصده تماماً، رحم الله أبي
الحبيب؛ فقد توفي بعد زفافي ببضعة أشهر.

عدنا جميعاً إلى بيت عائلتي حتى نحتفل بالمناسبة، فأمي قامت
بتجهيز وليمة تليق بالقران؛ فهذا من وجهة نظرها أهمّ وأعقد
وأصعب زواج بالنسبة لأولادها، ذلك لأنّها كانت تظنّ أنّه لن
يحدث أبداً!

وبعد ما تناولنا الطَّعام وجلسنا فترةً مع الأهل والأصدقاء،
فجأة قرّر «يوسف» أن نخرج بمفردنا، أنا وهو فقط! واستأذن أبي
الذي قال له:

— ماشي يا «يوسف»، العدّاد بيعدّ من دلوقتِ، خلي بالك.
قهقه «يوسف» من مُزحة أبي، وأخذني من يدي ونزلنا
مسرعين، ودون أن يلتفتَ أو يستمع لنداء أمّه أو أخته، فقد قرّر أن
نحتفل باقي اليوم وحدنا، فكفى زحامًا و(عُزًّا) على حدّ وصفه،
والحقيقة— ومن وجهة نظري— كان وجودُ العُزال شيئًا إيجابيًا جدًّا،
على الأقلّ كرامتي كانت مَصونة في وجودهم، فالحجّة لعدم الكلام
الرّومانسي العاطفي في وجود الآخرين منطقيّة، وأنّ حيائه يمنعه
من مغازلتني، وهذا حقّه، فنحن كمخطوبين لا يصحّ أن يقول لي
كلمة (تبّل ريقني)، أمّا الآن فأنا وهو وحدنا، ومكتوب كتابنا،
فكان الصمت يدلّ على أنّني— على رأي سعاد الممثلة مش سعاد
حماتي— تزوّجت من أمين شرطة؛ الرّجل الغامض بسلامته (آه والله)
«يوسف» كان وما زال لا يستطيع أن يقول كلمة غزل واحدة، (وما
أشقى النساء اللّاتي يفقدن حلوَ كلامِ أزواجهنّ إذا ما بخلوا عليهنّ
بأيسر البذل)!

وصلنا إلى الفندق القريب من مطار القاهرة الدولي، وكان الهواء خارج الفندق رائعاً، واعترتني رغبةً في الجلوس في الحديقة أمام البهو لكنني لم أجرؤ على البوح لـ «يوسف» بما في نفسي، ثم دلفت إلى البهو متأبطاً ذراعه لأول مرة، وإحساسٌ غريب يتملكني، لا أعرف تصنيفاً له، لكنني كنت (طائرة من الفرحة) وكان الجو رائعاً محملاً بروائح الياسمين، والموسيقى الناعمة تنساب من بين جنبات المكان الواسع المقام على مستويين، وفضّلت أن نجلس قرب النافذة الكبيرة المطلّة على أشجار وأحواض زهور تبدو خيالية، والإضاءة المتساقطة عليها من أعمدة النور جعلها كأنها مشهدٌ من فيلم أسطوري، ورغم أن المكان مكيف، فإن رؤية الأشجار تتحرك خلف الزجاج.. منحني الإحساس بالتواجد هناك خارج البهو في الحديقة، ثم أشعر باسترخاءٍ ونشوة، وفرحة أذهلتني وكأنني كنت أشتاق للازتياب (وكنت محببة على نفسي) ولم يمرّ علينا وقتٌ طويل حتى انضمم للركن الذي نجلس فيه زوجان من الألمان.

ذهب «يوسف» لدورة المياه، فجلستُ أعبث بأشياء في حقيبتني حين عودته، ثم رفعت رأسي أتفقد الوجوه من حولي، فانتبهت إلى أن السيدة التي تجلس أمامي تبسّم لي بودّ، فبادلتها الابتسامة وندمت وقتها أنّي لم أكن ملّمة بالألمانية، حتى أتمكّن مع التحدّث

إليها، وطبعًا مازال شعوري بالفرحة يسيطر على كل تصرفاتي،
لدرجة أن تحيّلت أنني حين أتبادل معها الابتسامات، سأقوم بعمل
تنشيطٍ سياحي لبلدي! (إيه الأفورة دي) أفورة أفورة فعلاً!!

بعد قليلٍ من تبادل الابتسامات أقبل عليَّ «يوسف» وهو
متجهّم، ووجهه يُنذر بغضبٍ شديد، ولا أعلم ما المشكلة التي قد
تكون واجهته في دورة المياه، جلس بجواري وهو يقلّب نظره بيني
وبين الجلوس، ثم ما لبثتُ أن وجدته يضغط على يدي، فنظرت له
بحبّ، ولكنّ الضّغطة تحوّلت لضغطة انتقام، لدرجة أنها أصبحت
موجعةً جدًّا، ثمّ قال لي وهو يجزّ على أسنانه:

- إنت بتستعطي يا «لبنى»! إنت فاكره اللي قاعد جنبك ده
شوال بطاطس، واللّا فردة شراب مقلوبة؟

أسحب يدي من شدّة الألم، فقد ضغط عليها (بقسوة وغلّ)
وأنا التي ظننت أنّها مغازلة من زوجي، قبل أن تتحوّل لمصارعة
حرّة، واندهشت من اختياراته، فقلت له:

- إسمعني فردة شراب واحدة، وليه مش فردتين، وليه مقلوبة
مش عدله؟! واخترت ليه البطاطس بدل من الكرنب؟!

وعندما قلت له هذا الكلام ازداد غيظًا واحمرّ وجهه، وظلّ
ينفخ، فسألته مستنكرةً غضبه وعصبيته:

- في إيه يا «يوسف» ليه كده!! ده لسه مكتوب كتابنا من كام ساعة، ملحقناش، بسرعة كده تقلب على الوش المحروق؟! في إيه حصلك في الحمام جاي تطلعه عليا، واللّا انتَ فاكِر عِلشان مكتوب كتابنا وبقيت مراتك، بسرعة كده تقلب وعاوز تدبّحلي القطة، على فكرة يا «يوسف» دبّح القطة بيكون يوم الفرح مش يوم كتب الكتاب! يردّ عليّ بصوت مكتوم:- إنْتِ مجنونة صحّ؟ أكيد مجنونة! اسكتِ شوّيّة عاوز أردّ عِلشان أو ضحكك وأفهمك أنا عاوز إيه.

وفي الوقت نفسه الذي يشتعل فيه «يوسف» غضبًا، أستمّر أنا في إرسال الابتسامات للسيدة الأجنبية حتى لا تلاحظ مشاعر زوجي السلبية تجاهي، أو (يحصل عدوى للأجانب ويعاملوا ستّاتهم وحش)، فأجد «يوسف» يستشيط أكثر ويقول لي:

- قومي يا «لبنى» من هنا، بدل ما تشوفي الوش المشنوق، إنْتِ قاعدة تضحك للرجال ولا كأنك قاعدة جنب جوزك، عيب إختشي، هو أنا مش مالي عينك!؟

أفتح فمي ذهولاً من كلام زوجي، وأنقل بصري بينه وبين السيدة التي يقول إنّها رجل، فأجدها سيّدة لطيفة تجلس بجوار زوجها هادئة مستكينة، وكلّ مأخذي عليها، هو تدخينها المفرط للسجائر الذي أصابني بالاختناق، غير ذلك لا يوجد شيء غريب؛

بل كانت تبدو في هيئةٍ رائعة وبسيطة، تعقّصُ شعرها على هيئة ذيل حصانٍ طويل، وترتدي بنطالاً من الجينز (المهلهل) وقميصاً بلون الفيروز، وابتسامتها ساحرة تأسرُ القلوب..

كيف لـ«يوسف» أن يتّهمني بأني أبادل الابتسامات مع رجل؟! أردّ على اتهاماته مستنكرةً: - فين الرّاجل ده يا «يوسف» فين.. هاه؟! أنا ضحكت للسّت، مش لجوزها، وبعدين زيّ ما انت شايف كده هي عمّالة تضحك لي وأنا بضحك لها، يعني مهوّبتش ناحية جوزها، إنت أزاى مش واخذ بالك؟!!

يسألني غاضباً: - «لبنى» فين النّضارة؟!!

أقول له أثناء إخراجي لها من الحقيية: - في الشنطة، ما انت عارف أنا مبلبسهاش لو مش هاسوق، ومادام إنت معايا يبقى طبيعي مش هاسوق! عاوز النّضارة ليه؟
ثمّ بسخرية منه أقول له وأنا أضعها على عيني: - اتفضّل آديني لبستها.. في إيه، هاه.. في إيه?!!

ثمّ أكتشف الكارثة، وأقول في سرّي:

- يا ليلة سودة ومنيّلة، المخفي طلع راجل، وكمان عنده دقن بسّ شقرا، يا خييتي وأنا مشفتهاش علشان قالعة النّضارة، واللّي ينضرب في قلبه مش عاوز يبطلّ بيتسم لي، يا غلبك يا «لبنى»،

واضح إنك النهارده هتتطلقي، وهيكون أسرع جواز وطلاق! يا
خبر ايض! دول الاتنين رجالة!

أفاجئ «يوسف» وأرفع صوتي صارخة:

- آه، آه.. مغص جامد، إلحقني يا «يوسف» عاوزه أروح مش

قادرة، مغص هيفرتك بطني.

فيفزع «يوسف» ويسندني حتى أغادر، فأنا لم أجد إلا هذه
الحيلة حتى أشتت فكره بعيداً عن هذا الموقف، الذي اعتبره من
أسوأ المواقف التي تعرّضت لها مع زوجي. مرّت هذه الواقعة بفضل
الله، ثم ادّعائي التعب، ولكنني أظنّ أنه لم ينسها أبداً.

كانت فترة عقد القران أكثر حريّة وحركة، وتمتلئ بالمواقف
اللطيفة، وأيضاً الغريبة والمزعجة (طالما ذكرنا إزعاجاً؛ سيكون
فيها روح روجي سعاد!) وقد تعرّضتُ فيها لبعض المواقف التي
لم أنسها أبداً، وأعتقدُ لم ينسها «يوسف» بدوره، على سبيل المثال -
لا الحصر - فلا يوجد حصر في حياتي، أوّل يوم ذهبت فيه إلى بيت
حماتي بعد عقد القران، ذلك اليوم الذي تنتظره كلّ فتاة لترى وضعها
ومكانتها عند أهل خطيبها، ذهبت وأنا أكاد أموت خجلاً، فوجدت
حماتي قد أقامت وليمةً بمعنى الكلمة! فقلت في نفسي:

- يا سلام أيوه بقى، هو انت بتحبيني يا سعاد ومش عاوزه
تظهري (التقل صنعة يا سوسو)، وليه بس؟! ده أنا مرات ابنك بس
ارضي عني.

في أعماقي سعدت باحتفائها، وما أن جلسنا حتى نادى حماي
علينا، وقالت: يلاً يا «يوسف» يا حبيبي هات عروستك وتعالوا يلاً
علشان الغداء جاهز.

وجلست بجوار «يوسف» سعيدة بهذا الاهتمام غير المتوقع
من حماي، وبدأ الكّل في تناول الطّعام، لكنني لم أستطع أن أتناول
صحناً لوضع الطعام فيه لنفسي، فقد كنتُ أشعر بالخجل لدرجة
أنني اندهشت من نفسي! فوجدت «يوسف» يتناول طبقاً ليضع لي
فيه الطعام، فهو يعلم أنني - كعروسة جديدة على أسرته - سأخجل
أكيد من وضع طعام لنفسي، فقلت في سرّي:

- أيوا كده يا «يوسف» يا حبيبي، أحسن مراتك مكسوفة قوي،
ربنا يخليك ليّا، حطّ إنت الأكل، ده أنا ميّتة من الجوع.

فتابعته وهو يضع لحومًا، وأرزًا، وسلطة، أرفع يدي لعله ينتبه
لحركتي؛ فأنا أريده أن ينظر إليّ حتى أقول له ماذا أريد، فكنت
أكلّم نفسي وأفعل ما يفعله المعلق الرياضي حين يوجّه اللاعبين
وهُم لا يسمعونه:

- يا «يوسف»، بلاش رزّ و حطّ مكرونة، بلاش سلطة يا عمّ..
عاوزه مخلّل، حاجة حرّشة أبلّع بيها نظرات سعاد ليّا! ده أنا هاموت
مخنوقة بالأكل قبل ما أبلعه! ويستمرّ في وضع أصناف لا أحبّها؛
فأبرّر لنفسي:

- معلش يا «لبنى»، أكيد مش عارف نفسك في إيه، كلي دلوقتِ
أي حاجة.

ولأّني طبعًا عروس أشعر بالحنّ، وأنتظر عريسي أن يضع
لي الأكل في طبقي ويقدمه لي، لا أرفع عيني عن يدي المعقودة على
حجري منتظرةً من «يوسف» أن يضع الطبق.. ثمّ يتسم لي ويقول..
اتفضّلي بالهنا والشفّا!

انتظرت أن يفعل هذا ويبدأ في تجهيز صحنٍ آخر له، لكنّه
للأسف لم يفعل هذا أبدًا.. أبدًا!!!، وبدلًا من أن يضع الطبق أمامي،
وضع وجهه فيه وبدأ في تناول طعامه، وكأنّ من يجلس بجواره
بالونة صغيرة من الهيليوم لا يشعر بها؟!!

تلمح إيمان أخته احمرارَ وجهي، فتحرصُ على إخراجي من
وضعي السّخيف هذا، وتهزّ رأسها إليّ تطمئنني وتقول لـ«يوسف»:
إيه ده Honey، ما تعزم على your fiancé في إيه؟! نازل أكل وسايبها،
مش دي برضو خطيبتك، عيب يا dear عيب قوي.

فيعطيني صحناً، ويشير لي أن أملأه بنفسي، ولا يرفع وجهه عن طبقه!
هنا، يأتي صوت حماتي قاطعاً صمّت خجلي وهمس أنفاسي
المتهدّج بفعل الموقف العصيب، وهي تقول لابنتها:

- في إيه يا إيهان؟! هي «لبنى» غريبة؟! ما تاخذ وتاكل هي،
ويعني همّا لما كانوا مخطوبين وبيروحوا أفراح أو بياخذها يعشّوها في
الفنادق مش بيبقى الأكل أو بن بوفيه!!

تخترق كلمة «ببعشّوها» أذني، وأرفع رأسي بكبرياء، وأنظر إليها
وأنا أريد أن أقول لها:

- يعشّي مين يا ستّ الحاجة، ده أنا لبنى بنت عامر عبد الله، ده
أنا أعشّي شارعكم كلّ، ولولا الأدب كنت ردّيت عليك، بس إلهي
يا سعاد تروحي الهند وتوهي هناك ومحدّش يلاقيك، إنت من أوّلها
بادية بالوشّ الخشب!

تستغرقني أوهام الردّ عليها، وأنتبه على باقي السيمفونية السعيدة:
- خلاص تعتبر نفسها في فرح!

الحقيقة إن حماتي لا تترك مناسبة إلا وتتفنّن في الكيل لي، وفي
الوقت نفسه تتكلّم عني وأنا أمام ناظرها بصفة الغائب، لديها قدرة
غريبة على تجاهلي، فبدلاً من أن توجه هذا الكلام لي توجهه لإيهان على
أساس أنني لا أجلس على المائدة نفسها أمامها مباشرة، وأني تبخّرت!

فتردّ عليها إيمان مستنكرة أسلوبها الفظّ، والذي كشف ما تحمله
تجاهي في أوّل مقابلةٍ بعد القران:

- ماما، إيه اللي بتقوليه ده؟! ليه كده! بلاش قسوة في الكلام يا honey.
وتأخذ طبقاً، وتضع لي من كلّ الأصناف، فأشكرها على ذوقها
وأنا أكاد أقول لها:

- هاتي إيدك ابوسها يا هني ويا دير، وبكل كلمات الإنجلش
اللي ناطرة على لسانك زيّ الطّفح الجلدي ده، إنت أنقذتيني يا إيمان!
أما سعاد، سعاد حبيتي فتقول بغیظ:

- يعني ما انتِ حطّيتِ لها الأكل، لازمته إيه تكسفي أخوك، هاه!!
فلا تنظر إيمان لها ولا تردّ على تعليقها، وتتابع وضع باقي
الأصناف في صحني، أمّا عريسي الحليوة، فيشير إليها بيده، ومازال
وجهه في الطّبّق إشارة معناها، (مفیش حاجة سيبوني أكمل أكل!)
وبمجرد أن تناولني إيمان صحني لأضعه أمامي، أقترّب من
أُذن «يوسف» وأقول له:

- هو انتِ كنت بتملّي الطبق علشانك؟!
ثمّ بصوت رفيع مثل صوت العرّسة المحشورة في كاوتش
العربية أقول:

- وأنا طبعاّ إنسى يا عمرو، ليه كده تكسفي قدام مامتك يا

«يوسف»؟ آل إيه عريسي منفض لي وبياكل هوّ من غير ما يبصلي،
أو يعمل زيّ بتوع الأفلام ويحطّ الأكل في بؤّي! دا ولا كأنه عازم
واحد صاحبه مش عروسته اللي لسه مكتوب كتابهم!

ثمّ ينظر إليّ نظرة استغراب ويقول لي:

- في إيه يا «لبنى»، هو انتِ غريبة، مش هتعرفي تمدّي إيدك؟ ما

تاكلي وحدك.

أضغط على أسناني وأنتبه إلى أنّ الجلوس يتابعونا بطرفٍ خفي،
فأبتسم مثل البلهاء، ثمّ فجأة أجده وكأنّ قلبه رقّ لحالي، أو شعر
(إني شكلي بقى وحش) فقرّر أن يهتّم بي، وأن يضع في طبقي طعامًا،
فرحت، وقلت لنفسي: (أخيرًا حسّ بيًا وعرف إنّه طنشني وخليّ
رقبتي زيّ السمسمة)، وجدته يقول بمنتهى الهدوء والثبات:

- خدي يا «لبنى»، أنا مبحبّش الصّنف ده من اللّحوم، أصله

بيوجعلي بطني!!

ودون شعور قلت له:

- نعم! إيه ده يا «يوسف»! إيه ده يا محترم؟ ده اللي قدرت عليه؟

طيب حطّه في الطّبّق، ووشوشني! خليّ الناس تفتكر إنك مش عازم
مسعد المكوجي بتاعكم علشان صعبان عليك، ظبّط منظري اللي
خرب عندكم النهارده.

شعرت أن أعصابي كادت تفلت مني، فهمست وقلت له:
- مش كفاية مامتك يا «يوسف» نازلة تلقيح عليا، كمان بتديني
بواقى أكلك!

نظر إليّ باستغراب وقال لي:

- هو في إيه يا لبنى، والله ما بواقى أكل، ده أكل ملمستهوش
لإني مش بحبه!

ثم يقرر أن يقوم ليدخن سيجارة، فهو قد أنهى طعامه، وأنا
لسه هاقول بسم الله) وما أن يحاول الوقوف، أضرب بكعب حذائي
مقدّمة حذاءه فيقفز في مكانه من شدة الألم،
فتنظر له أمه باستغراب! فيقول لها: - رجلي اتلوت يا ماما لما
جيت أقوم.

تنقل نظرها بيني وبينه، ثم تلوي شفيتها وهي تبدي عدم
تصديق وقرفاً، كاد يجعلني أظن أن هناك رائحة عفنة في المكان، ثم
تقوم وتتركنا نحن وإيمان وزوجها، أمّا حمايا فيلحق بها ويقول لي
وهو مغادرنا:

- ألف هنا يا بنتي، بيتك ومطرحك!

أرسل نظري خلف حماتي حتى أتأكد أنها لن تعود مرّة أخرى،
فيقول لي وهو مندهش: هو انت مش بتاكلي ليه؟
«اللهم صلّ على النبي! أخيراً أخذ باله» فلم أتمالك نفسي

وأصابني ضحك هستيري أنا وإيمان وكلّ الموجودين! وقلت له:
- يا «يوسف»، أنا شكلي بقى شبه فرْدَة الشَّبشب المقلوبة،
ونفسي حدّ يعدلني، معقول يا «يوسف» عروسة ومفروض جوزي
يفرّحني باهتمامه بيّا، في حدّ يعمل كده؟!

ثمّ بصوتٍ منخفض حتى لا تسمعني سعاد هانم التي تجلس
على بُعد، وعيونها راشقة في طاولة الطعام والجلوس قلت له:
- منّك لله ياللي كنت السبب، ومنّك لله ياللي فهّمتني إنّ الخطوبة
ورود وعصافير وهدايا ذهب! أمّال لو كُنّا متجوّزين بقى لنا عشر سنين!
تضحك إيمان وتقول لي:

- منّ الله ألف مرّة، مكنتش أعرف إنّك («so funny» كدا،
ودمّك خفيف قوي يا «dear!» بصراحة يا «لبنى» يا هني إنّت فعلاً
«unique») أنا حبّيتك قوي.

أنظرُ إليها باندهاش وأقول في سرّي:
- إيه السّت الرّايقة دي، خفّة دمّ إيه، دي حرقة دمّ، همّ
العيلة دول هربانين من العباسية واللّا إيه؟! ..والأمر الغريب في
الموضوع، أنّ «يوسف» كريم ومُضياف جدّاً، لكنّه وقتما يجلس على
مائدة الطعام ولا يوجد معنا أحدٌ غريب من وجهة نظره، انس أن
يهتمّ بأي مخلوق كان.

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصل لسّ دس مقلب عمري

لم تتوقّف الذكريات وأكملت هجومها عليّ، وصدقاً كنت مستمتعةً؛ خاصّةً أن «هنيّة» لم تقاطعني، رغم هذا شعرتُ بقلق لعدم عودتها مرّة أخرى، لكنني لم أقم من مكاني، وجلست أُقلّب في دفتر يوميّاتي أبحث عن الجزء الذي تذكّرتَه للتو، فأحياناً ما تأتي به الذّاكرة يكون منقوصاً عمّا سطرته أنت يوماً وأنت متذكّر كلّ التفاصيل، فتحت الصّفحة التي كنت قد سطرّتها فيها تفاصيل يوم زفافي، وقد بدأتها بالتّالي: كانت فكري قد تأكّدت أنّه لن يكون بيني وبين حماتي أيّ نوع من الودّ، ولا بدّ أن أحافظ على شعرة معاوية، ومن ثمّ اتخذت قراراً هو أن أبتعد عن أيّ صدام معها بأيّ شكل، وأنّ أهاودها وأضيق عليها أيّ فرصة لتخلق مشكلة بيني وبين «يوسف»؛ خاصّةً فترة التّحضير للعرس، وشراء الأثاث والتجهيزات.

(يوم الزفاف)

مرّت الأيام وبدأنّا في الإعداد للعرس، وقرّرنا أن يكون في سفينة على النيل، وقيل لي إنّ حماتي مرهقة جدّاً وتعاني من ارتفاع ضغطها،

وحالتها الصحية غير مستقرّة، (على حدّ قول «يوسف») فأنا لم أرها، لقد أبلغني بالوضع عندما قدّم لاصطحابي لنذهب معاً من أجل التقاط صور تذكارية للعرس، وكنا مع أختي نهاد وزوجها، ثمّ لحقت بنا إيمان وزوجها، وسبقنا باقي الأهل والأصدقاء إلى المكان الذي سيقام فيه الفرح، وللحظّ كان استوديو التصوير مزدحمًا جدًّا، وأمّامي ثلاث عرائس قدّمن قبلي، وكلّ واحدة ستستغرق جلسات تصويرها ما لا يقلّ عن نصف ساعة! فوجدت «يوسف» يأخذني جانبًا، ثمّ يتسمّ ابتسامَةً صفراء، ولاحظت أنه بدأ يتلجّج في الكلام، فقلت له باهتمامٍ واضح:

- أيوا يا «يوسف»، خير.. في إيه؟

فهو يبدو كمّن على رأسه الطير! (ويا ليتني لم أفعل)، ثمّ بإيحاء من رأسي شجّعته على الكلام (وأنا عاوزه أقوله إخّص، بطني كركبت، شكلك في مصيبة محضرها لي)، فاستجمع شجاعته وقال لي شيئًا ما إن سمعته، حتى طار عقلي وكدتُ (أطبق في زمارة رقبتة بقى) وقلت في نفسي:

- هو أنا إيه اللي عملته في روعي ده، الرّاجل ده شكله عنده الأربع تربّع ضارين وماشي بالبركة، أكيد ده مش «يوسف»، أبدًا، مش هو ده اللي كنت هاموت عليه، ده أنا هاموت بسببه! يادي

الورطة، منك لله ياللي كنت السبب، إنت مين ياعم انت؟! شكلي هاقع على جدور رقبتي، الأستاذ المحترم قال لي بالحرف الواحد:
- بقولك يا «لبنى» إيه رأيك؟! إنت شايقة إن الاستوديو زحمة قوي، واحنا هنتأخر كده على الناس في المركب، وكمان زي ما انت عارفة ماما تعبانة (ولا تعبانة ولا حاجة) وبابا كمان راجل كبير في السن، فإيه رأيك نروح الفرحة دلوقت ونخلص الليلة الجميلة دي ونبسط معاهم، وبعدين نيجي بكره في الروقان كده ويكون الاستوديو مفهوش زحمة، علشان نتصور الصور التذكارية بتاعة الفرحة!

أضغط على أسناني وأجاوبه قائلة:

- روقان!! وبتصور!! صور تذكارية! بتاعة الفرحة! فرح إيه؟! فرح مين، تقصد اللي هو هيكون إمبراح بتاع بكره؟! يا ليلة زرقا؟! وأكلم نفسي وأنا أتمنى أن تنشق الأرض وتبلع «يوسف» ومامته طنظي سعاد، الرّاجل فعلاً مش طيبعي؟! ثم أعود له وأقول:
- «يوسف»، إنت عاوزنا نعمل بكره عروسة وعريس تاني! عاوزني أنزل من بيتي وأنا لابسة عروسة من جديد علشان أروح الاستوديو أتصور؟!!

وبالنوسبة للجيران، مأخذتش بالك هيكون رأيهم إيه فينا؟! بلاش الجيران! عمّ عبده البواب القمر اللي هو ومراته مستيين

نجيب لهم معانا ما لَدَّ وطاب من الفرح علشان يفرحوا! (في الكيسة
السودا على رأي حزلثوم)

هو عاتشي خالص إنك تتوتّر بسبب الفرح، بسّ مش عادي
يا «يوسف» إنك تتحوّل لكائن فضائي نازل متسلّط على نفوخي،
فيك إيه!! إنت فعلاً طبعي!؟

وبمتهى الهدوء وعلامات الاندهاش البادية على وجهه من
ردّة فعلي يقول:

- أيوه طبعي طبعاً! إيه! فين المشكلة؟! هو انتِ دايمًا بتعقّدي
الدنيا كده؟! خليكِ سلّسة، طيب بالعكس ده انتِ بكره هتكون صوركِ
أحلى، علشان مش هتكوني متوتّرة، وهتطلعي زيّ القمر، متتعصّيش
من فضلك، يا «لبنى»، شكلي كده هاخذ فكرة وحشة عنك.

فأنظرُ في السقف، وأبدأ في إطلاق صوت صفير البومة الأرملة
أو الغراب اليتيم، أيّا كان، صوت ينمّ عن القرف والحنق، ثمّ أنظر
له والشرر يتطاير من عيني وأقول:

- «يوسف»، طبعاً إنت أكيد بتهرّج، ومش عارف بتقول إيه؟!
مين اللي بكره هتبقى صورها أحلى؟! أنا من دلوقتِ عرفت بكره
هابقى عاملة إزاي.

وأشير له لبيتعد عني قليلاً وأقول له:

- إمشي دلوقتٍ من فضلك يا «يوسف»، روح أقف مع جوز
أختي وجوز أختك، وأبعد عني على قد ما تقدر، وأبوس إيدك
بلاش الوش البريء ده علشان تحته كوارث، وأنا أصلاً خائفة لما
أروح معاك البيت أكتشف إنّي التجوّزت زكي رستم! وصدّقيني يا
نوال، أقصد صدّقني يا «يوسف» أنا حاسّة إنّ في روح شريرة بدأت
تتحكّم فيّ، وأظنّها روح ريّا وسكينة، فياريت تسييني خالص
علشان عاوزه أهدى وأتماسك قبل التصوير، علشان منظر سحتني
يطلع عدل! إنت عاوز تحرق دميّ ليه؟!!

يُرِبْتُ على كتفي ويقول: - والله ظالمة ومفترية!

أزيح يده عني بهدوء وأقول له:

- تصدّق أنا فهمتك، إنت صعبان عليك يطلع شكلي أحلى منك في
الصّور، لا وألف لا.. عمّر الطاؤوس ما هيكون أحلى من الطّاؤوسة.
وبدأت أشعرُ إنّي داخلة في دور هرتلة! وكلام ملوش أيّ معنى،
يفزع يوسف من طريقيّ ويحاول أن يوقف سيل كلامي الغاضب
فأقول له:

- وبالنسبة حضرتك للفكرة الوحشة اللي هتاخذها عني، آه
ياريت تاخذها وتمشي من قدامي! مصحوبًا بالسّلامة يا باشا علشان
خلاص أنا شكلي هلفّ وأروح على بيت بابا، الجوازة دي مش جايبة

تمنها! واقفة عليًا بخسارة!

ينظرُ لي وكلُّ أمارات الذَّهول ترتسم على وجهه، وكأنَّني شخصٌ مصابٌ بالجنون، وليس لأنَّه يقول كلامًا عجيبيًا لا يصدِّقه عقلي؛ بل فوق تحيُّلي (بخمستلاف سنة ضوئية!) ثمَّ يحاول أن يقول شيئًا آخر، فأبتعدُ عنه مسرعةً وشعوري بالتورِّط في كارثةٍ يتنامى، وأني أخذت مقلب عمري في هذه الزَّيجة العجيبة، وعلى رأي المثل (الخلو ميكملش) ثمَّ تدنو منِّي نهاد، ومن ورائها إيمان على استحياء، وقالت لي:

- ما لك يا «لبنى» يا هني، وشك ما له أصفر وشاحب كده ليه! في إيه؟! هو انتِ يا دير مأخدتيش «snake» أو أيِّ حاجة علشان متتعيش في الفرح! ولا You feel tired، تعالي يا سويتي اقعدي، علشان تستريحِي، أنا حاسة إن في something wrong حصل!؟

فقلت لها: - روقي يا إيمان، والله لا رونج ولا رايت، دي شكلها ورطة محترمة أنا وقعت فيها. وقصصت عليها الحوار الذي دار بيني و«يوسف»، فقالت لي وهي تكاد تسقط أرضًا من الضحك:

- متظلميش «يوسف» يا هني، ده سوو كيوت و pure أوي، أكيد حسين جوزي الشَّرير اصله evil أوي، وأنا واثقة إنه هو اللِّي اقترح عليه الاقتراح الغريب قوي ده.

فأقولُ لها وأنا مندهشة من ضحكها وثقتها أنَّه زوجها القائل :
- عرفتِ منين إنَّ المصيبة دي، أقصد الفكرة دي بتاعة جوزك
مش جوزي الجميييييييل؟
فقالَت لي:

- شفت «يوسف» وحسين بيتفاوضوا على أمر، وبعدين لقيت
«يوسف» بيكلِّمك ووشك يا honey بدأ يبقى لونه yellow، فعرفت
إنَّ المصيبة دي من اقتراح جوزي الكيوت، but I never thought
that حسين هيدع ويجوِّد بالمنظر ده، any way، عادي don't mind
ولا كأنك سمعت حاجة، وخليك في فرحتك، وأنا هابعد حسين
باقتراحاته دي عن «يوسف».

تضحك نهاد على الحوار الدائر بيني وبين إيمان وتقول:
- والله «يوسف» دمّه خفيف، وانتِ يا «لبنى» اللي مشدودة، يا
بنتي روقي عشان تطلعي قمر في الصّور.
أنقل نظري بين إيمان ونهاد، وأرسل نظراتٍ في اتّجاه «يوسف»،
ثمّ ننفجر ثلاثتنا في الضّحك!

وبعد ما انتهينا من التصوير ذهبنا إلى السفينة، وكانت السعادة
تبدو على «يوسف» وكأنه طفلٌ تائهٌ قد وجد أمّه بعد بحثٍ كثير،

فظلّ طوال الفرح مهتمّاً بحماتي وكأنتها هي العروس، وأنا يمزّقني الغيظ، فهي قد تزوّجت من قبل وأقيم لها عرس، لماذا تسلبني اهتمام زوجي يوم فرحي؟!

وظلّت تبسم لي ابتسامات صفراء، وكأنتها تقول لي:

- (أنا رقم واحد عند ابني! ومش هتاخدي مكاني) ورغم هذا لم أهتمّ بنظراتها وانشغلت بالحضور، ثمّ فجأة اكتشف زوجي أنّ اليوم فرحه، وأني عروسه فبدأ يهتمّ بي، في الوقت نفسه الذي قرّرت فيه سعاد هانم (حماتي) أن تهتمّ بالضيوف وتتركه لي، قضينا وقتاً رائعاً، خاصّة في الفترة التي نسيت فيها حماتي أمّها عروسة وتذكّرت أمّها أمّ العريس، وكانت أمي تأتي كلّ فترة وتهمس في أذني:

- هو أنا حسدتك يا «لبنى»! اضحكّي يا حبيبتّي وبلاش نظراتك (المهيبّة) اللّي بتبصّي بيها لحماتك، كلّنا واخدين بالننا، «لبنى» يا حبيبتّي، معلش كبري دماغك.

أردّ عليها وأنا أبتسمُ ابتسامات علية مثل الموناليزا:

- يا ماما، الستّ فاكره إمّها العروسة والبيه مطاوعها؟! يرضي

مين ده؟! هاتجنّ منهم جوز العصافير المغرّدة!

فُتّرت على كتفي وتقول: - بنتي عاقلة، ومش هتعمل مشاكل!
وكأنّ أمي كانت تريد أن تخرجني بقولها عني عاقلة، رغم إنّ

هذا لم يكن يوماً رأيها الأساسي فيّ، أستمع لنصيحتها، وأحاول أن أكون هادئة، في النهاية هذا يوم عُرسِي، وأنا مَنْ سيتضرّر بالذكريات المزعجة، وقرّرت أن أتجاهلها وأنشغل بحالي وبمَنْ حوِلي!

أربع ساعات، هي عمرُ مراسم العرس على السفينة، فهي تبحر خلال مياه النيل ساعتين ذهاباً وساعتين إياباً.

وبعد انتهاء العرس، اختفى «يوسف» تماماً، فعرفت أنه ذهب ليأخذ جرعات حنان من (حماتي حياتي)، فهو سيترك حضنّها اليوم، وسيتمّ اختطافه من قِبَل العنقاء (اللي هي أنا)، ورغم أنني أنا البنت التي ستترك بيت أبيها وأمّها، فقد تعاملت مع الموقف بشجاعة الساموراي الذي قرّر بشرّف أن يخوض معركة ويتحمل نتائجها، وسأتحمل نتائج الزواج، وأيضاً حربي الباردة مع سعاد!!

وفجأة داهمني شعور بأنني ينطبق عليّ مقولة (يغور وهنكسر وراه زير)، ذلك لعدم ظهور أيّ تعبير يدلّ على التأثير لفراقي على وجه أمّي أو أبي! (تفتكروا أنا قعدت عندهم كثير لدرجة الزهق؟!).

وصلنا إلى عشّ الزوجية كما يسمّونه، وبعد مغادرة الأهل والأصدقاء دخلت حجرة النوم، ثمّ جلست على الفراش في محاولةٍ

لاستيعاب ما أنا فيه، هل صحيح تزوّجت وتركت أهلي وسأكمل باقي حياتي مع هذا الرجل الذي لا أعرفه إلا منذ سنة تقريباً، كيف تنازلت عن حرّيتي!! ولم أجد جدوى من وراء هذه الأفكار، فقمْتُ لأبدلَ ملابسِي، فقد سبق السيف العذل، وأصبحت في بيت الزوجية، وبمجرّد أن هممت بتغيير ملابسِي، طرقت «يوسف» الباب مستفسراً عن سبب تأخري، ففتحت له وأنا بملابس العرس لم أبدلها، والدموع تنهمر من عيني، فقد انتابتنِي نوبة بكاءٍ شديدة مثل الأطفال كانت - من وجهة نظري بعدما استفتتُ منها - مبالغاً فيها جدّاً، تلك النوبة جعلت «يوسف» يدور حول نفسه، وأسقط في يده، وبدأ يحول بصره في الحجرة لعله يجد سبباً لبكائي، لقد أربكته دموعي بشدة، ثم قال لي بلهفة: - ما لك يا «لبنى»! فيك إيه؟! مش معقول تكون مامتك وحشتك! واللّا يكون عمي باباك هو اللي وحشك.

ولمّا أجب عن تساؤلاته هزّ رأسه نافيّاً، وأردف:

- مش مصدّقك، إيه ده؟! أصلي محسّيتش أبداً إنك عاطفية

قوي كده، واللّا انتِ عاطفيّة وأنا مكنتش واخذ بالي؟!!

أخرج من حجرة النوم وأقفُ أمام باب حجرة المعيشة أمسح أنفي، ودموعي مازالت تنهمر، وكأنّه قد حدثت لي مصيبة، وأقول له:

- عاطفيّة إيه! هو انت بتتريق عليّا ليه؟ هو ده وقته! وعموماً،

لا طبعًا محدّش وحشني! إيه يا «يوسف» هو أنا لحقت! هي يعني
طنطي سعاد وحشتك؟

كلّ الحكاية أنا محتاسة، أصلي نسيت علبة العدسات، ومش
عارفة هاعمل إيه، ومينفعش أنام وأنا لابسة العدسات! وطبعًا زي
ما انت شايف أنا تعبانة ولازم أخلعهم، وعمّالة أفكّر من ساعة ما
وصلنا ومش لاقية حلّ! وفجأة لقيتني بعيّط، أعمل إيه طيّب!

في أعماقي، غالبني شعورٌ أنّه في غالب الأمر هذا البكاء كان سببه
أنّني أصبحت وجهًا لوجه مع الزّواج، وكانت العدسات ما هي إلّا
حجّة حتى أُخرجَ شحناات خوفي ورُعيي من الزّواج والحياة الجديدة!
يخرج خلفي ويربّت على كتفي بحنانٍ محاولًا طمأنّتي ويقول لي:
- اهدي هاتّصل بإيها لآتمها عندها عدسات، فممكن تبعت
علبة من عندها مع حسين، روّقي بقى!... ثمّ يباغتني بسؤال
ونظرات الحُبث تلمع وتضوي في عينيه:

- طيّب إنتِ ليه كلّ ده قاعده وحدك ومغير تيش هدومك! أنا
جوزك وستر وغطا عليك، عادي لو معندكيش هدوم ممكن أسلفك
بيجامة من بيجاماتي؛ أنا عندي كثير!

لا أصدّق مزاحه (الرّخم) وأقول له:

- إنت مصدّق نفسك وبتتريق عليّا يا «يوسف»! أنا «لبنى

عامر» معنديش هدوم!! يضحك من ردّي عليه، ويقول:
- أنا بهزّر معاك، إنتِ ليه لابسه الوشّ الغامق ده، (قفوشة
أوي) عادي هزار يا «لبنى عامر» هزار! ثمّ يجذّبي من يدي، ويقول:
- تعالي بسّ غيّري هدومك، وان شاء الله هيجيوا علبة
العدسات على طول.

أدخل الحجرة معه وقبل أن يذهب ليتّصل بأخته أقول له:
- ثمّكن تساعدني في خلع الطّرحه! أصلها مضيقاني قوي،
ومش عارفة أقلعها.

وبعد أن ساعدني في خلعهها، قال ضاحكًا:
- إيه كلّ البنس دي، انتي كأنك خايفة الطّرحه تهرب منك يا
«لبنى» يا حبيتي

ويخرج مسرعًا ولم ينتظر الردّ- والذي توقّع أن يكون حادًا
ولاذعًا- ليتّصل بأخته.

قمتُ بارتداء قميص النّوم، وكان أبيض مصنوعًا من القماش
الشّيفون الناعم، وله روب دانتيّل مبطن بالسّتان، ثمّ حللتُ شعري
فانسدلّ على كتفي كشلالٍ من الليل، ثمّ تعطّرت وانتعلت شبشبًا
أنيقًا، وبعدها توجّهت إلى حجرة المعيشة، جلست في انتظار علبة
العدسات.. بضع دقائق وسمعت وقعَ أقدام «يوسف» تزحف على

الأرض كأنه يجرّ أكياساً من الرمل، واكتشفت أنّ هذه هي طريقته في المشي ممّا جعلني لا أفزع أبداً، فهناك أشخاص فجأة تراهم قد انتصبوا أمامك لرشاقة خطوتهم، أمّا «يوسف» فجعلني قبل رؤيته أسمع وقع أقدامه!

رفعت وجهي الذي كان يسكنُ بين كفيّ، ونظرت في اتّجاه القادم الباسم، فكدت أصرخ من الانفعال، فوضعتُ يدي على فمي حتى لا أطلق صوتاً قد يحضر على إثره الجيران!

لقد أهّل عليّ مرتدياً منامةً قديمةً بالية، عليها بعضُ بقع الزيت البيضاء، اقترب منّي وعلامات السعادة تظهر في لمعة عيونه، أمّا أنا فبمجرد أن جلس بجواري واقترب منّي باسمًا، تضاربتني أحاسيس؛ أقلها أن أقوم من مكاني وأناوله لكمّة في أنفه وأخرى في عينيه، لكنني أفقتُ من أفكاري ونحيّت رغبتني جانباً، وأنا أحاول أن أتأكد من صدق ما رأيت، فقد جاءني باشاً سعيداً كأنه مديرُ المنتخب المصري وقد تأهل فريقه لكأس العالم! أكلّم نفسي: لا يمكن أن يكون الليّ شفّته صحّ!!

ثمّ دعكتُ جبيني ومسحتُ عيوني بطرف أناملي، وقلت لعلّها العدسات هي سبب ما ظننت، لكنّه للأسف كان يرتدي - فعلاً - بيجامة قديمة وعليها بقعة دهان حوائط (بويات)، رميتهُ بنظرات

غِيظُ، وقلت له:

- «يوسف»، إيه اللي انت لابسه ده! فين البيجامة والرّوب اللي اشتريناهم سوا؟! إيه المصيبة اللي انت لابسها دي!!
ثمّ استدركتُ ساخرة منه وبصوتٍ مثل أصوات الشخصيات الكارتونية قلت له: (لو معندكش هدموم مُمكن أسلّفك بيجامة من بيجاماتي، أنا عندي كتير!) فين دول ما هو باين أهو!
يردّ عليّ بمنتهى الهدوء والثقة:

- البيجامة والرّوب هالبسهم للضيوف بكره، ليه ألبسهم النهارده؟! إنت غريبة قوي! وبعدين لو لبستهم هيتكرمشوا!
فنظرت له وقد انفرج جفني والتصق بحواجبي وجحظت مقلّتي غضبًا، وقلت له: - نعم! البيجامة والرّوب هتلبسهم للضيوف وأنا لابس لي بيجامة أقلّ ما يقال عنها إنّها معفّنة! وليه تلبس لهم بيجامة وروب، همّ ضربوا الجرس فجأة فانت اضطرّيت تطلع بالرّوب والبيجامة؟! عاوز تهبلني؟ ليه كده ليه تلبس لي يا «يوسف» هدموم قديمة ومعفّنة!! ده أنا لابسالك قميص نوم وروب من أمريكا! مش من سوق الكانتو!
ومقلّتليش ليه يا «يوسف» إنّ النهارده هتكون حفلة تنكّرية! وطبعًا اسمها (العفانة بارتي)

وكنت جبّت لـ الليلة المفترجة دي جلابيتي الكستور البمبي
الليّ بغسل بيها المواعين، ألبسهالك وأخيّ قميص النوم والرّوب
للصّيوف بكره!!

«يوسف»، إنت عاوز تموتني مشلولة؟!

يجلس بجواري مبتسمًا، ويقول لي:

- روّقي بلاش الشّكليات التّافهة دي! النهارده ليلة العمر....

ثمّ يُرَبِّتُ على شعري حتّى أهدأ، فما كان منّي إلاّ أن دفعته بعيدًا
عنيّ، وقلت له:

- النهارده آخر يوم في عمري معاك، إنت متأكد إنك مبتاخذش

دوا وبطلته فأثار انسحابه بدأت تظهر!!؟ أو حدّ من أصدقاء السّوء
إدّاك مخدّرات!

«يوسف» على فكرة تصرّفاتك النهارده كلّها.. كلّها مش طبيعية!

يقترّب منّي في محاولة لتهدّثني، فأنظر له مهدّدةً إيّاه أن لا يقترّب

منّي أو يحاول أن يتكلّم معي قبل أن يقوم بتغيير هذه البيجامة العفنة،

وقبل أن يردّ عليّ، يرنّ جرسُ الباب معلنًا حضورَ العلبة التي سأضع
فيها العدسات.

بعد 3 أيام من زواجنا، جاءني «يوسف» من الخارج وهو منفعلٌ

من تصرّفات شركات السياحة ويقول لي:

- على فكرة يا «لبنى» أنا نسيت ميعاد السفر بتاع أسبوع العسل، وهنساfer متأخرين عن ميعادنا بيومين؛ لأنّي لما رحلت لشركة السياحة قالوا لي مفيش تذاكر في نفس اليوم لأننا ما أكدناش الحجز! الناس دي بتستعبط!! أنا متسغربهم أوي بصراحة

فأسقط في يدي، ولا أردّ عليه وأقول لروحي:

- اشربي، أدي الحليوة الأّمور، إن شاء الله هتعيشي تكلمني نفسك معاه، حتى تأكيد ميعاد السفر مفتكرهوش! تفتكري إن ربنا هيسترها معاك ولا هتبقى عيشة فل؟ شكلها أيام ما يعلم بيها إلا ربنا..

يارب الطف بيا أنا غلبانة مفيش فيا غير لسان بس!

وبعدها بيومين، سافرنا إلى شرم الشيخ، وقضينا هناك أسبوعاً ممتلئاً بالأحداث والمواقف التي لم ولن أنسها أبداً، وكانت علامةً فارقة في تحديد شخصية زوجي «يوسف الرايق».

عدنا إلى القاهرة، وبدأ يتوافد علينا المهنتون، فزارنا أبي وأمّي وإخوتي، وعمّتي «وصوف» وجدّي عبد الله الذي جلس طول الزيارة يتبسّم ويسأل عن أسماء الموجودين، ويعيد السّؤال المرّة تلو الأخرى، أمّا عمّتي وصوف، فدخلت عليّ المطبخ ومنحتني نقوداً ثمّ قالت:

- دي نقطتك، متديهوش منها حاجة، شكلك عبيطة، النقوط
تجيبى بيهم ذهب فاهمة؟ خليك ناصحة زي عمّتك. واستطردت قائلة:
- وبرضو دمّه ثقيل.. يا ستّار!
وقبل أن أدافع عنه، تدخل علينا أمّي، فتقطع حديثي مع عمّتي،
وتقول لي:

- يلاً يا حبيبتى علشان عاوزين نسلّم عليكِ علشان جدك
زهقان وعاوز يروح. أخرجُ معها وكلمات عمّتي ونصائحها في
رأسي، وأستغربُ فهي لم ترّ من «يوسف» بخلاً أو شحاً، ثم قلت
في نفسي:

- يظهر الزّمن بيخلى الواحد حريص، عموماً مش هاخسر
حاجة لما احط نصايحها على جانب وقت ما احتاجهم ابص فيهم،
عمتي وصوف وتد مش سهلة، اكيد عندها نظرة!

كانت زيارة أهلي وأصدقائي خفيفةً ولطيفة، وسعدنا بها أنا
و«يوسف»، أمّا زيارة أهل زوجي، فقد كانت علامة مميّزة على جيني،
فقد كانت تعتبر كأبها زيارة تفتيش من وزاة الصّناعة والتموين
وإدارة حماية المستهلك؛ قامت حماي بفحص الخشب والمراتب
والنيش، وتأكدت أنّ لديّ أطقماً من الكريستال الفرنسي البوهيمي،
وكانت يدها تمرّ على كلّ جزءٍ في البيت، الوحيدة التي كان حضورها

بلسماً وخَقَفَ عَنِّي من وطأة هجماتِ سعاد الشَّرسة هي إيهان، كانت سعيدة بالشُّقة والأثاث، ومدَحَت في ذوقِي واختياراتي للألوان والأثاث، مقابل قول حماتي: (حلو رغم إنَّه عادي)، والعادي أنَّها لا بدَّ أن تسمِّمني بأيِّ كلام، ورغم إنَّني كنت قد أخذت «الفاكسين» فإنَّها كلَّ فترة تبهرني بنوعٍ جديدٍ من السَّموم، كنت أحاول ألاَّ يؤثِّر كلامها عليَّ! ومَّا ساعد على إزالة آثار تصرِّفات سعاد الغريبة، هو وجود بعض أقارب «يوسف» الذين قاموا بتشتيت تركيزها معي، وتركِّي أقوم بمهمَّة الضيافة على الوجه الأمثل، وحتى لا أتعرِّض لملاحظاتٍ من نوع:

- إنَّ بخيلةً واللَّا إيه، همَّا بابا وماما مجبولكيش طقم كذا وكذا؟!!

فحمدتُ الله أنَّ أبي لم يمنحها الفرصة، وجَهَّزني بما يليقُ بي، ويمنع شرَّها الفطري تجاهي! ورحم كبريائي من محاولة جديدة منها لتحطيمه.

لفصلك لس بع الحوض في السقف

يخرجني صوتُ الهاتف من تركيزي في القراءة، فأرى اسمَ المتّصل «يوسف» فتراودني فكرةٌ تجاهل اتّصاله، فأنا غاضبةٌ منه أيّما غضب، ولكنني في الوقت نفسه خفتُ أن يكون هناك أمرٌ ما جعله يتّصل بي، فرددتُ عليه بوجوم قائلةً:

- نعم يا «يوسف»، خير! في حاجة؟

أسمع صوتَه هادئًا يأتي من الطرفِ الآخر وهو يقول لي:

- إزيك يا ستّ الكل، روقي علشان خاطري، ده انت يا «لبنى»

الأمّ الحنون الرعوم، والأمّ الطيبة المتسامحة الرقيقة!

فقلت له:

- اللي هي إيه إن شاء الله الأمّ الرعوم دي؟! ما ناقص تقويّ يا

«يوسف» إني أمّ المصريين كمان! إنجز يا «يوسف»، عاوز إيه بتبثني

ليه على رأي «أدهم»!

ثمّ أُرْدِفُ بسخرية:

- أكيد طبعًا كلامك ده وراه هدف أو شاكك إنّ في شرّ جاي

في السّكة لمحتّه بيجهز في عينيّ الصّبح، «يوسف» بلاش استظراف،
إنّ عارف أنا أمّ الرّخامة، وأمّ التّريقة، وأمّ الخلول، وأمّ الغولة وأمّ
العناكب. فردّ عليّ بصوت ضاحكٍ من كلامي:

- إنّي أطيب قلب، بسّ لازم تبطلّي الاندفاع والعصبيّة،
ومتاخذيش كلّ حاجة على قلبك!
أردّ بنفس النّبرة الواجمة:

- أيوه، نعم.. المفروض أعمل إيه بعد كده؟!
فيقول لي: - ولا حاجة، أنا بسّ حبّيت أطيبّ خاطرِك علشان
الصّبح لما نزلت شفّتك زعلانة وكنت بتعيّطي.
أنفي سريعاً كلامه، وأقول له:

- لا طبعاً، مين ده اللي بيعييط، دي ناموسة قرصتني في عيني،
محدّش يقدر يزعلّني، وعلى فكرة أنا سكتّ لماتكّ امبارح بسّ والله
علشان هي ستّ كبيرة، بسّ بعد كده الكلام بينّا هيكون بنج بونج!
ينفعل ويتكلّم بحدّة وكأنّه تحوّل مائة وثمانين درجة، ويقول لي:
- خلاص.. خلاص إقفلّي يا «لبنى».. أنا غلطان، سلام.

ويغلق الخطّ دون انتظار ردّي، أستغرب من ردّه ونبرة صوته
في أوّل المكالمّة، وهو الذي تركني لقمة سائغة لأمّه ليلة أمس، لقد
اعتاد في الفترة الأخيرة القول بإني سيّدة مُزعجة، وأحياناً سليطة

اللّسان وسخيفة، وفي أوقات أخرى يراني أفعل ما يفعله البُرس،
فكان يقول لي:

- إنْتِ زِيّ البرص يا «لبنى» لا بيهش ولا بينش، وبيريّ عداوة
في القلب.

فكنتُ أضحك من تشبيه البُرس، وأقول في نفسي: وما له..
بُرس بُرس! ولا أخفي عليكم أنني عصيّة جدًّا، ومجنونة، وسهل
استشارتي، وأحياناً صعب إرضائي أو توقّع ردود فعلي، لكنني أيضاً
أحياناً كثيرة طيبة جدًّا (لدرجة العبط)، وأنسى الإساءة سريعاً،
وأنسى التحذيرات والتّنبهات والتّعليقات، والتّعليقات لا يلقها
عليّ إلّا حماتي (فهني تتعامل معي على أساس المعلّم والتلميذ البليد).

علاقتي بحماتي متوتّرة دائماً، فمنذُ أوّل لحظة رأيتها فيها، عرفت
أنّ الكيمياء بيننا ستفجّر الأماكن؛ ذلك لأنّ عناصرنا مُتنافرة تماماً،
لكنني كنت - ومازلت - أُكِنُّ لها بعض مشاعر الطّيبة، والتي اعتبرها
مشاعر لقيطة، لا أعرف لها سبباً، إلّا إنّها أمّ «يوسف»، أحياناً
عندما أرى ضعفها كأّم وزوجة مضغوطة، فيحنّ قلبي لها، رغم
أنّها تعاملني مثل الطبيب الذي يُجارب الميكروبات بكلّ الأسلحة
الطبية المتاحة، أو الجراح الذي ينشُبُ محالبَ مبضعه ليتخلّص من

الورم الذي يراوغه، فأنا كنت - ومازلت - ورمًا سرطانيًا في رأس حماتي؛ لأنني من وجهة نظرها بخمستلاف لسان (رغم أنها لم تر لساني هذا أبدًا)! بالإضافة لأهم شيء وهو إنني لا أستحق «يوسف» (ابنها الحليوة الأمور)

تلك السيدة القويّة التي أعجز أمامها عن ممارسة حقّي الطبيعي كزوجة وأمّ، فهي متزوّجة من «يوسف» وأنا التي تنجب له الأبناء، أمّا هي فتقوم بتربيتهم، ودائمًا أشعر وكأني تستخسره فيّ، وترى نفسها الأولى به، وتشعري أنّي خطفت منها حبّ حياتها!

لقد عانيت منذ أول يوم زواج من تدخلها في حياتي كأني مفتش مرسل من وزارة الزواج لتتأكد من حسن أدائي والتزامي بالمعاهدات الدولية في طاعة الزوج والسهر على راحته! لكنني كنت - ومازلت - حزينّة لأنّ علاقتنا دائميًا متوترة، بيدّ أنّه والله لست أنا من بدأ بالعداء، أو فلنقل المناوشات!

فحماتي تعتقد أنّي زوجة وأمّ فاشلة لأنني لا أطبق نصائحها في التعامل مع الزوج والأولاد، فهي طول الوقت توجّهني، وتلقي عليّ محاضرات تنمية «حمائيّة» في صناعة بيت يناسب ذوقها! فهي من اختار لابني «رمضان» اسمه، واختارت مدرسة «أدهم»، وضغطت على «يوسف» ليدخله فيها، رغم اعتراضه ورفضه لنوعية الدراسة

في هذه المدرسة، فقد كنت أريده أن يدرس في مدرسة قريبة من البيت ودراستها سهلة؛ حتى لا أسبب له ضغطاً نفسياً بالدراسة، فقد كنت بعيدة النظر، فنحن الآن رقم 139 على العالم (يعني كلة محصل بعضه يبقى نريح العيال، ليه أضغط عليهم في الدراسة ليه؟!) ولكنها أصرت أن يدخل صغير السن، وبالتالي ظلّ الولد يعاني، وأنا أيضاً أعاني معه، وكلّ هذا فقط من أجل الوجاهة (البرستيج) والمنظرة الفارغة!

لم تترك لي حتى مساحة دون نقد! الطبخ (عادي أنا ست بيت والله)، تنتقد طبخي وحتى ملابسي، تتدخل في تفاصيل التفاصيل، وأنا أبتسم مرّات، ومرّات أتصنّع الصّمَم، وأخرى أقوم أجري وراء ناموسة حمراء افتراضية، حتى أترك لها المكان، ودائماً وأبداً «نور عيونها» لا يخطئ؛ فهو تربيتها!

كانت منال زوجة بكر، أخو «يوسف»، دائماً تنصحني بالصّمت
حيال مناكفات حماتي، وتقول لي ببرود:
- متتعيش نفسك معها، محدش هيقدر عليها غير الموت،
وفري صحّتك علشان نفسك وعيالك، ولادها كلهم مبيقدروش
يقفوا في وشّها، حتى جوزها سايبها تتصرّف في كل شيء، بس في
المقابل تبعد عنه!

وتأكدتُ من صدق كلام منال، لكنّ طبيعتي أحياناً كانت تغلبني فأردّ عليها، لكن دائماً هي التي تفوز! والله لم أكن سعيدةً بهذه العلاقة؛ لكنّ هناك أموراً تُفرض عليك ولا تستطيع إصلاحها؛ لأنّ العلاج يحتاج رغبةً من الطرفين، وحماتي لديها رغبة وحيدة هي التخلّص مني! وأنا ليست لديّ الرّغبة لتحقيق أهدافها، لا أنكر أنّ ضغطها عليّ ومطاردتي انخفضت بشدّة بعد إنجابي «أدهم»! لكنّه لم يتوقّف طبعاً، بيد أنّ فكرة أنّي لا أستحقّ ابنها لم تستطع التخلّص منها أبداً، فكانت تبديها في كلّ مناسبة لتعكّر صفو مزاجي، ولقد نجحت في تلك المهمّة باقتدار، وكنت أتماسك احتراماً لزوجي وخوفاً من انفجار غضبي الذي لم أكن لأضبطه؛ فأنا عندما أفقد السيطرة على نفسي أحوّل لكائنٍ همجي لم يدخل مدارس ولم يتعامل مع بشر، كائنٌ قادم من العصر الحجري، والفضل لها ولا بنها؛ فقد تحوّلت شخصيتي تماماً!

أتفهّم أن تكون عيوي هذه مثيرةً لحفيظة بعض المتعاملين معي، ولكنني في الوقت نفسه لا أستطيع صنع شيء حيال هذا الأمر (فهذه هي أنا)، والمثير للدهشة أنه رغم اعترافي بعيوي، واتّساق مع نفسي والرّضا بحظّي القليل؛ فإنّ الحياة لا تركني أعيش بهدوءٍ مكتفيةً بنصيبي من المعاناة الأسريّة وفروعها؛ لا.. بل تجبأ لي دائماً المزيد (من

العُلب) في اتّجاهات لا أتوقّعها؛ لأنّ فكرة التأقلم مع المحيطين بك، وخاصة المفروضين عليكِ بصلّةِ رحمٍ أو نسب، تحتاج منك لمجهود كبير، وأيضاً رغبة، وأنا افتقدتُ كليهما بالفطرة، تَبّاً له من كوكب! كلٌّ مَنْ يعيش عليه يضغَطُ على أعصابي ويرهقها.

فجأةً أستمعُ لصوتِ جَهْوريِ غاضب، فأضع الهاتفَ بجوار دفتر يومياتي وألبوم الصّور في أحد الأذراج، وأخرج مسرعةً لأرى ماذا يحدث، فوجدت «أدهم» يصرخ في الهاتف، ويعاتب أحدَ أصدقائه لأنّه لم يحجز له تذاكر الماتش في الدّرجة الأولى، وسمعتُه يقول له: إيه يا معلّم التّهريج ده، هو مش كان في بينّا اتّفاق! مينفعش يا اسطا العوّ ده، دا أنا ممكّن أفش...

أصرخُ فيه حتى لا يكمل الكلمة البذيئة التي انتشرت هذه الأيام، وأنظر إلى الواقف أمامي وأتخيّل نفسي أسمع منادي سيارات أو عامل نظافة في ورشة، ما هذه الألفاظ! ثمّ أشاور له حتى يخفض صوته قليلاً، لكنّه لا ينظر إليّ ولا يظهر أيّ ردّ فعل تجاه كلامي له، ثمّ يغلق الخطّ ساخطاً ويسبّ صديقه سبّاً يؤذي مسامعي كأنّي لا أقف أمامه!! هنا.. أصرخُ فيه وأنا أشعر أنّ ضغطي قد ارتفع، وأقول له: - اسمع يا «أدهم»، قلّة أدب تاني مش هاسمح، وتصرفك

اللّي عملته امبارح معتمد على حليفتك تيته سعاد، مش هاقبل
تكرّره تاني.

ثمّ أرفع السّبابة وأحذره قائلةً:

- إنت ناسي أنا مين؟! أنا ماما، وكمّان مش أيّ ماما، فياريت
متناساش نفسك، والبيت ده مُحترم، مينفعش تشتمّ فيه وتقول
الألفاظ البذيئة دي! قليل الأدب صحيح.

فتأتي «هنية» على صوتي وتقول لي:

- أيوه يا مدام جوليله لأنّه بيشتمني وييهزّجني، وأنا يعني
جربيه منه في السنّ! مينفعش يعمل معايا كده، وأنا مممكن أشتكيه
لأستاذ «يوسف» وهو مممكن يكسر رجبته بسّ أنا مش عاوزه أأذيه.
يصرخ «أدهم» فيها قائلاً:

- امشي من هنا يا «هنية» بدل ما أنا اللّي أكسر رقبتك، وأورّيك
يعني إيه أبويا يكسر رقبتى.. إنت يابِت هبله ولا بتستهيلي، والله افتح
دماغك جاتك القرف.

أتدخّل لأفصل بينهما، وأقول لـ«هنية»:

- امشي من هنا، يلاً روجي شوفي وراك إيه.. ومحدش طلب
منك تتكلمي، ولما تحبي تشتكى

مش والنار والعة يا هانم.. يلا امشي

تنظر إليّ بغضبٍ من ضاع حقُّه، وتبرطمِ قائلَةً:

- آل يكسر رجبتي! ليه هو فاكر نفسه هر جليز، ولا شاندام،
آل يكسر رجبتي آل! وحاضر يا مدام هاجفل بوجي علشان
متزعليش مني..

فيهمم «أدهم» للحاق بها ليضر بها...
فأستوقفه قائلَةً:

- إنت أنجنت! ما لك وما لها؟ وإياك تضايقتها أو تشتمها أو
تزعّلها، دي أمانة عندنا، ملكش دعوة بيها خالص، والكلام ده
نهائي، والأهم تحليّك في خيبتك، مسمعش ألفاظك البذيئة دي
تاني، وامشي من قدامي.
يحاول أن يردّ على كلامي، فأشير له بيدي لأمنعه من الكلام،
وأردف غاضبةً:

- أنا أصلاً مش بكلمك، ولا هكلمك علشان تقّل أدبك عليّ
امبارح! وتتحامى في سعاد.

ينظر إليّ بتبجح، ويقول بصوتٍ أجشّ:

- ماما، إنت اللي زعقت لي، وانت اللي مش عاجبك حاجة
بعملها، على فكرة ده مش أسلوب تتعاملي بيه مع ابنك الكبير! أنا
مش «رامي» ولا «بسنت».

أديرُ وجهي عنه، وأذهب إلى الحجرة، وأغلق الباب خلفي،
يقف لحظات ثم يلحق بي، ويترك الباب فأقول له:
- إمشي يا «أدهم» خلي سعاد تنفعل.. متحاولش تتكلم معايا
إلا لما تكون محترم، وتعرف تتكلم مع مامتك بأدب.
يقف على الباب ويقول:

- أنا آسف يا ماما، من فضلك متزعليش. مكنش قصدي، من
فضلك افتحي، طيب يا ماما أنا نازل، ضروري تفتحي.
لا أرد عليه، فيذهب عني بعد عدة محاولات فاشلة منه لمصالحتي.

أشعرُ بنوبة غضبٍ عارمة؛ فالأمور تكاد تفلتُ مني، وأنا التي
رفضت أن أعمل كي أقوم بتربية الأبناء بشكلٍ صحيح، فتجربة
العمل رغم أنها مرهقة، لكنّها مفيدة جدًا، فهي تصقل شخصيّة
المرأة، وتمنحها القدرة على فهم البشر، وتساعدنا على كيفية التعامل
مع كل الأصناف، والنتيجة الأكيدة التي وصلت إليها (ابعد عن شرّ
البشر وغني لهم).

وبعد الزواج لم يطالبني زوجي بترك العمل تلميحًا أو تصرّيحًا،
فكلانا يرى أن عملي شيءٌ مهمٌّ في حياتنا، ولكن من منظور مختلف،
فالعمل بالنسبة لي ثقة وإثبات ذاتٍ واستقلال ماديّ، حتى لا أخضع

لممارسات ذكورية استعلائية من زوجي؛ ذلك لكونه المسئول المالي في
شراكة الزواج، أما هو فيرى عملي حجر الزاوية في استقرار زواجنا
حتى لا يتعرّض لهزّات في بدايته، فالعمل سيستنفد القدر الأكبر من
جهدي فأصبح بلا طاقةٍ أو جهدٍ لأتربّص به.

الخلاصة.. هو يريد زوجة (مهودة الحيل ومشغولة عنه)،
ولكن لم تستمرّ سعادته كثيرًا، فأنا قرّرت أن أترك العمل بعد
الإنجاب- والذي تأخّر- ليعطيه فرصته التي يَرجوها، فقد تناقلت
على كاهلي الأعباءُ والمهمومُ والمسئوليات، فهناك طفل يحتاجني
وعملي يريد مني كلّ انتباه، ورغم عشقي للعمل فإنني كنتُ دائماً
أؤمن بفكرة أن عملي يستطيع فعله عشرات النساء أو الرجال، أما
تربية أبنائي فلا أحد غيري يستطيع أن يقوم بها مثلي، فكانَ ولا بدَّ
لي من الاستقالة، حتى أستطيع التركيز في جبهةٍ واحدة، أما بعد
الإنجاب كانت استقالتي أمرًا مفروغًا منه، من أجل الاستعداد
للقدام والتسلّح بالأسلحة المضادّة للمشاكل والمناوشات الزوجية
والأسرية، وأيضًا حتى أستطيع الحفاظ على عقلي قطعةً واحدة، كان
رأي «يوسف» في هذا الأمرٍ مختلفًا، فكان يقول لي:

- يا «لبنى» ليه عاوزه تقّعلي من الشغل! إنت أصلاً تقدري
تديري عزبة بذاتها وبالأرض اللي حوالها كمان، مش شغل وبيت

وبسّ، اسمعي كلامي.. انزلي شغلك وودّي «أدهم» الحضّانة،
وهاقوّلك عملي إيه ببساطة، إنّت توّدّيه الصّبح في طريقك، وبعدين
ترجعي تجيبه بعد الشّغل، وطبعًا متشيليش همّ، أنا اللي هادفع
فلوس الحضّانة.

أصرخ في وجهه دونَ مقدّمات بمجرد أن ينتهي من كلامه،
فأنا لم أنمّ، ولم أكل، وأشعرُ أنّي أغرق وهو يقول لي أن أنزل العمل
وأصطحبُ ابني في طريقي، ما هذا الجنون؟!
فأقول له:

- أكيد بتهرّج، بسّ تهريج رخيص ومُبتذل كمان، إيه يا
«يوسف» هي «سعاد» ضحكت عليك وفهمتكَ إنّي مُمكن أعمل
كده؟! «يوسف»، من الآخر اكشف ورقك المكشوف أصلًا؟!
إنّت عاوز ميقاش عندي وقت خالص علشان تبقى براحتك،
أجيبُ لك من الآخر، أنا مش هاشتغل، ومش هاسيبك في حالك
إنّت وسعاد.

يهزّ كتفيه، ويضرب كفًا بكفّ، ويقول لنفسه وهو يغادرني:
- والله ظالمة، وهتفضلي طول عمرك ظالمة، الحقّ عليّا إنّي
عاوزها تحافظ على كيانه اللي بتقول عليه، معلش يا «جو» حظّك
كده مع مراتك.

أختمُ الكلامَ غاضبةً وناثرةً قائلةً:

- معلش يا مسكين، حظك كده، «لبنى» اللي أهلها إدو هالك
تتحكّم فيها إنت ومامتك وعيالك!
يرجع خطوةً للخلف ويقول:

- عيالك يا مفترية! ده حتّة عيّل مفعوص، ده حتى مرضيش
يقعد في بطنك أكثر من 7 شهور مستحملش من جنونك.

في هذه اللحظة السعيدة جدًّا، أقدفه بكيس الحفّاضات (فيلبس
في الهدف) فيضحك مني، ثم يترك المكان وأنا أكمل الكلام مع
نفسي الغاضبة.

أعود من ذكرياتي وأجلسُ على طرف السرير غاضبةً، كيف
وصل «أدهم» لهذا الحال؟! أتفكّر في وضعه، وأتذكّر ما دار بيننا
أمس! هل قصّرت في تربيته هو وإخوته؟ كيف وأنا لا همّ لي إلاّ همّ،
ولا يشغلني شاغل إلاّ راحتهم!

لقد منّ الله عليّ بـ«أدهم» بعد سنتين من الزواج، عانيت فيهما
الأمريين من تهكّمات حماتي وتطفّل الآخرين، ولكنه جاء طفلاً بأشأ
جميل المحيّا صاحب ضحكة ساحرة، لدرجة أنّ عمّتي «وصوف»
قالت لجدي يوماً:

- على فكرة يا بابا، البنت «لبنى» جايبة عيّل ما شاء الله عليه
زيّ القمر!

«أدهم» الآن 18 سنة، في الصّف الثالث الثانوي، كلّ أفكاره
ضدّ التعليم، ولا يحبّ فكرة النّظام، أو الهدوء أو النّظافة المفرطة،
و ضدّ بذل أيّ مجهود، قانونه في الحياة (الكسل عسل).

عندما كان صغيرًا كان كلّ تفكيره وكلامه أكبر من سنّه، وكنت
دائمًا فاغرةً فاهي من الصّدّات التي كان يرميها في وجهي، وصارت
له هواية معرفة أصل الأشياء، فأبيّ لعبة تصل إلى يديه تتحوّل في
لحظات إلى أشلاء، فهو يرى أنّ اللعب والهدايا التي نحضرها له لم
يتمّ صنعها بشكلٍ سليم، ودائمًا كان يقول لأبيه:

- بابا أنا ها صلّحها علشان بايظة.

وكان ينطق الحروف بشكلٍ مُضحك، لكن لا يضاهي «بوسي»
أحد في نطقها للحروف، فهي تنطقها بشكلٍ كوميدي بسبب مشكلة
لديها في الكلام.

«أدهم» ذلك العبقرى الفدّ الذي ضلّ الوصول إلى وكالة ناسا
للفضاء، وجلس في وكالة «لبنى» (ربّنا يجعله عامر) للألش وللهراء،
قال لي في أحد الأيام عندما كان في السّابعة من عمره ونحن جلوس
في حجرة المعيشة:

- ماما، تخيّلِي حضرتك لو الحوض بقى مكانه في السّقف،
تفتكري هنعرف نغسل إيدينا ازاي؟! أو مثلاً لقينا السراير على
الحيطه، هنتصرف ازاي!؟

لم أجد إجابة منطقية تُنهي هذا النقاش، ففكرت في شيء يتناسب
مع الفكرة، ويغلق باب الاقتراحات اللولبية واللوزعية فقلت له:
- عادي يا «أدهم» وقت ما ده هيحصل هنكون كلنا التحولنا
لقطط أو أبراص أو فيران، إنت اختار النوع اللي هيناسبك ويسهل
عليك الوصول للسراير أو للحوض!
لكنّه قال لي:

- هو ليه يا ماما حضرتك تفكيرك محدود! أنا عن نفسي هافضل
إنسان، بس هاكون سبايدرمان، وحضرتك مُمكن تفضلي ماما وتبقي
سبايدر وومان!
عند هذا الحدّ من الحوار أثرتُ السلامة حفاظاً على المتبقي من
عقلي، وأنا التي أنهيتُ النقاش وقلت:

- حضرتي هتاخذ تفكيرها المحدود ده وتروح تغسل المواعين
قبل الحوض ما يتشعلق في السّقف واحتاس، تحبّ أعملك «هوت
تشوكليت»؟

لم يردّ عليّ، فقط أوما برأسه وجعل يقلّب في قنوات التلفاز

ليشاهد فيلمًا كرتونيًّا عن الرَّجل العنكبوت، لم تتوقَّف أسئلته أو اقتراحاته، ولا حتى تعليقاته على ما يدور حولنا لدرجة أنّني شككتُ أن يكون تمَّ حقنُه بشيء عجيب عندما كنّا في أفريقيا، فهو لا يهدأ أبدًا، وكانت تراودني أفكارٌ شرّيرة أن أرسله لحماقي سعاد (وأضرب عصفورين بحجر) سيتسبّب في انشغالها بالردّ على أسئلته العجيبة، وفي الوقت نفسه (تلهّي) عني قليلًا، وأنا أرتاح من أسئلة «أدهم»!

مرّت السّنوات، وكبر «أدهم»، وظلّت مشاكل الدّراسة بيني وبينه لا تنتهي، فهو دائمًا يعمل عقله فيما يشئت عقلي، ويجعلني صيدًا سهلاً لفخاخه التفكيرية، وعندما أصبح في المرحلة الإعدادية، قال:
 - على فكرة يا ماما، أنا شايف إن التاريخ اللي بندرسه ملوش أي لازمة، يعني حضرتك أنا هاستفيد إيه بأحمد عرابي، واللّا سعد زغلول؟! هينفعني بياه في حياتي، صدّقيني ولا له أي لازمة، و حضرتك طبعًا هتقول لي، التاريخ عبرة وتعليم، هاقول لحضرتك إنّ المقولة دي بتاعة الكسالي، إحنا مفروض نتعلّم تاريخ الأمم المتقدّمة، مش تاريخ الدّول اللي طول عمرها محتلّة، وعمومًا أنا شايف، لو إنهم سمحولي أقول رأيي في التعليم! أكيد....

أقاطعه:- اسمخ لي أنا أقولك إنك عندك حق! وإيه رأيك سيبك من التّعليم وتنزل عند عمّ إبراهيم اللي بيصلح الكاوتش هو محلّه قريب

من هنا! بدل ما تجيب لنا مصيبة أنا وأبوك بتحليلاتك السياسية دي،
علشان مُمكن ألاقك عدّيت الخطوط الحمراء وبدأت تتكلّم عن الأستاذ
المهندس أحمد عزّ والأستاذ الدكتور فتحي سرور! أو حبيب باشا.
بمجرّد انتهائي من مجملتي، أفاجا بردّ جعلني أندم أنّي تفوّهت
بهذا الكلام أصلاً، قال لي: - مين أحمد عزّ! الممثل؟ وفتحي سرور
بيشتغل إيه؟!

قلت له: - أبداً دول اتنين كانوا معدّيين من تحت البيت، أيوه
انفضّل حضرتك كمّل كلامك! ويا ربّ نخلص النهارده، أمّا
حبيب باشا، فالحمدُ لله إحنا منعرفهوش.

طبعا لم ينته النقاش بتهديدي له بالعمل في الورشة؛ بل اشتعل
أكثر، فقد اعتدل في جلسته، وقال لي باسمًا:

- أمّا بخصوص عمّ إبراهيم، والله فكرة يا ماما، حتى مصطفى
اللي بيشتغل هناك صاحبي، وبحبّ أقف معاه لما بروحله مع بابا
وهو بيصلح كاوتش العربية، تعرفي بيكسب قدّ إيه؟! طيّب تعرفي
إنّه بيعرف كلّ أنواع العريّيات، ده شاطر جدّا!! ويُرِدِفُ بهدوء:
موافق يا ماما!

وأنا أوافق على إنهاء الحوار، وأجرّ أذيال الهزيمة وأتجه لحجرتي
أرتمي على سريري راغبةً في النّوم بعد جلسات التّنمية الحوارية
الصاخبة هذه!

كُنْ إِذَا لَبِثْتَ مِنْهَا
لِلثَّقَاتِ وَالْعُلَمَاءِ

لفصل لك من ضوافر وكحل

يدقّ باب الحجرة، ويأتيني صوت «هنية» خائفاً:
- يا مدام «لبنى»، المدام سماح، أمّ فريدة وعبد الرحمن جارتنا،
جات عندنا وعاوزاك، أجولها إنك نايمة.. هاه؟!
أردّ عليها بهدوء:
- هو لازم تعرّفيني بيها بكلّ الكلام ده؟! هو في غير سماح
واحدة! وليه تقولي لها إنّي نايمة هنكذب يا «هنية»؟!
تردّ وصوتها يظهر عليه القلق:
- لأنّ حضرتك جولتيلي لو بسّ حصلت مصيبة آجي واجولك،
وهو عشان مفيش مصيبة حصلت أنا خايقة تزعّجي، بسّ مينفعش أسيب
الستّ أمّ فريدة متلجّحة وحديها برضيك! هو ينفع أسيبها يا مدام؟
أقول لها من خلف الباب، وبصيرٍ شديد يكابد غضباً يتقافزُ
أمام عينيّ:
- روحي يا «هنية» اعلمي اتنين قهوة، وقولي لمدام سماح إنّي
جاية على طول، ومش هازعق لك ولا حاجة، يلاً..

تردّ قائلة: طيّب لو جالت مش عايزه جهوة، أعمل إيه أنا دلوقت؟! أسيبها ومجدّمهاش حاجة واللّا أعمل الجهوة غضبًا عنها؟ أقول لها بصبرٍ مازال يهدد غضبي ليهدأ، وأستغرب من أين جئني: -
روحي يا «هنية» اعلمي أيّ حاجة عاوزاها مدام سماح، وخليّني ألبس وآجي أشوفها.

سماح جارتي منذ ثلاث سنوات، هي عمرٌ وجودنا في هذه الشقة، قبل الانتقال لشقّتنا هذه كنت أعيش في سيرك مع صغاري المشاغبين؛ كان سببًا في البحث عن مكانٍ أكثر استقلالًا وهدوءًا، وكى يتمتّع قرودي بحريّة المشاغبة، وأتمتّع بدوري بحريّة الصّراخ فيهم دون أن أزعج الجيران، أو أن يعرفوا شيئًا عن سوء طبعي الذي زاد مع تقدّمي في السنّ والإنجاب (كما تقول سعاد)! ما سبق بالإضافة لنموّ الأبناء ودخولهم في مراحل العندّ والرّفص؛ جعل البيت حلبةً لمصارعة الثيران لا تهدأ، فكان لا بدّ من التحرك سريعًا، وقد كان..

لقد استطعنا الانتقال إلى منطقة هادئة ونائية هربًا من صخب القاهرة وجنونه المدمر لأعصاب البشر والمخلوقات، بالإضافة لأهمّ شيء؛ الحفاظ على سرّيّة حياة النّاس، فعائلتي تتّصف - من

وجهة نظري - بالجنون المفاجيء، والذي لا بدّ معه من وجود السّتر، وإلاّ فضيحة مصحوبة بربابة! وأحياناً اتّصالات بالشرطة لأننا عصبية مجانيين! لذا كان ولا بدّ أن يكون للمكان الذي سننتقل إليه مواصفات خاصّة، ومن فضل الله علينا ثمّ سعي وجهه جهيد من «يوسف» استطعنا الحصول على هذه الشّقة في تلك البناية التي لا يقطن فيها سوى نحن - والأشباح - وجارتنا سماح التي تعيش بمفردها وولديها بعد سفر زوجها.

تلك السيّدة الرقيقة التي ما أن تدور بيننا الأحاديث حتى أشعر وكأنّ أنثى العنكبوت قد تلبّستني، أمّا هي فسيّدة ناعمة، صوتها همس (إحم زبيّ أحياناً)!

أقوم بتبديل ملابسني، وأخرج من حجرتي لأستقبلها وأنا مبتسمة وباشّة، فأنا صدقاً أحبّها، وهي مصدر الطّاقة الإيجابية في حياتي! وبمجرد أن تراني تفتح ذراعيها وتستقبلني بحضنٍ طيّب حنون، وبصوتٍ مثل همس العصافير تقول لي:

- إزيك يا «لبنى» يا حبيبتني، والله وحشتيني جدّاً، إنت مش

باينة ليه؟

أضحك بخجلٍ وأقول لها:

- أنا برضو مش باينة!! طيّب وصوتي مش باين برضو؟ دي

عصبيتي واصلة للساحل الشمالي .

تقول برقة: - ليه يا «لبنى» يا حبيبتى العصبية دي، روقي وفرشني كده، صحتك بالدنيا، والله يا «لبنى» محدش هينفعك لما تتعبي .
أضحك حتى تدمع عيوني، وأقول لها: - والله إنت طيبة يا سماح، بس تعرفي إنت جيت متأخرة، كان لازم نتقابل قبل ما التحول لديناصور!

تُربتُ على كتفي وتقول: - سيبك من الكل، حبي نفسك واهتمي بيها.

ثم تطور معها الأمر، وقالت لي أشياء عجيبة، قالت لي:
- إوعي تنسي السبا (السونا والتدليك والجاكوزي) والجيم والبروتين لشعرك، بوتوكس لشفايفك، كل الحاجات دي هتفرق معاك جدًا وهتحسن نفسيتك، وهتخليك طيارة من السعادة.
أبتسم ابتسامة البليد الذي طلب منه التفوق وهو لا يفقه شيئًا، وأقول لها:

- طبعا طبعا يا حبيبتى، والله يا سماح فكرة، أنا فعلا نفسي أطيّر بس مشكلتي الوزن، أخس وأشوف حل لموضوع الطيران ده..
وأقرر أن أغير الموضوع قبل أن تكلمني على عمليات الشفط!
سبا وجيم وبروتين! وطيران كمان! لا وبوتوكس لشفايفي! «اللهم

صلِّ على النبي « إحنّا عيشتنا هتبقى فلّ! وأقول لنفسي مندهشة:
- الستّ الرّايقة دي من أيّ كوكب، ده أنا وكلّ أمّهات أصحاب
عيالي نعتبر مسجّلين خطر، ويمكن أنا أعتبر النّسمة بتاعتهم، سبا
وطيران، وبوتوكس، أنفخ شفافيي يا سماح! دا إنتِ من كوكب
العصافير، وأنا من كوكب المورستان، ربّنا يبعد عنها الأشكال اللي
شبهي، أكيد وجودها معايا هيخليها تفرّض ضوافرها بدل من
الباديكير والمانكير!

نظري باندهاش قائلّة وهي تضع فنجان القهوة:
- بصي.. في جيم فتح قريب، إيه رأيك أحجزلك؟ وقتها
ملكيش حجة وهتخسّي وهتبقى زيّ المانيكان! بجدا يا لبني وافقي
وافقي علشان خاطري، هتنسطي أوي.

أقول لها ضاحكة: - حاضر هاتِ المواعيد وأنا أظبط أموري!
بعد رحيلها أتذكر كلامها هذا فأضحك كالمجنونة! وأشعر
أنّ هناك مغناطيسًا جاذبًا للشخصيات المختلفة عني يتحكّم في
حياتي، ولكنّ إحقاقًا للحقّ عشرة سماح لطيفة وممتعة، ذلك لأنّها
تعيش في عالم تاني مقرّه الدائم فوق السحاب أو داخل استوديوهات
الكارتون، فلا علاقة لها بعالمنا الأرضي السّخيف، كنت أسمح
لنفسي ببعض الوقت معها، والانتقال من جنون بيتي إلى سكون

وهدوء عالمها الخيالي! ولم أستغرب عشق «بوسي» المكوث عندها كثيراً، فهي تحبّ فريدة وبودي وتعشق طنط نباح عlishان طيبة ومش بتزعق كثير زي مامتها الغوريلا.

«بوسي» أصغر أولادي، شخصية نارية مُلتهبة طول الوقت تشعل البيت مشاكل! رغم أنّها تبلغ من العمر 6 سنوات، لكنّها والمشاكل توأم سيامي، لديها مشاكل في نطق الحروف، فلقد تأخّرت في الكلام ولا أعلم سبباً لهذا؛ فكلّ أهل البيت (برباند) منطلقو اللسان، ولكن أظنّ أنّها لكونها الصغيرة أهملناها، رغم قرب سنّها من «رمضان»؛ لذا وبسبب هذا التأخّر، نداوم على الذهاب إلى جلسات التخاطب دون كللٍ أو ملل، وسبحان الله هي تستطيع النطق صحيحاً على حدّ قول الطبيبة، لكنّها تعاندنا، وترفض الأوامر، ومازلنا نعانى في فكّ شفرات الحروف!

وهي أيضاً ذات طبيعة مختلفة؛ فهي أيضاً لها طقوسٌ عجيبة عند الاستيقاظ، تختلف عن كلّ أبنائي، فعندما تستيقظ لا بدّ أن تفرع كلّ الكائنات الحيّة في البيت، فهي تشعر أنّ سارينه المطافي أو الإسعاف قد انطلقت لتجوب أنحاء المنزل، وإذا حدث واستيقظت أنا بعدها، أقوم أجدّ قلبي يكاد يتوقّف من سرعة الدق؛ ذلك

لأنها عندما تستيقظ تصرخُ صراخَ الطير المذبوح! وأوقات كثيرة كنت أستيقظ على صوتها، وبعدها بقليل أجدُّ دقاتٍ شديدة على باب شقتي، فالجيران يُهرعون إلينا بملابس المنزل، عارضين علينا المساعدة لنقل المصاب إلى المستشفى، أو الاتصال بأهلي ليرتبوا إجراءات دفن المتوفى، فهي رغم أن حجمها صغيرٌ، إلا إنها تمتلك حنجرة أوبرالية! (إحم) أعلم طبعًا من أين أتت بها! وأتذكر كلام جدتي - رحمها الله - والمثل الذي كانت تقوله لي:

(القدِّ قدَّ القولة والصوت صوت الغولة!)

تلك الصغيرة دقيقة الحجم لكنّها دائمةً تصنع قلقًا يعادل في حجمه حجمَ الجبال، ولديها مشاكل كثيرة في التأقلم مع مَنْ حولها (يا الله، عامل الوراثة له الأثر الشديد) وتتعالى على الأشياء والبشر؛ فهي ترفض سيارتنا، وترفض الشغالة، وترفض إخوتها وتتقبل أباهما على مضضٍ، أمّا أنا فزوجة أبيها، وهذه القصة سببٌ سأذكره لاحقًا، ترفض مرافقتي دائمةً، وتدّعي أنني أتسبب في إخراجها أمام صديقاتها (هذه البذرة لها صديقات ترحج أمامهنّ)!

فهي ترى أن سيارتنا غير لائقة، وتريدها أوتوماتيك، وأنها (أعفن عربية في العيلة)، وهذا يجعلها تحجل من ركوبها، فتلك العربية (بيئة) وللعجب «رغم أنه لا عجب مع «بسنت» هانم» فإنّ

السيارة التي لا تروق لها سيارة حديثة، ولكنها «بيئة» من وجهة
نظرها لكونها ليست أوتوماتيك!

كانت زيارة سماح خاطفة ومريحة، وأيضًا ممتعة - تأتي «هنية»
لتحمل فناجيل القهوة والصينية ثم تقول لي:

- هي «بوسي» هتفضل نايمة لغاية دلوقت هي و«رامي»، مش
كفاية عليهم كده نوم؟!!

أردّ على سؤالها وأنا أتصفّح مجلة بجواري تركتها لي «سماح»
قبل مغادرتها:

- سيبهم نايمين بلاش أذية يا «هنية» هانم، وروحي إسقي
الزرع، وحطّي رز للعصافير على سور البلكونة علشان ميدخلوش
ياكلوا الزرع.

تردّ عليّ قائلة:

- يا مدام طريجتك في ريّ الزرع عفشة ومش صحّ، ولازم
تسجيه مع المغرب، كده هيفطس ويموت.

أشير لها دون أن أرفع نظري وأقول: - إمشي اعلمي اللي بقولك
عليه وملكيش دعوة، يعيش يموت ميخصّكيش!

وكأنها كانت تنادي علي «بسنت» بذكرها إيّاها، وما أن تغادر

«هنية» حتى أجد «بسنت» قادمة وهي ترسم على وجهها تكشيرةً عميقة، فأسألها:

- فيه إيه يا حبيبتى؟! صباح الخير أولاً يا «بوسي».
تقفز وتجلس بجواري وتقول لي: - عندي مشكلة يا ماما..
أتوجه بكلّ جسمي ناحيتها ثمّ أشرع بوضعها على حجري
فترفض، فأقول لها:

- بلاش، براحتك، خير! في إيه؟!
«بسنت» لا تكتفي بالصراعات التي تنشئها داخل البيت؛ بل
تأتيني بمشاكل من الخارج.. قالت:

- لو ثمحت يا ماما تيجي معايا الحضانة.
فسألتها: إيه سبب الطلب المفاجئ ده يا حبيبتى؟!
فكان ردّها أن قالت:

- الميث بتاعة القولان مثقثداني! علشان أنا ثألتها: يا ميث إنت
مسيحية؟ أنا ثألتها ثوال عادي! ليه تزعق فيّا كده؟!

في الواقع أنا لم أشعر بنفسي إلا وأنا أصفق وأغني مثل ألتراس
الكرة من هول المفاجأة، فهذه العادة التقطتها رغم سني هذا ودون
أن أدري من أولادي، ثمّ ما لبثت أن جاءت «هنية» على صوتي وهي
تزغرد وتسال: - خير يا مدام حصل إيه!

ودون أن أجابها بدأت في طرح الاحتمالات: - ألف مبروك يا مدام على النّجاح، واللّا هوّ خبر جواز مين؟ ثمّ تكلمّ نفسها عندما لا أردّ عليها فتقول:

- أيوه أيوه، خلاص فهمت أكيد حدّ رجع من الحجّ! هوّ مين اللّي رجع من الحجّ يا مدام؟
أصرخ فيها قائلةً:

- إمشي من هنا، همّا بتوع مستشفى المجانين تايين عنك ليه، هو في حدّ بيحجّ في رجب؟!
تنظر لي باندهاش من سمع خبراً لا يمكن لعقله أن يصدّقه ثم تقول لي:

- وما له رجب يا مدام! همّا هيحرّموا فيه الحجّ لبيت ربنا؟! ده إيه الكلام ده!

أصرخ فيها: - همّا مين اللّي هيحرّموا! يخرب عقلك الخربان أصلاً، يا بنتي إيه.. إيه؟ إنتِ متسلّطة عليّا!! مين سلّطك هاه... قولي. تتابع ثورتي وغضبي وهي (لاوية بوزها) ولا تنطق بكلمة، فصراخي فيها أجم سيلّ كلامها، فلم أنتّه من كارثة «بوسي» حتى تأتي لي «هنية» هانم!

ثمّ أنهرها لتغادرني، فتذهب وكالعادة تبرطم قائلة:

- هوّ إليه الظلم ده، ما كلّهم شهوّر ربّنا، المدام بقت عصبيّة قوي!
جلست أنوح، وكاد نواحي يصلُّ بي إلى اللّطم، ولولا خوفاً من
الله لفعلتها، خاصّة بعد أحضرت لي «بوسي» إشارباً من إشارباتي
وقالت لي:

- خدي يا ماما الإيشالب ده أولبطية على لاثك علشان شكلك
يبقى حلو وإنّ بتلخي، علشان تبقي شبه ملات عبد الغفول البولعي!
نظرتُ إليها برهة أستوضح ما هذا الذي تقوله! فشغلت
برنامج فكّ الشّفرة، ففهمت أنّها عندما رأني أصرخ، قرّرت أن
أكمل المشهد بأن أربط الإيشارب على رأسي مثل زوجة عبد الغفور
البرعي في مسلسل لن أعيش في جلباب أبي! وبحركة تلقائيّة،
أخذت منها الإيشارب وربطته على رأسي لأنّها كادت تنفجر! فما
تقوله «بوسي» قد يذهب بعقل الحكماء أدراج الرّياح ولا يعود
أبداً، بعد أن هدأت قليلاً تفكّرت من أين لها هذه الفكرة؟! هذا
المفهوم غريب عن بيتي وعن محيط معارفي، فأن تكون معلّمة القرآن
قاسية مع «بنت» وتضطهدها وارد جدّاً نتيجة شغب «بوسي»،
وإزعاجها! وارد أن تؤول شدّتها بالقسوة والاضطهاد، أما أن تكون
مسيحية فهذا يستحقّ التّفكر (مدرسة القرآن مسيحيّة)! فكيف لها
بهذا المنطق المضحك والرّكيك؟! ضغطتُ على أعصابي وتقمّصت

دور الأمّ الهادئة طويلة البال، وضحكت ببرود وسألتها وأنا كاتمةٌ دهشتي حتى لا تتهمني بالسخرية بمشاعرها الرقيقة، آه والله ابنتي (الأوزعة) تقول كلاماً أكبر بكثير من عمرها وقدراتها اللغوية، ورغم عجزها عن تركيب الحروف والكلمات بشكل صحيح، فتنتقي أصعب الكلمات لتنطقها بشكلٍ كوميدي، لكنّها ترفض السماح لي بأن أعبّر عن استغرابي لأي كلمة غريبة تقولها:

- «بوسي» يا نور عيني، ليه مسيحية؟ وإزاي مستكدصاك؟!
تردّ وهي متحفّزة:

- أثلها يا ماما عندها ضوافل، وتحتطّ كحل في عنيتها! تثولي يا ماما!
وأنا من مكاني هذا أتصوّر طبعاً أتصوّر، دي أكيد مسيحية،
وكان مسيحية من أوروبا، يا سلام (اللهم صلّ على النبي، بنتي عبقرية)، وطبعاً كيف لي ألا أتصوّر أيّ شيء مع «بوسي»!
أقربتُ منها ثم أخذتها في حضني، وحاولت أن أشرح لها أن ما تقوله عارٍ تماماً من الصحة، ولا أساس له، بدليل أن عمّتها تربي أظافرها وتضع الكحل وأيضاً جدّتها «أمّي» تضع الكحل! فانتظرت اقتناعها بدليلي هذا.. فنظرت إليّ بلا مبالاة وقالت بمنتهى الثقة:

- يبقى تيتة وعمّو مشيحين، أكيد، أكيد.
أسقط في يدي، أقوم من مكاني وألفّ في البهو دون هدف

وأنا لا أعرف ما الذي يجب عليّ فعله؟! وأشعر أنّ بوادر أزمةٍ قلبيةٍ عفيفةٍ قد تقتنص عمري، وبدأت أشكّ في نفسي، هل أنا السبب؟ هل لأنّي توقفت منذ زمن بعيد عن وضع الكحل في عيني؟ فهذا منطقي بالنسبة لها، فأنا لم أكن يوماً مغرمة بمساحيق التجميل! ولم يرغب «يوسف» أن أستخدمها، حقاً أنا في ورطة. أتحرك في اتجاهها وهي جالسةٌ مُحدِّق في أظافرها، ثمّ أجلس بجوارها، فنظر إليّ ببراءةٍ من ينتظر حلولاً لهذه المشكلة، أقرض أظفري مثل الفأر عندما يجد قطعة خشبٍ سهلة القرض! وأسأل نفسي لماذا ظننت أن معلمة القرآن مسيحية؟ هناك سرٌّ لا أعرفه وقد تكشفه هي لي فسألتها بهدوء:

- «بوسي» يا حبيبتي مين قالك إنّ المسيحيين بس هم اللي بيحطوا كحل ويربوا ضوافرهم؟

وبعد أن ألقى السؤال انتظرت الردّ وعقلي يفكر.. هل من إجابة عن هذا السؤال، فتهزّ كتفيها بلا مبالاة، ثمّ تنظر لكفها الصغيرة وتقول لي:

- «هنية» هي اللي قالت لي كده!

أصرخ قائلةً: - يا سلام! ومن إمتى إنت بتسمعي كلام «هنية»؟!!

لا تردّ عليّ، وجعلت تتابعني في هدوء، أستغفر ربّي وأدعوه في

سَرِّي بأن يلهمني الصبر، وألاً أصاب بارتفاع في ضغط الدم من وراء هذه الـ«هنية» التي لا هناء يأتي من ورائها! إذاً هي سبب هذا التحوّل العميق في آراء ابنتي، لكنني أستدرك وأقول لنفسي:

-«هنية» لا ذنب لها، فهي لم تصل إليها المعلومات الصحيحة، وهي تجتهدُ مثل باقي البسطاء، وتستمتع لبعض الأفكار البالية المنتشرة في القرى والريف، والتي لا تمتّ للدين الحنيف بأيّ صلة، هذا الموقف أظهر لي كم نحن مقصرون مع هؤلاء البسطاء، ويجب علينا أن نعرّفهم أبسط أمور دينهم، وأن لا نتركهم لقمة سائغة للدجالين والمنافقين ومدّعي الالتزام!

«هنية» فتاة ريفية، عمرها حوالي 16 سنة، تعمل لديّ منذ عامين أو أكثر، مشاغبة، تتحدّث كثيراً، فيلسوفة ولا أفلاطون، أو ديكارت، لها هوايات عديدة أهمّها الجدل معي ومحاولة إثبات أنّي لا أصلح لأكون زوجة أو أمّاً، وتعشق التلفاز والأغاني، وأيضاً تفعلُ بي ما تفعله الأذن الوسطى بالإنسان عندما تلتهب، وتتسبّب في تدمير خلايا هدوءيّ العصبية، وتتعامل مع «بوسي» صغيرتي (الزومبية) على إنّها نذٌّ لها! فداًئماً تأتي إحداهما تصرخُ وتشتكي من الأخرى كأنّهما في العمر نفسه!

لقد ظهر بانتقالنا للبيت الجديد أهمية وجود شغالة في البيت معي، تساعدني وتخفف عني بعض المسؤولية، فالبيت أكبر، والأولاد الصغار سنهم متقارب، فكان ولا بدّ من وجود شغالة مقيمة تساعدني، ووقع الاختيار عليها صغيرة يتيمة أحضرها لنا طلعت سائق جدّي، فهي قريبة له من بعيد، هذا الكائن المزعج أكثر إنسان يرهقني عصيباً، وأيضاً يُدخِل الابتسام على قلبي!

وكون «هنية» من الرّيف، من البحيرة تحديداً، فهي مثل الكثير من الريفيين (تبدل القاف بحرف جيم) وكانت أولى صدماتي عندما وجدتها أوّل يوم تأتي للعمل عندنا تحدّثني بكلام لم أفهمه في أوّل الأمر، ولم أستطع معرفة ماذا تريد، فقد كانت تتكلّم بجديّة وقرّف في آنٍ واحد، قالت لي:

- يا مدام أنا لجيت الجلم العفش ده متلجّح في درج المطبخ!
فما كان منّي إلا أن فتحت فمي في حالة ذهول، وأنا أحاول أن أفهم بأيّ لهجة تتحدّث معي، إلى أن قالت لي وهي تشاور على قلمٍ صغير، كان «رمضان» ابني قد قام بعرضته وتشويه معاله:
- (الجلم ده، ده يا مدام).

عندها عرفت الشفرة وقرّرت تحويل كلّ حروف الجيم إلى قاف، ولكنني وقعت في مأزق، هناك بعض الكلمات تتكوّن من

حرف الجيم طبيعياً ودون تلاعب من «هنية»، مثل الجراج، والجنينة، والجنينة، وبعد قليل استطعت أن أعرف ما تقصده دون إعادة الجيم لقف، ولكم أن تتخيلوا بأيّ مفردات تناقشني وتتعامل معي! فهي تتعامل كأنني أنا التي تعمل عندها! وليس العكس، فكنت ومازلت أحتمل شطحاتها وجنونها فهي أرحمُ بكثيرٍ من العاملات اللاتي يأتين ويرحلن في اليوم نفسه.

أخرج من ذكرياتي على صوت «بسنت» وهي تناديني، أنتبه لها وأقول:

- إن شاء الله هاروح معاك للحضانة، بسّ مُمكن تروحي لـ«هنية» علشان تدخل الحمام وتغيري هدومك، وتيجي بعد كده علشان تفطري.

تُعطيني قبلةً ثم تقول لي: - إنتِ أجمل ماما.

ثم تقترب مني وتنظرُ في وجهي، وتقول:

- هو انتِ ماما فلعن! واللاملات الاثاث يوثف!؟

أجذبها من يدها وأسأها: - مين الأستاذ «يوسف» ده!؟

تضحك وتقول لي: - بابا. أثل «هنية» بتقولُه يا اثاث يوثف،

عاوثة مني حاجة يا مدام!؟

أنفجرُ في الضحك فقد منحتني «بوسي» ضحكًا لا أطمع فيه
أبدًا في هذا التوقيت. ثم أقول لها: - (مدام)! ثم أناديهما تعالي، إيه
حكاية مرات يوثف دي أقصد «يوسف»؟!
تضحك وتقول بمنتهى البراءة:

- أثلك مش شبهنّا، بثلاحة، «هنية» بتقول إنّا ثمعت تيتية ثعاد
بتقول: إنّا أحنا أولادها مش أولادك، علشان حضلتك مش شبهنّا!
ثمّ تجري أمام «هنية» التي جاءت لتأخذها لتغيّر لها ملابسها،
«هنية» أصبحت المعلم المرشد لابنتي، وحماتي تعبت في عقول
أولادي من ورائي كالعادة! ولا أدري متى سيتوقف هذا الأمر؟!
فهي تتعمّد إهانتني وإيلامي بأيّ صورة، ولا تراعي أيّ توقيت، ولا
أيّ ظروف، حماتي هي الإنسان الذي يتغدّى على وجع الآخرين!

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصل لكّ سع أمّ عزت

أتذكّر عندما كنتُ في أواخر حملي بـ«بسنت»، وكنتُ في زيارة روتينيةٍ لحماتي؛ أصرّ «يوسف» عليها خوفًا من غضب والدته، ورغم تعبٍ وثقل الحمل، إلّا إنّها لم ترحم هذا، فبمجرد أن دخلنا، وجلست أحاول أن أتنفّس بشكل طبيعي، وجدتها تنظر إليّ وترفع حاجبيها ثم تقول لـ«يوسف»:

- هيّ مراتك مش خايقة على نفسها أحسن تموت أو تجيب عيّل مُعاق؟ مش كان كفاية «أدهم» و«رمضان»، ربنا ستر وجمّ سولام مش متصايين بمرض علشان سنّها الكبيرة!

يُقَلِّب «يوسف» نظره بيني وبينها خائفًا من أمّه أن تبدع في إهانتني أكثر من ذلك وهو يظنّ أنّ كلامها القاسي القميء لم يصل إلى مسامعي بعد! ولكنها تستمرّ في الكلام السخيف الذي تقوله عنيّ وفي حضرتي، وكأنّني من الهند لن أفهم لغتها إذا وجّهت إليّ الكلام؛ لذا تكلمه هو، فهو المترجم! أضعُ يدي على بطني فقد شعرت بتقلّص نتيجة السمّ الذي رمته بي، وأصرخ في «يوسف» وأقول له:

- هوّ مش كان بيتقال لي يا «يوسف» إني (أرض بور) دلوقت بقتيتوا خايفين عليّا واللّا خايفين بييجي لكم عيّل معاق!! والله مفيش مُعاق غيرنا.

ثمّ أحاول الوقوف، وأقول بصوت واهنٍ ضعيف:
-«يوسف» عاوزة أروّح.

ينظر «يوسف» إلى أمّه التي تدير وجهها عنيّ بغضبٍ وكأنّني أنا التي أهنتها وعايرتها بعمرها! وكان يأمل أن تطيّب خاطرني لكنّ للأسف لم تفعل.. وفجأة، تعلن «بسنت» عن حضورها، ورغم أنّ إعلان وصولها أنهى الكارثة التي كادت تحدث بيني وبين حماتي؛ لكنّه كان بدايةً لكوارثٍ كثيرةٍ قامت بها «بوسي» الأميرة!
لقد غيّرت حياتي تمامًا، فأصبحت أعيشُ في مستشفى العباسية (مستشفى المجانين).

أعودُ من ذكرياتي على صوت «بوسي»، فقد غيّرت ملابسها وجاءت وفي يديها ساندويتش صغير وكوبٌ من العصير، ثمّ جلست بجواري وقالت وهي تصدر صوتًا رقيقًا:

- ماما يا حبيبتي، أضحك وأقول:

- يا حبيبتي دي مش لله! نعم يا بوسي.. عايزه إيه؟!

تضع ما في يدها على المنضدة ثم تقفز لتحتضنني وتكرّر جملتها وهي تفتعل الجدّية وعاقدة حاجبها بشكلٍ ينمّ عن خطورة الموضوع: - يا ماما يا حبييتي، أنا محتاجة ألوح لفليدة علشان نخلث اللّعبة بتاعة إمبالح! وأصل بودي الليخم غلبنا وإحنا عاوئين نهزمه ونخلث عليه!

أبادها الجدّية وأقول لها: - إيه اللّعبة الخطيرة الّتي بودي غلبك فيها إنّت وفريدة وعاوزين تهزموه ومصمّمة على الموضوع من بدري! السّاعة دلوقت 10 ونص! اصبري طيّب لما يصحى «رامي»! تنزل على الأرض، ثمّ تدقّها بقدميها وتصرخُ قائلة:

- لمضان لا يا ماما، أقثد لامي لا، ده غلث وبيعمل حاجات وحشة، بيثعّق لي وبيغلبنى لأنّه أشطل من بودي! ولما بييجي معاي هناك بيلخّم قوي.

وقبل ما أنطق بكلمةٍ أجدُ «رمضان» قد هلّ علينا وجلس أمامي قائلاً:

- صباح الخير يا ماما، لو سمحتِ قولي لـ«بسنت» متنامش عندنا تاني في الأوضة، لأنها طول ما هي نايمة عمّالة تتخانق في الحلم مع بودي وفريدة، وفي الآخر لقيتها بتشتمني وتقولي يا غلس يا رخم، بصراحة أنا مش عارف أنام منها، لو جات أوضتنا هاروح أنام في أوضتها.

تصرخُ «بسنت» قائلة:

- إِيَّاكَ يَا لِمُضَانَ تَقْعُدُ فِي أَوْضَتِي، دِي بَتَاعَتِ الْبَنَاتِ، وَمَشْ هَتْنَامُ فِيهَا.

أَحَاوُلُ فَضَّ النَّزَاعَ فَأَقُولُ لَهُ:

- يَا رَامِي دِي أَخْتِكَ الصَّغِيرَةَ، وَبِتِيحِي تَنَامُ عِنْدَكُمْ عِلْشَانَ خَائِفَةَ.

يَرِدُ بَهْدُوءَ:

- هِيَّ كَذَّابَةٌ دِهْ أَوْلًا، ثَانِيًا دِي تَخَوَّفْنَا كَلْنَا لِأَمَّهَا شَقِيَّةً جَدًّا وَبِشْعَةَ، أَنَا بَكْرَهُ الْبَنَاتِ، وَبِتْنِكَ السَّبَبِ.

وَطَبْعًا لِحَقْنِ الدَّمَاءِ أَنَادِي عَلَى «هَنِيَّة» الَّتِي تَأْتِي بِتَمَهَّلٍ وَهِيَ تَحْمَلُ كُوبَ اللَّبَنِ لـ«رَمْضَانَ» وَتَقُولُ لَهُ:

- اتْفَضِّلْ يَا «رَمْضَانَ»، اللَّبْنُ أَهْوَى يَا أَبُو صِيَامٍ، صَبَّاحِ الْفَلِّ!
يَنْظُرُ لَهَا بِقَرْفٍ شَدِيدٍ وَيَقُولُ لَهَا:

- «هَنِيَّة» كَامَ مَرَّةً قَلْتُ لَكَ مَتْنَدِهَيْشَ عَلِيَّا بـ«رَمْضَانَ»! وَإِيَهُ أَبُو صِيَامٍ دِي؟!

أَنْفَجَرُ فِي الصَّحْحِ، فَيَنْظُرُ إِلَيَّ «رَمْضَانَ» مَعَاتِبًا، فَأَقُولُ لَهُ:

- مَعْلَشْ يَا رَامِي أَنَا أَصْلِي افْتَكْرْتُ حَاجَةَ. ثُمَّ أَعْتَذِرُ لَهُ، يَتَابَعُ وَهُوَ عَابِسُ الْوَجْهِ:

- «هنية» ملكيش دعوة بيّا خالص، وتناديني وإنت بتقولي يا رامي بسّ، والله، والله أنا قرفت من البنات اللي في البيت ده.

أقول لـ«هنية»:

- خدي «بوسي» ودّيا لمدام سماح، هتلعب مع فريدة وعبد الرحمن. تقاطعني «بسنت»:

- بودي يا ماما مش عبد اللحمان.

هنا يتدخل رامي ويقول لها:

- أمّال بتندهي عليّا ليه بـ«رمضان» يا سخيفة؟! بجدّ إنت «أوفر» رخامة!

أشاور لـ«هنية» كي تبعد، لكنّها تقول له:

- على فكرة، الأستاذ حسن مصطفى في مسرحية العيال كبرت كانوا بيحولوا له يا «رمضان» يا أبو صيام، ليه أنت زعلان جوي كده، الحجّ عليّا بدلّعك. ينفخ «رمضان» قائلاً:

- إمشي يا «هنية» وخدي كوباية اللبن دي، أنا مضمنش درجة نضافتها، إنت شخصية عكّاكة.

هنا وعند هذا الحدّ، أقوم من مكاني وأسحب «هنية» و«بسنت» وأدفعُ بهما في اتجاه باب الشّقة، وأعود لـ«رمضان» وأنا أرسم

الغضب على وجهي، وأقول له:

- يا «رمضان» أقصد يا «رامي» الكلام اللي قلته لـ«هنية»
ميصحش، لأنها نضيفة وأنا معلّماها تاخذ بالها من نضافة نفسها،
وهي زيّ الفل، فعيب تقول لها كلام مُمكن يجرحها! ليه كده؟!
فكان ردّه مناسباً لحالته المزاجية فقال:

- هي ضايقتني وأنا مش عاوز أتعامل معاها وحببت أقرفها
زيّ ما قرفنتي؛ آل «رمضان» أبو صيام!
أرَبْتُ على وجنتيه، فيقوم من مكانه ويحتضني، ثم يمنحني
قبلةً سريعة، ويتركني ليذهب للحمام، كم هو رقيق وحازم رغم
صغر سنّه!

9 سنوات من عدم الإنجاب هي الفرق بين «أدهم» وحملي في
«رمضان» (رامي)، عشت فيهم أصعب فترات حياتي، وفي السنّة
العاشرة رزقته، عانيت فيهم الأمرين من حماتي التي لم ترحم ضعفي،
ومن الناس المتطفلين الذين يدسون أنوفهم في حياة الآخرين، ولكنّ
لم يكونوا أبداً مثل حماتي، كم كانت قاسية لا تراعي مشاعري، حماتي
«سعاد هانم رمضان»، هي من قام بتسمية ابني «رمضان» دون
علمي، لقد قرّرت أنّ تسمّي ابني على اسم والدها لأنّ زوجها

«حمايا» رفض أن تسمي زوجي أو أخاه على اسم جدّهما؛ لأنّه اسم قديم، (أيام ولادته قديم وأيام ولادي أنا إيه!! الأمود؟) فما كان منها إلا أن ضغطت على زوجي، وأقسمت عليه أنّها ستقاطعها لو لم يسمّ ابني «رامي» كما كنت أرغب في تسميته، فأذعن لرغبة أمّه المكبوتة، وأطلق اسم «رمضان» على وليدي الجديد الذي عاش يعاني من استغراب أصدقائه لهذا الاسم القديم!

لم أكتشف هذه الكارثة إلا عند التّقديم للمدارس، فلم يكن «يوسف» أو أمّه يتركانني أذهب وحدي وقت التطعيم الدّوري للصّغير، ومما كان يثير دهشتي وقتها- لكن دون إعطاء الأمر أهميّة- هو أنّ المرضة دائماً تخلط بين اسم رامي واسم «رمضان»، وعشت سنوات مخدوعة و«يوسف» لا يظهر عليه أيّ شيء يدلّ على تلك المؤامرة، أو أن تشعر حماتي بتأنيب الضّمير لخداعي وسلبي حقّي في تسمية أبنائي، ولسداجتي لم يخطر ببالي لأيّ سبب أن أنظر في الأوراق، فأنا من وجهة نظر «يوسف» التي يصرّح بها دائماً:

- «لبنى»، إنّ مهملة جدّاً، ومينفعش تشيلي أوراق ولا إنك تحفظيهم في مكان، إنّ ناسية إهمالك في أوراقك وأوراق ابنك؟ إنّ للنهارده متعريفش مكانهم!

وعليه لم أهتمّ بأيّ أوراق تخصّ الأولاد حتى كان اليوم ذلك

الذي ذهبنا فيه لتقديم أوراق «رمضان» للمدرسة، وعند كتابة الملف أظهر «يوسف» رغبة في كتابته حتى أنتبه أنا لـ«بسنت» التي كانت معنا، ظننتُ أنه لا يريد إرهابي، وكم كانت دهشتي من إصرار المدرسة على أن تقوله يا «رمضان»:

- فوك يا «رمضان»، حطّ المكعبات هنا يا «رمضان».

و«رمضان» يقول لها:

- أنا اسمي «رامي»، اسمي رامي يا ميس!

وبعد الانتهاء من المقابلة، وعند مغادرتنا للمدرسة نادى عليّ المسؤولة، وبتعالٍ غريب قالت لي:

- على فكرة يا مدام مش أسلوب تربوي صحيح ولا مقبول إنكم تندهوا على الولد باسم غير اسمه، ده تصرّف يشوّش تفكيره وعقله. فنظرت إليها باستغراب، وقبل أن أردّ عليها وأكيل لها بسبب نظراتها وطريقتها في الكلام؛ يمسك «يوسف» بيدي، ويقول لها:

- حاضر، إن شاء الله، وشكرًا على الاهتمام.

استوقفته وأنا أشعرُ ببعض الاضطراب، وقلت له بصوتٍ كفحيح الحية:

- يوووووووووسف، تقصد إيه الست دي، شامة ريحة سعاد

في الموضوع.

يرتبكُ ويقول لي:

- سعاد برضو! مش عيب يا «لبنى»، دي في مقام مامتك، تعالي نركب العربية وهاحكي لك.

أضرب الأرض بقدمي وأنا أقول له:

- هتحمكي ايه يا «يوسف»! الولد رامي ما له؟! وإيه حكاية الاسم اللي هيشوشه، ورمضان.. سعاد أمك هي السبب، ده اسم أبوها، «يوسف» ابني اسمه «رمضان»؟!!

يطرق في الأرض ويقول:

- تعالي بس نركب العربية ونتكلم؛ الولد بيص لنا مستغرب.

أبكي، وأنا أضم ابني، فهذا سيدمر نفسيته، وأقول له:

- هنتكلم في إيه؟! كده يا «يوسف» تمشي ورا سعاد؟! سعاد

سمت الولد «رمضان»، وانت وافقت يا «يوسف»؟

طلقني يا يوسف، إنت خذتني، أنا مش مصدقة إنك تعمل كده!

لا يرد عليّ، وظلّ طول الطريق صامتًا كأنه أصبح أخرس.

تقلنا السيارة للبيت، فأصعد وأنا غاضبة منه أكثر من والدته، فهو

صاحب القرار، لماذا خضع لها ولابتزازها؟! لقد كان من الممكن أن

يسمي ابننا بالاسم الذي يناسبه ويسترضيها لاحقًا، لا أعلم لماذا

يخلط الرجال بين برّ الأمّهات وإضاعة حقوق بيوتهم؟! فالبيوت لها

حقوق مثل حقوق الأمّهات، ونحنُ أمانات، فلا يجوز أن يظلمني
وأولادي بحجّة برّ أمّه!

ظللتُ غاضبةً منه فترةً طويلةً، ولم أستطعُ غفران هذا التصرف،
لقد كان بيتي أنا الصّيد السّهل بسبب سلبية زوجي! حاولت كثيرًا
أن أوضّح لـ«رمضان» أن اسمه هذا اسمٌ جميل، وأنا أشعرُ بمدى
الضيق لكذيبي، فهو اسم الشهر الجليل، لكن لم يكن اسمًا لطفل
أبدًا، ولم يقتنع بكلامي، فـ«رمضان» شخصيّة مختلفة، يقول
الناس عنه إنّه طفل (رخم) قليل الكلام، ينظر لهم بتعالٍ، ويحتقر
البنات، ويكرههنّ، أعتقد أنّ «بوسي» لها يد في هذا الموضوع،
وعندما يتحدّث مع أيّ إنسان يتفحصه أولاً، ثمّ يقرّر بعدها هل
يتعطف عليه ويمنحه ردًّا، أم يتجاهله ويتركه ويمضي في طريقه،
فـ«رمضان» كائنٌ غير اجتماعي! ولا يقبل أن تضحك عليه بحلو
الكلام، طفل ذكي ومتفوّق في دراسته، لا يزعجني إلّا في الأمور
الإنسانيّة الاجتماعية، يجب أن يتحدّث بالفصحى مثل أبطال
القنوات الفضائيّة، ممّا يسبّب له مشاكل مع الناس ومع أخته التي لا
تعرف أن تتكلّم بشكل سليم، فبدلاً من الحوار معه تضربه وتكيل
له اللّكّات!

رغم مشاكله التي يتسبّب فيها بسبب جداله الكثير؛ فإنّه من

الطف أولادي. ولكن رغم خلافه مع «بسنت» فإنني أرى أنها هي المستبدة صانعة المشاكل، فهو رغم كل شيء رقيق.. أمّا «بوسي» رغم صخبها فهي أجمل الكائنات وأرقها (سأحني يا رب.. الكذب حرام)، فكل أولادي لهم وضع يجعل لكل واحد منهم مكاناً مميزاً في نفسي.

عجيب أمر الأبناء! فالأمهات يجبن كل أبائهن بنفس القوة والدفء، ويشتكى الأبناء من وهم التفرقة، وهي من صنع خيال بعضهم؛ فالأم لا تفرق في المحبة ولا القلق ولا الخوف على فلذات أكبادها، ولكن هناك من تراح في التعامل معه لسعة صدره وليونة طبعه وطاعته، وهناك من ينطبق عليه (إبعد عن الشقاوة وغني لها) لكن الحب والمعزة واحدة، ومن يفعل غير ذلك معلول في فطرته!

يعود «رمضان» من الحما، ويجلس بجواري في هدوء تام، ويمسك في يده مجلّة، يتصفحها، وهو يقول لي:

- تعرفي يا ماما موضوع مثلث برمودا ده مجنني، مش عارف هو صح ولا كذب، ونفسي أسافر بالقرب منه علشان أشوف الكلام ده صدق واللا بيشتغلونا.

أقول له: - واحنا ما لنا ومال مثلث برمودا، إيه رأيك أجيّب

لك ساندويتش جبنة مثلثات، وأهو كلّه مثلثات يا حبيبي..

يضحك ويقول لي:

- إيه ده يا ماما جبنة إيه، ده موضوع بجدّ مش هزار، حضرتك بتهزري، بسّ أنا بتكلّم جدّ، لو شفت الفيديوهات والصّور، ده ناس كثير بتختفي ومش بيعرفوا يلاقوها.

أشعرُ بالخجل من نفسي وأقول له:

- طبعًا.. طبعًا، ياريت لو عرفت حاجة قويّ أنا أصلي مش شاطرة في السيرش. بيتسمُ برضا ثمّ يقول: - طيب هاقوم أعمل لنفسي كوباية عصير علشان مش عاوز حاجة من الرّخمة «هنية» دي. أقول له:

-ها.. وبعدين؟ قلنا إيه يا حبيب ماما؟

يقول لي: - خلاص مفيش مشكلة، خلاص مش هاضايقها. ثمّ ينفخ وهو يقول: - بصراحة يا ماما كلّ البنات زفت! ماعدا إنت، إنت أجمل بنت في الدنيا!

يذهب عني «رمضان» بهدوء، فأقوم إلى حجرتي وأخرج دفترَ اليوميات من الدّرج، أفتحه كي أدوّن أحداث الأمس قبل عودة الشّعب للبيت، فأجدني فتحت صفحةً لم أستطع تحويل عيني عنها، فجلست وأكملت القراءة، ولم أدوّن أيضًا في حينها.

لا أدري لماذا فقدت القدرة تمامًا على ضبط عصبيتي مع أولادي وزوجي، فأصبحت أكثر ضيقًا وجنونًا، لم أعد أستطيع بث قلقي ووجعي لأُمِّي التي تراني «مزوداها» وبلغه هذا العصر (أوفر قوي)، وإنه يتوجب عليّ شكر الله لمنحي رجلًا هادئًا يستطيع أن يتعامل مع شخصيتي المعقدة، فلم أكن لأناقشها كثيرًا، فأنا لديّ ما يرهقني أكثر من الدفاع عن وجهة نظري التي لا تراها لأنها لا تعيش معنا تحت سقفٍ واحد. وفي نهاية الأمر، كلّ الأشياء سهل التحكم فيها إلا لسان حماي سعاد غُلب حياتي!

حاولت كثيرًا أن أشرح نفسي فلم أجد صدّي لكلامي، فأنا إذا اشتكيت لأُمِّي من أولادي كانت تقول لي: - يا «لبنى» بلاش إنتِ بالذات. ثمّ تذكّرني بما كنت أفعل في طفولتي، فأبتسم وأغيّر الموضوع، ولكنها في إحدى المرات رأت أنّي تجاوزت معهم بعصبيتي وشكوتي ممّا يفعلونه؛ وفقدت صبرها، فقالت لي ونحن نتحدّث على الهاتف: - افكري كنت بتعملي إيه فينا وفي الدنيا، ارحمي أولادك، بلاش تبقي عاملة زيّ صفارة الحكم طول الوقت عمالة تصفري وتصدّعيهم، شوية تغافل، ياما فوتنا لك!

يومها، أغلقت الهاتف وجلست حزينّة لأنها لا تفهم طبيعة أولادي المشاغبة، وتتهمني بقلة الصبر، وفجأة لا أدري كيف

تذكّرت طفولتي وكنت دائماً أنحّيها جانباً لأنّها كانت صاحبة ومدوّية، فتذكّرت أنّي كنت أعاني بسبب رفضي للآخرين، وذلك لأنّ شخصيّتي كانت معقّدة كما يقولون، فمندُ الصغر وشخصيتي تظهر كلّ المتناقضات متجمّعة في إنسانٍ واحد، فأنا اجتماعيّة حين أرغب، وانطوائيّة حين أريد، ولأنّني الابنة الوسطى، تلك التي تلقّب (باللمّضة)؛ أرفض أيّ قيود وأيّ قواعد، دائماً (ليه وعلشان إيه)، فأنا أرفض تماماً التمييز الذي يصنعه البشر، فنحن جميعاً عبادُ الله سواءً في التكليف والثواب والعقاب، لكنّ البشر دائماً يضعون لمساتهم الظالمّة! فطبيعتي المشاكسة ورفضني قوانين البيت كانت دائماً تفجّر الموقف الذي عادةً ما ينتهي لصالح عصاية الغليّة وأنا صغيرة، أو الحرمان من الخروج في فترة المراهقة، ثمّ الخصام بعد أن أصبحت شابّة تعتمد على نفسها!

ورغم اختلافي ونفوري أحياناً من الآخرين، لكنّني كنت ملكة (المجلسة والقرع) وأنا صغيرة كنت أعتبرها (تسليك) أمور قبل أن أدرك معناها الحقيقي والقاسي في آنٍ واحد وهو (النفاق)، فوالله وقتها ما كانت نيّتي أنّه نفاق؛ بل تشغيل دماغ وذكاء، فقد علّمتني الأزمات من أين تؤكّل الكتف، فأنت عندما تكون في وضعٍ لا يُثَمّن، لست بأوّل فرحة، ولا نوعك ذكر، ولا (جايّة على شوقه زيّ

ما يقولوا) ستشعر بالرغبة بالتصريح وبصوت عال:

- (انا أهو يا عالم، إنتم مش شايفيني علشان قصير واللا علشان شفاف)، ممّا يجعلك مشاغبًا ودائمًا تقبع في مرمي الانتباه، فالهدف المتحرّك يظهر للكلّ بخلاف الساكن الهادئ، فكنت أنا القلق الكامن في عقل أبي وأمّي؛ لعجزي الحقيقي عن الإذعان لأوامرهم، والتصرّف بما يليق بكوني فتاة ولست صبيًا مشاغبًا! وكانت أختي نهاد كما يقولون الكبيرة العاقلة (قولاً واحداً) وأخي محمّد الصغير، آخر العنقود والحيلة وديك البرابر، وحيب الكلّ، الوريث وحامل اسم العائلة والامتداد، أمّا أنا فالانتكاس، أنا البطة السوداء أو كما يقال بالإنجليزية (the black sheep of the family).

كانت هذه هي قناعاتي التي تسبّب فيها وضعي في العائلة، وضع من جاء دون اشتياق له، فالكبيرة عاقلة والصغير صبي، هذا الكائن المزعج الذي يدسّ أنفه في كلّ شيء، هو زيادة وعبء على الآخرين، صاحب مغامرات، ومشاكسات لا تنتهي! فعندما كنت طفلة، كانت قامتي قصيرة جدًّا، وبشكل لافت للانتباه، ممّا كان يثير حفيظة جدّي عندما تسمع صوتي، فأنا لا أكاد أرى إلا إذا رفعت صوتي الذي كانوا يشبهونه بصوت صافرات الإنذار، فكانت تقول:

- القدّ قدّ الفولة والصوت صوت الغولة!

فعندما يرتفع صوتي يلاحظ الموجودون أنّ هناك كائنًا صغيرًا يتحدّث، وله طلبات يدافع عنها بهذا الصّوت البغيض! ولقد ساعدني حجمي الصغير كثيرًا في الهروب والقفز والمراوغة والاختباء الصّوروي، وذلك عندما كانت أمّي تلك السيدة الهادئة الرّائقة تجري ورائي لتمسك بي لتعاقبني! فكنت أهربُ منها مثل القط الصغير وأختبئ تحت السرير، أو أقفز قفزةً سريعةً لأكون فوق الدولاب، وفي النهاية يكون مصيري (علقة سخنة من أبي) فأمّي لم تكن لتضربنا أبدًا، فهي تهدّد فقط، أمّا أبي - رحمه الله - فلا يهدّد، يفعل.. وبقوّة!

ولقد اعتدتُ على إتيان بعض الأفعال التي لا تليق إلا بالصبيان، ولأنّي كنت من وجهة نظر أبي وأمّي غير أهلٍ للثقة لتهوّرني واندفاعي، كانوا يغلقون عليّ الباب بالفتح إذا كنت بمفردي، فكنت إذا احتجت شراء شيء ولا يوجد معي أحد في المنزل، أقفز من النّافذة للشارع، فنحن نقطنُ في الدّور الأرضي، وكانت دكّة عمّ راضي وكُرسي أمّ عزت أدواتي للخروج من وإلى البيت عبر نافذة حجرتي.

وفي أحد الأيام أحّت عليّ رغبة شديدة لشراء بعض الحلوى، فاستخدمتُ طريقي الطّبيعي عبر النّافذة، لكن يومها عدت محمّلة بالكثير من المشتريات، وعندما حاولت أن أصعد الكرسي الذي

أضعه فوق الدكة اختلّ توازني فسقطت، وستر ربّنا شملني، فلم
أصّب بمكروه، ولكن افتضح أمري!!

لم تكن أبداً تعينيني الحيلة، كنت إذا لم أجد الدكة والكرسي
أقفز من الشباك إلى الشارع مباشرة، وعند العودة إذا لم أجد الدكة
والكرسي أجمع قوالب طوبٍ فوق بعضها وأعود للبيت، فكون
حجرتي تطلّ على ممرّ جانبي كان يمنحني الأمان فهي ليست على
الشارع الرئيسي، وبالتالي من الصعب كشف أمري أو حتى أن يرى
مساري لصّ!

وكنْتُ إذا احتجّت إلى نقود كنتُ أقترض من عمّ راضي البواب
الذي كان دائماً يساعدي ولا يفضح أمري (كان يغطّي شهري)
وكانت الأمور بيننا طيبة، ولولا زوجته الطماعة التي ما أن كشفت
سرّي يوم سقوطي من على الكرسي، حتى بدأت تساومني على ردّ
النقود أكثر من الذي اقترضته، لم أكن أعلم حينها أنّها ربّا، لكنني
كنتُ أعتبرها استغلالاً؛ لذا رفضت بشدّة، فكانت النتيجة أنها
كشفت سرّي عند والدي، وأخذت علقه لن أنسها مدى الحياة،
وطبعاً وضعوا قضباناً حديدية على نافذتي، ولن أنسى أمّ عزت
زوجة عمّ راضي أبداً ما حييت!

أُغلق دفتر اليوميّات وألتقط الهاتفَ الخليوي الذي نسيتَه في الدّرج وألبومَ الصّور الذي سقطتُ منه صورةٌ لأبي وحمايا! فألتقطُ الصّور وأنظرُ إلى صورة حمايا، ذلك الرّجل الذي لم يضايقني يوماً، ولم يهينني، لكنّه كان دائماً متابعاً صامتاً لكلّ ما تفعله حماي التي استطاعت بنجاحٍ منقطع النّظير وبسكوتٍ «يوسف» عنها أن تكدر حياتي تماماً؛ بل كانت سبباً في تخريب نفسيّته.

فقد عملت على أن تؤكّد له في كلّ وقت أن الرّجل لا يصحّ أن يظهر مشاعره، ولقد كان؛ فقد كنتُ أقول لأختي عندما يأتي الحديث بالكلام عن الرومانسية والعاطفية أقول:

- الحمدُ لله «يوسف» منشّفها على الآخر، لو قال لي يوماً: تسلّم إيدك يا «لبنى» يبقى كده تحوّل ليوناردو دي كابرियो في فيلم تايتنيك، وضحّى بنفسه علشان كيت ونسلت.

«يوسف» بخيل عاطفياً قولاً واحداً، ولقد اكتشفتُ بنفسي سرّ هذا البخل، ففي إحدى المرّات، والمرّات النادرة جدّاً، كانت حماي راضية عنيّ وتتحدّث معي ونسيتُ أنّي زوجة ابنها الآخر، وقالت لي تشتكي من بكر ابنها الأكبر:

- تصوّري الخايب طول النهار يقول كلام ناعم وحلو لمرّاته مع إنّي ربّيته على الرّجولة، وإيهمّ لازم يحافظوا على صورتهم،

وإنه لما يقول كلمة حلوة لمراته هتتدلّع عليه وهتتمرّع، ومش هيعرف يمشيها!!

(يمشي مين يلى تنصري في أفكارك المسمومة!) طبعاً دي جملة عبّرت أفكارى وأنا أستمع إليها فاغرةً فمى كالبلهاء، وبعدها تأكدت أنّ هذه السيدة تمكّنت من منحّ زوجى وخربت له رأسه، فهو غالباً أكثر واحد في الأبناء تمّ تدمير خلايا التعبير عن المشاعر عنده لأنّه الصغير، والذي مكث تحت جناحها أكثر من باقى إخوته! لم أستطع أن أفعل شيئاً لهذا التدمير المتعمّد في شخصية الرجل المصرى المتمثّلة في زوجى سوى الصبر والتغافل أحياناً.

أنته من ذكرياتى على صوت «هنية» تغنى، فأنادى عليها فتأتى مستفهمة:

- نعم يا مدام، عاوزه حاجة؟

أقول لها: - آه عاوزه، روحى هاتى السلم، وإياك تفتحي بؤك بكلمة.. فاهمة!

تبسم بخبث وتقول لى: - عينيّ يا مدام فورتيه هيكون عندك، السلم و«هنية».

أضحك لفهلوتها؛ فوريرة أصبحت فورتيه، تحضر السلم وتمسكه وهى صامته ومبتسمة، فتجربتي السابقة جعلتها أكثر ثقة

في قدرتي على تسلق السلم! أصدد السلم وأطلب منها أن تناولني
الصندوق بعد أن وضعتُ داخله ألوم الصور ودفتر يومياتي بعد أن
سجلت أحداث الأمس في نقاطٍ فقط ودون وصف، أميل بجسدي
لأخذ منها الصندوق.. يختل توازني، فأسقط على الأرض! ويطير
الصندوق والدفتر والأوراق.

كأنا، اللبشيري
للتقافة والعلوم

لفصل لع شر يوم من غلبي

تدق الساعة الثانية عشرة، ويصدح صوت الأذان في المسجد
القريب من بيتنا، وتأتيني «هنية» وهي مُنفعلة وتقول:

- يا مدام، يا مدام، الحجى، جدّ حضرتك وصل وجاعد برّا،
تعالى له؛ لأنّه مش عارف حدّ منّا ومتترفز جدّا، ده حتى «رمضان»
يوووا.. أجصد رامي واجف معاه ومش عارفه أفهم كلامهم همّا
الاتنين! بيكلّموا بعض بكلام غريب جوي، وجدّ حضرتك عمال
يجول له فين «لبنى» حفيدتي؟! ورامي يضحك ويردّ عليه، إثبت
مكانك لا تتحرّك وإلا سأستدعي لك الشرطي ليجبض عليك، يا
مدام هي حفيدتي دي معناها إيه؟ وجدّك يجصد بيها إيه؟

وكالعادة قبل أن أردّ أو أنبس بنت شفة تتابع:

- عارفة يا مدام التّمثليات اللي بتيجي في «رمضان»؟! أهو جدّ
حزرتك بيتكلّم زيّهم!

أصرخ فيها كي توقف سيل الكلام، وأقول لها:

- باااااااااا اسكتي شويّة، إبلي ريقك، إلهي تتخني بيه، إنت

بتهرتلي بتقولي إيه؟ إنتِ شكلك أصلاً بتتعاطي حاجة!
تنظر لي بجانب عينيها، ثم تقوم بعوج شفتيها، فأفهم ما تقصده
بهذه الحركة! ثم تقول: - إنتِ حرّة يا مدام، أهو الأستاذ جدّ
حضرتك موجود برّا، روجي اتأكّدي بنفسك! والله ده حتى بيحول
كلام كثير مش فاهماه.

ثم استدركت قائلة، وفي صوتها جدية واضحة واستفسارٌ حقيقي:
- هو جدّ حضرتك أجنبي يا مدام؟! أنا بصراحة مش بفهم
كلامه! وكلّ مرّة يبجي يزور حضرتك، بتجنّن منه حجيجي لإنّه
بيطلب منّي حاجات مبفهمش منها غير ماء! يعني هو إنتِ بتفهميه
إزاي، هو حضرتك برضيك أجنبيّة زيّه؟!

أتابع الكلام المنهمر من بين شفتيها (وأزغر) لها بعد أن شارفت
على نفاذ صبر سيفجّر المكان، فقد كادت رأسي تنفجر بسبب ماسورة
الأسئلة والاستفسارات التي فجّرتها «هنية»، ولإيقاف سيل الكلام
قلت لها:

- أيوا كلّنا خواجات، يلا روجي قدّمي له حاجة يشربها وأنا
جاية وراكِ.

وتذكّرت أنّها قالت «رمضان» فقلت في نفسي: سترك يا ربّ،
رامي مش بيستر وربّنا يلطف بيّا النهارده.

خرجت «هنية» من الحجرة تبرطم بالكلام وتشوّح بيديها وتقول:
- لَمَّا هُمَا خَوَاجَاتُ لِيهِ بِيحَاسِبُونِي بِالمِصْرِيِّ مِشْ بِالدُّورَارِ؟ هِيَ
النَّاسُ بَجَتُ بِخَيْلَةَ كَدِهِ لِيهِ!

هُرِعْتُ لِلتَّرْحِيبِ بِجَدِّي، وَمَا أَنْ وَصَلْتُ لِلبُهْوِ الَّذِي يُوْجَدُ
بِهِ الصَّالُونَ وَحِجْرَةَ السَّفَرَةِ، حَتَّى وَجَدْتُ «رَمْضَانَ» وَاقْفًا يَنْظُرُ
إِلَى جَدِّي بِذَهُولٍ، وَلَا يَجِدُ نَظْرَهُ عِنْدَهُ، وَعِنْدَمَا سَمِعَ صَوْتِي مَرْحَبَةً
بِجَدِّي تَوَجَّهَ كَالسَّهْمِ فِي اتِّجَاهِي وَاسْتَوْقَفَنِي قَائِلًا:
- اسْتَنِّي يَا مَمَا، عَاوَزَ أَسْأَلُكَ عَلَى حَاجَةِ مِتْرُو حَيْشٍ لِلرَّاجِلِ
دِهْ إِلَّا لَمَّا أَكَلْمُكَ.

أَقُومُ بِتَنْحِيئِهِ جَانِبًا فَيَبْدُو عَلَيْهِ الْإِنْدِهَاشَ وَالرَّفْضَ، وَيَصِرُّ
عَلَى اسْتِيقَافِي فَأَتَجَاهِلُهُ تَمَامًا وَلَا أَسْمَحُ لَهُ بِتَعْطِيلِي عَنِ جَدِّي عَبْدِ
اللَّهِ، جَدِّي لُوَالِدِي، إِنْسَانٌ رَائِعٌ وَمَتَدَفِّقُ المِشَاعِرِ، لَكِنَّهُ يَنْسَى كَثِيرًا،
وَذَلِكَ بِسَبَبِ تَصَلُّبِ الشَّرَائِينِ وَدُخُولِهِ فِي آلِ زَهَايْمِرِ، وَلَكِنَّهُ الحَمْدُ
لِلَّهِ مَا زَالَ فِي بَدَايَتِهِ، وَكَانَتْ نَصِيحَةُ الطَّيِّبِ لَنَا:

- اتكلموا معاه كثير، واولعوا تسيبوه يقعد لوحده، أو إنه يتعزل
عنكم، كل ما هتكلموه كثير، هتقللوا من قوة آل زهايמר.
ولكن مشكلة جدِّي أنه يتحدّث بالفصحى، وكأنه نسي العامية

كلها؛ لذا عندما يقوم بزيارة أحد من أحفاده أو أبنائه تحدث أزمة كبيرة في التواصل، لذلك في كل مرة يأتي عندي أصابُ بهلعٍ شديد، فمن يعيش في بيتي هم كائنات فقدت أجزاءً كبيرة من عقلها (دا رأيي فيهم) وحضور جدِّي بتركيبته المختلفة، دائماً يجعل البيت كأنَّ هناك معركةٌ لا تنتهي بين الدِّيناصورات والباندا!

لقد كانت آخر زيارة له هادئةٌ لأنَّ (رمضان أفندي) كان عند عمِّته في زيارة سريعة وخاطفة، اعتبرتُها جزءاً من رزقي، حتى أستمتع بقليلٍ من الهدوء، ف«رمضان» و«بسنت» لا يجتمعان على خيرٍ أبداً، فهما وراحة بالي (دونت ميكس). و«رمضان» الآن أصبح أكبرَ وأكثر شغباً، وجدِّي أكثر اختلافاً. فأذهبُ إليه مرَّجبةً به، ثم أعانقه وأقبله، فيبتعدُ عني وهو ينظر إليَّ غاضباً ثم يقول صارخاً:

- ما هذا! ماذا أنت فاعلة؟! ما هذه الرِّقاعة وهذا المجون؟! هل يصحُّ يا فتاة أن تقبلي رجلاً غريباً عنك؟! هل أنتِ بلا حياء، أنتِ حقاً قليلة الأدب!

أنظرُ إليه مستعطفةً إيَّاه، بعد أن أزاحني جانباً، فأحاول أن أشرح له، فيشيح بوجهه عني، ثم يبتعد ويجلس على الأريكة يستغفرُ ويحوقل من هذه الماحنة التي تريد أن تلوِّث تاريخه! أقول لنفسِي:

اللهم صلّ على النبي.. مجانة ورقاعة!! ثم أقنع نفسي: هي فعلاً
رقاعة يا بنت عامر، انبسطي يومك ملوش زي النهارده.
أقتربُ منه مرّة أخرى وأرَبْتُ على وجنتيه فيدفعني بيده، أقتربُ
أكثر وأقبله، ثم أجلسُ بجواره وأقول له:

- يا جدّو يا حبيبي، أنا «لبنى» حفيدتك، بنت ابنك المرحوم - إن
شاء الله - عامر، يا جدّو افتكرني الله لا يسيئك، اليوم كده هينضرب
بدري بدري، وأنا أصلاً ماشية برُبع عقل، كفاءته نصّ عمر!
يقتربُ مني وتظهر في عينه الرّيبة والقلق، ثم يتفحصني قائلاً:
- مَنْ أنتِ؟ أنا لا أعرفك!

ويبتعدُ عني ويذهب لآخر الأريكة، فأصاب بإحباطٍ وقلّة
حيلة، ثم فجأة ودون أيّة مقدمات يعود ويقتربُ مني بودّ، ويحتضنني
باكيًا ويقول:

- يا حبيبتى يا ابنة ابنتي، كيف هي أمك وكيف حالها؟ يا الله
كم أشتاقُ إليكما! افتقدتُ ضحكاتكما ومرحكما، وأين هو أبوك،
هل مازال غائبًا؟

أضرب بقدمي الأرض، في محاولة لطرْد غيظي جانبًا، ورغبةً في
التماسك حتى لا أصابَ بنوبةٍ قلبية، فيأتي «رمضان» مسرعًا ويقول:
- ماما، لو سمحتِ هوّ الراجل ده، ويكاد يضع أصبعه في عين

جدّي - بجدّ؟! يعني حقيقي زيّنا! أنا من ساعة ما جّه وأنا مش عارف أتأكّد إذا كان زيّنا واللّا كارتون زيّ الإم بي سي ثري؛ أصله بيتكلّم زيّهم!

سحبته من يده، وابتعدتُ عن مكان جدّي، وأحمد الله أن جدّي ضعيف السمع، فقد كان ينظر إلى ابني مبتسمًا، ويظنّ أنّه يقول أشياء لطيفة عنه، قلت له:

- يا ربّ يتفرمط لسانك الطويل ده! إزاي بجدّ يعني! وكمان كارتون يا «رمضان» إنت متسلّط عليّا! وبعدين إنت جاي يا أفندي توقع بيني وبين جدّي، إمشي إجري على أوضتك.. وفين إخوانك؟! ينظر لي وكلّه براءة، ثمّ يقول:

- ماما، إنت جدك عايش إزاي.. وأنا جدّي مات، مش باباك مات، صحّ؟! طيّب إزاي باباه عايش!
وكأني لم أكلّمه أو أسأل عن أخته وأخيه، يسألني وينتظر الإجابة بشغف يظهر في عيونه القلقة التي يقلّب نظراتها بيني وبين جدّي، فأقول له:

- عادي بتحصل مش دي المشكلة، المشكلة إنت هتعملها لو سمع كلامك الخايب ده، امشي من هنا، وبعدين هو كلّ ما تشوفه تعمل الفيلم ده، «رمضان» انتهى بقى، ليه بتحاول تستفزني؟! بابا

مات قبل باباه علشان عمره خلص، وغالبًا أنا هاحصل أبويا علشان
ترتاحوا كلّكم.

يصرخ ويقول لي:

- أنا اسمي «رامي»، بلاش «رمضان» دي لو سمحت يا ماما.
ثمّ ببراءةٍ شديدةٍ يُردّف:

- ومن فضلك متموتيش؛ أنا بحبك قوي، وبعدين مين
هيعمل لنا البوفتيك اللي بحبه، ومين هيعمل لنا الفطار واحنا رايجين
المدرسة، «هنية» مُقرّفة، من فضلك يا ماما متموتيش!
ويفلت يده الصغيرة ويذهب كالسهم في اتجاه جدّي، ثمّ ينظر
إليه مرّة أخرى ولكن هذه المرّة كانت نظرة مطوّلة، ثمّ يهزّ رأسه
ويبتعد عنه عائداً إليّ، ويقول:

- ردّي عليّ يا ماما، والله لتقولي الحقيقة، هو الرّاجل ده حقيقي؟
أقصد جدّ حضرتك راجل بجدّ والّا تمثال؟!

فقلت له صارخةً فيه: - ما لك يا رامي! معقولة هنفصل نتكلّم
في نفس الموضوع؟! يا ابني هو انت حقيقي والّا تمثال؟!

ردّ سريعاً: أنا حقيقي يا ماما والله مش تمثال، بسّ نفسي أعرف.
أقاطعه قائلةً وقد استبدّ بي الغضب، فكيف لي أن أتعامل مع
«رمضان» وجدّي في الوقت نفسه، وكلاهما يتعاملان معي كأني

(سفنجة) أمتصّ المشاكل ولا يكون لي ردّ فعل، على الرغم أنّه مع
أولّ ضغطة سينفجرُ كلّ ما بداخلي في وجوههم:

- امشي من هنا بدلّ ما أنا أخليك تمثال فرعوني.

يضحكُ بسعادةٍ ثمّ بجدية يقول: - بجدّ! ازاي يا ماما؟ أنا فعلاً
عاوز أبقى فرعوني.

أصرخ فيه، فيتنفّض جدّي قائلاً: - ماذا بك يا أحلام؟ لماذا
تصرخين في الصّغير؟

ترتسمُ على وجهي ابتسامةٌ بلهاء وأقول: - لا يا جدّي متقلّش،
أنا بهزّرمعاه، وأنا «لبنى» مش أحلام، دي ماما اللي اسمها أحلام.
وأضعُ يدي على رأسي، فقد بدأ الدّم يندفع إليها، وأكادُ أجنّ،
ثمّ أدفعُ بـ«رمضان» بعيداً عنّي وأقول له:

- اجري من قدّامي حالاً بدلّ ما أطلّع فراعيني عليك.

ثمّ أبتسمُ ابتسامةً سخيفة (كما ينعتهـا «يوسف» دائماً) وأجلس
بجوار جدّي وأنظرُ إليه صامتة لعله يتذكّر أنّي ابنة ابنه ولستُ ابنة
عمّتي «وصوف»، ولم يدم صمتي طويلاً حتى رمقني باستغرابٍ وقال:

- من أنت؟! وماذا أنا فاعل هنا؟! وأين عامر ابني؟

شعرتُ بإحساس البطة عندما تقرّر الطيران فتقع، فتحاول
السباحة والغطس فتفشل، ها هو جدّي يتذكّر أبي وينساني، فأقول

له حتى أجعله يطمئن لي:

- أنا بنت عامر يا جدّي، إنت ناسيني؟ أنا أحلام.. يووووه
أقصد أنا «لبنى»، روق يا جدّي يا حبيبي ومتقلّش، والله العظيم
أنا بنت ابنك.

وأحتضنه حتى يشعر بالأمان، وأدعو الله أن يخرجني من هذا
المأزق العصيب، يعود «رمضان» مرّة أخرى ويقول لي:

- ماما، مممكن أقعد معاكم، مش هاعمل دوشة، هابصّ على جدّ
حضرتك، مش هو برضو جدّ حضرتك.. واللّا إيه؟!
أقول له بنفاد صبر:

- أيوا جدّي، ومش هتقعد معايا، ويلا امشي من هنا على أوضة
الليفنج، روح اتفرّج على كرتون، واللّا اعمل أيّ حاجة مفيدة.
يهزّ رأسه ويقول لي:

- سأفعل يا سيدتي ولكن احذري، لا تأكلي البوشار فقد مرّت
عليه الفأرة الصغيرة، ولا تمكثي كثيرًا مع هذا الغريب؛ إنّه يشتعل
ليلاً! وقد يتحوّل لتلك الفأرة، يا له من موقفٍ عصيب!

لا أردُّ على كلامه، فأنا أعلم ما تفعله هذه القنوات بعقله،
وأيضًا قد أصبت بإرهاق شديد، ولا رغبة لي في الجدال، وقد مرّ
على وصول جدّي ساعتان لا أعلم كيف مرّ، وأنا ما بين جدالٍ

«رمضان» و«هنية» وما بين جدّي الذي يرفضني! وقارب العصرُ أن يؤدّن، وكلّ شيء يتمّ ببطء شديد، ولا أعلم لهذا اليوم نهاية.

يتركني «رمضان» مبتسمًا، وأنظرُ لجدّي، وأشعر بقلّة الحيلة وأنا جالسة بجواره، أنتظرُ أن يقول أيّ شيء، وأقول في نفسي:

- إليه اليوم ده، ما له بادي بوجع دماغ، من ساعة «يوسف» ما نزل وهو متغيّر معايا كالعادة الأيام دي (بركاتك ياسعااااد)، ومشاكل العيال و«هنية» وجنّونتها، وأهو جدّو حبيبي بتعبه وعجزني عن منحه بعض السّلام والراحة.

كيف لمركب صغير متهالك أن يقوم بإيصال أيّ لاجئ إليه بسلامٍ إلى شاطئ الأمان! وأعيد النّظر إليه مرّة أخرى فأجده قد أغمض عينيه وهو جالس بجواري، أمّا أنا فأشعرُ أنّي أوشكت على الجنون، وعلى أطراف أصابعي أتحرّك بعيدًا عنه لأستجمع نفسي، وأرى ماذا أنا فاعلة، فعندما يباغتني حدثٌ أو أكثر أصابُ بالشلل، والآن أنا لا أعلمُ ماذا سأفعل إذا ما قرّر جدّي أنّني خاطفة أو لصة سطت على بيته! وأدعو الله أن يجعل اليوم هادئًا، ويرزقني بمددٍ من عنده وعونٍ، وما أن تحرّكت بعيدًا عن جدّي حتى رأيت «هنية» تلوح لي بالهاتف وتنادي: - يا مدام، يا مدام.

فأشرتُ لها أن تصمت، وبمجرد أن اقتربتُ منها، حتى أسرع

الخطوات في اتجاهي، وأعطتني اللاسلكي وهي تقول:

- يا مدام، المدام مامة حضرتك على التليفون، وهي عاوزاك ضروري جدًّا، مش عارفه إيه الضروري ده؟ هو في حاجة حصلت؟! ألتقط منها سماعة الهاتف وأنا أحمدُ الله على استجابته لدعائي سريعًا، ثمَّ أسأل «هنية» قبل أن أتحدّث مع أمِّي:

- وحضرتك ما لك بالضروري واللا الهانف! اتفضلي بسرعة اعلمي كوبايتين لمون وزوددي السكر، ومتجيبهمش إلا لما أندهلك. تهزّ رأسها بالموافقة، ودون تعقيبٍ على تقريري لها، ثمَّ تقول بنبرة تحذيريّة:

- لمن الكوباية الثانية يا مدام؟! مش إنتِ عاملة رشيم برضو، ولا همّ قالوا إن اللّموناتوه مش في الرّشيم! ... ثمَّ تقلّب شفيتها بسخرية، وتنظر إليّ نظراتٍ مستفزة، فأصرخ فيها بعد أن فشلت في التحكم في أعصابي، فيكفيني ما أنا فيه:

- امشي من قدامي بدل ما أهدك بأيّ حاجة في دماغك، رجيم إيه؟! امشي هو أنا ناقصني لَسعان دماغك دي دلوقت، غوري. تجري من أمامي وهي تحدّث نفسها:

- هيّ المدام النهارده ما لها غريبة كده! همّا الخواجات عصبيّين قوي كده ليه... ثمَّ تتابع الحديث مع نفسها:

-آه يبقى ده سبب إننا مش مرتاحين مع بعض، مهى لو كانت
مصريّة زينا و بنت بلد مكنش ده حصل! هو أنا دايمًا حظّي عفش كده!
أبتسمُ رغمًا عنيّ من تعليقاتها التي تُبهرني دائمًا، وأيضًا على
إصرارها أنني أجنبيّة، فجأة أشعرُ بوجود شيءٍ ما في يدي، أنظرُ إليه
أجد ساعةَ الهاتف فأصرخ:

- يا خبر أبيض! ماما، أنا نسيته! آلوو أويا يا ماما، ساحيني يا
حبيبتى، أنا أصلي ملبوخة، حصل كذا حاجة.
فيصل إليّ صوتُ أمي هدهوتها الذي لم أرته و صبرها الذي حجبتة
عنيّ و بنبراتٍ ناعمة تقول: - «لبنى» يا حبيبتى اهدي شويّة، مالك يا
بنتي متعصبةً ليه، إنت كويسة، والعيال و«يوسف».. كلّمكم بخير؟
أردُّ وأنا أتنفّس سريعًا من خوفي على زعلها: - آه يا حبيبتى
بخير، كلّمهم بخير.

تقول لي: - الحمد لله.

ثمّ تردّف و صوتها يبدو عليه من رعشته أنّها قلقة:

- معلىش يا «لبنى» يا حبيبتى عاوزه أسألك سؤال بس إمسكي
أعصابك، وإوعي تتخضي، هو جدك اتصل بيك أو طلعت كلّمك؟
أصل عمّتك «وصوف» هتتجنن عليه؛ لإنه كان رايح لها بس اتأخر
عليها، و طلعت تليفونه مقفول، وإحنا داينين نسال عنه، وإنت آخر

حدّ طبعاً ممكناً يفكر بييجي له علشان شقاوة العيال وكدا يعني .

أضحك بهستيريا وأقول في نفسي:

- جدّو جالي بالغلط وأنا آخر واحدة يفكر فيها! الله أكبر! أنا

فعلاً حظّي حظّ نادي الزمالك لما يقابل الأهلي ..

ثمّ أردّ على أمّي سريعاً:

- أيوا يا ماما عندي، وزيّ ما إنت شايقة آديني أهو مش آخر

واحدة يفكر فيها، ده أنا أول واحدة، وكالعادة الدنيا ملخبطة

عندي، وهو مش مركز معايا يا ماما، هو في إيه؟!!

جدّو مش عارفني قوي، مقارنة بالمرّة اللي فاتت كان أحسن

من كده بكثير، صحيح مكش عارف غيري أنا وأمّ كلثوم، يعني أنا

والست محدش قدّي، لكن كان مُنتبه، بس دلوقت مش فاكر حاجة

وبيلخبط في الأسماء، وعمّال يكلمني بالفصحى ورامي نازل مناكفة

فينا، و«هنية» عمّالة تحقّق معايا! ماما أعمل إيه؟!!

تضحك وتسري ضحكها الرّائقة في أذني فأشعرُ بهدوء يلفني

وهي تقول:

- مش ممكناً إنت يا «لبنى» مش هتبطّي شقاوة، لا هو فاكرِك

بسّ علشان تغيير الدّوا، والفصحى إنت عارفة إيّها عشقه، معلى

يا حبيبتّي، طيّب اتّصلي بطلعت السّواق وخليّه يرجع علشان بييجي

الزّرار علشان الناس توسّع!

ينظر إليّ باستنكار، والاندھاشُ بادٍ على وجهه ويقول:

- جيت علشان حظّك، علشان أساعدك تقومي من الأرض، هو انتِ كنتِ هتتعرفي تقفي وحدك؟ (ويُرِدُف ونبرات الغيظ تظهر على صوته): وبصرف النظر عن موضوع الرّجيم الفكسان والهري بتاع الجيم وجهاز الجري؛ آسف، (التريد ميل) لسه برضو انتِ محتاجة تحسّي كثير، فلا كان جدّك هيعرف يساعدك، ولا «رامي» ولا حتى «هنية»، فهل كنتِ تحبّي تفضلي في الأرض؟ واللّا تحبّي إنّي كنت أفضل ماسك السّاريننا وأضغط على الزّرار أقول يا ناس الحقونا في زوجة وقعت على الأرض واتكعورت؟ هو أنا مش هاخلص من سفك عليّا يا «لبنى»!؟

أنظرُ له وأنا أراه خمسة أشخاص يتقافزون حولي من أثر الوقعة، وأشعر برغبة عارمة في لكمه لإحباطه لي! ثمّ أقول له ثارًا نفسي:
- أنا بسفّ عليك! والله.. أمّال مين اللّي كان بيسفّ دلوقت ويقول باليرينا؟! وعمومًا مش هاردّ عليك، واه تخينة يا «يوسف» ودالّ اللّي عندنا، وبرضه مش أحسن ما أكون قرعة ورفيعة ومعصّصة وطالع لي كرش ملوش أيّ علاقة بيّا! بسّ أهو برّي عداوة، صحيح يا يوسف هو في حدّ وزنه 70 ويكون كرشه 30 كيلو!

ياريت بلاش نتكلم على الوزن والجسم، فين أيام ما كنت رفيعة
وتقويي اتخني، مش عاوزك مسلوعة، ولما اتخنن تسف عليا مفتري؟!
يصرخ قائلاً:

- خلاص خلاص، ربنا ياخذ اللي يزعلك يا شيخة، ده إنت
كيم كارديشيان، ولا تزعلي ولا بسف ولا بتريق.
أرد عليه غاضبة:

- إيه يا «يوسف» هو انت مُعجب بالست كارديشيان دي؟
الله يرحم لما كنت أنا كل الستات في عينك! إنت بتعكس الستات
دلوقت يا «يوسف»؟! ووصلت لكيم كارديشيان! وأنا اللي عاوزه
أخس علشان أفرحك، وإنت أصلاً بتلعب بديلك وعينك زايغة!
يرد ساخرًا:

- ديلي إيه هو انت شايفاني قط واللا تعلق! أنا بقولك شايفك
عاملة زي مين.. إنت بتدوري على الخناق، بلاش كرديشيان،
خلاص أنا آسف! هاتي راسك أبوسها، بس بلاش نكد الله يرضي
عليك، أنا جاي من برا مش مستحمل!

وقبل ما أنبس بنت شفة، تأتي «هنية» لتقول شيئاً، فتلتقط كلمة
كارديشيان فتقول:

- يا مدام مش كربينان دي هي المثلة اللي البنات بيحبوا شكلها

وعاوزين يبجوا شبهها؟! هو حضرتك هتعملي عمليّة وتحوّلي؟!
ينفجرُ «يوسف» ضاحكًا ويقول لي: - قابل يا معلم، أهو ذنب
ناس بتخلّصه «هنية»، اعترضني بقي، هتحوّلي يا «لبنى»؟! إوعي
تقولي حاجة.. أنا رايح لجدّك؛ أجدع راجل فيك يا مصر!

ألقي نظراتٍ نارية في اتّجاه «يوسف» الذي يتركني لـ«هنية»
ويذهب لجدّي مرحبًا ومقبلاً إيّاه، وللعجب، جدي يتعرّف عليه ولا
ينكره كما فعل معي، وأستعجب من عالم الرّجال!... وأعودُ لـ«هنية»،
أقترب منها وأمسك بقفاها وكأني سأعلّقها على المشجب، وأقول:

- كربشنان لما تلحس دماغك، إنّي يا بنت انتِ متسلّطة عليّا!
بتتحرّش بي وبين جوزي ليه؟! نفسي أعرف هو حدّ قالك إنّي
ناقصني جنانك! ما تبعدني عن خلقتي علشان أنا فعلاً هاتحوّل للستّ
الخضرا بتاعة الإعلانات، وهاعلّقك في السقف، اخفي من هنا.
تبتعدُ عني قليلاً، وتقف تتمتم بكلمات، ثمّ تمصّصُ شفّتها..
أصرخ فيها قائلةً:

- ما لك واقفة متخشّبة في مكانك ليه؟! عاوزه إيه؟ ما تمشي
يالّا من هنا.

تهزّ رأسها تعبيرًا عن زهقها، ثمّ تبتمس ببلاهة وتقول:
- إديني الأمان يا مدام، عاوزه أجولك حاجة وبلاش تتنرفزي
وتزعّجي.

أهزّها رأسي بالموافقة فتقول:

- بصّي.. حضرتك هو الأسطى طلعت واجف برّا ومتعفرت
وكانّ حنش جرحه! وأنا مش عارفه أكلّمه من ساعة ما جليّ أندهي
ستكّ وأنا جولتله إنّا مش موجودة، مأهو صحيح وهي ستيّ إيه
الليّ هيجيبها عندكم هنا؟! فلّمّا جولتله كده زجر وجاليّ اندهي
سيدك، فجولتله يا عمّ طلعت سيدي وستيّ في البلد، راح شاخط
فيّا وجاليّ غوري اندهي أمّ «أدهم»، ما كان يجوليّ اندهي المدام وأنا
هافهم، ليه يجول أمّ «أدهم»، وبعدين هو هياخد على حضرتك واللا
إيه؟! جال أمّ «أدهم» جال!

أسألها: خلاص خلّصت؟! مممكن أردّ؟!

لا يبدو عليها أنّها تسمعني وتُردّف: - وهوّ صحيح يا مدام ليه
بيسأل عن سيدي وستيّ، همّا اتصلوا وجالوا جاينين ياخدوني؟
ثمّ تتعافز في مكانها وتقول: بلاش يا مدام، أنا مرتاحة هنا
والنّبي، يا مدام بلاش تمشيني من عندكم.

ثمّ وكانّ هناك لمبة فهمّ أنارت في رأسها قالت:

- بسّ هوّ حضرتك مبتدّيش عليّا ليه؟ وهوّ ليه كلّ ما حدّ
يشوفني يجوليّ غوري؟!!

وبمجرد أن تغلق فمها أنفجر في الضحك ولا أردّ عليها،

فتنظر إليّ باستغراب ولكن لا تتكلّم، هذه الفتاة حكاية حقًا على رأي «يوسف»، ف«هنية» أول مرّة تعمل في بيت كان بيتي، ولم يقل لها أحدُ كلمة «ستك»، لذا جُنَّ جنونها وارتبكت، لماذا يريد أسطي طلعت جدّتها؟! ثم زاد الطينَ بلةً عندما سأها عن سيّدها وهي ظنّت أنه يقصد جدّها، أنتبهُ إلى أنّها مازالت واقفة تنظر إليّ وأنا أضحكُ وعلاماتُ الدهشة مُرسمة على وجهها، فأقول لها: خلاص روجي انتِ، أنا رايحة لطلعت، شوفي «بنت» عند جارتنا، واثأكدي إنّها مبتعملش مشاكل، وارجعي بسرعة، متركنيش ترغي مع سعديّة، بسرعة روجي وارجعي.

تتكلّم بجديّة وقد نسيّت أسئلتها الكثيرة وقالت:

- شفتِ يا مدام لما بتضحكي بتبجي شبها ازاي زيّ المصريين فعلاً، موش خواجية!

لا أعقبُ على كلامها فأرسي تكادُ تنفجر، وأحوّل وجهي عنها وأذهب لأرتدي إسدال الصلاة، وأتوجّه إلى طلعت فأقول له:

- من فضلك يا طلعت، خليك قريب منا، وهانزلك شاي مع «هنية»، وأول ما جدو يجب يروح هاتصل بيك.

وعندما ذكرت اسم «هنية» خيّل إليّ أنّي لمحت على ملامحه الهادئة تحوّلًا، وبمجرد انتهائي من كلامي وجدته يقول لي:

- معلنش يا مدام أنا لسه شارب شاي، مش عاوز حاجة، شكرًا، وبلاش تتعبي «هنية» مش عاوز حاجة، شكرًا، وهانزل استنّي الحاج عبد الله تحت.

أتفحص ذلك الذي لا يريد (تعب لـ«هنية»)، فأرى في عيونه رغبةً في ذبحها! ويتأكد لي أنّها فعلت شيئًا ما أثار حفيظة الرجل الهادئ الرصين، وليست فقط كلمة «ستك» التي استفزته، أكيد هناك حدث جَلل؛ فأنا أعلم «هنية» حقّ المعرفة، وهيئة الرجل تدلّ على غيظ شديد. فأردُّ عليه قائلةً:

- تمام يا طلعت، خلاص، أوّل ما جدّو يقرّر إنّه يروح هنتصل بيك، شكرًا.

أغلق الباب وأتّجه حيث يجلس جدّي و«يوسف»، والحوار بينهما على أفضل ما يكون، و«رمضان» يجلس بينها فاعرفاه، وأحمدُ الله أن «بوسي» عند جارتنا و«أدهم» في مشوار، وإلا كانت نهاية هذا اليوم استدعائي بمستشفى الأمراض النفسيّة نزيلةً دائمة!

بعد الغداء، جلسنا جميعًا في حجرة المعيشة نتبادلُ الأحاديث والذكريات التي فشلنا جميعًا في إحياؤها عند جدّي إلا البعيدة جدًّا؛ تلك التي حدثت له في أوّل حياته.

ولقد أذهلني النقاش الدائر بين جدّي و«يوسف»، ومدى استجابة جدّي لمداعبات «يوسف»، والبهجة التي حلّت على

الجميع، وكنت سعيدة؛ لأنني لأول مرة أرى جدِّي سعيدًا ومتجاوبًا هكذا. وفجأة قال جدِّي:

- «يوسف» يا ولدي، لقد مكثت في بيتكم مدة طويلة ولم يأت والدك المحترم أو والدتك لتحيّتي!

قلّبت نظري بينهما، وظللت صامته لا أنس بنت شفة، ولم يصدر مني أية حركة، كأني تمثال، وراودني شعور أنني شارفت على الجنون، لكن «يوسف» يجاوب جدِّي مجاريًا إياه في الحديث ويقول له:

- الحقيقة يا جدِّي همّا مش موجودين، بس لو تحب أتصل بيهم ييجوا علشان يسلموا عليك عيني، حاضر.... فيرَبْتُ على كتفه، ويقول له:

- سلمت يا بُني من كل شرّ، ولكنني أرى أنه لا يصحّ أن تمكث أنت وأحلام بنت ابني في مكان واحد دون أهلك، وحتى هذا الصغير أخوك المدعو «رامي» لا يكفي أن يكون معكم؛ فهو لن يقوم بمقام أبيك وأمك، وحتى لو كنتم عاقدين، فهذا لا يصحّ، لا يصحّ.

هنا، أدرك «يوسف» مقصد جدِّي، فابتسم قائلاً:

- حاضر يا جدّو، بس إنت ماترعلش.

وفجأة ونحن جلوس، ينهض جدِّي مبدئياً رغبةً ملحةً في الرّحيل، وكأنّ جلسته معنا كانت بمثابة تنشيط جزئي للذاكرة،

فيرحل عنّا وهو يتذكّرنا جميعاً، فأصبحت «البنى» بعد أن كنتُ
«أحلام» ابنة ابنه مرّة أخرى، وأكّد قبل رحيله مرّة أخرى أنّه لا
يصحّ أن أعيش في بيت حماتي إلّا بعد الزّواج. فأقبله قائلةً:

- حاضر يا جدّو، سلّم لي على عمّتو «وصوف» ودادة «فتحية».
فيشاور بيده ويقول:

- آه من عمّتك، إمّا تملأ البيت شغباً وموسيقى صاخبة، وكأنّه
لا يوجد غيرها في المنزل، والله إنّي لأتساءل كثيراً، متى تنزوّج
وأستريح من إزعاجها هذا؟!!

أنظرُ إليه والدّهشة تقرّر أن ترسم خطوطها على وجهي! فما
أسمعه جعلني أقول في نفسي: (ليه كده! هو في إيه! هو أنا مليش
أهل يسألوا عليّ؟! هو أنا بيتعمل فيّا كده ليه؟!)، وأتذكّر أنّ كلّ ما
يحدث لي بسبب أهلي، فأقول له:

- معلش يا جدّو اصبر عليها، عيّلة صغيرة وبكره تكبر.
يصدّق على كلامي ويقول لي:

-عندك حقّ يا «أحلام» ربّنا يهديها وتصير مثلك. وعند هذا
القدر من تداخل الأسماء أحمدُ الله أنّه لا يراني أبي.

ونستدعي طلعت ليأخذ جدّي، ولكنّ «يوسف» يصرّ على
مرافقته إلى سيارته كي يطمئنّ عليه، فينزلون جميعاً وأذهبُ أنا إلى
حجرة المعيشة في انتظار «يوسف».

لفصلُ لِح دِي عِشر

بِرّه عني وبلح

وما أنُ أجلسُ على الأريكة، وأرفعُ قدميَّ المتعبتين في محاولةٍ
للاسترخاء، فجأةً أتذكرُ عمّتي، فأقفزُ من مكاني وأنادي على «هنية»
لتحضر لي سِاعة الهاتف اللاسلكي من الخارج، لقد نسيتُ أمرَ
عمّتي تمامًا، وخفتُ أن تكون أمي نسيت أن تخبرها بأمر جدّي؛
فاتصلت بها: - ألو، عمّتو حبيبتي، إزيك.. أنا «لبنى».

وعلى الطرف الثاني بعدم اهتمامٍ أو تركيز:

- أيوا يا «لبنى».. إزيك يا بنت.. عاملة إيه؟ وإزي عيالك؟
أضحك، فهي لم تسأل عن «يوسف»، وهذا طبيعي، وأقول لها:
- كلنا بخير ياعمّتو يا حبيبتي، وحتى «يوسف».
ثم أُردفُ قائلةً:

- عمّتو، جدّو مش هيجي لك، هو هيروح على البيت، هي
ماما كلمتك؟

فما كان منها إلا أن صرخت في أذني قائلةً:

- إنت بتستعطي يا بنت عامر! الله يرحمك يا خويا معرفتش

تريي! سييتيه ينزل ليه، ما كان بات عندك، أو جالي، هيعمل إيه في البيت وحده، وأمك طبعًا نسيت تقولي إنه عندك، مأهو أنا آخر من يعلم، وأنا هاتجنن! هي أمك مش هتبتّل حركاتها البطيئة دي؟!!

أسمع منها كلمات؛ وحده وأمك وعندك، أشعر كأن الأرض تميد من تحتي، أو أن هناك غزوًا من الكائنات الفضائية، وعلى إثره قام أحدُ الغزاة بتدمير خلايا التركيز والذاكرة عند عمّتي، أو أن هناك جنًا أحمر قد تلبّسها! أحاول أن يبدو صوتي متماسكًا، وأقول لها:

- عمّو يا حبيتي، جدّو راح بيته ومش هيقعد وحده، إنت عارفه إن معاه دادة فتحية هناك، فاكرها؟

تقول لي: - يووو، آه صحيح، فتحية! قطعة تقطعها، دي مغلباني مبعرفش أقول كلمتين إلا لما تصرخ في وشي وتقول خمستلاف إيه.. بتقولي إيه؟ وبرضو مبعرفش أكلم بابا! وبعدين يعني إنت فاكرة فتحية دي أصلًا عايشة مع بابا، دي مش في الدنيا، هو عايش لو حده، والله صعبان عليّ.

أحاول أن أعيدها على الخطّ الذي نتحدّث فيه حتى لا تستدعي كل ذكرياتها وأنسى أنا هدفَ المكالمة، فأقول لها:

- يا عمّو بشويش على دادة فتحية! ما لك، فيك إيه يا ست الكّل، الست خلاص العدّاد قلب ودماعها بلح!

تقهقه بصوتٍ يكاد يقضي على آخر جزءٍ سليم في طبلة أذني،
أحدث نفسي: هو في إيه؟ العيلة دي هتخلّيني التجنّن رسمي.

ثمّ يصل إلي مسامعي صوتها مجلجلاً:

- ألووووو يا «لبنى» إنتِ يا بنت، رحّت فين؟! إيه يا بنت يا

لوبي، بتدافعي عن مين؟! دي هتهبلني.

ثمّ تستدرك:

- إستني يا دي الحيبة، أنا شكلي داخلة على زهايمر، صحيح

دي أمك كلمتني قالت إنّ بابا عندك، معلش يا «لبنى»، ساحبيني يا

بنتي، هو أنا ساعات كده بفصل من الغلب.

ثمّ تقول لي وهي تضحك: - بسّ إيه بلح ده! مش فاهمة؟!

أسكتُ برهة وأنا غير قادرة على التصديق، عمّتي أصابها

النسيان، وتتهمني بالتقصير، ثمّ أتنفس بهدوء وأقول:

- ولا يهّمك يا عمّتو يا حبيبتي كلنا بننسى، أمّا «بلح» دي

كلمة بيقولها لي «أدهم».. يعني معناها؛ بحّ خلاص مفيش، سيبك

من البلح وقولي لي إنتِ عاملة إيه وإزي ريهام ومحمود، عاملين إيه

وعياهم؟

تنهّد بقرف، ثمّ تقول لي:

- زيّ الزفت، كلهم زفت، وإنتِ المحروس أبو دمّ تقيل جوزك

عامل إيه! لسه رخم؟ يختاااي ده جوزك يا بنت يا «لبنى» والله كئيب، تحسيه بيخرّ كآبة كده، إنت مستحمله ازاي؟! سيبك من كونه كئيب.. هو لسه برضو مستر بني! بيلبس بني واللّا ربنا هداه؟! ثمّ تضحك بسخرية وتقول:

- بسّ الحقيقة يا «لبنى» المشكلة إنه فعلاً حدّ رخم، وملوش قُبول كده في النفس.

أقاطعها متوسّلة إليها أن ترحمه قليلاً وأقول:

- يا عمّتو حرام عليك، إنت قرشة ملحّته ليه؟ مع إنه حتى وهو لابس النبيّ الليّ مش عاجبك كان، ومازال، آخر شياكة، هو «يوسف» عمل لك إيه؟!!

تفهقه وكأّتها ابنة 10 سنوات وتقول:

- أصلي بحسّ إن جوزك على المعاش، صحيح ابن ناس ومتربيّ، بسّ مش مرح، بصّي يا «لبنى» من الآخر إتمّ كده ودمّه ثقيل.

أسغرب من عمّتي التي لا تترك مناسبة أو مقابلة أو تليفون إلا ولا بدّ أن تسخر من «يوسف»، وكأنّ بينها وبينه ثأراً، أو أنه زوج أمّها، أحاول أن يبدو على صوتي الاستمتاع بالحوار، فأضحك:

- هاهاهاها.. يا عمّتو دمّك خفيف والله، يا ستّ الكل «يوسف» دمّه زيّ العسل، متقوليش عليه كده، والله ده حبّوب، بسّ

مش بياخذ على النَّاس بسهولة! وانتِ مستقصداه، مع إنَّه بيحبك.
تقاطعني قائلة:

- حَبَّوب في عينك، ده دمّه زيّ السّم، شوفي جوز عمّتك هوّ
الليّ بصحيح حَبَّوب، لذيد ودمّه خفيف ويحبّ المرح، وقعدته
جميلة، بصراحة إنتِ يا بنت عسل زيّ عمّتك! ومسخرة، مش عارفة
ليه اخترتِ واحد بايخ كده؟!!

أنفجرُ ضاحكةً وأقول لها:

- إيه يا عمّتو بسّ مشكلتك معاه! ... ثمّ تمرّ بيالي فكرةً خبيثة؛
فأقول لها:

- وعموماً خلّيني بسّ أفكرك إنّ أبو دمّ خفيف وحَبَّوب،
جوزك يا عمّتو، متجوّز عليك من 10 سنين، من عيّلة قدّ عياله
ومبسوط معاها، زيّ ما حضرتك بتحكّي وتقولي!
فجأةً يّخفتي صوتها وأسمع صوت حشرة ثمّ تقول:

- آه، منه لله البعيد حرق قلبي، إلهي ربّنا يحرق قلبه زيّ ما قهرني،
ويورّيني فيه يوم، هو والليّ تنضرب في عمرها مراته الحُرّباية، كسروا
قلبي، وخطفته منّي المُجرمة، وهوّ فرحان بيها وقاعد عندها على
طوول، ليه فكّر تيني يا «لبنى» يا الليّ تنقرصي في لسانك انتِ!!؟
ثمّ تضحك بهستيريا وتقول:

- لكنّ أنا رأيتُ في الرّجالة مش بيخيب، بس خاب في جوز
عمّتك، لكنّ جوزك برضو دمه ثقيل.

أعتذر لها وأقول:

- معلىش يا عمّتو أنا كنت بهزّر معاك، مكنتش أعرف إنك لسه
زعلانة عليه، ومقهورة كده.

تقاطعني صارخة:

- فشرر... مين يا بنت اللي مقهورة وزعلانة، أنا بس لما افتكرتهم
حييت أديهم اللي فيه النصيب، أنا أصلاً ولا بفكر فيهم، إلهي يتلقوا
ويتشردوا.

أقرّر أن أغيّر الموضوع، فمن الواضح جدّاً أنّ عمّتي نسيّت
موضوع الزواج لدرجة أنّها ستقتلني إذا لم أصمت، أو أتحدّث في
شيء آخر، فأقول لها:

- نفسي أشوفك يا عمّتو، هتيجي إمتي، وخليني أشوف هيام
وعياها ومحمود ومراته وعياله.

فترد عليّ وهي تضحك:

- قطيعة تقطعهم كلّهم، مبيجيش من وراهم إلا الصّداق،
وبيوسّخوا البيت، أنا هاجي لك إن شاء الله وحدي، لما جوزك أبو
دمّ ثقيل يكون مش موجود.

أتعجب من كرهها لزوجي غير المبرر، وأقول لها:

- معندناش حدّ دمّه تقيل! حرام عليك يا عمّتو.

يقبل «يوسف» عليّ متسائلاً ويقول:

- مين دمّه تقيل ومين رحم! إنت بتكلمي مين يا «لبنى»؟

أُسْقِط في يدي، وأقول له:

- عمّتي «وصوف» يا «يوسف»، بتسلّم عليك.

ينظر إليّ بدهشة ويقول:

- «لبنى» الكذب حرام، عمّتك مش بتطيقني، ومتأكد إنّها لا

يمكن تبعت لي سلام، دي عمرها ما سلّمت عليّ إلاّ لما تقولي أهلاً

يا خويا، مش معقول هتسلم عليّا وكمّان عبّر الأثير! بسّ تعرفي يا

«لبنى» نفسي قبل ما أموت أعرف هي بتكرهني ليه كده، أنا أصلاً

مفيش بيني وبينها أيّ شيء يستدعي النظرات النارية اللي بتحدفني

بيها على طول؟!!

وعلى الطّرف الآخر أسمع عمّتي تقول:

- إنت يا بتّ يا كدّابة مين الليّ بسلّم عليه! يلا اقفلي السّكة،

مش بسلّم على حدّ دمّه تقيل.

وتقوم بغلق الهاتف بعنفٍ شديد، أبتسمُ مثل البلهاء، وأطلب

من «يوسف» أن يأخذ الهاتف معه، ولا يجعل أحدًا يدخل عليّ لآتني

أريد أن أنام قليلاً، فنهاري كان شديد التوتر، وأشعر بصداغ يكاد يمزق رأسي، فيخبرني أنه سيذهب ليشاهد التلفاز مع رامي وسيعلق الأنوار وينتظر «بوسي» و«أدهم» حتى لا يزعجاني، ثم يقترب مني ويقول لي:

- تعرفي يا «لبنى» لما تبقى تعبانة بتضايق، وبشعر بحاجة ناقصاني، أصل بصراحة لما المفترى يقع؛ الواحد بيحس إن الدنيا خربت خلاص... ثم يقرصني من خدي ويقول: المفترى القمر. أنظر له بنصف عين وأشعر أنه قد أصيب في عقله بلوثة، ثم أقول له:

- إيه الألس البايخ والسفّ اللي ملوش طعم ده، تصدق أنا كان نفسي أقدر أحذفك بالتليفون بس مش قادرة. بيتسم ويشاور لي (خلاص)، ثم يتركني أكلم نفسي! وبمجرد أن أضع جسمي على الفراش، وأغمض عيني، أذهب في سبات عميق، وفجأة يدوي صراخ عنيف في البيت أقوم فرعةً، وقلبي يدق بسرعة لدرجة أنني شعرت أنه سيتوقف!

جلستُ على السرير للحظاتٍ لا أدري ما الذي يحدث، وأنا أحاول أن أتمالك نفسي، ففي اللحظة التي دخلت فيها في النوم بعد

إرهاقٍ عصبي، أفزع من ذلك الصوت، أتبيّن ماذا يحدث، فأعلم أنّها «بسنت» قد حضرت بزعايبها، جاءت ابنتي من عند الجيران، وصوتها يتردّد صداه في البيت فيساروني الشكّ أنّ وراء هذا الغضب العارم حدوث كارثة سببها «هنية»، ثمّ فجأة يفتح الباب، وتدخل «بوسي» ساخطة وصوتها مثل صفير الرياح:

- يا ماما.. يا ماما، شوفي حلّ في الثفتة «هنية» دي.

أتابعها في صمتٍ وأنا منتظرة نشرة الأخبار التي تحتوي على تسعين بالمائة من الأخبار المؤلّفة العارية تمامًا من الصدق، ولكن فقط لتؤلّبني على «هنية» (الرّفتة) على حدّ قولها، فسألتها مستفسرة:

- مالِك يا «بوسي» في إيه يا حبيتي؟ وما لها «هنية» عملت إيه؟

فتقترب منّي وتمنحني حُضناً وقبلة، كنت سابقاً أحايلها كي تمنحني إيّاها، لكنها الآن في وضع تريد أن تستدرّ عطفي ومحبّتي، وتستعديني على خصمها العتيد «هنية»، تمسح دموعاً زائفة وتقول:

- تثولي يا مامي، «هنية» الثفتة دي جاية علشان تلجّعني البيت

وأنا أقول لها ثييني لما أدخلت لعب مع فليدة وبودي وهي تقولي يلاً ياثت بشت، المدام عاوْناك بثولعة، وفضلتُ ترنّ، وطبعاً أنا اتكفّشت،

وانطليت الوّح معاها علشان شكلي بقى علّة قوي!

أظْهر الجدية على ملامي، وأقول لها:

- هي وصلت إنها تخلي شكلك عرّة! مش معقول يا «بوسي»
يا حبيتي! لا طبعاً أنا هازعق لها، بس انتِ روجي اغسلي وشك
وإيديك علشان تاكلي.

فتبتسم وتنسى كل غضبها وتقول: - لا مش جعانة.. أكلت أنا
وفليدة وبودي، ممكن ألوح أكمل لعب يا ماما؟
أرفض وأقول لها:

- لأ، خلاص، يلاً على «هنية» تغير لك هدومك، وبعدين
روحي اقعدي مع بابا ورامي علشان أنا عاوزه أنام شوية.
تقفز على الأرض، وتنظر إليّ بغضب وتقول:
- على فكلة يا ماما حضلتك بتقهليني وبتظلميني، أنا فلعن
ثعلانة منك.

أبتسم وأقول لها:
- أولاً إنتِ شكلك مش بتدربي على الحروف زيّ دكتورة
التّخاطب ما قالت لك، الزّين والسّين عندك ث، ليه يا بوثي؟ يووو
أقصد يا «بوسي»، وعلى فكرة أنا لا بظلمك ولا بقهرك، يا أمّ ألف
لسان، يلاً، امشي على «هنية»، والرّاء طبعاً مفيش أمل تبطلّي تخليها لام؟
تبتسم وتقول: ماما فكك من الدكتوله دي، كلامها كلّه بالا
عني، الليّ عاوث يفهمني هيعلف.

أنفجرُ في الضحك وأقول:

- الرّاء الّلي لسه متصلحتش شغالة بيها وبتنقي الكلام بيها باقتدار، «بوسي» شكرًا! وبرّه عني كمان، مأهو المعلم بتاعك «أدهم»، هنقوله لازم ينقي كلام مفيهوش راء!

تخرج محدّثةً جلبه، وتنظر إليّ بطرفِ عينيها اللامعة الغاضبة وتصفق الباب خلفها بعنف. فتفتحه «هنية» وتدخل خلفها، وقد تبادلا نظراتِ التحديّ قبل دخول «هنية» وهي تحمل في يدها الهاتف وتقول لي:

- يا مدام، المدام مامت الأستاذ «يوسف» على التليفون. وقبل أن أقول أيّ كلمة أو حتى أتناول منها الهاتف تُردّف وتقول: - على فكرة صوتها مش عارفة ما له كده غريب، وشكلها متنرفزة، هتكلميها ولا أجولها إنك نايمه. أصرخ فيها:

- إنْتِ اتبهلتِ!! أنا نايمه واللّا صاحية؟! هاتي التليفون وابعدي عني، أيامك معانا شكلها قرّبت تخلص، بسّ لما أفضي لك. أضعُ السّماعه على أذني فلا أجد إلّا حراره، وهذا يعني أنّها أغلقت الخطّ!

أصرخ فيها مرّة أخرى: - ازتحت، أهّي قفلت الخط، كان لازم ترغي.

أشعرُ بالكارثة المقبلة عليّ من جرّاء تأخّر «هنية» في إعطائي الهاتف، ثمّ أنظر إليها بغضب، وأقول لها:

- مبسوطة يا بومة؟! النهارده أهو بسببك مش هيعدّي على خير.

تردُّ عليّ بصوتٍ قوي وتحدُّ غريب:

- ليه يا مدام! الحجّ عليّ عاوزه أوفر عليك الشخط، وتسميم

البدن، وجلبة الوش بعد ما تجفلي التلافون، مآهي المدام مامة الأستاذ

دايماً تنكّد عليك، الحجّ عليّ يعني، هو كده خيرًا تعمل...

ثمّ تصمت، فأقول لها:

آه، كملي يا فالحة شرًّا تلقى، مآهو ده اللي حصل معايا لما جبتك

من البلد.

لا تهتمّ بالردّ على تعليقي كالعادة وتكمل كلامها، فالأسئلة

تتدفّق على رأسها، وقد قرّرت أن تحاصرني بها:

- إلّا صحيح يا مدام، ومن غير إساءة أدب منّي، هي المدام

سعاد ليه بتعاملك عفش كده؟! وكأنتك بنت جوزها مش مرات

ابنها؟! ثمّ هرشت رأسها وأضافت:

- واللّا لتكون كانت عاوزه تجوّز الأستاذ «يوسف» لبنت

أختها، زيّ المخفيّة مرات عمّي لما فضلت ورا أختي لما طلجتها

من ابنها، وجوزته بنت أختها، وأختي يا عينيّ متلجّحه في بيت

أبويا وحيدة هي وعايها، بسّ أبويا، جال لها تعيشي في بيتي متكرّمة
ومحدّش يذلك!

ثمّ تضيفُ على الفيلم الذي تقوم بتأليفه:

- يمكن المدام سعاد بتعاملك وحش عشان أبو حضرتك
متوقّي وانتِ يتيمة؟!!!

أنهرا بصوتٍ مكتوم، وأقول لها: إخرسي..
وغوررررررررررررررري

فتعطيني الهاتف وترحلُ وتغلق الباب خلفها، وأنا أشعرُ برعبِ
اللحظات القادمة عندما أتصل بحماتي أو تتصل هي، لكنني أحمد
الله أمّها لم تسمع حوار «هنية» معي، أو أظنّ ذلك. ثمّ أنتبه لكلمات
«هنية» التي قالتها، وأتساءل:

- أبو مين اللي بتسرح بيّا وتقول أبوها قال تقعد متكرّمة!! هي
مش أبوها مات!! آه من دماغك يا «هنية»!

وكأّمها نوبات أو نوبتجيات يتناوبها عليّ أهل البيت، تخرج
«هنية» والصّداع يكاد يلتهمني، فيفتح «أدهم» الباب وأنا جالسة
أنظرُ لسّاعة الهاتف لا أدري ماذا أنا فاعلة بها؛ هل أتصل بحماتي أم
أنتظر أن تتصل هي بي، وفي الحاليتين سأسمع هجائية من هجائيات

جرير، فقررت الانتظار، فاقترَبَ «أدهم» منِّي واحتضنني ثم قال لي:

- ما لك يا ماما بتتفرّجني على التليفون كده ليه؟

ثمّ يضربُ بيده على جبهته ويقول:

أه صحيح.. بخصوص التليفون، نسيت أقولك، عمّتو إيمان اتّصلت بدري قبل ما أنزل وبتقولك: عاوزاك متأخّريش على المشوار اللي اتّفقت معاك عليه، علشان الشركا عندها مجتمعين لمناقشة الميزانية، وبتطلب منك تشتري بيتزا، وتورته على ذوقك، علشان هيّ مش فاضية، بتخلّص حاجات تانية.

أهز رأسي، وفي سرّي أقول:

- ذوقي! إيه التّهريج ده! هي إيمان حصل لها حاجة؟ هو أنا

هانزل مخصوص أجيب بيتزا وتورته؟! متجيب هيّ.

ثمّ يؤنّبني ضميري: هوّ بس لولا إني بحبّها وهيّ تعتبر القلب الحنين في العيلة دي، كنت اتجنّنت عليها وخرّجتْ غُلب اليوم فيها، إيمان بالنسبة لي شخص لطيف، لكن أوقات تعتريني رغبة قوية في مشاغبته ومشاكستها؛ ذلك لأنّها تتصرّف أحياناً بطفوليّة مزعجة، ورغم ذلك فهيّ مصدرٌ ثقّتي وتعترني أختاً لها، لكنّها أحياناً لا تسلم من المرأة الشريرة بداخلي، فتلك المرأة تتحكّم في تصرفاتي أوقاتاً كثيرة دون قصد، بالإضافة لتصرّفات سعاد التي تدفعني لأنّتمّم

مَنْ يَخْصُونَهَا، ثُمَّ فَجأةً يَرَنَّ الهاتفَ النَّقَالَ، فأَضَعُ على أذني بدلاً منه الهاتفَ المنزلي، فأنا أَنْتَظِرُ مكالمَةَ من حماةي تَوَنَّبيني أو تَقْرَعَنِي، أو على أَحْسَنِ الأحوال، ستعطيني أوامر، أنتبه إلى أنني قد وضعتُ الهاتفَ الخَطَأَ، أضعه جانباً وأفتَحَ الهاتفَ المَحْمُولَ، فيأتيني صوتُ إيمان ينضجُ بالرقّة:

- أيلووو أيوا يا «لبنى».. إزيك يا هني!

في هذا الوقت من ذلك اليوم، وفي تلك الساعة، وفي تلكم الحياة، قد تمَّ شحن الشرِّ والسُّخافةِ داخلي بمعدّلات عالية تماثل كهرباء برج من أبراج الضَّغطِ العالِي! فأقول لها ببلادة:

- مين معايا!؟

فتردُّ عليّ بصوتٍ مندهش:

- «لبنى».. مين معاكٍ يعني إيه؟! هو انتِ مش مسيِّقة ركمي،

أنا إيمان يا هني!

فأردُّ عليها متصنّعة البراءة:

- أهلاً، إزيك يا إيمان عاملة إيه؟ معلش يا حبيبتي، أنا أصلي

مُجهدة، وصوتك غريب قوي، ما لك فيك إيه؟

وبنفس درجة الصوت، والرقّة «الأوفر» تردُّ إيمان عليّ قائلة:

fine my dear كنت عاوزه أسألك question، ممكن يا «لبنى»؟.

أنا: of course اتفضّلي يا إيمان go ahead ..

إيمان بصوتٍ رائق تقول لي وتتجاهل نبرة السّخرية، أو لا تدركها؛ لا أدري:

- «لبنى» يا دير، معلّش إنت عارفة المان اللي جنب بيتكم بتاع البيتزا

أنا: مين المان ده؟!

إيمان: المحلّ اللي جنبك على طول.

أسألها: هو اسمه المان؟!

إيمان: لأ يا «لبنى»، أقصد الرّاكّل صاحب المحلّ.

أبتسم بشر، فقد طلب منّي الموقف سخريّة ومشاغبةً قدر استطاعتي وأكثر؛ فأنا لو لم أفعلّ هذا سأقف في الشّرفة أصرخ كالمجنونة! فقلت لها:

- إيه الرّاكّل ده، يعني إيه؟!

إيمان: يا «لبنى» المان، The man you know!

أنا: آه الرّاكّل، إيمان إيه الرّاكّل دي، ثمّ أتذكّر، آه نسيت التّقويم

اللي انت حطّاه، هو هيخلص التّقويم إمتى يا إيمان؟

إيمان: آه يا «لبنى»، الدتتور بيقولّي شوية وقت، علشان عاوزه

أعمل سناني زيّ أليسا!

أضحك حتى تدمع عيناى، وأقول لها:

- دكتور، أه الدكتور، هي الكاف قلبت ته ليه!؟

إيمان: - معلش يا دير التّقويم مَبوّز كلّ الحروف، إيه رأيك في

سنان أليسا، واللّا إيه رأيك أعمله زيّ نانسي عجرم؟

أردُّ عليها بجديّة وثقة: لأ، خليهم زيّ سنان شعبان عبد الرحيم.

تقول لي: - بسّ ده راجل! معقول سنانه حلوة! إنت بتسقيّ

عليّا يا «لبنى»؟ صحّ! why my dear!

أقول لها: - بسفّ عليك! أبداً يا حبيّتي، أنا بسّ بفكرّ معاك

بصوت عالي، طيب متزعليش خلاص، أنا بهزرّ معاك، متعلّيش في

سنانك، دول حلوين جدّا بس اطلبي من الدتتور بتاعك يظبّطهم.

ثمّ أُرِدِف قائلةً: بلاش، أليسا وخلاص.

أشعرُ بأنّي شريرة، فيإيان أطيب قلب في بيت حماتي وأغلبهم،

وأكثرهم سذاجة، أغيّر الموضوع وأقول: ماشي يا إيمان، هاجيب

بيتزا وتورته، «أدهم» قالي على ذوقي.

إيمان: طبعًا يا «لبنى».. ذوقك لا يُعلّى عليه، فعلاً إنت

amazing.. Unique يا ماي هارت!

وفي سرّي أقول: Unique

، الستّ دي ملهاش علاقة بسعاد، أكيد متبنيهاها، الله يرحم (البيئة

واللوه) اللي كانت على طول توصفني بيهم سعاداً لما تغضب عليّ!

ثمّ أرفع صوتي: حاضر يا إيمان، حاجة كمان؟

إيمان: آه من فضلك عصير العنب والصودا.

أصرخُ فيها: ينهاركم اسود! إنتم هتسكروا عندكم في الشركة؟

ايه دا يا إيمان، وأنا اللي كنت فاكراكي ملتزمة؟ وحجاب إيه ده،

وصلاة إيه؟ لا لا مكنتش فاكراه انك كده، اخوكي عارف الكلام

ده؟ ربنا يسامحك مكنتش اعرف انك كده

إيمان ضاحكة بصوت عال: اهدي يا هنني في ايه، انت فعلا

وبجد ظريفة والله يا «لبنى» so funny، ياروحي طبعاً لأ، العصير

مفيهوش أيّ شيء مسكر، والصودا علشان الهضم... على طول كده

تظلميني، انت naughty

أقول لها من باب الاحتياط: مش هاعرف أجيب المشروبات،

جيبها انت يا هنني.

إيمان: أولك يا «لبنى» يا حبيبتي اتفقنا، باي يا دير.

أنا: باي يا جرجير! قال دير آل! هو أنا ناقصة يا إيمان! دا اليوم

انضرب وهيختم بطلباتك.

بعد أن أغلقت الهاتف مع إيمان، فردتُ جسدي على الفراش،

فأنا أصبحت متأكدة أن هذا اليوم طويل بشكلٍ مُنقطع النظير، ويأبى

الانتهاء بسلام، فهو ممتلئ بالأحداث والتليفونات والنقاشات،
ورغم أنّ المغرب لم يؤدّن بعد؛ فإنه أطول يوم في عمري! نفسي
أناام، يا بشر الرحمة.

وبمجرد أن أغمض عيني وأمدّد جسدي في الفراش، يدخل
«يوسف» الحجرة بهدوء، ويقترّب من السرير، ثمّ يضيء النورَ
فأفتح عيني، وألح على وجهه الضيق، ثمّ يظهر على ملامحه التّجهم
والعبوس، وأرى عيونه كأنّها جمرة نار مشتعلة، تشي بغضبٍ شديد
وعارمٍ قادم بسرعة، يعود ليقفل الباب بقوة ثمّ يغلقه بالمفتاح كأنّ
هناك أمرًا جلالًا، أو أنتوى العراك معي، يقترّب مني مرّة أخرى
ويقف أمامي مباشرةً محدقًا فيّ، وواضعًا يده في جيب بنطاله،
ويتحفّز يقول لي:

- «لبنى»، على فكرة بابا أتصل حاليًا، وبيقولّي ماما زعلانة جدًّا
ومنهارة من العياط، علشان كلمتك وانتِ مردّيتيش عليها.

ثمّ لا ينتظر ردّي ويقول:

- ليه يا «لبنى» محترمتيش ماما وردّيتِ عليها، من إمتي انتِ
مبتردّيش على ماما مهّما كانت مضايقاك؟ وبعدين كون إنّ بابا
يتّصل بيّا يبقى في كارثة حصلت! وماما زعلانة جدًّا، وماما أكيد

مبتكذبش، وبعدين هافضل لأمتي أفضل بينكم؟!

أنفحص الواقف أمامي يعطيني مواعظ في التعامل مع البشر، ويسرد عليّ بطولاته، كونه الحكم الفصل، ثم أرسل نحوه نظرات حانقة ساخطة، وما ألبث أن أعيدها للأرض متجاهلة تساؤلاته، والشّرر المتطير من عينيه، وأفكر في ردّ؛ فكون «سعاد» مُنْهارة، كذبة لا أصدقها- فهي لا تنهار- أبداً، أقرّر ألا أردد على هذا الاستفزاز من وجهة نظري، فما تدّعيه حماقي على لسان حمايا، ظلم وجور بواح؛ فأنا يومي طويل ومُجْهدة، وأريد أن أستريح، ولم يسألني هل ما سمعه حقيقة أم ظنون نتيجة لعدم التواصل، وسوء النية المبيّنة دائماً بيني وبين أمّه، عاودت النظر إليه بإهمالٍ ولم أهتم بما قال، وعندما رأى عزوفي عن الحديث معه، اشتعل غضباً وثار، وبدأ في رفع صوته وقال:

- مبرّدش عليّ ليه يا «لبنى»؟! هو انت شايفاني شويّة هوا عدّوا من جانبك وصفروا، واللّا بني آدم واقف يكلمك! يعني تتجاهلي أمّي وكمان متعبّريش جوزك؟! هو أنا هافضل طول عمري أبرر في الناحيتين؟!

أرفع نظري وأحدّق في عيونه بنظرات لا روح فيها، ولم أحاول أن أردد عليه بنفس أسلوبه المستفزّ؛ بل أتماسك وأقول له:

- عاوز تعرف اللي حصل واللّا خلاص صدقت مامتك وباباك

وقررت تصدر أحكاماً من غير ما تسمع دفاعي؟ عموماً اللي حصل هو على ما «هنية» جابت التليفون كانت مامتك قفلت الخط. يرتفع صوته ويصرخ في قائلاً:

- لا يا «لبنى» ماما سمعت هنية وهي بتتحايل عليكِ علشان تكلمها وان عملت نفسك مش مركزة ومرديتيش عليها. أستمع لكلامه وأنا أكادُ أجُنُّ، وأقول له:

- أولاً بلاش تزعق علشان أنا أصلاً مجنونة وممكن أزعق، ويومي خلاص يشطب، والجيران يسمعون أوركسترا بيت «يوسف حمدي» السيمفوني؟! ثم أُرِدِفُ قائلةً:

ثانياً مامتك مش بتقول الحقيقة، وعندك «هنية» تحكي الموضوع كله، وثالثاً ودا الأهم.. من إمتى إنت بتفصل بيني وبين مامتك؟ إنت طول عمرك تيجي علياً وتقولي اعتبريها مامتك، اصبري عليها، وأنا أمي عمرها ما عملت حاجة، وفي حالها، وأمك سعااااد سعاد ما وراهاش حاجة في الحياة إلا أنا، على فكرة يا «يوسف» إنت مفتري وظالم، وطول عمرك فاهم إن برك بأمك وأبوك يعني إنك تنصرهم على زوجتك حتى لو كانوا غلطانين، دا اسمه افترا، برك بيهم لا يعني ظلمي وأنا لي عندك حقوق ومش علشان خاطرهم

تظلم مراتك وتنصرهم بالزور، والله ربنا هيسألك عني يا «يوسف»
وأنا هاشتكيك له.

ثم أُرِدِف بغضبٍ عارم: روح اسأل شيخ واللا دار الإفتاء،
واعرف منهم الفرق بين برك بأبوك وأمك وبرك بمراتك، إنت مش
عادل، أمّا حمايا فأنا مش مسمحاها، علشان طول الوقت بيتفرّج على
أمك وهي بتبهلني وتمرط بيا الأرض وعامل كإنه سايح من الصين
نزل الصعيد! ومش عارف يتواصل معاهم فيكتفي بالنظرات!
يقاطعني قائلاً:

- اسمها أمك؟! أمك يا «لبنى»! عيب كده، ليه نغلط بس؟
عندما قال جملته الأخيرة هذه كان قد استبدّ بي الغضب،
واشتعل قلبي نارًا، فالיום طويلٌ مُرهق، وكنت أرغب في قليل من
الراحة، فظهري يؤلّني من أثر السَّقوط رغم أنّي لم أحاول أن أُبديّه
له، وصداعٌ مُريع يفتك برأسي، وهو يؤنّبني على أنّي لم أكلم أمّه،
رغم أنّها أغلقت الهاتف قبل أن أرّدّ عليها، ويلومني على كلمة أمك
فأقول له:

- لما أقول كلمة أمك، يبقى بغلط يا «يوسف».. ولما مامتك
حببتك تقول إني- عليّا أنا مرات ابنها- «لبنى» دي سودا كودا،
وكارته، ومعرفش «يوسف» اتجوزها على إيه، مسمعتكش بترّد

عليها!! ليه يا «يوسف» مبرّدش عليها؟!

مع إنّي لا سودا ولا كودا، وأصلاً مش عارفة كلمة كودا دي
يعني إيه؟! بسّ غالباً سف علياً وسخرية، وأنا ستّ بتهمّ بنفسها
وعاملة شعري بروتين وبصبغة ومهتّمية بنفسي زيّ ما جارتنا سماح
نصحتني، بسّ أمك بتحبّ التأنيب والتلقيح والتريقة! ورغم كده
مكنتش بعلّق واسكت، أمك يا يوسف الليّ مفهّمة عيالي إنّي مش
مستواكم وإنّي من سلالة عبيد! عبيد يا «يوسف»! هي مامتك
عايشة ليه في دور الملكة نازلي؟! واللّا لتكونوا خواجات وجيتوا
مصر تحتلّوها؟! كلّ ده علشان لوني قمّحي! والليّ زاد وغطّى بتقول
إثمّ مش ولادي وإنّي مرات أبوهم!

ينظر إليّ وهو مذهولّ من غضبي وكلامي الذي يتدفّق مثل
شلال في أوّل اندفاعاته.. وأردفُ قائلةً:

- على فكرة، أنا حلوة وزيّ القمر ودمّي خفيف، وكوني قمّحية
ميعيش إنّي مش حلوة، ومامتك الليّ هي لونها أبيض تقاطيعها
كبيرة، يعني لو أخذت «تان» هيبقى شكلها زيّ الأفارقة مع احترامى
الشديد للأفارقة؛ لأنهم أصحاب قلوب طيبة مش حقودين! يحاول
أن يهدّثني فلا يستطيع، وأنا أستطرّدُ قائلةً وقد أصبحت قاب قوسين
أو أدنى من الجنّون:

- وعلى فكرة، أنا بكرهكم كلكم، بكرهكم كلكم، وانا مش عاوزه أعيش معاك، وطلّفتني يا «يوسف» علشان سعاد ترتاح، وعلشان إنت زوج مش قادر تتحمّل مسؤولية الفصل بين أمك وجبروتها وبيتك واللي بيحتاجه! وكم ان علشان أنا خلاص زهقت من كيلك بمكيالين، كأني أنا وأمك متجوّزين راجل واحد!

يا أخي دي مش بتغير على أبوك زيّ ما بتغير عليك! هو أنا مش كفاية عليّا البيت وعيالك اللي هبليني وكلّ أمور حياتنا اللي بعملها لوحدي، كم ان مش قادر تسمع وتفوت من أمك وابوك، يا ما سمعت وفوت لهم علشانك، إنت دايماً تيجي عليّا، خلاص يا «يوسف» أنا ماشية وابتعت ورقة طلاقني على بيت أمي، وهات سعاد تعيش معاك هنا، وأنا مش هاقعد لك فيها.

ثم تركته وذهبتُ إلى الدولاب أستخرج منه ملابسني، وبدأ يتتابني صداغ رهيب، أضغُ يدي على رأسي من الألم، وخيالات أمام عيني، وأتذكر السلم وسقوطي، أحاول الجلوس، أشعر كأنّ هناك من يسحبني من رجلي ليقعني أرضاً، أقاوم، وأتحامل على نفسي، ثم أحاول المقاومة، وشعورٌ بالقهر والحزن العميق يملؤني، خاصّة وأنا أرى «يوسف» جالساً لا ينظر إليّ كأنه مشغول بشيء في يده، فلم يحاول أن يمنعني أو يستوقفني، وقتها نما ليقيني أنه افتعل

هذا الموقف فقط لكي أرحل وأترك له البيت، وعندما تمكنت مني هذه الفكرة أتجهت بثقل إلى باب الحجرة أحاول أن أفتحه لأرحل من البيت، فقد اعتراني إحساس الغريق الذي يحاول الصعود لسطح الماء فيفشل، ليجد صعوبة في الكلام وجفونه أصبحت ثقيلة، فجأة أشعر بدوار شديد، وعدم تركيز وأرى الأشياء كأنّ عليها سحباً بيضاء؛ فالبكاء أحال رؤيتي إلى ضباب، فيُخَيَّلُ إليّ أنّي المَحُ من خلالها «يوسف» كأنه يجلس على الغمام ممسكاً في يده كتاباً صغيراً، فيستفزني هذا المنظر، فأقوم بمحاولة لفتح الباب المغلق فلا أستطيع، أحاول مرّة أخرى ولكن هذه المرّة بقوة أكثر فلا أعرف، وما أنّ يشعر «يوسف» بجديّة ما أنتويته من خلال جذبني الباب بقوة في محاولة لكسره، يقوم مسرعاً ليمنعني لكنني أسقط من الإجهاد والتوتر، وأشعر بألمٍ حادّ في جسدي.

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصل لكَ نبي عشر

الغيبوبة

وبصوتٍ كلّه حنان وحبّ، وهزّة رقيقة، وبرفقٍ شديد:
- «لبنى».. إنَّ صحيت؟، أيوا يا «لبنى» أيوا إنَّ فُقتي، الحمدُ
لله يا حبيبتِي، الحمد لله يا بنونتي.

بصعوبةٍ شديدة فتحت عيني، وصداع قاتل يلفّ رأسي! مَنْ
حبيته هذه، زوجي يناديني بحبيبتِي! لم يقلها ونحن مخطوبان!
يقولها لي الآن؟ مَنْ هي بونونته تلك! نظرتُ إليه من خلال غشاوةٍ
تظلل عينيّ لا أعرف سببًا لها! ثمّ فركت عينيّ بيدي مثل الصّغار،
وبدأتُ أتحسّس طريقي إلى رفيقتي نظارتي، فوجدته يعطيني إيّاها،
وضعتُها على عينيّ ونظرتُ إليه، نعم إنّه هو، هو زوجي، ولكنّ ما
هذا الذي بيده؟ وردة حمراء! ويقول:

- الحمدُ لله يا حبيبتِي، إنَّ فُقتي يا «لبنى»! الحمد لله والشكر
لله، ويسجد شكرًا لله!

أغلق عينيّ ثمّ أفتحهما جيّدًا، وأنظر مَنْ هي حبيته تلك التي
يتحدّث إليها! وهل هذه الهزّة الرقيقة ليست بفعل الصّداع أو أنّ

هناك زلزالاً ضرب المكان على استحياء! أم إنه فعلاً زوجي يناديني بحبييته ويدلّني ببونونتي! إذا «يوسف» زوجي أصيب في عقله وعافرَ الخمر، خمر يا «يوسف»! أنا أعلم أنّي كما قلت من قبل حظّي تعس، لكنّ زوجي يشرب الخمر؟!

جلستُ وأنا أشعر بألمٍ شديدٍ وأتخيّل أنّي أرى ابتسامة غريبة تبدو على مُخيّا يوسف» بالإضافة لرقّته! يتسم.. وهو الذي إذا استيقظ من النوم ظلّ عابساً إلى أن يشاء الله، ولا يتسمّ في وجهي، ولا يوقظني إلّا بصوتٍ مثل بوق المعسكرات! هل ما يفعله الآن صحيح؟! ويناديني برقّة، ثمّ أتلفتُ حولي فأجدني في مكان غريب، وكأني في حجرة في مشفى، فأسأل «يوسف»:

أنا فين؟ هو أنا فعلاً في مستشفى؟

ثمّ أمحسّ رأسي وأقول له: وليه راسي بتوجعني كده؟
يُرِبْتُ على كتفي بحنانٍ ويقول لي: - إنت فعلاً في المستشفى.
أسأله وأنا في حالةٍ فزعٍ رهيبه من المقدمات السابقة، ووجودي في مكان لا أدري أين.. ومتي نُقلت إليه:

- في إيه! مين من العيال اتعوّر؟ يا لهوي يا «يوسف»، أكيد «بوسي»، أصلها مش بتتهدّ، وأكيد اتخانقت مع «هنيّة»، آه يا راسي، ما تردّ عليّا يا «يوسف»؟ إوعى ليكون «رامي»؟ يا حبيبي يا ابني،

الواد ده قليل البخت، ليه يا يوسف سيبتني مغمى عليا مفوقتنيش؟
آه، أكيد أنا أغمى عليا لما شفت الجرح بتاع «رامي»، أنا أصلي مش
بستحمل الدم، شوف أنا تخينة إزاي، أقصد مليانة بس أفع زي
الناموسة لما تتكب على وشها من شوية فليت اترشوا عليها.

ثم أنظر إليه وهو لا يجيب على سيل أسألتي الهادر، وأستعجب قائلة:
- وهو احنا جينا هنا أصلاً إزاي؟! أنا مش فاكره حاجة غير
إني كنت بتخانق معاك ووقعت على الأرض وأنا بحاول أسيلك
الأوضة وأخرج علشان أسيب البيت.

يهمس لي بصوتٍ حنون.. آه والله حنون! ويقول:

- حبيبتى، إنت اللي تعبانة، الولاد كويسين مع مامتك و«هنية»
في البيت، لسه ماشيين كلهم من شوية صغيرين، علشان تغديهم
وتطمئن عليهم وبعدين ترجعلك تاني، والحمد لله إنت بقيتي أحسن.
أقول بذهول، وفي مفتوح مثل الطفل في فترة التسنين:

- حبيبتك! وقلبي! الاتنين مع بعض، وكان قبلهم في وردة! تاني
يا «يوسف» بتسف عليا! وأنا أحسن من إيه، آآه أنا مصدعة قوي.

ثم أتذكر فاقول له:

أيوا صح.. السلم، أنا اتكعورت من على السلم، مهية الأزارة
«هنية» فضلت تزني عليا هتجعي يا مدام لغاية ما وجعت أقصد

وقعت، بس أنا كنت كويّسة، وحتى بعدها، جدو جه وزارني،
وقعدنا مع بعض، فاكر يا «يوسف»؟! واليوم كان طويل وكلّه
مناكفات، وأنا تعبت قوي، وإنّت كملت عليّا بخناقك معايا علشان
أمّك، أقصد مامتك!

بيتسّم ويهزّ رأسه ولا يردّ عليّ كأنّه محتاج مترجمًا للكلامي فوجهه
يبدو عليه الاندهاش! ثمّ يربّت على رأسي، ثم ينادي الطبيب الذي
يسلم عليّ ويقول لي:

- إنت أفضل بكثير، والحمد لله إنك خرجت من الغيبوبة!
أقاطعه قائلة:

- غيبوبة! مين اللي كانت في غيبوبة؟!
يكمل كلامه كأنّي لم أتكلّم، ويقول:

- إحنا كنا مرعوبين عليك لغاية ما اتأكّدنا إنك في semi coma!
ولمّا لقيناك حاسّة بينا اطمّنا، والحمد لله إنّ اللي حصل
مدخلكيش في deep coma، لأن دي الخروج منها صعب، وإنّ
حصل بيكون في إصابة شديدة في المخ، والحمد لله الإصابة مكتش
قويّة فمدخلتيش في غيبوبة عميقة، يعني تقدري تقولي ممكن ارتجاج
في المخ مع فقدان وعي مؤقت! بس هتفضلي معانا يومين نتأكد إنك
بقيت كويّسة، وبعدها ترجعي البيت على طول.

أنظر للطبيب باندهاش، وأقول له:

- غيبوبة! مين اللي في غيبوبة!.. إيه.. ازاي؟! أنا كنت نايمة شوية.

بيتسّم ويقول لي: حمدًا لله على السّلامة يا مدام.

وكأني عفريت لا يراه ولا يسمعه! ولستُ إنسانًا أتحدّث إليه،

لم يردّ عليّ، وتكلّم مع «يوسف» ليعطيه بعضّ التعليمات، وتركني

مندهشةً ورحل، تباً لهذا المغرور!

وبعد أن خرج الطبيب، حكى لي «يوسف» ما حدث بالضبط، قال:

- بعد وصوله للعمل بساعتين تقريبًا، اكتشف أنه نسي بعض

الأوراق المهمّة، فعاد البيت لإحضارها، وعندها وجدني ملقاةً على

الأرض، و«هنيّة» بجواري تبكي، حاولا إيقاظي فلم ينجحا، ولم

يحرّكاني من مكاني، واستدعوا الطبيب من المستوصف الصّغير،

فقال لهم:

- إغماء نتيجة سقوطها من على السّلم، أنا حاول أفوّقها، بسّ

احتمال لو ما فقتش معايا يبقى لازم نقلها المستشفى... وفعلاً حاول

الطبيب إفاقتي، ففشل؛ وتمّ استدعاء الإسعاف ونُقلت إلى المشفى

ومكثتُ في الغيبوبة يومين تقريبًا.

نظرت إلى «يوسف» بحبّ وقلت له:

- معقول يا «يوسف»! أمّال أنا ليه كأني لسه بتخانق معاك بعد أطول يوم في حياتي؟!!

يضحك «يوسف» ويقول: - تقصدى يوم من غلبي!
أنظر له باندهاش، فهذا هو الاسم الذي كنت أطلقتته على هذا اليوم بالفعل لأنني أقوم بكتابة اسم لكلّ حدث في مذكراتي.
ثمّ تذكرت أنّه في نهاية هذا اليوم لم يغش عليّ، ولم أترك البيت، أنا تركت الحجرة وذهبتُ إلى البلكونة أبكي، ثمّ جاء «يوسف» ورائي يصالحني، بعد ما شعر بأني فعلاً لم أتعمد الإساءة إلى أمّه، يتسم إليّ ابتسامته المحبّبة عندما بهمّ بمشاكستي ويقول:
- بصراحة اليوم ده يوم من غلبي أنا.

فأسأله مُندهشة:

- واشمعنى اليوم ده بسّ اللي فُقت من الغيبوبة فاكراه، أو حاسّة إنّي كنت عايشاه؟!
يقبل يدي ويقول:

- إنتِ كان عندك شبه غيبوبة، يعني سامعة وحاسّة بسّ مش قادرة تتواصل، وأنا لما رجعت البيت علشان اطمن الأولاد وارتب أمورهم، بعد ما جبتك المستشفى، لقيت دفترك، فأخذته وحطّيته في جيبي، ولما جيت المستشفى قعدت أقرأ فيه، سامحيني، بسّ هو كان

لازم أعرف إيه اللي مضايقتك، ومن حظنا إنك مكنتيش في العناية المشددة، فكنت بعرف اتصرف مع المرضين وادخل أقعد جنبك أقرأ بصوت عالي، علشان أنبهك، معرفش ده صح واللا لأ؟ بس ده اللي جه على بالي، زي ما بشوفهم بيعملوا في الأفلام الأجنبي!

أبتسم لبراءته التي لم تستطع يدُ سعاد أن تشوّها كلياً، فيُردف قائلاً:
- وكنت أنا والأولاد هنموت من الرعب عليك، و«هنية»
كمان، طول الوقت تعيط وتقول: يا حبييتي يا مدام، البيت من غيرك
جبر ملوش طعم، هههه..

قال يعني في قبر له طعم! إنتِ مستحمة الكارثة دي إزاي،
بحسّ إنها لغم قابل للانفجار في أيّ وقت، ومش قادر أوصفلك
اللي كانت بتعمله هي و«بوسي»، والله يا «لبنى» أنا مكنتش أعرف
إنتِ بتتعبني كده قوي!! ساحيني.

فأبكي من تأثري، وأقول له: - «يوسف»، أنا كمان مقدرش
استغنى عنكم، إنتم حياتي، بس أنا تعبت من الضغوط. ثمّ أعتدل
قليلاً، وأقول له: عاوزه ورد يا إبراهيم.

ثمّ أبتسم له بوهنٍ وأقول:

- أقصد عاوزه أسافر أغير جوّ، بس وحدنا.

يقبل رأسي كأنّي أمّه التي عادت من السفر، ويقول لي:

مامتك مش مُمكن تيجي تزورني إلا وهي متأكّدة إنّي هاموت وأريّجها
مني، «يوسف» طمني، أنا بجدّ حالي خطيرة وهاموت، أنا كنت
زهقانة منكم صحيح بسّ كان نفسي أشوف عيالي وهماً بيكبروا،
طمني هو الوقوع من السلم دمرّ خلايا محّي؟!
يحتضني ويقول لي:

- اهدي يا «لبنى»، إنت زيّ الفلّ والله، بسّ ماما والعيال..
كلّنا بصراحة لما حسينا إنّنا مُمكن نفقدك حياتنا أصبحت سودا، لكن
الحمد لله روحنا ردتّ تاني فينا، «لبنى» هترتاحي يومين في المستشفى
وبعدين نروح، وإن شاء الله ترجعي بيتك في أحسن حال.
أستكينُ بين ذراعيه، فوجوده يشعرنني بالأمان، حتى ولو لم
أخبره بهذا. لحظات ثمّ يخرج ليطمئنّ أمّه وأباه، فتدخل حماتي ويبدو
على وجهها القلق، آه والله، وحمايا أيضًا يبدو عليه التآثر، ثمّ تقبلني
وتقول لي:

- حمدًا لله على سلامتك يا حبيبي.
أنظر إليها مندهشةً وأقول لنفسي:
- حبيبة مين! هو أنا نايمة وبحلم، والّا دخلت الغيبوبة تاني
ودي هلاوس!
ثمّ تُردفُ وأنا مثبّتة ناظري عليها:

- تصوّري أنا نفسي مكنتش أعرف إنك غالية عندي زيّك زيّ
إيمان والله، ومعرفتش إنّي بحبك إلا لما لقيتني خايفة عليك أحسن
تروحي منّا، وكلّ ما أشوفك وانتِ نايمة زيّ العيلة البريئة، وطبعاً
محدّش بيصدّق إنّ اللي نايمة دى إنتِ أمّ خمستلاف لسان! أقول يا
ربّ تخفّ لعيالها ومش عاوزه أشوفها تاني، أقصد ومش عاوزه
حاجة منها غير إنّها تبقى مبسوطة مع جوزها وعيالها!

أقلّب نظري بين «يوسف» وأمّه وحمايا الصّامت دائماً وأبدأ،
فيسارع «يوسف» لائماً أمّه وهو يقول:

- ماما الهزار مينفعش دلوقت، علشان «لبنى» لسه تعبانة، ومش
متصوّرة خوفنا عليها، وهتفتكر إنّ كلامك جدّ، وممكن تزعل.
تقترب منّي أكثر، ثمّ تجلس بجواري وتُربّتُ على شعري،
وتقول لي:

- الحمد لله إنّك خرجت من الغيوبة بالسّلامة، اسمعي بقى،
بطلي رجيم واهتمّي بصحتك، خلاص إحنا راضيين بيك تخينة كده،
مش أحسن ما كنتِ زمان عاملة زيّ القلم الرّصاص! اسمعي،
خلصنا مفيش داعي تموتني نفسك، وجوزك أصلاً متجوّزكيش
مارلين مونرو وفجأة بقيت أوبرا وينفري، إنتِ زيّ مانتي أقصد
يعني إنتِ متغيّرتيش قوي كده، لكن الرّجيمات واللي بتعملوه ده

هِيخْرَبْ صَحْتِك، شعرك بيقع وهتبقِي قرعة، وياريت تصبغِي
شعرك الأبيض ده، علشان الألوان بتصغر وتديك عمر أقل بكثير،
ومش هتحتاجي تحسِّي ولا عملي شدّ ونفخ، ولما تخرجي هابقي
أقولك على نوع صبغة حلوة أنا عارفها.

أستمعُ إلى الدَّرر التي تلقيها في وجهي ولا أنبس بنت شفة،
وأقول في سرِّي وأنا باصّة ليها كأنِّي هتشنق خلاص:

- شدّ ونفخ وأوبرا وينفري، لاااا، كده كثير يا أمّ «يوسف» يا حلوة!
فجأة تقترب وتطبع قبلةً على جيني، ثمّ خدي وتمسح دمعة
سقطت من عيونها وتقول: - يلاً أسيك ترتاحي، حمدًا لله على
سلامتك يا حبيبتِي! يا بونونتي.

أفتحُ عيوني وأنظرُ في اتّجاه سعاد، وأقول بصوت عالٍ من المفاجأة:
- يا لهوي بتقولي حبيبتِي تاني يا سعاد؟! أقصد يا حماي، يووو
يا ماما، بونونتك! حماي تعالي أبوسك.... وفي سرِّي تعالي علشان
أشّم نفسك، إنتِ ضاربة مخدّرات قبل ما تيجي واللّا شاربة خمرة!
تُرَبُّتُ على كتفي ولا تعقب وترحل هي وحمايا الذي لم يقل
سوى حمدًا لله على سلامتك يا بنتي!

وبعد مغادرة حماي تتصل أمِّي، أسمع وأرى فرحتها ودموعها
من خلال صوتها الذي يصل إليّ عبر الهاتف، وأيضًا عمّتي

«وصوف» التي تتصل لتطمئن عليّ هي الأخرى وتمازحني، وبنال «يوسف» نصيبه الدائم من السخرية، ثم يتصل الأولاد و«هنية»، وبعد أن أغلق الهاتف، أشعر بسعادة رهيبية؛ لأنّي استمعت لأصواتهم الحبيبة واطمئنت عليهم جميعاً، ثم أنزلت في الفراش غائبة في النوم، وأطلب من «يوسف» أن يغلق أصوات الهواتف، حتى أستطيع النوم في هدوء، فيفعل ما سألته، ويغلق أيضاً الأنوار، ثم يجلس بجواري صامتاً حتى أذهب في نوم عميق بفعل الأدوية. ساعات قليلة لكنّها من وجهة نظري كافية لأشعر بالراحة، أستيقظ على وصول أمّي، لقد جاءت إليّ ملهوفة، بعد أن تركت الأولاد و«هنية» مع جدّتهم «سعاد» التي أبدت استعدادها للمبيت مع الأولاد إذا استدعى الأمر، فقدّرت لها هذه المبادرة الحسنة؛ لأنّ المبيت مع الأولاد يعتبر بالنسبة لها بمثابة الإقدام على الانتحار، وسعدت بهذا التقدّم - غير المتوقّع - في العلاقات!

عندما دخلت أمّي الحبيبة، شعرتُ بحضورها من غيرها الذي يسبقها دائماً، فهي كالنّسمة الفوّاحة، رغم أنّها لا تتعطر، لكنّها - في رأيي - عطرٌ في ذاتها، وشممت رائحة المسك التي تصاحب مسبّحتها، وعندما فتحت عيوني ورأيتها واقفةً بجواري تنظر إليّ، لم أستطع السيطرة على دموعي التي انهمرت كسيول؛ لأنّي شعرت في

وجودها أنني طفلة تريد الارتقاء في أحضانها، ورغبة في أن تضمّني بقوة، اعتدلتُ من نومي وجلست فاقتربتُ منّي فدفنت رأسي في حضنها، ولقد تأثر «يوسف» من الموقف، وشعرَ بوجود انصرافه، فتركنا لبعض الوقت، وذهب بعد أن وضع كرسيًّا لأُمّي لتجلس في مواجهتي، وعلى مقربةٍ منّي في الوقت نفسه!

احتضنت أُمّي يديّ بكلتا يديها، وقالت: الحمد لله يا بنتي إنك بقيت بخير، أنا كنت كل يوم أمشي وانتِ لسه رجعتيش لوعيك أحسّ إن قلبي ييموت، الحمد لله إنك رجعتيلنا! إنتِ يا حبيبتي ملح العيلة اللي ملهاش طعم ولا روح من غيره، الحمد لله إنك بقيت بخير، إنتِ لازم تنتبهي على نفسك يا «لبنى» بلاش تهوّر، سلّم إيه اللي تطلعي عليه!

أرفع رأسي من حضنها وأقول لها:

- حلاوة روح يا ماما، هاعمل إيه! عاوزه أحسّ إنّي راقصة بالية، بس اكتشفت إنّي فرقة كاملة، كان لازم أحترم سني ووزني.

تضحك أُمّي من سخريتي من نفسي وتقول:

- مفيش فايده فيك.. مش هتبطلي تريقة حتى على نفسك! ثمّ

تُردفُ وتقول:

- نهاد أختك اتصلت أكثر من مرّة علشان تطمّن عليك، هي

وأخوك، وسفرهم براً مصر مخلصهم هيتجننوا عليك، ولما عرفوا من «يوسف» إنك بخير، قالوا هيتصلوا تاني ويكلموك بنفسهم علشان يسمعوا صوتك، وهمّا بيدعوا لك كثير.

ثمّ فتحت حقيبة يديها، وأخرجت منها منديلاً ومسحت دموعها، وربّتت على شعري وهمست:

- اسمعي يا «لبنى»، عارفه إن الكلام مش وقته، لكنّ يعلم ربّي إزاي قلبي كان هيقف من خوفي عليك، بسّ كمان أنا تعبانة من قلقي عليك، هوّ صحيح إنتِ تعبانة ومفروض إنّي مرغيش معاك كثير بسّ عاوزه أقولك على حاجة، الليّ حصل خلاني أحسّ إنّي لازم أنضحك، وبسرعة علشان متضيعيش فرصة إصلاح حياتك، إنتِ طول الوقت عاملة زيّ القطة الليّ لازق في ديلها ورقة ومش عارفه تجيبيها، وكلّ ما حدّ يقرب منها علشان يساعدها تبخّ في وشّه أو تخربشه، بصرحة أنا شفت من جوزك وولادك وكمّان من حماتك، قلق عليك لا يمكن تتصوّريه، فصورة الديناصور الليّ مصوّراهم بيها مش صحّ، فيها مبالغة شديدة، وإوعي تنسي إن شخصيتك عليها عامل، إنتِ قيادية، ديكتاتورة، صعب ترويضك، لكنّ «يوسف» أكثر واحد عرف يتعامل معاك، ورغم كده مش عاجبك، صابر وهادي وبيفوّت كثير، ياما اشتكى من تقصيرك وأنا أقوله إنتِ

مدلّعها يقوِّي مآهي شايلة كثير، بسّ لو تنصّحيتها من غير ما تحسّ
إني اشتكيت منها، جوزك بيحبّك وبيقدرّك، هو بسّ مبيعرفش يعبرّ!
نموتّه يعني يا «البنى»! أحاول مقاطعتها، تُسكتني بحركة حازمة من
يدها، وأشعر أنّي بحماقتي سأفقد حليفي الدائم رغم اختلافنا.
أكملت أُمي:

- يا «البنى»، الرّضا بيخليّ الحياة تمشي بهدوء، والتغافل مهمّ
جدًّا، إنت ازاى قاعدة لكلّ الليّ حواليك على الواحدة كده، مبقولش
إنك شريرة أو بتكذبي، ولا إتهم ملايكة وبعناحات، بسّ اقبلهم
زيّ ما همّما، ومتحاوليش تعيّرني حدّ، ولا حتى تعيّرني نفسك، بسّ
هاقترح عليك فكرة فكريّ فيها، وقت ما الليّ حواليك يكونوا
مأفورين (زيّ ما بتقولوا الأيام دي) ومزوّدونها ابعدي شوّية، ولما
يهدوا قربي، وإدّي لهم مساحة يتحرّكوا فيها بعيد عنك ومنّ غير ما
تطولهم سخريتك ولا ملاحظاتك، ملكيش دعوة غير بالليّ يخصّك
انت بسّ، المنكر أنكريه مرّة واحدة، العيب ارفضيه مرّة واحدة، إنت
مش مدرّس ولا مفتش، ليه تصرفات كلّ الناس مجنّانك، اهدي يا
بنتي، وبصراحة أكثر لو كلامي منفعش معاك وما عرفتيش تطبّقيه،
روحي لدكتورة نفسيّة تعدلك دماغك الملخبطة دي أو تدّيك أدوية
تخليّك أكثر سلام، علشان ترتاحي والناس ترتاح، لازم تعيدي

ترتيب أوراق حياتك وأولوياتك!

أستمع لكل حرف، وكل كلمة، ولا أستطيع غير قول:

- حاضر يا ماما، هاحاول يا حبيتي، أنا والله بحبهم، حتى سعاد، سعاد بحبها.. بس بشكل مختلف، لكن هي بتجننني.

تقاطعني: ها.. قلنا إيه؟ نعيد ترتيب أوراقنا متبصيش وراك، واحدة واحدة الدنيا هتروق، وزيّ ما الناس فيها عيوب إحنا كمان، مفيش ملايكة بتعيش على الأرض. ثم تعادل في جلستها وتمم بالوقوف وهي تقول:

- فكّري في كلامي كويس متحدفيهوش ورا ضهرك كالعادة، الحادثة دي زيّ ما حسستهم بقيمتك لازم تحسسك بقيمتهم، هاقوم أسيبك ترتاحي وتفكّري في كلامي، أستودعك الله.

ثمّ تنهي حوارها معي بالدعاء، وتقبّلني في جيبني، ثمّ تخرج وهي تكفكف دموعها، أمّا أنا فأجهش بالبكاء، ثمّ أدير ظهري لباب الحجرة حتى إذا ما دخل «يوسف» لا يرى دموعي، فأنا الآن في حالة فوضى نفسية، وأريد ترتيب نفسي، ودون أن أشعر، أغطّ في نوم لا أستطيع القول إنّه عميق لكنّه نومٌ فيه راحة لم أشعرُ بها من قبل.

لفصل لكَ لكَ عشر

العودة

استيقظتُ من النَّوم على صوت شخير «يوسف»، فقد نام على المقعد وهو ممسكٌ بدفترتي كأنَّه يتتوي تحضير الدكتوراه في يوميات «لبنى»، أشفقت عليه من نومته تلك، وكانت السَّاعة قد قاربت على العاشرة، وميعاد الزيارة قد انتهى، ولولا العلاقات الطَّيبة التي أقامها مع الأمن والتَّمريض ما تركوه يرحل آخرَ شخص في المشفى، رغم إنَّني موجودة في حجرة، لكنَّها ليست مجهزة لمرافق، ويكفيه ما عاناه في اليومين السابقين، فأيقظته وطلبت منه أن يرحل ليرتاح ويعود في الصباح.

ناديتُ عليه لأوقظه من النوم، فهو عندما يستيقظ من النَّوم، يحتاج وقتاً لينتبه ويعرف أين هو، كأنَّه دائماً ما يسقط في غيبوبة، فقال لي:

- إيه ده، أنا فين! ثمَّ يتسم ويقول:

- آه، أنا نمت من غير ما أحسّ... ثمَّ يهرش في رأسه ويدعك عينيه ويعتدلُّ في جلسته، ثمَّ يُردِّف: - لا مش هامشي، خلِّيني للسَّاعة 12 وبعدين ابقى أروِّح.

ثمّ قام وصبّ لنفسه كوباً من الشاي، فقد كان في الحجرة تُرْس للشاي أحضرته حماي لعلمها مدى حبه الشّدِيد للشاي، وسألني إذا كنت أرغب في شيء، قلت له لا، ولا أدري لماذا رفضت، وهزّزت رأسي مؤكّدة على الرفض، وداخلي يتمزّق؛ فأنا أشتاق لقطعة من الباذنجان المخلّل وقرن فلفل حرّاق، لكنني أبيت أن أظهر رغبتني في الأكل؟ لا أدري لماذا أظهرت عكس رغبتني!

هل كان رفضي خوفاً من «يوسف»، فقد ينعّني بالمجنونة إذا صرّحت له برغبتني هذه! وما الضميرُ فهو يعرفني، لكنّ هاتفاً داخلي أقنعني، فكتمتُ شوقي في نفسي ولذتُ بصمت العازفين، وادّعت الشيع وعدم الرغبة، وأنا أتلوّ من الشوق، ومنيت نفسي بكلّ ما تشاقه عند العودة للبيت.

وللعجب وعكس طبيعته، قابل رفضي بمحاولاتٍ كثيرة لجعلي أتناول أيّ شيء، زبادي أو عصير أو قطعة خبز بالجن، وكلّما عرض عليّ صنفاً من طعام المشفى رفضت بشدّة، فما كان منه إلا أن استسلم، وقال لي مغيراً الحديث:

- على فكرة، إنّي بتكتبي حلو وأسلوبك يشدّ، رغم إنك كاتبة كلام كلّ ضدّي تقريباً، فكونه شدّني علشان أكملّ للنهاية وأشوف آخره إيه.. يبقى فعلاً إنّي مميّزة!

ثمَّ كأنَّ ضوءاً شمسيّاً أشعل رأسه بالنور، فقال لي فجأةً وبصوتٍ
كله حماس: إيه رأيك مُمكن تكتبي كتاب عن مضمون رسايلك دي.
ثمَّ يستدرك: صحيح ليه مفكرتيش في الموضوع ده قبل كده،
وخاصةً الرسايل اللي كتبتها في الجون بصراحة، ما عدا بتاعة ماما
وبابا، مينفعش طبعاً تنتشر.

أنظر إليه وفيّ مفتوح مثل الذي رأى عفريتاً، وأقول:

- «يوسف»، إنت طبعي يا حبيبي، أصله عادي.. جو
المستشفيات مُمكن يخلينا عاتشفيين شوية، يووووسف مين يألف!
إنت بتسّف عليّا؟ ليه كده تقلب على الوش البلاستيك بسرعة،
م الوش العسل كان ملزق المكان وكنت فرحانة فرحة النملة!
وعموماً لو فكّرت أنشر الرسايل أول رسالة هتنتشر هي رسالتي
لمامتك، حماتي حياتي!

الغريب في الأمر إنه ابتسم كأني لم أذكر سيرة حماتي وتعامل
مع الكلام ببساطة، واستمرّ في مناقشة الرسائل بشكل أذهلني،
وجعلني أتفكّر هل زوجي أصيب بالفراغ أم رُفد من العمل، وقرّر
أن يبحث عن وظيفة فرأى أن يكون مدير أعمال أفضل من الغريب،
على اعتبار أنني وافقتُ أنشر غسيل، أعني تفكيري، فالرسائل
بعضٌ مني سطرته حروفاً!

وقال لي: هي الرسائل بتتقدي فيها الأشخاص، ولكن يا
«لبنى» مفيش حلول، الانتقاد والسخرية سهل، وضع الحلول هو
الجزء الأهم، وعلشان الموضوع يكون ناجح لازم العقدة وحلها!
فجأة أشعرُ بزهو وسعادة، وتعجبني طريقة تفكير زوجي، بيد
أني أردّ عليه عكس ما أشعرُ به وأقول له:

- «يوسف» أنا معنديش استعداد أقدم حلول، الناس هي اللي
لازم تشوف حلّ لعيوبها المعروضة بعدسات مكبرة، أنا حاولت
أوضح لهم حجم الأذى اللي بيتعرض له الناس من تصرّفاتهم،
ويمكن أحاول أقدم حلول بس أكيد مش دلوقت، أنا حاليًا هاحاول
أرّم حياتي! مش قادرة أفكر في حلول للناس ولو إن العيوب
واضحة، اللي أفدر عليهم همّا عيالي وبيتى وبس في الوقت الحالي.

لا يبدو عليه الاقتناع بكلامي، ولكنه لا يضغط عليّ، فهو يعلم
أنني لو أستطيع تنفيذ ما يفكر فيه لفعلت دون تأخير، بالإضافة
لرغبته في عدم تعريضي لمزيد من الضغوط، فيقول لي:

- اتفقنا، وعمومًا إن شاء الله أنا اللي هانشر لك رسايك دي
في كتاب هدية مني، أصل بصرحة عاجبني أسلوبك، ويظهر إن
تريقتك علينا طول الليل والنهار نمّت عندك ملكة الكتابة الساخرة.
ثم يقول كأنه تذكر شيئًا مهمًا: - صحيح لو اتنشر كتاب
هتسميه إيه؟

أستغرب سؤاله لكنني في الوقت نفسه أستشعرُ اهتمامه وحنانه، وهذا الشعورُ غمرني بسعادةٍ وأحاسيس لم أشعرُ بها من قبل، فهذه أوّل مرّة يهتمّ «يوسف» بي كإنسانٍ خارج منظومة الأسرة، فأنا كنت بالنسبة إليه مجرد أمّ، وزوجة فقط، أمّا اليوم فهو يتعامل معي على أساس أنني بشر، وهذا أعطاني ثقةً في نفسي، دعّمتني ورفعت من معنوياتي! أردُّ على سؤاله: غالباً هاسمّيه بوز البرّاد.

ثمّ طلبت من «يوسف» متوسّلة:

- عاززة أروّح من فضلك، ما دامت التحاليل والأشعّات كويسة، أرجع بيتي، مش قادرة، الولاد والبيت وحشوني. فوافقني على أن نسأل الطبيب، فنحن على حدّ قوله لن نستطيع المغادرة دون إذنه، فصبرتُ للصباح، وقلت لنفسي «أليس الصبحُ بقريب»، وقد بدأت أفقد السيطرة على إدراكي، وصوتي يذهب بعيداً بسبب أقراص المهدئات، نمت وأنا سعيدة أنني لن أقضي ليلةً أخرى بعيداً عن أولادي.

واستيقظتُ على قُبلةٍ حانية على جبيني، ففتحتُ عيني لأنظر من هو صاحب تلك القُبلة الرقيقة، فوجدتها إيمان! اعتدلت من رقدتي ثمّ جلست، وأحضرت هي وسادة ووضعتها خلف ظهري

وأحضرت لي الإيشارب الذي أضعه على رأسي تحسباً لدخول أيّ
غريب عليّ الحجرة، ثمّ قالت:

- صباح الخير يا هنّي، عاملة إيه يا ماي دير دلوقت؟

ابتسمُ وأقول لها:

- أنا بخير يا دير! يا أحنّ قلب في الدنيا، أنا تعبتكم معايا يا

إيمان قوي، إنّي فعلاً أخت غالية.

وقبل أن تردّ عليّ، دخل علينا الطبيب، فقد جاء مبكراً عن

المتوقّع، وسمح لي بالمغادرة، فكانت فرحتي لا تضاهيها فرحة،

فسوف أعود لأبنائي، وبيتي وحياتي مرّة أخرى، فقد وهبني

الله فرصة؛ بل وهبنا جميعاً فرصة لنراجع أنفسنا ونقيم كلّ

الأشياء المحيطة بنا، ويخرج الطبيب ومعه «يوسف»، فأبكي

من فرحتي، وأقول:

- الحمد لله يا ربّ.

وألثقتُ لإيمان قائلةً: أشكركم بجدّ، مش عارفة كنت هاعمل

إيه من غيركم!

فيظهر التأثير على وجهها وتقول لي: - متقوليش كده يا my dear

إحنا إخوات بجدّ.

أداعبها قائلةً: - تاني يا إيمان هنّي ودير وجرجير، النبيّ عربي

يا ستّ الكلّ، إيه حكاية العفريت خريج أوكسفورد ده اللي ماسك فيك! يا my love إنت!

تضحك حتى تظهر أضرأسها، وتقول:

- أنا بحبّ أعاكسك يا «لبنى» علشان بحبّ تعليقاتك، المهمّ يلا يا ستنا يلا حاجة علشان تلبسي ونخلص من المشواره، ورانا مصالح كثيرة! حلوكده، أهو جيت لك عفريت من حيّ شعبي، مناسب؟
أبتسم لردّة فعلها وأقول لها: - تعالي قرّبي جنبي.

فتأتي إليّ وهي مندهشة من رغبتني هذه، ثمّ أقوم باحتضانها، فتردّ هي العناق بحبّ وحنان، ثمّ تساعدني على ترك الفراش والذهاب للحمام لأرتدي ملابسني! وبعدها قامت هي و«يوسف» بترتيب حقيبتني الصغيرة، والتأكد أنّنا لم نترك شيئاً وخاصة الروشحات والأشعات، وبعد أن ارتديت ملابسني، جلست أتابع بهدوء ما تفعله إيمان، تلك السيدة الطيبة التي تحمل قلباً يحتمل الآخرين دون تذمر، فزوجها النسخة الرجالي من «سعاد» حبيبتني، ولكن مع بعض التعديلات التي تسمح لها بأن تتنفس، فهي «إيمان» تحتمل أمّها وتحتملني، وزوجي وأبنائي، وزوجة «بكر»، فكلنا نشاكسها ونستغلّ طيبتها، لكونها من أنقى الشخصيات التي من الممكن أن تقابلها في حياتك!

ورغم أنها لم تُنجب، فلم تكن يوماً متبرّمة أو مبدية شعوراً بالنقص أمام باقي أخواتها، بل العكس كانت ترى أنّ الله لم يرزقها أطفالاً لعلّمه أنّها لا طاقة لها على تربية الأبناء، وكنا للأسف أشراراً نستغلّ كونها ليس لديها أبناء، لتساعدنا جميعاً كلاً حسب احتياجه، وهي لا تقصر؛ بل تتفانى معنا، فهي بعد عودتها من عملها تقريباً متفرّغة للجميع، فزوجها يسافر كثيراً، وكانت، وما زالت تتقبّلنا بعيوننا وشغبننا، فقلّبها يسعُ الكلّ، فإيمان لا تعاتب ولا تلوم ولا تنتقدك، هي من وجهة نظري عكس شخصيتي؛ لذا أرتاح معها؛ فأنا لا أحتمل التعامل مع شخص مثلي، ولأوّل مرّة أجدني أنتبه إلى أنّه من الممكن عدم ارتياحي مع حماتي، إنّنا متماثلتان، وأظنّ أنّي قد أفعل ما تفعله بي حماتي في زوجتي «أدهم» و«رمضان» إلا إذا انتبهت لذلك، وابتعدت عن حياتهم، ليعيشوا بسلام، فأنا رغم كلّ شيء أرى أنّ برّ الوالدين لا يلغي أبداً حقوق الأزواج وبرّهم، أنتبه من تحليلاتي على صوت «يوسف» وهو يقول لي:

- إحنّا خلاص جاهزين، ودفعت الفلوس وعملت تشك أوت، إنتِ تلعبى أكروبات وأنا أدفع فلوس، مش كنا بالفلوس دي يا «لبنى» سافرنا الغردقة أو شرم الشيخ، نستعيد ذكريات شهر العسل.

ثمَّ يبتسم بحبورٍ ويُردِّفُ: فآكره!
أنظر له غير مصدقة أنه مازال يذكر شرم الشيخ رغم ما فعله
فيها وأقول له:

- فآكر أنت! «يوسف» إنت بتفتخ على نفسك فتوحة ليه؟ شرم
الشيخ إيه يا حاج؟! بتسم إيمان وتتساءل: ما لها شرم يا هني، دي
مكان يونيك! أنا بحب أروحها كثير.

ابتسم «يوسف» وقال مرتبگًا: - يلاً يا «لبنى» علشان نزل.
فقلت لها: أبوا هي فعلاً جميلة، بس مش هننزل إلا لما أخلي إيمان
تقرأ اللي كتبتة عن شرم وجمالها، هات لو سمحت الدفتر. وفتحت
الصفحة التي كتبت فيها ذكريات شرم الشيخ، وقتلتها:

اقرئي يا إيمان!

فبدأت تقرأ بصوت مرتفع:

أسبوع شرم الشيخ..

ذهبنا لقضاء أسبوع العسل في شرم الشيخ، وبالطبع لم تكن
سيارة المنتجع في انتظارنا، نظرًا لأننا لم نساfer في يوم الحجز، فوقفنا
في المطار فترةً إلى أن أقلتنا سيارة ميكروباص للمنتجع، وما أن
وصلنا إليه حتى عمرني شعورٌ بالانتعاش وتسللت إلى أنفي رائحة
البحر، وداعبَ وجهي شعاعُ الشمس الدافئ، فقد كان الطقس أكثر

من رائع، وسبحان الله! كان الجو في النهار صيفياً، وفي الليل شتوياً!
جلست في بهو الفندق الخاص بالمنتجع في انتظار «يوسف»
الذي كان يقوم بتسجيل الدخول، فأخذت أجول ببصري في
المكان، فرأيت المباني عبارة عن تحفة فنية من النقوش والحفر
الأندلسي الإسلامي الرائع، والأثاث وثيرٌ ومريح، والخضرة في
كلّ مكان وتوجد في الأسقف فتحات، وأيضاً الحوائط تُدخِلُ نور
الشمس دون حرارتها، وبعد قليلٍ شعرت أن «يوسف» قد تأخر
في تسجيل الدخول (كأنّه يقوم بعمل فيش وتشبيه)! فقامت من
مقعدي واقتربتُ منه، وقلت له:

- «يوسف»، هو أنتَ مش هتعرّفهم إننا عرسان جداد، علشان
يهتمّوا بينا وكدا!

صحاباتي قالوا لي لما بيعرفوا إننا في ال Honey MOON بيحتفلوا؛
ورد وحركات لطيفة قوي.... نظرت لي باستغرابٍ ثمّ قال:

- إيه الهيافات وقلة القيمة دي! اكبري يا «لبنى»، يعني إيه أقول
إننا عرسان في شهر العسل!

اقتربتُ منه ونظرتُ في عينيه وجدته يتكلّم بجديّة شديدة،
فقلت له:

- «يوسف»، على فكرة معلومة بسّ، أنا أوّل مرّة أروح شهر

عسل لأنّي أول مرّة أتجوّز، وبيتهياً لي برضو من المعلومات اللي عندي
إنك زبي متجوّزتش قبل كده، ليه بتتعامل معايا على إنّي مطلّقة
واللا أرملة متجوّزها من خمستلاف سنة وجاي تفسّحها؟! مش
شهر عسل ده!

لم يردّ عليّ وكأني هواء صفر بجوار أذنه، وكانت تلك هي
أول مرّة أشعر فيها بغصّة في حلقي وقبضة في صدري منه، فكونه
لا يجب أن يخبر الفندق لأنّه يرى الأمر تافهاً من وجهة نظره، هو
منتهى الإهانة لي، ولأنّ الأمر من وجهة نظري يستحقّ فحزنت
بشدة، وأسرت الموقف في نفسي، فأنا عروسة، تزوّجته بعد رفض
الكثير، وبعد ظنّها أنّ هذا هو الفتى المتيم الذي سيحقّق لها أحلامها،
 ويفتخر بزواجه منها (مش يقول هيافة وقلة قيمة)؟!

ذهبنا إلى غرفتنا، وكان ملحقاً بها غرفةً أخرى وضعنا فيها
الحقائب، وقرّر «يوسف» أن ينام قليلاً، أمّا أنا فقرّرت أن أذهب
إلى الغرفة الأخرى لأفرغ محتويات الحقائب، فوجدت بين الحقائب
حقيبةً غريبة لم أقم بترتيبها، أو حتى وضعها مع حقائبنا، وعندما
فتحتها، كدتُ أصرخ، ما هذا الذي يملؤها؟! ما هذا! لقد قمنا
بأخذ حقيبة ركبٍ آخر! فذهبت إلى «يوسف» أوقظه:

- «يوسف»، اصحى.. اصحى، في شنطة مش بتاعتنا وأنا

برتب الشنط لقيتها، قوم كلم إدارة الفندق، أحسن يكون صاحبها هيتجنن عليها، غالباً صاحبها بقال أو مندوب سوبر ماركت، قوم أحسن أكيد الرجل هيتجنن على البضاعة بتاعته.

رفع رأسه، ثم أشار إلى أن أرحل بعيداً عنه، فقلت له:

- «يوسف»، قوم صحصح ضروري.

ثم جذبت الغطاء فجلس غاضباً، وقال:

- إيه يا «لبنى».. بتصحيني ليه، حرام عليك، أنا يادوب عيني شبكت. قلت له ساخرة:

- يادوب عينك شبكت، هو انت أصلًا كنت سايق الطيارة ومجهد، ما الساعة إلا ربع اللي قعدناهم في الطيارة إنت نمتهم، والرّبع ساعة من المطار لهنّا نمتهم، إيه.. إنت قرصتك ذبابة التسي تسي يا أخي؟! قوم، في شنطة مش بتاعتنا لقيتها وسط الشنط.

فهرش رأسه ثم تئاب وقال: - فتحتها؟

فقلت له: - أيوا، ما أنا قلت لك شكلها بتاعة بقال، فيها علب

تونة وجبنة مثلثات، وعسل ومربات وحلاوة، ده ميني ماركت!

تفتكر صاحبها بيتاجر في البقالة!

سحب نفسه تحت الغطاء وقال برود:

- دي شنطة الأكل بتاعتنا، بس طلعي الحلاوة أحسن يبجي

لها نمل.

نظرتُ إليه برهة، وأنا أريد أن أستوعبَ ما يقوله، فقلت له:
- يا حلاوة! إيه يا «يوسف» ده؟! إحنا هنعيش على البقالة
والنّواشف؟! إنت من أولها هتخلّيني أربط الحزام! وطبعًا غلاية
المية، والشاي والعيش، بمناسبة إننا هنعمل كامبنج في الصّحرا....
لم يردّ عليّ، وأكمل نومَه.

تركتهُ وذهبت لغرفة الأغذية والمشروبات؛ أقصد للغرفة التي
بها الحقائب، فقامتُ بعمل شطيرة من الجُبْن وكوبٍ من النسكافية،
فقد كنت جائعة وأعاني من الصداع، جلست أمام التلفاز أُقلِّبُ في
قنواته، فشعرتُ بالضيق والزّهق فلم يكن به سوى قنوات إيطالية
أو فرنسية، وأسقطُ في يدي، وقلت لنفسي:

- شهر عسل إيه ده يا خايبة! ما كنتِ قعدتِ في بيتك معززة
مكرّمة؟!

ثمّ قامتُ وارتديت ملابسِي، وجلست في شرفة الحجرة أشاهد
النّاس وهي تستمتع بالجوّ وتمارس كلّ أنواع التّرفيه المتاحة، وأنا
أمارس المشاهدة الإجماريّة؛ لأنّ زوجي يمارس هواية النوم التي
اكتشفتُ بعد الزواج أنه يدمئها، ثمّ نظرتُ إلى البحر الممتدّ أمامي
بزرقته الرّائعة؛ تلك الزرقة التي لم أرها في شواطئ الإسكندرية أو
السّاحل الشمالي، وسرحت بناظري فيه، ثمّ اعتراني شعورٌ خبيث

ورغبةً لئيمة، تمنيت أن يكون هناك في هذا البحر قرشٌ صغير جائع يخرج منه ويأكل «يوسف» وأرتاح منه، هذا هو «يوسف»، زوجي العزيز، روقان وحلاوة، والحلاوة الحمد لله مجاش عليها نمل!
وبمجرد ما أغلقت إيمان الدفتر، حتى انفجرت ضاحكة وقالت:
- «يوسف» يا دارلنج، إيه ده! إنت كنت فيلن قوي وشرير، ليه كده يا هنني، دي «لبنى» سو سو كيوت! بصراحة إنت أوفر قوي، وانت يا لبنى يا هنني استحملت كده ازاي!
ينظرُ إليها «يوسف» وقد احتقن وجهه خجلاً، ثم قال لي:
ههههه إيه الصّفحة دي، أنا مشفتهاش، إيه يا لبنى الافترا بتاعك ده، والله أنا ورّيتك هناك سعادة وهناوة محدش شافها!
أبتسم وأقول له: - يمكن كانت مكتوبة بحبر سري؟! بيتهيّالي إنت قريت بسرعة.
وحتى أمنع عنه مزيداً من الحرج قلت له:
- عموماً لو سافرت شرم الشيخ تاني هتكون بطقوس تانية، وياريت بلاش ذكريات بقى عن أيام الخطوبة والجواز علشان كانت أيام سعيدة جدّاً! ويلاً بينا ننزل علشان العيال وحشوني.
قام بمساعدتي على الوقوف، فلقد كنت أعاني وهنأ شديداً؛ ربّما من فرط تناول الأدوية في الفترة السابقة، أو لرقدي مدة طويلة عن المعتاد بالنسبة لي.

غادرنا المشفى إلى البيت، وفي الطريق انتابني شعورٌ غريبٌ أنّ الحياة قد اختلفت، وأنني أرى الدنيا بعيون لم تختبر الأمل ولا المعاناة، كأني طفلة مولودة من جديد؛ فأنت عندما تشعر أنك قد اقتربت من الموت - حتى ولو كان تهيؤات - ستكتشف أنّ هناك أشياء كثيرة داخلك قد تغيرت؛ فأنت تثنّ ما أضعته من فرصٍ نادرة جاءت لك ورفضت استغلالها، وأنك قد منحت عودة للحياة، وستكون هناك فرصة جديدة لتتدارك ما فاتك، وستتمكّن من إصلاح ما سبق وخرّبته برعونتك وطيشك، ونزق طول الأمد الذي تظنّ أنك تملكه. أقلّتنا السيارة باتجاه منزل إيمان التي بمجرد ما رأته أننا في اتجاه بيتها حتى شجبت الفكرة، وأصرّرت على الذهاب إلى بيتي، ورفضت تمامًا الانصياع لرغبتني بأن تعود لبيتها، وسبحان الله! لم يزعجني إصرارها هذا، (يمكن لو كانت سعيدة كنت فضلت في المستشفى أحسنلي) ونزولاً على رغبتها غيرنا اتجاهنا وسلكننا طريق بيتنا، وكانت الطرق شبه خالية، فالיום هو السبت إجازة في أماكن كثيرة، وقد قام زوجي بقيادة السيارة كعادته ببطء شديد؛ لقد كنت دائماً أذمّر من طريقة قيادته؛ لأنني عادةً على عجلةٍ من أمري وهو لا يكثرث للوقت، بيد أنّ هذه المرة كان الوضع مختلفاً، لم تضايقني قيادته الهادئة؛ لأنه قد أتاحت لي الفرصة لمشاهدة

الشوارع والبيوت والمحال التجارية بتمعّن واستمتاع، لا أحصل عليه في الغالب عندما أقود السيارة بنفسي، فعندما تقوم بالقيادة يكون كلّ تركيزك على كيفية الوصول للمكان الذي تريده دون خسائر، لا في الوقت ولا في الأشياء؛ لذلك قد يفوتك الكثير من جمال ومعالم الأماكن التي تمرّ بها أو تقصدها، ولا تستشعر حلاوتها إلا إذا سلّمت المقود لغيرك.

لا أدري لماذا استدعيّت تلك الفكرة عن قيادة السيارة؛ (فكرة أنّك إذا ظللت ممسكًا بمقود الحياة طوال الوقت ستفقد المتعة، ولن ترى الأشياء الجميلة فيها، ولن تحصل أيضًا على ذكريات، لتسترجعها عندما تتوقّف الحركة والحياة من حولك؛ ذلك لأنّك كنت مشغولًا بعلامات الطريق ولم تعرّ معاملة اهتمامك)!

يا الله! لقد اكتشفت الآن فقط كم كنتُ حمقاء لأجلس خلف المقود طوال الوقت، ولم أمنح نفسي فرصة لأهدأ، أو حتى استراحة محارب!

لفصل لربع عشر صفحة جديدة

وقفتِ السيارةُ أمامَ المنزل، وانتظرتُ لحظاتٍ قبل أن أترجّل منها، ثمّ لحقتني إيمان وأمسكتُ بيدي، ثمّ استندنا إلى السيارة، وقام «يوسف» بإخراج الشنط من حقيبة السيارة ووضعها على الرّصيف وهو يتلفّتُ بحثًا عن الحارس، ثمّ نادى عليه فلم يستجب لندائه، فقلتُ له:

- رِيح نفسك، ده العادي بتاعه يا «يوسف».. مش هتلاقي حدّ منهم! أكيد في مشاوير فيها أكل عيش زيّ ما بيقولّي، أو بيلفّ على عمارات علشان شغلته الأصليّة السّمسة.
يضحكُ «يوسف» معلقًا على كلامي:

- تعرفي والله أنا كنت مراهن نفسي وقلت يا واد يا «يوسف» والله مراتك لا يمكن تتغيّر وتبطلّ سخرية، دي تُمكن تبطلّ أكل أو تبطلّ نوم، لكن لا يمكن تبطلّ سفّ على خلق الله، الرّاجل أكيد راح يجيب طلبات، الرّحمة حلوة!
أردُّ عليه بهدوء، وأقول له:

- نفسي أعرف بتدافع عنه ليه؟ ده انتم لو عاملين سوا تشكيل عصاي مش هتدافع عنه كده، بتدافع عن الرّاجل المفترى ده ليه يا «يوسف»! ده ظالم مراته بشكل مخلّيني نفسي أقعد معاها أنصحها وأفهمها حقوقها، علشان يبطل استبداد.

يصرخُ بهلع:

- أبوس إيدك سيبي الستّ تعيش، هي معندهاش مشكلة في حياتها، لو صعبانة عليك، طبطي عليها هتفرح، إديها فلوس هتبقّي حبيبتها وكفاءة، «لبنى» بلاش مشاكل، إنتِ لسه راجعة تعبانة، وفري طاقتك لعيالك وبيتك.
تتدخّل إيمان قائلةً:

- صحيح يا dear ليه بتوجعي راسك الجميل بـ people دول؟! يا «لبنى» روّقي يا هني، إنتِ لسه خارجة من الهوسبتل ومجهدة، take care بنفسك يا روحي، دونت ووري.. أكيد الجارد بتاع العمارة بتاعتكم في مشوار.

أنظرُ في أنّجاهها وأقول لها:

- يا خبر يا إيمان، أنا نسيت من سكوتك إنك موجودة! يا بنتي مفيش حدّ محترف سكوت زيّك، والله إنتِ بتسكتي ازاي! إزاي.. ده انتِ بنت سعاد، أقصد طنط سعاد.

ثم أقول لها وأمنحها ابتساماً جزلة: برضوا بترطني، مان إيه
وبيول إيه يا ستّ الكلّ، تصدّقي إنّ حبّيتي.
يقهقه «يوسف» ويقول لي:

- طيّب وصلة الغزل دي حوشي منها شويّة لسعاد؛ أقصد لماما،
يخرّب عقلك، هاغلط مرّة وأقول لها سعاد!! ادخلي بشويش إنّ
وإيهان وأنا هاتصرّف، واللّا أقولك خليك سائدة على العربية أنا
هارجع لكم.

ياخذ «يوسف» الحقيبة والشنط البلاستيكية ويضعهم في مدخل
العمارة، ثمّ يعود ليسندني، فهو يعلم مدى حالة الضّعف والوهن
التي أعاني منها رغم رفضي الاعتراف بذلك، وفي تلك اللحظة
التي عاد لي فيها «يوسف»، لمحتني «هنية» وهي تسقي الزرع الذي
يكسو جدار الشرفة والسور الحديدي، ذلك الزرع الذي كانت
ترفض سقيه في هذا التوقيت، وتقتلني جدالاً في دورات السقيا
ومواعيدها، وكنت أطلب منها بعد أن يفيض بي الكيل من كثرة
جداها وشغبتها أن تتركه لي وسأقوم بريّه بنفسي لأوفرّ على قلبي
مزيداً من المناهدة! ثمّ يا للعجب! ها هي تراعيه في غيابي وتهتمّ به!
«هنية» تلك الصغيرة المشاغبة، يا الله كم كنت أفتقدها! وبمجرد
أن تلاقت نظرانا قفزت كأتمّها قطعة صغيرة تحاول الوصول لسور

الشّرفة، وأشعلت البناية بالزّغاريد والصراخ، وقالت وهي تتدلّى
حتى كادت تسقط:

- حمدالله على السّلامة يا حاجّة، أجصد يا مدام، كفارة! يوو
أجصد يعني نورّ بيتك ومطرحك، ألف سلامة.

ثمّ تنادي على «بنت» قائلة: يا «بنت».. يا «بوسي»، أمك
أجصد مامتك وصلت.

وظلّت على هذه الحالة، ما بين الصّراخ والضّحك حتى ظننتُ
أنّها قد أصيبت بلوثة! فشاورت لها أن تتوقّف، فصوتها وصرأُها
جعل الجيران يتوافدون على الشّرفات ليروا ماذا يحدث؛ ذلك لأننا
نقطنُ في حيّ لا تحدث فيه جلبة إلاّ بمطاردة اللّصوص أو القبض
عليهم، غير ذلك صمتٌ وكأنّنا نعيش في السحاب!

ورغم إشارتي لها أن تتوقّف وأن تهدأ، فإنّها لم تُعرِ إشاراتي
اهتماماً، وطفقت تغني، نصرّة جوّية وفرحة وألف سلامة، كأنّها
تحتفل بخروج سجين من اللّيمان، ثمّ تنادي على «بوسي» وتعود
للغناء (يالّي على الترعة حوّد عاملح)، وعندما وجدتنا نقرب من
مدخل العمارة تركت الشّرفة واختفت!

سلّمت أمري لله ولم أحاول معها ثانية ثمّ دخلنا العمارة،
فنزلت مسرعة تطوي الدّرج طيّاً، استقبلتني بالقبّلات والأحضان،

فضممتها لصدري وربت على رأسها، فأنا أعلم صدق مشاعرها،
فيتمها جعلها ضعيفة، خاصة أنها لم تر أباه، وقد كانت حياتها خالية
من الأب بوفاته، والأم بزواجها، وتركها عند أخوالها وجدتها؛ لذا
أشعر أنها ابنتي الرابعة مكرّر بعد «يوسف»، فكلاهما ابناي بالتبني!
أدفعها بعيداً عني برفق، وأستلم «بوسي» التي تقرصها في
ذراعها حتى تبعد عني، وما أن تعانقني حتى تقول:

- ماما حبيبتني لحتك أئجخانة، هو حضلتك كنت عايشة هناك؟
أعمرها بالقبلات وأحتضنها، حتى كادت ضلوعها تتداخل،
ثم قلت لها:

- حضرت مرة واحدة! لا يا ستي ريحتي مش أجزخانة، ريحتي
مستشفى! وحضرتي ممكن تعيش هناك وتسيبكم لو مبطلتوش شقاوة.
هنا تتدخل «هنية» وتقول:

- ما بس بقى يا ست «بوسي»، المدام تعبانة مش ناجصها
رغيك ده، إنزلي من على ذراعها، إنت مش شايفها مفررة زي
الفرخة المدبوحة اللي بتتخبط في الحيطان، إنزلي بلاش تضاييها.
تركني لتجري خلف «هنية» التي تصعد الدرج بمجرد ما تلمح نية
«بست» في ملاحقتها، فتلاحقها تقول لها:

- يا «هنية» يا ثفته، إنت مالك ومال مامتي؟!!

والأخرى تشوح لها بيدها فيما معناه (أتلهي)! كل هذه الجلبة
والعراك، وإيمان و«يوسف» يقفان مُبتسمين ويتابعان المشهد دون
تدخل، إلا عندما قال «يوسف» لـ«هنية»:
- بسّ بطلي دوشة وإنزلي خدي الشنطة والأكياس، يلاً بسرعة.
فتعود أدراجها متخبطيةً «بوسي» حتى لا تضربها.

لم أفطنُ لغياب «أدهم» و«رمضان» بسبب البنات، فما فعلته
الفتيات شغلني عن السؤال عنها، ولكن بمجرد وصولنا بالمصعد
إلى طابقنا حتى فقدت الرؤيا من جرّاء انهيار الألعاب الخاصة
بالاحتفالات، تلك التي كانت دوماً تزعجني، وأصبحت في لحظاتٍ
مثل الشبح الأبيض المخيف، لقد احتفل «أدهم» و«رمضان» بعودتي
على طريقتهم الخاصة، تلك الطريقة التي دأبتُ على رفضها، بيد أن
هذه المرّة استقبلتها بترحابٍ وسعادة، قبلاًني ثم أفسح لي الطريق
حتى أدخل.. هذا الاستقبال جعلني أندھش، فأنا طوال الوقت أظنّ
أنني بالنسبة لهم كابوساً يطاردهم أيقاظاً ورقوداً! أمّا هذا الاستقبال،
فقد عني لي الكثير، ومنحني طاقاتٍ إيجابيةً رهيبية!

وما أن خطوتُ بقدمي داخل البيت، حتى رأيتُ أمي تقف
مستندةً بيديها إلى المنضدة في البهو، فذهبتُ إليها واحتضنتها، ثم

أخذتها وجلستُ بجوارها وقد التصقتُ بها تمامًا، فقالت هامسة:
- وحشتيني ووحشني جنانك، البيت من غيرك صعب، الحمد لله
يا حبيبي إنك بخير يا قلبي. ثم تمسح دموعها وتحتضني، وتقول لي:
- متصوِّريش فرحتي برجوعك قد إيه، عملتلك كل الأكل
اللي بتحبييه، والولاد ما شاء الله كانوا هادين، حتى «هنية» و«بوسي»
كان بينهم هدنة غير مُعلنة، بس للأسف كسروها دلوقت!.

أضع رأسي على صدرها، وأقول لها:
- ربنا ميحرمنيش منك يا ماما، يا ست الكل، بيتنا نور
بوجودك، لو بس تيجي تعيشي معايا بدل ما انت عايشة وحدك.
تضحك وتقول:

- لا.. خلاص معدش عندي دماغ للمورستان بتاعك، أنا
كبرت على كده، ربنا يقويك.. ثم تُردفُ قائلةً:

- شايفة يا «لبنى» النعمة اللي انت فيها! شايفة الحب، يا رب
تكوني استوعبتِ الدرس، واتخلصتِ من عقدة الاضطهاد اللي
ملازماك طول عمرك، رغم إنني كنت دايمًا أقولك والله كل اللي
بتشتكي منه خيال ووهم، المهم ابدئي صفحة جديدة معايم كلهم،
وأولهم حماتك.

أبتسم وأظلم واضعة رأسي على صدرها أستشعرُ دفء حضنها

ولا أنبس بنت شفة، فحضن أمي هو الأمان؛ ففي وجودها أنا صغيرة وبدونها الحياة باردةٌ مُحيفة، ورغم مشاكستي الدائمة، فهي كانت - وما زالت - بوصلة الحق في حياتي.

أرفع رأسي لأجد «هنية» تقف مبتسمةً وتهز رأسها بسعادة، أبادلها الابتسامة، وفجأة تختفي من أمامي؛ لأن «بوسي» نادى عليها لتحضر لها شيئاً.

بعد التفكير في حديث أمي معي، قررت أن أبدأ صفحة جديدة مع الكل، داعية الله أن يمنحني القدرة على الصمود والتغير، فأنا مُنحتُ بفضل الله فرصةً جديدةً للحياة، ومُنحتُ رؤيةَ الأشياء بشكلٍ مُختلف، وما زالت رغم ذلك، «لبنى» الإنسان نفسه، لم تتغير، نعم نظرتي لكل شيء اختلفت، لكن التطبيق سيأخذ مني وقتاً، فالصبرُ والهدوءُ صفتان يصعب عليّ الاتصاف بهما، ولكنني سأتعلم، لم أحب حياتي السابقة، ويجب أن أحب القادمة، ولن يحدث هذا إلا إذا تغيرت!

بعد عودتي بيومين كنت أجلسُ أنا و«يوسف» في حجرة المعيشة نشاهد بعض البرامج، وفجأة اقترحتُ عليه فكرة هو دائماً متبنيها، فكرة الصفحة الجديدة، فقال لي:

- يا ما قلت لك يا «لبنى» نفتح صفحة جديدة وإنت تقولي
الكتاب خلاص انقطع كله، أهو يا ستي علشان خاطر ك هنشترى
كتاب جديد!
أقاطعة قائله:

- بصّ يا «يوسف» لو هنبداً نعاير بعض إنت عارف، أنا في
دقيقة أحوّل وابقى «لبنى» أم الخلول، فبلاش موضوع المعايير ده
هو والرّخامة، وفي تلك اللحظة الحرجة التي أحاول أن أضع فيها
النقاط على الحروف، تأتي «هنية» مسرعةً وتقول لي:

- يا مدام.. الست أم رجب الطباخة اللي بعنتها مامة حضرتك،
عاوزاك ومستعجلة.. ومش عارفة ليه مستعجلة، هي الدنيا
هتطير! ثم تهرش رأسها، وتقول:

- صحيح يا مدام، هي مامة حضرتك جابت لك طبّاخة ليه،
مكنتي علّمتيني الطبخ وزوّدت مرتبي، أو ممكن يعني بدل ما
تزوّديه تجيبلي ذهب وصيغة أو آخذ دورارات.
أقول لها:

- وليه ذهب ودورارات يا فصيحة؟!

تنظر لي بذهول وتقول:

- هي وصلت لفصيحة يا مدام، ليه كده؟ دا الواحدة منّا عايشة

بشر فيها، أنا عمري ما عملت حاجة غلط، والله أنا بصليّ ومش بعمل
أي حاجة تغضب ربنا! ليه كده؟!

أنظرُ إلى «يوسف» الذي لم ينس بنت شفة، وجلس يتابع
باستمتاعٍ بادٍ على ملاحه ثم أقول لها:

- فضيحة إيه وشرف مين يا طرشة يا مُصيبة، أنا جيت جنبك؟!
بقولك فضيحة فضيحة، يعني بتعرفي تتكلمي كويس وشاطرة... ثم
أعيد السؤال:

- مقولتيش ليه ذهب ودولارات؟

تبسم في زهو وتقول:

- أيوا أنا فعلاً بحسّ إنّي فظيعة زيّ ما حضرتك ما بتجولي،
طيب يا مدام هاجولك، أصلي سمعت إنّ الذهب والدورارات مش
بيخسوا زيّ الفلوس.

ثمّ بمنتهى البراءة تسألني: هو الكلام ده صحيح؟ واللا
بيجذبوا علينا علشان ياخدوا فلوسنا؟! ههدوء أقول لها:

- الكلام صحيح، بسّ أنا بدفع بالمصري عاجبك واللا لأ؟
تقول بجديّة:

- طيب غيريلي المصري دورارات، أو اشتريلي بيهم ذهب.
أنهرّها بصوتٍ حادّ:

- إيبيبيه، إنتِ فاكراي شركة استشارية، واللّا شركة توظيف
أموال؟! امشي، امشي، أنا مش ناقصني توتّر، دهب إيه وفصّة إيه!
إنتِ مجنونة، يا بنتي هتسليّني، ابعدي عني يا «هنية».
نظّر إليّ بتمعن، ثمّ بمنتهى البرود تقول:

- يا مدام إحنّا جولنا إيه؟! مش جولنا مش هتتفرزي وهتفتحي
صفحة جديدة؟! مش لسه حضرتك بتجولي الكلام داهوه للأستاذ
«يوسف»!؟

فجأة أجدُ «يوسف» ينحني وقد كاد يسقطُ أرضاً، فلم يستطع
أن يتحمّل كلام «هنية» وقال لي:

- هاسألك مرّة تانية، إنتِ عايشة مع المخلوقة دي إزّاي؟! دي
اختراع يا «لبنى»!

تستفهم «هنية» وتقول لـ«يوسف»:

- أيوا مين يا أستاذ «يوسف»؟ تجصد أمّ رجب الطّبّاخة، صحّ؟
والله يا أستاذ «يوسف» أنا جلت للمدام ملهاش لازمة، وأنا أطبخ
وأعمل كلّ حاجة، أصل الستّ دي بتيجي تدوّخني وتطلب منّي
طلبات بزّهج منها والله، يعني هتبجي هي وعيالكم؟ الرّحمة حلوة!
صحّ يا مدام؟ واللّا انتِ لكي رأي تاني!

أخبأ وجهي بيدي كأني مصابة بصداع؛ حتى لا ترى ابتسامتي،

وأقول لها من بين يدي: - امشي قولي لأُمّ رجب أنا جايّة لها، وبعدين
روحي اسقي الزّرع ولّي الغسيل، ومدخليش علينا إلاّ لما تجبّطي،
قلت لك ميت مرّة الموضوع ده.

تقترب منّي وتقول:

- أخبّط أزاّي والباب مفتوح! وحضراتكم جاعدين جدّامي
وشايفاكم وسمعاكم، دا صوتكم جايب لآخر الشجّة، وعلى فكرة
يا مدام لما تحبّوا تتوشوشوا ابجوا اجفلوا الباب عليكم.
لم أملك نفسي، فقمّتُ من مكاني ثمّ جذبتها من يدها وأخرجتها
إلى خارج الحجرّة، وقلت لها:

- روحي جهّزي هدومك، هتروّحي البلد حالاً يا «هنية»،
وهاّتصل بطلعت يوصلك؛ علشان أنا تعبت منك، لأنك مش
بتسمعي الكلام، وفعلاً خلاص انا جيت أخري منك
تصرخُ وتدقّ بقدميها وتقول:

- بلاش البلد يا مدام والله هبجا كويسة، بلاش صفحات
جديدة، إنّ كويسة خليك بالكتاب الجديد، يا مدام أنا مش عاوزه
أرجع البلد، أنا بحبّكم وبحبّ عيشتكم!

أغلق الباب خلفي، وينفجرُ كلانا في الضحك، ولكنّي أحرص
على ألاّ تسمعي «هنية» حتى لا تتمادى، فيمسح «يوسف» دموعه

ويقول لي بصوت مرتفع:

- مش ؤمكن يا «لبنى» البنْت دي ميح خالص، دي محتاجة تتعلّم أزاى تتكلّم وتتعامل مع البشر! إيه رأيك نبعثها لماما يومين في الأسبوع لغاية ما تظبطها لك!

أسمع صوتها من خارج الحجرة وهي تقول:

- يا مدام «لبنى» أنا جاهزة أروح البلد، يا أستاذ «يوسف»

بلاش الستّ سعاد!

أقربُ من «يوسف» وأهمسُ له حتى لا تسمعني:

- شفت .. حتى «هنية» المهبولة مش عاوزة تروح لمامي سعاد!

أنهي حديثي مع «يوسف» قائلة: كده تمام على البركة، هنفتح

صفحة جديدة!

أذهبُ لأمّ رجب فأجدها تصرخُ في «هنية» قائلةً: - إنتِ يابِتّ

رحتِ فين، جهّزي الليّ قلتك عليه.

وعندما تراني تغير من صوتها، وتقول:

أهلاً يا مدام، إيه أخبارنا؟ هنطبخ إيه الأسبوع ده؟

فأردُّ عليها بحزم:

- يا أمّ رجب ما أنا قلتك امبارح، علشان تجيبي الحاجة معاك.

...ثمّ شرحت لها المطلوب، ووجدتُ «هنية» تقف ووجهها عليه
علامات القلق، فقلت لها:

- متخافيش مش هتسافري، بسّ بطلي دوشة.. انا فعلا مش
مستحمة قرف!

ضحكت وبصوتٍ عالٍ وقالت:

- ولا هاروح للسّ سعاد؟ ثمّ رقصت وقالت:

- من النهارده مفيش خوف تاني، من النهارده مفيش رعب تاني.
قلت لها:

- ليه يا ستّ الثورجيّة؟! كلّ ده علشان مش هتروحي البلد؟!
قالت بثقة:

- لا كلّ ده علشان مفيش ذلّ تاني، مفيش جهر تاني، مفيش
مدام سعاد.. ثمّ تستدرك كأبّها تذكّرت شيئاً:

- على فكرة يا مدام، مش لازم أروح عند مدام سعاد علشان
أعرف إن العيشة هناك هتكون مجرقة وبطّاله وعفشة، يعني الخمس
دجايج الليّ بيتجي فيهم البيت هنا، كلّ بيت رعب، وحضرتك يا مدام
وشكّ بيتجلب وبييجا عامل زيّ كيس المخدة المكرمش، جال
أروح جال! يا روح ما بعدك روح، دا عشرتكم إنتم الخواجات،
وحضرتك يعني حتى جابل الصّفحة الجديدة أرحم بكتير! يا مدام

أنا نفسي من جيوه مليانة وحاطة في جلبي وساكتة وأجول اللي
بتعملوا الستّ سعاد معايا ده ولا حاجة، دي بتمرّط حضرتك
يعني وانتِ مرات ابنها!!
أقول لها ساخرة:

- هو انتِ خلّيتِ فيها حضرتك، عموماً اسكتي خالص،
مسمعش صوتك، مامي سعاد ستّ زيّ الفلّ.

تقترب منّي، وبخبث تقول:
- صحّ، أيون هي كده شكلها الصّفحة الجديدة اتفتحت، يحيا
العدل.

ثمّ تهّمّ بالابتعاد عنيّ، فأقول لها:
- تعالي عاوزه أعرف منك حاجة قبل ما تمشي!
تلفّت بقلق وتقول:
- في إيه رجعتِ في كلامك تاني؟! هو ده اتّفاجنا يا مدام!
أطمئنّها وأقول لها:

- لا مش هترجعي البلد، ده موضوع تاني موضوع يخصّ
الأسطى طلعت، هو من فترة كان متضايق منك، وطول الوقت اللي
فات مبيصّش في وشك، وأنا نسيت أسألك، إنتِ عملتِ إيه في
الرّاجل الطيب؟ وكلّ ما آجي أسألك أتلبخ وأنسى.

تنظرُ إلى الأرض ولا ترفع رأسها وتقول:

- خلاف في النظر بينا وراح لحاله.. ثم تُردِف:

- يعني يا مدام، ما حضرتك والستّ سعاد على طول عندكم

خلاف في النظر، وعادي يعني!

أدفعها بهدوءٍ بعيداً عن المطبخ، وأدخل معها إلى الشّرفة، وأقول لها:

- خلاف في النظر! تقصدي مُختلفين في وجهة النظر، اللي هيّه

إيه؟ وطلعت بينك وبينه خلاف إزاي؟

تصرخ وتقول:

- أيوا هي دي يا مدام أصلي بسمعها كتير مع الستّ المذيعه دي

اللي اسمها أليس الحميدي، إنتِ عارفها، اللي جوزها أجرع كده

وصوته عالي، أهي أنيس دي، ولا أليس، دايمًا تجول خلاف أجصد

الاختلاف ده..

أنفجرُ في الضّحك من فصاحتها المرعبة، فلو سمعت لميس

الحديدي اسمها ينطق بهذا الشّكل لاعتزلت الإعلام! أتوقّف عن

الضحك و«هنية» تنظر إليّ باستغراب، ثمّ أقول لها:

- أيوا يا «هنية» إيه بقى اللي حصل؟!

تفركُ أنفها، وتفركُ يديها وتقول:

- الحجيجه يا مدام أنا طلبت منه إنه يعلمني السّواجة وأنا

أساعده، يعني أعمل مشاوير لكم، ويديني حاجة من مرتبته، مأهو الواحد لازم يفكر ويشغل دماغه علشان يزود دخله، أنا سمعتهم بيحولوا كده برضك في فيلم للأستاذ عادل إمام!

وبعدين هو عمّ طلعت هيخس عليه إيه لما يعلمني السّواجة، مأهو طول النهار جاعد في العربية ميعملش حاجة، طيب يعلمني علشان أفصح الستّ «بوسي» وجدّ حضرتك،

بس مرضيش برضيك وجليّ يا مجنونة إبعدي عني، وهددني إنه يروّحني البلد، فأنا جلت له ربنا الرّزّاج، وهاخليّ أيّ حدّ يعلمني، ووجتها هاسوج عربية حضرتك وأبجي السّواج الخصوصي، وهاوديك الأهرامات والمفتح المصري بتاع الأصنامات والناس المتحنطين! علشان حضرتك خواجاية، وأكيد بتحبّي تروحي الحت دي!

أستمع لكمّ البراءة في كلامها، وأقول لها بهدوء:

- أيوا ماشي الأستاذ عادل أمام قال تزودوا دخلكم، هو انت يا «هنية» قاعدة عندنا بتعملي إيه، مأهو إنت كده بتزودي دخلك، والسؤال المهمّ إنتِ عرفتِ معنى كلمة يزود دخله دي من مين؟! وإيه حكاية الأصنام دي يخرب عقلك، هو احنا في قريش! جبت الكلمة دي منين كمان؟!!

بهدهوء لا يليق بالحماس الذي تتكلّم به قالت:
- سألت الأستاذ «يوسف» وهو الليّ شرح لي معناها، أمّا
الأصنامات دي يا مدام هي الليّ بشوفها في التلافزون، وبعدين إيه
يعني الجبنة الجريش دي، هو حضرتك جعانة.

ثمّ تعيد الطلب مرّة أخرى رغم إنني منذ نصف الساعة كنت
قد نهزتها وشرحت لها أنّني لن أدفع إلاّ بالمصري:

- هو يا مدام صحيح ينفع تديني حسابي بالدورار؟
أمسكها من رقبة البلوزة وأقول لها:

- ينفع أديك بالبوكس في وشك؟ إيه رأيك! ومفيش صفحات
جديدة وهاخليك تبطلّي زن!
تبسم ببلاهة، وتقول لي:

- خلاص يا مدام مش هاتكلّم، هاأخذ بالمصري.

أترك «هنية» وأتوجّه إلى حيث يجلس «رمضان» أمام الكمبيوتر،
احتويته بين ذراعيّ، ثمّ أقول له بصوتٍ حنون: - حبيب ماما بتعمل إيه؟
نظر إليّ بتوجّس وقال:

- أنا بتفرّج على حلقات تجارب علميّة للصغار، الحقيقة يا ماما
أنا محتاج معمل صغير أعمل تجارب بسيطة، والله متخافيش منّي،
مش هافرّقع الدّنيا.

أشجّعهُ على أن يكمل حديثه قائلةً:

- قول عاوز إيه وأنا أجيبهولك، بسّ نعمل حاجات مفيهاش تفاعل كيميائي، لو موافق أنا من بكره إن شاء الله آخذك وننزل نجيب الليّ يعجبك.
يحتضنني ويقول:

- على فكرة عايز أقولك إن البيت من غيرك كان وحش، ومكنتش عارف أقولك إنّي بحبك كثير قوي، بسّ أنا فعلاً بحبك قوي، ومن ساعة ما رجعت من المستشفى وأنا حاسس إنك أحلى أمّ في الدنيا، بسّ يا ماما في مشكلة، حضرتك مش عارفه تبعدني عني «بوسي»، دي إنسانة سخيفة بتضايقني طول الوقت، وموضوع المعمل هيفشل بسببها، أصلها...

وفجأة، وقبل أن أردّ أجد «رمضان» قد وقع على الأرض و«بست» تمتطيه مثل الجرو الصغير، وتقول له: - أنا تخيفة يا ليخم.
أقوم بالفصل بينهما فيقول لي:

- يا ماما، أنا بكره البنات، كلّ شوية أقولك كده، فعلاً سخاف قوي، دول أوحش حدّ في الدنيا، وياربّ يا «بوسي» تتسخطي بُرص! تصرخُ في حركةٍ تمثيلية تريدُ من ورائها تشتيتُ غضب «رمضان» وتقول:

- يا ماما مش عاوزه أبقى بولص .

ثم فجأة تظهر خوفاً حقيقياً عندما يقول لها:

- هتتحوّلي وانت نايمّة لبرص صغير .

فتستجديه وتقول:

- حلام أنا ائفة يا لامي ثا محني، بلاش تحوّلني لبولص .

فيفقُ عاقداً يديه أمام صدره، ويقول:

- لا مش هاسا محك، ومخاصمك يا «بسنت»، وإن شاء الله

هتتحوّلي برص، وعلى فكرة أنا أصلاً زهقان منك ومن كلامك اللي

مش بيتعدل ده، رغم إنّي صلّحت لك حرف السّين، لكن برضو

بتقوليه غلط .

ويسخر منها قائلاً:

- ويا ماما وفالي فلوث الدكتولة، مفيش فايده فيها، دي تافهة!

تقربُ منه وتقول له:

- ثا محني يا لمضان، أنا مش قثدي، إنت بتغلث عليّ، خلاث

ثماح بقى، وأنا تافهة عادي كلّ الناس تافهين حتى ماما تافهة!!

أنظرُ إليها مذهولة: - وأقول لها أنا تافهة يا «بوسي».. مش

عيب كدة؟!!

تردّ عليّ بمنتهى البراءة وتقول: - مآهو يا ماما، تافهة يعني

حضلتك طيبة! أصل بشمع تينة تُعاد بتقول عليك كده! وبعدين
تقول: «لبنى» طيبة، فأنا عالفة التافهين طيين، ثح يا ماما؟
ماما اللي هي أنا، أنظر لها وأنا فاغرة فمي:

- تُعاد أقصد سعاد بتقول عليّ تافهة! طيب الكلام ده قبل
الصفحة الجديدة واللا بعدها؟ أضطرّ لتغيير الموضوع، وأقول لها:
إنتِ طيبة، ورامي طيب، وهتصالحوا علشان خاطر ماما صحّ؟ من
فضلك يا رامي ساعها.

بيتعد عنها ويرفض المصالحة؛ لخطئين ارتكبتها؛ الأوّل لأنّها
تعاملت معه بعنف وهو كائن مُسلم يرفض القسوة والغلظة،
والخطأ الثاني مناداته بيا «رمضان»، وهو لا يجب أن يطلق عليه أحدٌ
هذا الاسم، أشعر أنّه يحتاج وقتاً ليهدأ من تصرّفها، فأطلب منها أن
تذهب لأبيها وتركنّا معاً، فتقول لي:
- طيب هالوح لبابا، دي عيشة تخنق.

أحتضن «رمضان» وأقول له:

- إنتم أحلى أولاد في الدنيا، وأنا بحبكم قوي! بس لازم تطوّل
بالك على أختك، خليك إنت الكبير، «بوسي» أختك عيلة صغيرة يا
«رامي».. تفكيرها صغير، غيرك انت ما شاء الله تفكيرك كبير! يردّ
عليّ وقد استعاد هدوءه بعد أن غادرتنا:

- حاضر، بسّ برضو خليها تبطل سخافة وتسييني في حالي!
أعدّه أنني سأحاول معها، وأنا في داخلي شك؛ فهي مستنسخة
من جدتها سعاد، صعب جداً أن تتغير.. عندما قرّرت أن أكون أكثر
هدوءاً، وحناناً، وتقبلاً وصبراً وتسامحاً مع أولادي وأيضاً تغافلاً
عن السفاسف؛ وجدت أن مساحات الاتفاق بيننا ازدادت، حتى
علاقتي بحماتي، مع بعض التغافل مني، وبعض الرفق منها، سارت
الأمر أفضل، لم تتغير تمامًا، لكن قمنا بتوسيع المساحة التي قد
تحتملنا معاً، وأخرجنا «يوسف» من دائرة النزاع قدر استطاعتنا!
فبدأت حياتي تأخذ شكلاً أكثر هدوءاً، وحاولت أن أرى الحياة
خارج حدودي.

لِلتَّحَاةِ وَالْعُلُومِ

لفصلُ لِحْ مَسْ عَشْر

السَّلم والتَّعبان

مرّ على خروجي من المشفى حوالي أسبوعين أو أكثر بقليل، في تلك الأثناء أمور كثيرة في حياتي أخذت تتحسن، وازداد شعوري بالهدوء النفسي والسكينة. وفي أحد الأيام وأثناء تدويني لبعض الملاحظات في دفترتي لأستخدمها بعد ذلك في كتابة مقالة! دخلت عليّ «هنية» وهي مُرتبكة، وقالت بصوتٍ ضعيف مرتعش:

- مدام، عاوز أجولك حاجة تجيلة على جلبي جاوي، ومكدرة عيشتي، بصراحة في موضوع أنا مخبيها على حضرتك، ومش جادرة أشيله في نفسي أكثر من كده، تعبت والله!

فقلتُ لها مشجعة إياها على الحديث: - خير يا «هنية» ما لك؟

في إيه؟

تقول: - هو عمّ طلعت اتكلم معاك في حاجة جريب؟! أقول لها مُستفسرة: - حاجة زيّ إيه يا «هنية»? خير.. عملت إيه يا بلوة!

تتمتم ثم تطرق بنظرها إلى الأرض وتقول: - هو زعلان مني

تجريبًا، حصلت حاجة جريب يعني، بس والله عادي مش عارفة ليه
إصايج وزعج لي!

أقول لها: - أنا والله قلت إنتِ عاملة مصيبة، طيب ليه ضميرك
الميت نقح عليك دلوقت؟!

لا ترفع رأسها لتواجهني، وتقول بخجل شديد: - بصراحة أنا
معرفش ليه حسيت إنِّي عاوزه أجولك، يمكن ضميري صحي، زي
ما انت بتجولي، مش عارفة، أهو عاوزه أجولك وخلاص، أصل
الموضوع ده أنا جلته لعمّ طلعت من جريب، من كام يوم كده، مش
زمان يعني مش في نفس اليوم اللي طلبت منه إنه يعلمني السّواجة،
لا ده جريب جوي، وخايفة هو يجولك جبلي، فتزعلي مني وتفهمي
كلامي غلط.

أهز رأسي وأقول لها: - اتفضلي قولي، متخافيش هافهمك
صح! أنا أصلًا فاهمك كويس، انطقي!

قالت: - بصراحة هو أنا طلبت منه يجيب لي عريس علشان أنا
كبرت ولازم أتجوز، أنا خايفة أعنس.

قلت لها: - هتعنسي وانتِ لسه مكملتيش 17 سنة؟!
لم ترفع رأسها، وظلت منكسة إياها وقالت: - يا مدام البنات
حدانا كلاتهم اتجوزوا، ولما بروح زيارة في البلد ببصّوالي على إنِّي

فاتني الجطر، وأنا الحكاية دي بتحس في نفسي جوي! وبيجي تعبانة
وعايزه أعيط من الجهر.

أضحك وأقول لها: - بتحس في نفسك؟! بجد هو انت أصلاً
بتحسي علشان تحس، وبعدين اسمها تحز.
تردّ بهدوء:

- يا مدام، إنت فهمتيني، ليه بتسقي عليا على رجي «أدهم»! يا
مدام أنا بيعيروني إني لسه متجوزتش، بلاش تتمالتي عليا.
أجد أن الموضوع جدّ مهمّ بالنسبة لها فأقول لها: - طيب وانت
عملت إيه مع طلعت! خلّيتيه يتعفرت كده، أصل موضوع يجيبلك
عريس مش أزمة!

قالت: - هو أنا، وبدأت تتلجلج، بصراحة يا مدام أنا جلتله:
إني موافجة إنه يتجوزني، لو مفيش حداه عريس ينفعني!
أفتح فمي في ذهول، وأقول لها: - موافقة إنه يتجوزك! ليه هو
كان طلب إيدك يا مخلولة؟ وليه متكلمتيش معايا الأول؟ كنت
سألته لو عنده حدّ يجوز هولك!

تصدر همهمات غاضبة وتقول: - إيه يعني لما يتجوزني، ما هو
متجوز واحدة بس «أم فتحي»، وعندنا في البلد عادي يتجوز اتنين
وتلاثة وأربعة كان.

قلت لها بسرعة: - وفي كل الدنيا مباح، أقصد مسموح للرجال
يتجوّز أكثر من واحدة، بسّ بضوابط أقصد بشرط، وانتِ إيه اللي
يخليّ طلعت يتجوّزك لو أمّ فتحي مريّحاه وراضي بيها؟ اللي عملتيه
ده نوع من خراب البيوت.

تضرب بيدها على صدرها وتقول لي: - يا لهوي، ليه كده يا
مدام! أنا كنت هاتجوّز عمّ طلعت وأخدم أمّ فتحي، عادي يعني،
زيّ كلّ الناس ما بتعمل عندنا!

أقول لها: - وليه؟! علشان إيه يا «هنية»؟ حرام عليكِ إنتِ لسّه
صغيرة، لازم تتجوّزي واحد قدك صغير، طلعت قدّ أبوك، طبعي
الرجال يتخضّ منك، إن شاء الله أدور لك على عريس وبطلّي
تتصرّفي من دماغك، ارجعي لي بسّ في أيّ فكرة غريبة تيجي لك،
بلاش هبل.

في حركة مفاجئة تحتضّني وتقبّلني، وتقول لي: - أنا بحبك يا
مدام، بسّ لولا عصبيتك أنا كنت جعدت معاك ومش مهمّ أتجوّز،
وممكن كمان أستنى وأتجوّز لما ابجي في سنك لما انتِ اتجوّزت، ولو
إنّ الست سعاد جالت إنك كنت عروسة كبيرة في السنّ علشان كده
عصبية ومش طايحة نفسك، وإنّ ربنا ستر معاك وخلفتي!

أقول لها: - الست سعاد تقول اللي عايزاه، إنتِ لازم تعرفي

الكلام الجدد، محدّش بيتجوّز إلا وقت ما ربّنا يشاء، وبعدين إنت سمعتِ مدام سعاد إمتى قالت كده؟

تتخايب وتقول: - مش فاكره إمتى، بس هي العادي إنها دايمًا تجيب سيرتك بالبطل، يووو بالحلو، أيوا بالحلو، (وتغيّر الموضوع) المهم إنت بجيتي طيبة أكثر من الأوّل، بس لو تبطلّي ترعّجي وتحفشي كده على رأي «أدهم»؟!!

أستغربُ من قدرة حماتي على الخوض في سيرتي في أيّ وقت، ومع أيّ إنسان، حتى الشغالة! ثم أقول لنفسي:
- خلاص يا «لبنى» إحنا فتحنا صفحة جديدة، وأصلاً «هنية» دي في دنيا تانية.

أخرج من أفكاري على صوت «هنية» تقول: يا مدام، أسجي الزرع واللّا هتسمعي كلامي ونسجيه بعد المغرب؟! لأول مرة أقول لها:

- لا.. اسقيه بعد المغرب، ويلاً روجي للطبّاخة بسرعة.

جلست أتفكّر في حال البنات والزّواج والاستعجال على الارتباط، وقد تكون الاختيارات خاطئة؛ لأنّها تحت ضغط الرّغبة في الزواج فقط، دون التفكير في عواقب اختيار الزّوج الخطأ، «هنية» فتاة بسيطة، لم تتعلّم، ولا تعرف عن الحياة شيئاً، أمّا المتعلّقات

خريجات الجامعة والمثقفات، فما الذي يدفعهنّ للارتباط بمنّ لا يقدرهنّ ولا يليق بهنّ اجتماعياً وثقافياً ومادياً؟! لماذا اللهفة، والزّواج رزقٌ يأتي في الوقت المناسب، أو قد لا يأتي لعدم صلاحيته للإنسان الذي لم يوفّق في الارتباط! لو توكلنا على الله، ولم نرفض أقدارنا؛ لكانت حياتنا سعيدة.

أعودُ لأوراقِي، وأستأنفُ ما كنت أقومُ به قبل دخول «هنية»، أراجع ما كنت أدوّنه، فجأة يدخل «يوسف» سعيداً متهللاً وهو يقول:
- «لبنى»، عندي لك خبر حلو، عندنا ميعاد مع صاحب دار نشر، صاحب صاحبي.

أقاطعه وأقول: - مفيش صاحبي يا صاحبي يا صاحبي، هاهاهاه.. إيه.

ولا أدري سبب تعليقي، وأشعر أنني سخيقة، خاصّة عندما رأيت «يوسف» ينظر إليّ بتحفّز وقال:

- إيه السّكر ده؟! أنا فصلت منك، إنتِ قطعيني من الاستطراف، هتبطّي والّا محكيش؟

خجلتُ من نفسي وقلت له:

- والله يا «يوسف» ساعات القافية تحكم، وعموماً حاضر.. هاحاول أمسك نفسي.

قال: - أخذت منهم ميعاد، يوم التّلات الأسبوع الجاي، هيكون مع صاحب دار نشر السّلم والتّعبان، ابعت لهم الملفّ النهارده على صفحة الدّار على ما نروح يكونوا قروه.
قلت له وأنا ممتعضة:

- «يوسف» دي دار نشر واللّا لعبة! إيه الاسم ده؟! لا أنا عاوزه جرير، أو العبيكان!

قال لي ساخرًا:
- في جرير ينفع! جرير مين يا ستّ المغمورة إنت، مش لما تقبّي على وشّ الدّنيا؟!
قمتُ من مكاني وأنا أشاكسه، وقلت له:

- بهزّر يا «يوسف»، إيه حرام أهزّر؟! خلاص هابعت وأشوف صاحب صاحبك ده، والله فكّرتني بفيلم عوكل، يا ابن بنت بنت بنتي. فقدفني بوسادة صغيرة، فابتعدت عنه، فجاءت في «بوسي» التي صرخت، وقالت:

- إيه يا بابا ده، مش عالف تنشن؟! قولي وأنا أوليك!
ضحك وقال لها: - حاضر يا «بوسي»، تعالي أقولك.
قفزت وجلستُ في حضن أبيها، وجعلت تحكي له حكايات، وعندما نظرتُ في وجهه عرفت أنّه يعاني معها، فهو لا يفهم نصفًا

الكلام؛ لأنه لا يعرف مفاتيح الحروف، ودائماً يسألني:

- هي بتقول إيه؟!

أضحك وأقول له:

- على رأي المثل القديم اللي يقول: أمّ الأخرس تعرف لغته،

مقالوش أبو الأخرس.

وعليه ظلّ «يوسف» لا يدرك ما تقصده «بوسي»، تركتها

يتجادلان، وذهبت لحجرة الأولاد، وقررت أن أجلس مع «أدهم»

قليلاً، فأخبرته عن توجّسي من التجربة، وأنّ دار النشر لا تعجبني فقال:

- شوفي يا ماما المنطق بيقول إنّ حضرتك لسه كاتبة مش

معروفة، يعني مجهولة للقراء، ومحدّش يعرف حاجة عنك، يبقى

التجربة دي هي اللي هتخليّ الناس تتعرف عليك، ووقتها تقدري

تملي شروطك الأدبية والمالية وتختاري بمزاجك!

أستمعُ لنصيحته وأنا لا أصدّق نفسي! هل نضجّ ابني هكذا

دون أن أشعر! كيف لم ألاحظ هذا؟! شعرتُ بالندم لانشغالي

بإصلاح الكون عن الاستمتاع بزهوري وهي تنمو وتشعل الكون

جمالاً وبهاء! قبّلتُه وقلتُ له:

- ماشي يا فيلسوفي، تمام يا فندم هانفد إن شاء الله.

لقد كان لحواري مع «أدهم» وقعٌ في نفسي أعطاني القوَّة والثِّقة، لكنْ كان بداخلي رفضٌ للتنازل، لا أدري لماذا شعرتُ بصراعٍ ما بين اقتناعي بكلام «أدهم» ورغبتني في عدم التنازل، أعلمُ أنَّه من السَّابق لأوانه أن أتوقَّع أن يكون لي القدرة على التفاوض، لكنِّي خائفة من التجربة، وأيضًا من هذا الوسط، ولا أريد تنازلات.

يجلسُ «يوسف» أمامي، وعلى الجانب الآخر مديرُ دار النشر، وتبدو عليه الثِّقة الزائدة، يوجِّه الكلام إليَّ قائلاً: - أهلاً بيك يا أستاذة. أردُّ عليه: - أهلاً بيك.

يكمل كلامه: - أنا قرئت الرِّسائل، مبدئيًّا موافقٌ عليها، لكنْ لي سؤال: هوَّ ليه حضرتك ماسبتيش حدِّ إلا لما سخرتِ من أدائه وأسلوب تعامله؟! هو انتِ النَّاس كلُّها حوالياً صعبة كده؟! ثمَّ يستطرد قائلاً:

بس الحمد لله إنتِ متكلمتيش في السياسة، كانت هتبقى مشكلة. أجابوب ساخرة:

- آه علشان مفيش فايده من الكلام، أصدِّع نفسي ليه؟! واللَّا إنتِ إيه رأيك؟!

فيردُّ عليَّ سخريتي بتهمكُم محيِّط:

- يعني إنتِ شايفة إنَّ رسايك دي مُمكن تجيب فايده؟! عن نفسي شايف إنَّه والله مفيش أمل، لكن ده كتابك وانتِ حرّة فيه، وعمومًا هادخلهم لجنة قراءة، وأردّ عليكِ ولو اتوافق عليهم، يبقى حضرتك هتدفعي نصّ المبلغ اللي يتحدّد لطبع الكتاب.

أشعر بتدقق الدماء إلى وجهي، وكأنّ شحنات حرارية تخرج منه، أنظرُ إلى «يوسف» الذي يغمز لي بطرفِ عينه، تتبعها نظرةُ استجداء (بلاش يا «لبنى»)، وكان ظاهرًا على تعبيرات وجهه أنّه يطلب منّي ألاّ أبدأ وصلة (الرّخامة)، تجاهلته وتظاهرتُ بأنّي لم أفهمه! ثمّ بصوتٍ حادّ مثل صوتِ سنفرة الزجاج أقول:

- حضرتك مش عاجبك حاجة؟! مش عاوز الرّسائل، براحتك عادي، لكن تتريق على كتاباتي يبقى بلاش منها يا سيدي، وخليك في الكتابات الرومانسية والحبّ! فيستغربُ من لهجتي الحادّة ويقول:

- في إيه يا أستاذة؟! أنا ما قولتش حاجة، إحنا بنتناقش، وبرضو براحتك.

أستطرّد وكأنّني قطارٌ انفصلت عنه القاطرةُ فيدهس برجوعه للخلف كلّ ما هو قادم: - وإيه حكاية لجنة القراءة ولو عاجبهم أنا اللي هادفع؟ هو انتِ دار نشر واللا مطبعة؟! شكلي كده مش هارتاح

معاكم، وأكيد هاكتب رسالة عنكم في الكتاب ده لو نشرته أصلاً،
ودي لازم هتكون آخر رسالة.

بيتسم ببلاد كانه يرى مختلفاً عقلياً يريد أن يهاوده، ويقول لي:-
هنشر كتابك لو اللجئة وافقت عليه، ولو زكته هنشره من غير ما
ناخد منك فلوس، ورغم كل اللي قلتيه أنا لسه بقولك مفيش أمل
إنّ الرسائل دي تجيب فائدة مع المرسل إليهم، بس علشان أبقى مش
ظالم هادخله لجنة، عاوزه أكثر من كده إيه! وبعدين إنت بتكلميني
كده ليه يا أستاذة؟! لازم يكون عندك مرونة أكثر من كده.

ثم يوجه كلامه لـ «يوسف» الذي كانت لديه رغبة ظهرت في عيونه
أن يسحبني من يدي ويخرجني من المكتب حتى لا أوظفه في خناقة:
- مش كده واللا إيه يا بيه؟! إنت أصلك جاي من طرف راجل
عزيز علياً قوي.

ينظر له «يوسف»، ولا يرد عليه في الحال، والحق أقول: لا أدري
سبب هذا التصرف الغبي والحدّة في الكلام، والهجوم على صاحب
دار النشر! يبدو أنني لم أتخلص من عيوبي واندفاعاتي وحمقاتي! ولم
أفتح بعد صفحة جديدة مع العالم، يبدو عليه وكأنه إنسان تورط مع
مسجل خطر في مصلحة ما، ويقول موجّهاً كلامه لي:

- إيه يا «لبنى» ما لك متفرقة ليه؟ الأستاذ يقول رأيّه في الفكرة

مش في كتاباتك، وحتى لو قال، ما لك؟! من حقّه ينتقد كلام مش مناسب له.

ثمّ يوجّه كلامه لصاحب الدار:

- طبعاً إنت حبيب حبيبي، وربنا يوفقنا إن شاء الله، بعذر عن عصبيّتها، أصلها لسّه خارجة من تعب ومتوتّرة و.. و..

وقتها تذكّرت فيلم «باب الحديد» عندما كانوا يقومون بتكتيف «قناوي» ويعدونه بالزّواج من «هنّومة»، وأقاطعته وأنا أبتسمُ ابتسامة صفراء ساخرة، وأقول:

- «يوسف»، فاضل تقوله دي بتعالج من الجنون! أنا مش عاجبني الكلام، وأنا بعذر، مش عاوزه أنشر كتابي.

ثمّ أغادر المكتب، فأنزل مسرعةً وأنا أشتعلُ غضب، فأنظرُ «يوسف» أمام سيارتنا، لكنّه لم يلحق بي، فوجدتها فرصةً لأقعد بين النّاس في الشّارع، فهذا شيء - يمتعني - أمارسه منذ كنت شابّة صغيرة، فمتابعة تصرّفات النّاس عندما لا يشعرون برقيب تجعلك ترى مخلوقات بريئة، على سجيّتها، خاصّة وأنت لست في وضع القاضي، فقط تشاهد دون أيّ توجيه، فاقتربت من مقعدٍ خال في محطة حافلات، وجلست عليه، ثمّ بدأت أتابع النّاس، فاكتشفت أنّ معاناة النّاس من حوّلي كثيرة ومتفاوتة، ولكنها صدقاً

معاناةً أكيدة، وفجأة تظهر أمامي سيّدة صغيرة في السن، بدأت تقترب منّي وهي تدفع بيدها كرسيّاً متحرّكاً، يجلس عليه فتى وفتاة؛ كلاهما مُعاق، تبسم لهما وكأنّها تتحاور معهما بالعيون، ثمّ تجلس بجواري، وتُخرج علبةً صغيرة وتبدأ في إطعامهما وتحدّث إليهما، فيتجاوبان معها ولكن دون أن تصدرَ منهما أصواتٌ سوى همهمات، ما هي إلاّ دقائق حتى خطفا قلبي، وبدأت أفاعل معهما، لم أتحدّث إليها ولكن أظهرت اهتماماً بحبّات قلبها، وشعرت بضالتي، واكتشفت أنّي حقّاً أحتاجُ إلى تأهيل نفسي، حتى أَرْضَى وأتأقلم مع الناس، وأكفّ أذاي عنهم.

نسيت نفسي ومعاناتي وعصبيّتي وانصهرت تماماً مع الصغيرين، وبدأت أداعبهما، ثمّ تحدّثت مع الأمّ ودعوت لها، وبعد نصف ساعة لحقني «يوسف» فقد كان يظنّ أنّي أنتظره في سيارتنا، وعندما لم يجذني اتّصل على هاتفني الخلوي، وخلال الطريق حكى لي حوارهِ مع صاحبِ الدار بعد مغادرتي المكتب غاضبة، والذي أثار حفيظته فقال:

- بصراحة يا «لبنى»، مش شايف أيّ داعي لتصرّفك مع صاحب الدار، مش عاجبنا كلامه خلاص، وهو قاليّ بعد ما نزلت غضبانه زيّ الأطفال، إنّه بيتكلّم وبيأخذ ويديّ مع الناس اللي بينشر

لهم، ولازم يعرف عاوزين ينشروا ليه، وفهمته إنك كنت بتكتبي
لنفسك وإن أنا اللي أقنعتك تنشري
وعلشان كده مش لازمك النقاش ومتوقعتيهوش، وقالي يا
«لبنى» إن أسلوبك كويس، وهو مقصدش اللي فهمتيه.

شعرتُ بإحراج واعتذرت له فقال:

- ولا يهّمك، بسّ حاوي تظبّطي انفعالك شوية، لو هتكتبي
للناس، لازم تتوقّعي رفض البعض وموافقة البعض، إحنا بشر،
مش كل الناس هتحبّ اللي بنعمله.

أسلوب «يوسف» الذي لم يكن يوماً جافاً أو محبباً ساعدني
على استرجاع هدوئي، بيد أنّه رغم هذا، مازال صامتاً، ومتجاهلاً،
ولكن الحق أقول عندما أتعرض لموقف مؤلم لا يتركني أبداً دون
دعم، قد أكون حقاً أنثى العنقاء وأحتاج تهذيباً لانفعالاتي، لكنني
أحبّ زوجي، وأعاني من بخله الذي ثبت لي أنّه غير مقصود!

مرّ أسبوعان على لقائي مع الناشر، وجاءت الموافقة والتركية،
طار عقلي فرحاً؛ فالكتاب سيرى النور، وعندما أخبرت «يوسف»
بتواصل دار النشر معي، فرح كأنّ الكتاب له وليس لي، فرحته
أثلجت صدري، واقترح عليّ اقتراحاً؛ الحقيقة عندما سمعته
سعدتُ به جدّاً، فهذا الاقتراح سيتيح لي فرصة نشر الكتاب دو أن
يثير حفيظة أو غضب أحدهم.

قال: علشان تخرجي من حرج (التلقيح) وميانش إنك بتتكلّمي على الناس اللي حواليك ياريت تغيري شوية من تفاصيل الرسائل، يعني بلاش ماما أو بابا أو «أدهم» يفهموا إنك تقصديهم (رغم إنهم هيفهموا، دي مش محتاجة فتاكة) بس مش هيكون في إديهم أو أي حد من اللي وجهت له الرسالة أي دليل، كمان هتوسّعي النقد وهيكون لقطاع أكبر، هي دي الفرصة علشان محدش يلومك، فتكتبي رسائل تانية، بالإضافة للرسائل اللي في دفترك.

أستمع لكلامه وأنا في حالة انبهار، فهذه الفكرة من أروع ما سمعت منه؛ أقول له:

- يسلم فومك يا «جو»، إيه ده يا «يوسف»! إيه الإبداع ده، يا

سلام عليك لما تشغل دماغك معايا وتساعدني!

ثم أزدفُ قائلةً بسبب الشريرة التي تخرج مني دون قصد:

- صحيح هو في سؤال كده كنت عاوزه أسأله لك من زمان،

هو انت بتخاف على تفكيرك من إن حد ممكن يسرقه منك وتعيش

من غيره، لو اتعرف إنك عندك تفكير مميز، أو بتفكر تأجر دماغك

الأماظ دي بنظام المفروش؟ وخايف لما تفكر في أي شيء يخصني

أو ينحص البيت يقلل من كفاءتها أو جودتها، ودا يقلل من قيمتها

في السوق، بجد إنت محافظ على أفكارك دي لمن؟! يستمع إلى

سخريتي، ويقول:

- أهو ده اللي باخده منك! لو أسكت، إنت مفيش منك فائدة،
لو اتكلمت تتريقني، وإنت بتحوّش الأفكار دي لمن! تصدّقي إنتِ
يا بنتي مكانش ليك الجواز أصلاً!
أقاطعهُ قائلةً:

- هات إيدك أبوسها.. أخيراً عرفت! أقسم بالله صادق يا
باشا، أنا فعلاً مكنش ليا لا جواز ولا خلفه ولا عيشة في الأرض، أنا
عاوزه أعيش في كوكب تاني!
يسخر مني ويقول:

- كوكب تاني! ليه يا «مدحت صالح»! ما الكوكب ده أحسن
من غيره. ثم يستدرِك قائلاً:

إيه رأيك؟ هاهتعدلي الملفّ قبل ما تبعته واللا عاوزه تعيشي في
كوكب تاني؟! فأقولُ له:

- «يوسف»، خلاص ألسة وعدت، بلاش تبقى غلس كده
وخلينا نتكلم جد، إشطة؟ يقلب شفّته وهو يقول:

- إيه إنتِ بقيت لو كالم قوي يا «لبنى»، إيه إشطة دي؟!!

أقرصه في خده قائلة:

- مآهو عيالك كلهم بيقلولوا كلام غريب، بلح وإشطة وافتكسي

وسَفِّ، ومعلِّم وبرِّاً عني، وعوء، وجات عليّاً أنا يا جو؟!!

ثمَّ أردف سريعاً وبصوتٍ كارتوني:

- بصِّ يا «يوسف» أنا شامّة ريحة طنطني سعاد، بلاش العرق
التركي بتاعها يبوّظ لغتنا العربية! ثمَّ أعود لصوتي الطبيعي وأقول:
من فضلك إحنا دلوقت عاوزين ننجز، أنا موافقة على فكرتك جدّاً،
يالاً على البركة! لو عندك أفكار مفتكسة علشان أكتب عنها قولي..

ابتسم وقال: - اتفقنا يا حضرة الكاتبة العظيمة..

واقترح «يوسف» العديد من الأفكار المذهلة، كم أنت رائع يا
زوجي المشاكس فعندما تتخلّص من صندوق اللاشيء الذي تعشق
الاعتكاف داخله تصبح «يوسف» آخر، «يوسف» لا مثيل له!

لِلتِّقَاةِ وَالْعُلُومِ

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

لفصلك لسن دس عشر

كتاب حياتي

عندما أستعرض شريطَ حياتي، أستغرب مما حدث لي فيها، فأنا كنت أخطئ في اتجاه مختلف عن ذلك الذي عشته وعاشتته، فأنا لم أكن أريد الزواج نهائياً، وكنت أريد الحصول على محل صغير، في مكان مميز، أجعله للأنتيكات والمصنوعات اليدوية، وبدلاً من المحل! تزوجت وتعطلت كل أحلامي بفعل فاعل، فالزواج والمسئوليات التي تترتب عليه تفقدك القدرة على التثبث بأحلامك، والعودة لاحقاً لتحقيق ما كنت ترجو عمله، وتأمل أن تمارسه باقي حياتك! لقد حاولت النجاح وأن أكون مختلفة عن الآخرين، بيد أنني فشلت بشدة! فعندما تخلّيت عن أحلامي وطموحاتي فشلت في أن أكون متميزةً في أي شيء سوى الشكوى!

حتى عندما كنت أكتب، كنت متبينة نظرية تفريغ الشحنات (بوز البراد) حتى أستطيع العيش دون أمراض، ورغم ذلك كنت أدوّن أمراض بيدي وأثقل كاهلي بحملها، وأمشي بكل معاناتي مدوّنة، دون علاجها أو التخلص منها، لقد لجأت لأسهل الحلول وهو الهروب

بدلاً من العلاج الحقيقي، وأقنعتُ نفسي أنّ ما أفعله هو الصّواب، وأنّ تقليل الضغط يقلّل فرص الانفجار، وبذلك أعبرُ بسفينتي إلى برّ الأمان، كلّ النتائج كانت معروضة ومتاحة إلاّ أن أتخيّل يوماً أن يتحوّل (بوز البرّاد) منفذ التّخفيف والتهدئة؛ إلى كتاب!

تمرّ الأيام سريعاً وتتمّ الموافقة على الكتاب، وبعد التعديلات التي اقترحها «يوسف» والتي لاقت استحساناً لديّ ولدى المدقّق اللّغوي يدخل الكتاب المطبعة، وأحاول من خلال أسلوبٍ ساحر تسليط الضّوء على بعض الأشياء السّلبية في حياتنا وحياة الآخرين، أردت أن أخرج من أنانيتي لطرح معاناة غيري. وأخيراً (بوز البرّاد) سيكون كتاباً ورقياً، وليس فقط صفحات في دفثري الأثير!

كانت المقابلة الثانية مع صاحب الدار مختلفةً لكليتنا، أُعجبتُ بإخراج الكتاب، وسعدت به أيّما سعادة! فأمسكته بين يديّ، ومررتُ بأصبعي على الاسم المكتوب وأنا أكادُ أطير من الفرحه، أمّا صاحب الدار فأنشغل مع «يوسف» في تفاصيل التوزيع والنشر، لم أنتظر العودة إلى البيت، وأنا في الطريق بدأت القراءة.

«بوزالبراد»

مقالات ساخرة

لِلثَّقَافَةِ وَالْعُلُومِ

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

المقدمة

أحياناً التمسك ببعض الأحلام يكون هو العقبة الحقيقية في تحقيق ذاتنا، أو الوصول لنجاحاتنا أكثر مما نتصور.

كَلِمَاتُ الشَّيْرِ
لِلثَّقَافَةِ وَالْعُلُومِ

الإهداء

إلى أعلى النَّاسِ
زوجي الحبيب، أشكرُكَ على حُبِّكَ، الذي طالما اشتكيت من صمته
فبهرني بأفعاله
إلى نور العين والقلب
«أدهم»، «رامي»، «بسنت»

إهداء للشيخ
للثقافة والعلوم

الشكر

إلى كل من تسبّب في ألمي فتحوّل ذلك الألم إلى نور.
وبدأت أطوي صفحات الكتاب بشغفٍ ملاً قلبي، وتسمّمت
رائحة الطباعة، مرّرتُ يدي على الغلاف وجعلت أقلب الكتاب
مرّة أخرى، حالة من النشوة احتوتني، هدأت من حالي، ثمّ بدأتُ
أقرأ مقالاتي، وكانت أوّل مقالة هي:

كتاب التّشريح
للتّحفاة والعُلوم

(1) أصحاب المناخير

يا أهل الخير، أحبّ الأوّل أعرف إيه هي المشكلة عندكم؟ ليه حاشرين نفسكم في تفاصيل الناس؟ هل هي إنّ عندكم مناخير كبيرة مضيقاكم! طيب ما كلنا عندنا مناخير وأوقات بتضايقنا عادي خالص، لكن مخلّينها في وشنا عادي مبنحشرهاش في أيّ مناسبة وأيّ مصلحة وخلاص زيّكم يا بهوات!

اتّقوا الله.. إيه اللي بتعملوه في خلق الله ده، تمسكوا النبي آدم اللي يقع تحت إيديكم، وتعصروه أسئلة وحشريّة، لو كانت بنت؛ تبيّنوا لها الاهتمام بمستقبلها وحياتها، وهات يا أسئلة؛ متجوز تيش ليه لغاية دلوقت، ولا هو في حدّ وانت محبّية علينا؟! طيب إنت مواصفاك إيه؟ ولو قالت المواصفات تبدووا في سلخها وتقطيعها، وبعدين مضمّصة شفايف، طيب ما ترضي بالنصيب وبلاش تطلعي فيها قوي!

اللي هو إيه حضراتكم؟ يعني أشرحوا لها؛ علشان هي غالباً في KG1 ومحتاج حدّ يفهمها إيه المناسبة لها، ومتنسوش تجيوا لها المصاصة والشيتوس واللبان! نصيب إيه اللي ترضى بيه؟ إمّا تبقى

في حمى راجل، طبعًا ميهمش الرّاجل ده؛ صنف ولا نوع ولا مواصفات، وكأنكم شايئنها على راسكم من فوق، أو بتاكل أكل عيالكم، أو حتى بتصدّقوا عليها،

دي أحيانًا بتكون موظّفة مرموقة وبنت جميلة وبرضو مبتسلمش من غلاستكم، ولو حتّى لو بنت عادية، إنتم مالكم وماهم، تعرفوا البنات دول دماغهم توزن بلد، ليه عاوزين ترموهم لأيّ واحد يحمل نوع ذكر في البطاقة؟ مش مهمّ إنّه يبهدها! مش مهمّ ياخذ فلوسها، يقهرها ويئينها، تستحمل، مش أحسن من العنوسة! المهمّ تتجوّز علشان الحسّاسية اللي عندكم، واللي مش بتخليكم تناموا وترتاحوا؟!

لا يا بهوات لا يا أفندية «العنوسة» لو انتم مصريين تسمّوا عدم رغبتهم في الجواز من أيّ حدّ «عنوسة» تبقى دي شرف للبنات الأذكيا، اللي لا يمكن ترمي نفسها في عصمة فردة شراب واخذ الصّنف ذكر، يئينها ويبهدها ويطلّع عُقد النّقص بتاعته عليها، البنات دول أذكى من إنّه يقعوا في مصيدة ضلّ راجل...

أمّا إنتم يا أصحاب المناخير لازم تتقصّ مناخيركم علشان مفيش فايده منها؛ لأنّ لو البنت ربّنا أهداها وأنعم عليها برزق طيّب والتجوّزت شخص مناسب لها، تبدءوا الأزرّ.. هه مفيش حاجة

جاية في السّكة؟ يا بنتي إنت أصلاً متجوّزة كبيرة (كبرت علتكم ومصيبتكم) وانتم مالكم؟! ولما ربّنا يكرمها وتحمل وتحلّف فيكون التّونو» بنت! يا عيني يا ختي، معلش المرّة الجاية تجيبي الولد، ولو كانت أوّل خلفتها صبيان يبقى اللي مجابش بنات مخلّفش للممات، لازم تخلّفي تاني علشان ربّنا يرزقك بالبنات، طيّب مش ناوية تخاويهم! هتفضلوا حاشرين مناخيركم لغاية إمتى؟!!

سيبوا النّاس في حالها، محدّش مستحمل تطفلكم! وسبحان الله اللي يبصّ في حياتكم يلاقيها غمّ وسواد، وبتطلّعهو على غيركم، ده أنا متكلّمتمش بسّ غير عن البنات لو اتكلّمت عن باقي الناس، وباقي تفاصيل التفاصيل أكيد هاحتاج كتاب لوحده! بسّ علشان مناخيركم الطويلة المحشورة في أيّ مصلحة. اختشوا!

تمت

أدخل حجرتي وأنا محتضنة الكتاب، لا أتحدّث مع أحد، أستلقي على السرير بعد أن بدّلت ملابسني، أستكمل قراءته وأنا سعيدة سعادةً غامرة، أغلقه بعد أن انتهيت منه، وقد امتلأت فخرًا، وكاد قلبي يطير فرحًا، لم أكن لأتخيّل أنّ خروج الكتاب بشكل مميّز له هذه الفرحة، ولا أنّ رؤية كلماتي التي سطرّت من خلالها معاناتي الحقيقية مطبوعة، سيكون لها هذا الأثر في نفسي وسيمنحني كلّ هذه

السَّعادة! الحمدُ لله على نعمه عليّ.

أهزّ رأسي بفرح وأتقمّص شخصية إيمان، وأقول: yes yes، عندما أتذكّر أنّني كنت دائماً أكتب لنفسي خوفاً من مواجهة الجميع، وبفضل الكتابة (التنفسية) أصبحت كاتبة؛ أقول رأبي دون خوف، وتعلّمت المواجهة بحزم ولين في الوقت نفسه، لقد أصبحت أكثر تفهّمًا وإدراكًا للمعنى الاندماج دون الانصهار.. واكتشفتُ مؤخراً أنّ الناس تقبل أن تندمج معك، لكنها لا تقبل أن تنصهرَ فيك، وكلّ إنسانٍ منا يرغب في مساحة ليتحرّك فيها دون قيود، وأن يحتفظ بالناس حول حياته لا داخلها، حتى الصّغار اكتشفت أنّهم أولى الناس باحترام خصوصيّتهم مع مراقبة ما يحيط بهم من مخاطر، تتخفّى في هيئة أشخاص وأماكن.

تجربة التّأليف منحتني صبراً وقوّة وطولَةَ بال كنتُ أحتاجها عند تعاملي مع الآخرين، وسبحان الله لقد استخدمت (بوز البرّاد) هرباً من مواجهة الناس، فكان هو بداية مواجهتهم ومواجهة نفسي!

يأتي زوجي متحمّساً لمعرفة رأبي في الكتاب فأقول له:
- رائع، لكنّ في حاجات ضايقتني، منها وجود بعض الأخطاء الإملائية وقواعد النحو، أنا مش هابعتُ أيّ كتاب بعد كده لأيّ دار

نشر قبل تدقيقه عند مدقق لغوي قوي.

فيقول لي وهو سعيد:

- مرّة وعدت متزعلّيش نفسك، وإن شاء الله نتدارك أخطاء
أول مرّة.

لقد تمّ توزيع الكتاب بشكلٍ رائع، وحاز على إعجاب العديد
من المهتمّين بالأدب الساخر، لدرجة أنّه قد تمّ استخدام بعض
من رسائله في أحد البرامج الساخرة التي تقوم بانتقاد الأوضاع
الاجتماعية البالية في البلد، وذاع صيته في المواقع الإلكترونية، ممّا
جعل دور النشر ترغب في التعامل معي! فأحمد الله على هذا النجاح!
وبعد نجاح كتاب (بوز البراد) كتبت كتباً أخرى وامتهنتُ
الصّحافة، وخاصّة الإلكترونيّة، ولكن دون أن تطغى على حلمي
الذي أخطط له وسأنفذه قريباً، محلّ للأنتيكات، والأشغال اليدوية!
ما تفرؤونه الآن هو قصّة حياتي، نعم أنا الكاتبة «لبنى عامر»؛
سطرت لكم فيها تجرّباتي ونقاط التّغيير في حياتي، وكلّ معاناتي
ومواجهتي مع نفسي والآخرين، وتلك التحوّلات التي لم أكن أفكر
فيها ولم تكن لتخطر ببالي، فطموحاتي وآمالي قبل الزّواج كانت في
اتّجاه آخر تمّ تفويضه من وجهة نظري - وقتها - بالزّواج؛ ليفتح الله
لي باباً آخر أكبر وأكثر سعةً وحياة، وأكثر جمالاً، ولعلّ باباً يغلق تظنّ

أن خلفه الخير الكثير، فيأتي من وراء غلقه الخير كله!
وكيف كان الدفتر الذي استخدمته وسيلةً لتقليل الغليان
والضغط النفسي، يكون كتابًا وفتحةً خيرٍ حتى أدخل عالم الكتابة
السّحري؛ ذلك العالم الذي لا يعرفه إلاّ محبو الكتابة!
لقد تعلّمتُ أن كلَّ شيءٍ في الحياة مقدّر بقدر الله، وكلّ تصاريفه
فيها خير! فقط نرضى ونراقب الله في أعمالنا وتصرفاتنا، مع إدراكنا
أننا بشر نخطئ ونصيب، وأن الآخرين يعانون مثلنا، فقد نكون
نحن وهم عبئًا متبادلًا، ولو تقبلنا بعضنا البعض ومنحنا أنفسنا
مساحاتٍ من الودِّ والاحترام، لعشنا في سعادة وراحة بال.
عندما تصبّحون حكماءً، تفصلون بين الناس، تبادلوا الأدوار
معهم، وقتها ستكونون أرقّ قضاة الأرض، فالقاضي العادل لا
يحكم على الآخرين دون سماعهم، ودون أن يعرف مبرراتهم. كونوا
عادلين.

تمّت

2015/12/12

كُنْ أَدَبًا لِلشَّيْرِ
لِلثَّقَافَةِ وَالْعُلُومِ

كلا كيت تاني مرّة إيناس ماهر

يغمر الحجره ضوءً باهر.. أسحب نفسي من تحت الغطاء، ورأسي تننّ من صداع شديد، أركّز بصري في اتجاه باب الغرفة، فأرى أمي تقف مبتسمة، أجلس في محاولة لاستجماع ما الوقت الآن؟ وما الزمن الذي أعيشه حاليًا فقد نمتُ نومًا عميقًا، أنظر إلى الساعة لا أستطيع رؤية شيء، وما زالت غشاوة النوم تغطي عيني! أشعر بشيء صلب ينخر في جانبي، أبسط يدي تحت الغطاء وأستخرج اللاب توب، فأتذكّر! لقد انتهيتُ اليوم باكراً من كتابة رواية «يوم من غلبي»، ونمت من شدة الإرهاق، فقد ظللت أكتب فيها أكثر من 10 ساعات متواصلة، كنت فقط أقوم للصلاة، وأعود مرّة أخرى، لأنّه قد حان وقت تقديمها لدار النشر، وقبل أن تهم أمي بالدخول، أطلب منها أن تطفئ النور، على أن أضيء الأباجورة بجواري، فأنا لا أستطيع الآن تحمّل ضوء مصباح الحجره القوي.

تسألني أمي مستفسرة:

- إيه كلّ النوم ده يا إيناس؟

أدفعُ إليها «باللاب توب» وأقول: - انفضّلي يا ستّ الكل، آخر جزء كُتِبته في الرواية.. اقرئيه، وقوليلي رأيك، أنا الرواية دي هلكتني. تأخذ اللاب وتغادر لتقرأ آخر ما سطرته، فأُمّي هي أوّل النقاد وأهمّهم على الإطلاق، أمسك هاتفي النقال وأجري اتّصالات مع دار النشر لتتفق على الغلاف وعلى تفاصيل إخراج بصورة جذّابة مميزة، فقد كان اتّفاقنا أن يكون الغلاف كاريكاتيريّ الشخصيات، وبألوان زاهية ملفّته لنظر القارئ، وأن تقوم الدار بعمل حملاتٍ دعائية له قبل المعرض لنضمن توزيعه بشكلٍ جيد، وبعد أن أغلقت الهاتف، تدخل أمّي وهي تحمل في يديها صينية عليها أكوبٌ من الشاي وشطائر لانشون وجبنة رومي، فشعرت فجأةً بالجوع، فالتقطت شطيرة لانشون وقربتها من فمي وأنا أقول لها:

- ماما باركيلى، اتّفقت مع دار النشر خلاص، أخيراً هخلص من صداع «يوم من غلبي».

أمضغ قطعة طعام، وأرتشف بعدها رشفة شاي ثم أقول: ياه ستّين بكتب فيها يا ماما! دي تعبتني قوي، تعرفي شخصية لبنى دي واللي معاها حقيقيين، رغم إنهم مش أشخاص في حياتنا، بس فعلاً أنا شفت النماذج دي مع صحباتي، وطبعاً مش هانسي في منهم في عيلتنا، يا ربّ تطلع كويّسة وتعجب الناس وتفيدهم..

تهزّ رأسها موافقة وتقول لي:

- فعلاً يا إيناس، دي أخذت منك وقت طويل.

ثمّ تقرب منّي وتمنحني عنافاً رائعاً، وتقول: هاه.. ناوية عملي
إيه بعد ما خلّصت الرواية دي؟ أفلتُ نفسي من بين يديها برقة
وأقول:

- مش عارفة يا ماما، أنا أصلاً مش متخيّلة إزاي عرفت أعيش
الوقت اللي فات ده من غير ما أتقمّص شخصية لبني عامر! يااه دي
شخصية مركّبة جدّاً، تعرفي أنا حاولت على قدّ ما أقدر إني أكون مُنصفة
وأنا بكتب، بسّ طبعا كنت ميّالة لها على حساب باقي الشخصيات.

ترتشفُ أمّي آخرَ رشفة شاي، ثمّ تضع الكوب وتقول:

- الحقيقة يا إيناس، عندي بعض التّحفظات حاساها طويلة، وفيها
سرد كثير ومحتاجة منك شوية مراجعة! شيلي شوية وخليها بسيطة.
أقول لها:

- لا يا أمّي مقدرش أشيل من الحوارات، بسّ أوعدك إني
هاشيل من السرد الزيادات اللي مش هتفرق في الرواية، خصوصاً
إنّ الطباعة بقت نار بعد الجنيه ما عوموه.

تهزّ رأسها في رضا، وتقول:

- خلاص اتفقنا يا لبني مستنّية تطبيقك للرواية، وبلاش سيرة

المرحوم الجنيه، ربنا يرحمنا برحمته.

أضحكُ وأكاد أسقطُ أرضًا، وأقول:

- ماما أنا إيناس مش لبني، من أولها كده هتتلخبطي بيني وبينها، معنى كده الناس هتتلخبط بيننا، يا ربِّ محدش يفتكرها حياتي الشخصية، أنا كلُّ الحكاية عندي 25 سنة، ومعنديش مشكلة اتجوز النهارده قبل بكره، بس يبجي فارس أحلامي.

تلكرني أمِّي في كتفي بلطف، وتقول:

- إنتِ عايزه تتجوزي انتِ! أنا شايفة «لبنى» قدامي، طيب هاه هتردي على العريس اللي عايز يشوفك إمتي؟ الناس بيلحوا علينا! علشان خاطري يا نوسة، شوفيه ولو معجبكيش خلاص، نفسي أشوفك عروسة، يا ربِّ يا إيناس يا بنتي أفرح بيك واطمن عليك، دانتي من كتر ما اندجت مع شخصية لبني حاسة إنك هتعملي زيها في حياتك! ومش هتتجوزي، وهتفضلي ترفضني في العرسان كده! أقبلها من وجنتيها، ثم أبتعد مسرعة- وهي تلاحقني بدعواتها الجميلة- لأردد على الهاتف، فدار النشر لن تتركني هذه الليلة حتى تنتهي من كافة التفاصيل.

تمت

2017/12/14

عبير جمال الدين عن يوم من غلبي

(الطبعة الأولى)

هذا هو الكتاب الورقي الخامس بعد حكاوي الستّ ماما (لحظة ضعف) وأنا وعيلتي والموريستان، ومرايا الروح وبعضّ منّا. تمّ الانتهاء من كتابتها في منتصف عام 2016، بدأت بفكرة مختلفة عن فكرتها التي خرجت بها، ومع دار نشر غير الحالية، تمت مراجعتها في أول صورها مع الأستاذ محمد أبشر، ثمّ مع الأستاذ أحمد عبد السلام، وقد استفدت جيّدًا من تدقيقهم للرواية في صورتها الأولى وقبل أن يتم إعادة نسجها من جديد فتحول تدقيقها إلى نصائح علقت في ذهني لأن التدقيق ضاع مع النسيج الجديد. لقد كان لدي عدة مقالات ساخرة وأردتُ أن أضعهم بصورة طبيعية في كتاب، ثمّ تطورت الفكرة واختلف الهدف من وراء كتابتها وأصبحت في شكلها الجديد بعد عدة محاولات، مضية ومرهقة خرجت في صورتها الحالية «يوم من غلبي» وقد شهد مولدها العديد من المقربين، لكن أنا وأسء عبده،

وإناس الوزن كنا كأننا في ورشة، عندما أنتهي من جزء أرسله لهما
وأنتظر الرد والتشجيع بالطبع ..

ثم بدأت في جوهر وقلب الرواية وكانت هذه هي أصعب فترة،
أرهقتُ معي صديقتي الطيبة إيمان شوشة بأسئلة طبية واستشارات
كثيرة، وبفضل الله كانت خير عون سواء من الناحية الطبية أو من
النقد، لإخراجها في صورة مميزة.

وقد كان من المتوقع أن تتواجد في معرض 2017، ولم يقدر
لها نصيب في هذا المعرض، فوضعتها جانباً، وشعرت أنها ستكون
رواية «غلسة» لأنها لا تريد أن تكتمل!

ثم قمت بإعادة صياغتها أكثر من مرة بناء على نصائح المقربين،
أصعبها على الإطلاق عندما أصرت صديقتي إيمان شوشة وابنة
أختي رضوى الشاذلي على إعادة الصياغة بتغير الهيئة الأولى لها!
فكل محاولات إعادة الصياغة كانت نقل فقرات، إعادة تركيب
جمل، كانت عملية بسيطة وسهلة لم تأخذ مني وقتاً كبيراً، أما ما
طلب مني فكان أكثر من تصوري، نسيج جديد! يا الله لن أستطيع،
لن أتمكن، لا لن أكملها، وبالدعم وبالحث وبالتشجيع أخرجتها
في ثوبها جديد! وبعدها انتهيت من الصياغة الجديدة، اكتشفت أنها
الأفضل بفضل الله ثم بإصرار حبيباتي.

هي رواية مرهقة مثل الشابة اليافعة، تُناورك وتُحاورك
وتُشاكسك لأخذ أفضل ما لديك ..

ولكنها للأسف مشاغبة جدًّا، فبعد أن قدمتها لدار النشر،
قررت أن أجعلها رواية صغيرة فحذفت الكثير من الفقرات.

وقد قام الأستاذ عبد الواحد الحسيني بمراجعتها، وقبل أن
أرسلها لدار النشر مرّة أخرى قمت بإجراء تعديلات، تسببت في
بعض الأخطاء اللغوية والإملائية، فقامت بعمل تحرير لها، لا أدري
رقمه، ثمّ مرّة أخرى أنا وإيناس الوزان من خلال الماسنجر هي في
أمريكا وأنا في القاهرة.. ثمّ فاطمة سعيد دقت الفصحى فقط.. ثمّ
أخذتها المدققة جهاد أبو زينة ودقتها للمرة الأخيرة

أبطال «يوم من غلبي» غير حقيقيين، وإن كانت بعض المواقف
حقيقية وعاشت أبطالها!

أشكر كلّ من أرهقته معي أثناء كتابتها، وكلّ شخص سانديني
لخروجها إلى النور.

عبير جمال الدين

صفحة الكاتبة الشخصية على الفيسبوك (عبير جمال الدين)

<https://www.facebook.com/ELSETMAMA>

صفحة الكاتبة الأدبية على الفيسبوك (حكاوي الست ماما)

<https://www.facebook.com/Hakawyabeer/?pnref=llc>

لِلتِّقَاةِ وَالْعُلُومِ